

呂留良等選編

宋

詩

鈔

(三)



書叢本基學國

鈔 詩 宋

(三)

選牧自吳 振之吳 良留呂  
校 龔 宣 李



行發館書印務商



78  
24  
屏山集鈔

劉子翬字彥沖。以父幹任授承務郎。辟幕屬。幹死靖康之難。子翬痛憤哀毀。服除。通判興化軍事。以羸疾丐祠。歸隱屏山。學者稱屏山先生。而自號病翁。與籍溪胡原仲。白水劉致中爲道義交。所學深遠。朱子受遺命往遊其門。子翬告以易不遠復三言。俾佩之終身。一日感微疾。卽謁廟。訣別家人。與朱子言入道次第而歿。詩與曾茶山。韓子蒼。呂居仁相往還。故所詣殊高。五言幽淡卓鍊。及陶謝之勝。而無康樂繁縟細澁之態。則以其用經學不同。所得之理異也。

涼月

涼月未出山。浮雲半空白。徘徊步軒窗。宛若待佳客。經林漏飛輝。映渚生華澤。及茲秋景清。吾廬更幽寂。殊觀發祕藏。妙聽生寥閔。營營息初機。炯炯懷新得。豈無平生心。所樂已非昔。天旋河漢動。夜久鄰機息。淒淒感庭蘭。歲莫霜霰集。呼兒溫濁醪。獨酌醉永夕。

渡淮

鳴榔渡長淮。霏煙散清晨。皎皎初日光。照耀草木新。橫林渡餘碧。疊嶂開嶙峋。移橈失向背。煙波浩無垠。兒童相擢歌。余心亦欣欣。輕帆互相踰。畫鷁映流津。徘徊望洲渚。悠然獨懷人。樵漁有棲遯。寂寞誰問鄰。

暮風翻洪濤。魚蝦亦有神。四顧天地黑。孤舟恐漂淪。

阻風

晚歲多悲風。江湖浪崢嶸。扁舟渺無依。日暮猶孤征。重岡擁滯霧。迴隰飄浮雲。繫舟古岸邊。纜斷舟復橫。天寒鴻雁稀。滯留知旅情。頽崖震林谷。客子心夜驚。披衣待清曉。缺月西南明。遠遊多所懷。益遣歸思盈。

建康六感

吳

龍翔大耳兒。虎視捉刀人。風雲競追逐。逸軌誰能遵。大皇負英材。沈潛歛求伸。一呼定南國。再戰威強鄰。坑魏旣搖岳。攘劉亦披鱗。組練繞平隰。艨艟蔽通津。偉哉人物盛。成功豈無因。代祀已飄忽。風流久彌新。停橈眺迥陸。裂蔓登層闔。臥龍昔來遊。萬古懷清塵。

晉

日昃無全照。南遷事倉忙。龍謠方協瑞。星禍已告亡。凌遲百年運。凜凜危莫將。向來問鼎人。項背常相望。環宮白羽列。面闕鳴弦張。膺圖未躋泰。卜世豈在長。獨憐短轅公。推刃殺忠良。百身嗟莫贖。一慟鬢成蒼。時移事亦更。爲宋復爲梁。惟有采石潮。年年到前岡。

宋

寄奴真偉人。落拓龍潛地。據筵呼五木。已有吞世氣。世期值陽九。天綱日淪替。偏邦或跨州。卑號猶稱帝。匪乘艱棘運。英姿疇能濟。南戡奠番禺。西狩澄涇渭。功雖與世隆。道亦因人廢。緬懷揖讓風。黃屋身如寄。頽波日奔迫。夜壑遷神器。巢由獨賢哉。高蹤邈難繼。

齊

堯宮不剪茨。禹室無崇壤。巍巍天步隆。萬代猶可仰。荒哉二三君。經營務華敞。落柿滿清江。飛斤殷遙響。疏淵引瀾澳。築圃遷林莽。筋力斃民軀。貲財傾國帑。雄心獨未倦。矯首生遐想。時徂陵谷變。無事猶悲曩。殷憂易興懷。逸樂難終享。過客問青樓。荒畦棘一作花長。

梁

開圖屬英睿。失國由昏愎。斯人異前修。撥亂旋致亂。輕刑下益肆。厚爵臣彌叛。聰明馳萬機。精苦徒宵旰。鳳冕敬方袍。鸞旗游彼岸。悠然弃從懷。臨機復難斷。那知千佛力。不紓一寇難。酒色覆商周。神仙蕩秦漢。趨亡固多軌。荒迷卒同貫。微聖常鮮終。撫冊三慨嘆。

陳

悲風嘯荒垣。歌斷庭花曲。璧月夜沈輝。瓊樹春銷馥。郊圻遊從盛。想像猶經目。麗景明新妝。清波映鮮服。承恩屬令姿。被選皆華族。朝從結綺遊。暮向臨春宿。意高時忽謝。步遠塗方促。榮華事不長。哀樂情難足。

悠悠六朝事。轉盼風驚燭。永懷興亡端。斯文慚麗縛。

夜飲

良宵樂未央。促席團欒坐。佳人意慙懃。唱歌屬余和。幽期貴闊略。醉語多叢脞。沉沉玉卮酒。量淺難負荷。豈不懷極懽。恐重賓友過。褰帷望明河。山月銜半破。回軒互追奔。傘拂簷瓦墮。

遊朱劬家園

晨暉麗丹楹。翼翼侔帝居。向來堂上人。零落煙海隅。聯翩際時會。振迹皆刑餘。閨帷尙帝主。阜隸乘軒車。流威被東南。生殺在指呼。樓船載花石。里巷無袴襦。至今江左地。風雲亦嗟吁。叨榮已過量。受禍如償逋。荒涼當門路。尙想冠蓋趨。客舸維岸柳。鄰人罾池魚。徘徊極幽觀。曲折迷歸途。夜月扃綺戶。春風散羅裾。繁華能幾時。喪亂實感予。曹鄴予何譏。此曹真人奴。

早行

村鷄已報晨。曉月漸無色。行人馬上去。殘燈照空驛。

老農

山前有老農。給我薪水役。得錢徑沽酒。醉臥山日夕。忘形與之語。妙理時見益。志士多隱淪。欲學慚未識。種菜



榜舍植柔蔬。攜鉏理荒穢。桔槔勤俯仰。一雨功百倍。朝來綠映土。新葉搖肺肺。牛羊勿踐畦。肉食屠爾輩。

晨興

晨興訪蕭寺。爽氣清如沐。坐看雨離山。飛陰斷平陸。歸途阻夕漲。竚立驚幽獨。曳杖聽殘鐘。卻寄僧坊宿。

下灘作

青山鎖連環。白澗走鳴瀨。迷津毫髮間。舟與危石會。回淵聚浮沫。斷壁餘澎湃。玩奇心若驚。覽鏡自不逮。悠然一回首。孤驛已茫昧。停橈念經歷。履地猶旋憤。悲風嘯枯林。暮野雲相蓋。隔船聞和歌。沽酒慰疲怠。

棄竹夫人

愛憎情易遷。感物思鬱紆。念昔未棄捐。嘗侍君子居。煩襟一披豁。雅抱何清虛。蹉跎怨時暮。涼德意見疎。飛霜皓中庭。枵然委牆隅。的皪珠幃深。熒煌錦茵鋪。豈不懷舊恩。君心已非初。當年執扇謠。抱恨同區區。

秋懷

哲人嘆逝川。志士悲廩秋。流光不暫停。忽忽歲欲周。涼飈襲迥野。飛霜皓盈疇。華林失鮮輝。奔谿殺湍流。萬化儻日徂。吾生難獨留。而我苦不樂。彷徨復何求。世途多軌轍。今行非昔謀。徒遵耿耿意。齟齬固莫投。時乎不再來。豈余敢懷尤。王道炳日星。歷聘疲軻丘。歸歟既改旆。浩然亦回輈。寂寞寧子歌。棲遲長卿遊。客嘲徒自解。天問終不酬。長揖未免烹。說難竟遭囚。行藏或大謬。聖賢共悠悠。含思疚恆積。念往川途修。

煌煌青春姿。蹉跎恐茲由。諒非宏達觀。那能齊百憂。

四不忍

草邊飛騎如煙滅。拉獸摧斑食其血。此時疾首念鑾輿。玉體能勝饑渴無。危城屑麴驚雲擾。簾簾無光天  
座杳。奮戈儻未雪深讐。我食雖甘何忍飽。

黃河鑿鑿冰成路。人語寒空氣成霧。此時泣血念鑾輿。玉體能勝凜冽無。蒼皇天步蒙塵去。晝夜飄零傷  
歲暮。飛書儻未伐姦謀。我服雖華何忍御。

平沙月轉旌旗影。擐甲爲衾戈作枕。此時飲恨念鑾輿。玉體能勝暴露無。問安使者空相繼。清蹕不回宮  
殿閉。請纓儻未縛酋渠。我榻雖安何忍寐。

漁陽疊鼓風沙戰。潑水淋漓舞胡旋。此時太息念鑾輿。玉體能勝寂寞無。六宮遭亂多奔迸。不復梨園歌  
舞盛。著鞭儻未蹂龍庭。我瑟雖調何忍聽。

望京謠

雙鑾北狩淹歸轂。寂寞梁園春草綠。猶傳故老守孤城。官軍不到黃河曲。連雲樓櫓已灰燼。更倚窗扉防  
箭鏃。招兵太半出羣盜。繡褕蒙衣屢翻覆。前宗後社力誅鉏。白刃如霜挂人肉。州橋燈火夜無光。夾道狐  
狸晝相逐。往時汴泗絕行舟。市糶十千塵滿斛。衣冠避胡多在南。胡馬却食江南粟。謀臣武士力俱困。海

角飄搖轉黃屋。盤庚五遷方擇利。昆陽一戰何當卜。寧聞犬豕亂中華。漢祚承天終必復。夕烽明處望千門。孤臣祇欲吞聲哭。

臨池歌

劉致思倦遊。復臥故廬。有意學書。來求石刻。因慨然念昔經行秦洛趙魏間。未嘗不回驂駐軫。搜訪古迹。故宮遺址。豐碑斷碣。歷歷相望也。吹埃剔蘚。考年代之所志。訂古驗今。識興衰之所自。至乃壞壠荒榛。微陽霧雨。雖暴露霑沐。僮僕色難。而余躊躇不忍去也。奇蹤偉筆。多致墨本。甚者缺裂模糊。不可辨了。亦皆摸脫以歸。登登之聲。殷乎山谷。歸所獲。車載牛負。不可勝計。喪亂以來。汎掃焚。何止七厄哉。今披篋視之。十得一二。有副本者。以與致思。致思明爽。嘗留心字學。運筆流快。風動草偃。固足以軒輊流輩。然未能窺古人藩域者。功虧一簣耳。夫洞石仆木。非蹶張挽強者所能。用志不分。乃凝於神。梓慶削鐻。狗瘦承蜩。皆此道也。致思充是而學焉。余不知其所至矣。因作臨池歌。以堅其志。切切惇惇。亦朋友之義也。

君不見鍾繇學書夜不眠。以指畫字衣皆穿。當時尺牘來鄴下。錦標玉軸爭流傳。又不見魯公得法屋漏雨。意象咄咄凌千古。斷碑零落翠苔封。直氣英風猶可覩。元常獨步黃初際。清臣後出今無繼。風神迥處一作本天資。巧力亦自精勤至。羨君好尚何高奇。寒窗弄筆手生胝。向來失計墮塵網。銳氣直欲摩雲飛。

男兒舌在心何作。卻擬臨池尋舊學。要須筆外見鍾顏。會自蛟龍生掌握。銀鈎石刻余何愛。勸以短歌君勿怠。他時八體妙有餘。此歌儻可君紳書。

和李巽伯春懷

山寒古寺清。斷續春朝雨。遙憐遠客情。寂寞誰晤語。平生氣軒昂。失意今易與。有酒卽佳晨。無兵皆樂土。微吟對節物。林靜幽花吐。悠悠念鄉邑。耿耿悲豺虎。知有濟時才。從橫在談塵。功名恐未遲。老翮期更舉。

明皇九馬圖

書生兀兀園不窺。見馬豈辨騮與騅。開圖九駿立突兀。摸擦知是真龍兒。奔雷蹴踏原野動。曳練慘錯風沙隨。華纓金絡豈不好。矯首奮迅那容羈。吾聞取驥如擇士。競愛安帖驚權奇。士懷倜儻衆論斥。馬有顛頓羣鴛欺。六閑豢養固恩厚。橫氣摧折常嗚悲。丹青儻不逢妙手。萬世豈識真龍姿。因思中原政格鬪。鐵騎倏忽銀山移。著鞭安得致此物。掩畫四顧徒歔歔。

怨女曲

空原悲風吹苜蓿。胡兒飲馬桑乾曲。誰家女子在氊城。嗚嗚夜看星河哭。黃金爲閨玉爲宇。平生不出人稀覩。父憐母惜呼小名。擇對華門未輕許。干戈漂蕩身如寄。綠鬢朱顏反爲累。朝從獵騎草邊遊。暮逐戎王沙上醉。西鄰小姑亦被虜。貧賤思家心更苦。隨身只有嫁時衣。生死同爲泉下土。出門有路歸無期。不

歸長愁歸亦悲。女身軟弱難自主。壯士從姑不如女。

巡寨偶書

窮寇轉趨海。吾邦備宜先。連年戍役頻。徵兵及漁佃。扶戈或稚齒。嬰冑仍華顛。未知戎伍肅。朱旗亂長阡。杯端晚燧發。石際飛梯懸。崎嶇樵牧地。萬竈生浮煙。我行視營柵。兒戲端可憐。倚茲形勢險。寇至常遷延。羣兇昔吾軍。赤指抨鳴弦。防胡屢瓦解。合寇俄星連。猶多燕趙兒。意氣非當年。駢車載珍寶。結騎馳嬋娟。時危天稔亂。事豈汝能專。怒風飛驚濤。河梁失歸船。四顧天地黑。攬衣思茫然。

負暄

宵寒臥增裯。晝寒起增衣。何如負暄樂。高堂日暉暉。引光扉盡闢。追影榻屢移。妙趣久乃酣。瞑目潛自知。初如擁紅爐。凍粟消頑肌。漸如飲醇醪。暖力中融怡。欠伸百骸舒。爬搔隨意爲。稍回驕佚氣。頓改酸寒姿。薰然沐慈仁。天恩豈余私。願披橫空雲。四海同熙熙。矯首望扶桑。傾心效園葵。

木犀古風

化工吝幽香。斑斑被花木。氤氳寒巖桂。高韻蓋羣馥。無人盡日芳。守志何幽獨。士介耻求知。女貞慙自鬻。淒涼楚山秋。樛枝吐金粟。淺水映輕明。微颺發含蓄。樓端靜忽聞。馬上遙相逐。踟躕爲延佇。但見林巒綠。餅罌誰折贈。清芬闕廬屋。久處不自知。乍至彌鬱郁。客悲芳歲暮。夢遶寒溪曲。長吟小山詞。古意恐難復。

食蠨房

卍

蠨房生海壖。堅頑宛如石。其中儲可欲。雖固必生隙。嵌巖各包藏。硯礪相附積。中逢霹靂手。妙若啓扇鏹。鑽灼諒難堪。曷不吐餘瀝。南庖富腥盤。豈惟此稱特。吞航大絕倫。梯巒萬夫食。針鱗九牛毛。小嚼逾千百。光螺暈紫斑。蟹膏湛金色。水母脆鳴牙。章舉懸疣密。烏黏力排冪。貼石不可索。妾魚戲浮波。媚鮪雌雄匹。蟹彘輒橫鶩。竈縮常畏出。車螯不服箱。馬鮫非駿迹。江瑤貴一柱。嗟豈棟梁質。骨柔競愛鱗。多鯁鯽乃斥。蚶虹鮭赤文。肉黑魚之賊。鱖鱠鯉鰻。鱸鮓鮒鯽。鱠庸而劍小。瑣穴難盡述。包涵知海量。長養荷天德。貪生族類繁。失地波濤窄。網罟人創禍。甘鮮已爲厄。紛然均可口。流品當剔白。微物倘見知。捐軀不足惜。

諭俗十二首

故園喪亂餘。歸來復何有。鄰人雖喜在。憂悴成老叟。爲言寇來時。白刃穿田畝。驚忙不知路。夜踏人屍走。屋廬成飛煙。囊橐無暇取。匹夫快恩讎。王法誰爲守。艱難歷冬夏。遷徙徧林藪。深虞邏寇知。兒啼扼其口。樹皮爲衣裳。樹根作糧糗。還家生理盡。黑瘦面如狗。語翁翁勿悲。禍福較長久。東家紅巾郎。長大好身首。荒荒死戰場。頭白骨先朽。

西村人漸歸。撐拄燒殘屋。東村但蒿萊。死者無人哭。昔茲號富穰。被禍尤殘酷。二三里中豪。喪亂身爲僂。遺骸悵莫掩。飢鳶啄其腹。豈無平生時。意氣凌鄉曲。錐刀剝微利。舞智欺惇獨。錦囊收地券。奕葉相傳續。

只今鄰叟耕。歲歲輸官穀。爾曹何顛愚。人生固多欲。

何州無戰爭。閩粵禍未銷。或言殺子因。厲氣由此招。蠻陬地瘠狹。世業患不饒。生女奩分貲。生男野分苗。往往衣冠門。繼嗣無雙髻。前知飲啄定。妄以人力僥。三綱旣自絕。餘澤豈更遙。王化久淘漉。刑章亦昭昭。那無舐犢慈。恩勤愧鴟鴞。冤報且勿論。茲義古所標。

愚氓擾潢池。艱難亦常態。簪紳有包藏。事異吁可怪。豺聲久伺亂。鯨戮終何悔。游言張兇焰。巧謀移機會。初如卵殼微。趾踐悉糜碎。養成羽翮雄。飛掣鞬繩外。翦鉏淹歲月。螫毒彌疆界。向來詰端由。罪白不容蓋。南冠囚載路。東市誅其最。隆寬俗與新。僥倖汝勿再。

野人厭羹藜。家有庖丁刀。徒誇批導手。肯念耕稼勞。隱然肉山雄。畏彼尺筮操。春泥臥寒野。夜月犁東皋。辛勤力已盡。穀蕪禍豈逃。誰無惻隱心。鮮能勝貪饕。蓋帷猶示恩。況異犬馬曹。

扇馬嚴內仗。貂璫侍宸閣。哀哉里閭間。刁閹逮雞豚。放麇識忠藎。母卵著格言。矧利肥甘軀。絕其孳息源。難銷愛欲心。物物天性存。逆情氣必戾。順化生乃蕃。誰開口腹謀。無乃傷仁恩。

粵人多悍驕。風聲亦惟舊。兒童僅勝衣。挾筮相格鬪。藝精氣益橫。質化心忘陋。家饒喜稱俠。世亂甘爲寇。豈伊天性然。習俗所成就。吾聞互鄉童。翱翔聖賢囿。隱豹弄爛斑。攻駒發馳驟。佩觿爾何知。義方得無謬。村南井欲乾。曉汲盈瓢濁。飲濁不足言。奈此田畝涸。啞啞龍骨響。煥爛陽烏虐。良農無他營。辛苦事東作。

春苗何葱芊。秋刈何稀薄。我雖食有餘。念彼心不樂。乞靈走羣祀。晚電明霍霍。屯膏竟未施。天意自難度。震雷霹枯松。頑龍失其據。浮雲三日雨。盈畝復地注。商羊舞未休。旱魃消何遽。稍寬人心切。仰荷天恩布。稻畦裏連顛。按穗給朝飮。菜畦擢新萌。蕩滌死羣蠹。歲儉民怨咨。時豐家悅豫。青青寒莠色。亦復貪雨露。茲鄉山水佳。昔乃爲盜窟。吾廬已煨燼。荒草牆兀兀。牆東大梨樹。惟此爲舊物。火燒枝葉盡。老本更奇崛。衆鳥罷高棲。空庭失清樾。鄰兒利薪爨。往往肆戕伐。豈知昂霄勢。長養自毫末。寒堤孤碓在。廢圃鳴泉出。衝茅且經營。霜霰莫倉猝。

未須葺吾廬。且復修吾倉。求安當卜居。求飽當聚糧。營生力有限。先此計頗長。去年稻盈畦。避寇不得將。新芽雨後白。臥穗霜中黃。鰥惻有饑色。寇釁餘稻梁。解衣易升斗。糠粃隨風揚。休嗟昔艱難。喜茲歲豐穰。鄰翁爲人耕。貯粟不盈箱。溪頭廩與困。纍纍已相望。

縣牆挂德音。盡弛今年租。旄倪發懽謠。助達和氣舒。皇恩施甚厚。疲瘵望少蘇。吁嗟吏舞文。詔紙墨未渝。借貸盡白著。勾稽窮宿逋。掎克儻歸公。民貧猶樂輸。量權徵倍耗。貪緣竊其餘。寧逢盜剽攘。厭聞吏追呼。盜姦久必戢。吏姦無由鉏。雷霆不言威。肉食忍自誣。故態勿狃習。窮閭勿浸漁。勿謂天聽高。勿謂黔首愚。

清江行

漁翁一棹老清波。稚子學語能漁歌。日暮沙頭寒蕪竹。雨餘船角亂堆蓑。鸞殘小鮮仍自鱸。湖海茫茫醉



鄉內夜闌酒渴漱寒流。月照蘆花上篷背。

聽詹溫之彈琴歌

鳴琴藝精非小道。可惜溫之今已老。玲琅一鼓萬象春。鐵面霜髯不枯槁。自言寡知音。求我爲作歌。號宮韻角可聽不可狀。錦腸繡舌空吟哦。吾意其一氣之濁清。兩曜之晦明。山河之結融。雷霆風雨之震驚。包羅具七絃。開闔造化由人心。又疑夫堯禹之躬行。丘軻之立言。瞿聃之同歸。百家諸子之紛然。更歷千萬古。此意不滅絲桐間。滌除浮慮清蕩靡。愁襟開。琴之氣象廣莫有如此。欲媚俗耳知難哉。寒缸燒涸夜向闌。罷琴歸矣我欲眠。夢跨冰輪出瑤海。一笑碌碌瀛洲僊。

雲際會劉到致中

紅綃千樹桃。雪縠萬株李。柘葉青青如鼠耳。橫山渡口浪成堆。認得劉郎船子來。物情時事不須說。且喜新歲同銜杯。少年鼻哂輕流俗。斂銳收豪今碌碌。敝裘常帶客塵緇。雙鬢不如春草綠。東風吹愁入我心。使成嘯嘆成悲吟。問君底事久留此。曷不聯鑣歸故林。

懷舊歌

黃茅生煙暗村落。浩歌無復當時樂。鄰家酒熟逆鼻香。一醉乾坤墮冥漠。尋芳屢過垂玉軒。又魚夜上浮清閣。鬪牌擊鼓多伎倆。我獨旁觀惟大噓。驚烽入座權難保。幸得身存他勿道。吾宗潛武臥空棺。衰臣兄

弟埋荒草。當時醉舞向花下。綠鬢朱顏各鮮好。隙駒風燭尙須臾。數子凋零不待老。死生細事從渠天。莫學兒女相哀憐。一窗容膝可終隱。寇盜擾擾今連年。王師誅鉏有漏網。死灰焰焰猶思然。憂煎過計祇自惱。且但努力耕吾田。

夜過王勉仲家宿酒數行爲作此歌

遙林帶雪迷村曠。伶俜一馬行無伴。故人家住丁坂頭。停驂邂逅成清款。犯寒知我猶空腹。地爐然薪架紅玉。花瓷湯酒欲生香。竹外庖廚聞剝肉。夫君不有中饋賢。咄咄辦此何神速。酒酣意氣悲荆棘。尙憶朱蔓舊時宅。豺狼得志竟何成。至今人骨如霜白。亂離少有闔門在。漂蕩俄驚五年隔。數畝荒田已失耕。一間茅屋仍留客。客情主意懽難盡。短臘窮冬春欲近。明朝分手更愁人。且覆清觴莫留贖。

夏日吟

君不見長安公侯家。六月不知暑。扇車起長風。水檻瀝寒雨。重欄邃屋晝生陰。反易天時生談吐。又不見武陵富豪兒。炎天多快意。雪穀曳輕明。珍饈嚼甘脆。蛾眉皓齒發清歌。灑酒筠枝集蠅蚋。何如野客歌滄浪。萬事不理心清涼。流金礫石未爲苦。勢利如火焚中腸。

海棠洲

煌煌海棠洲。錦樹臨清灣。常恨灣頭風。吹花走潺湲。潺湲去不息。花亦無由還。

懷新亭

茅簷入竹低。曠野時寓目。寂寂農家春。新秧滿田綠。何時稻登場。秋山響蓬樸。

宴坐巖

青青槐樹林。下蔭蒼蘚石。幽人宴坐時。懷抱忘其適。不見暮樵歸。寒山雨中碧。

南溪

聊爲溪上遊。一步一回顧。悠悠出山水。浩浩無停注。惟有舊溪聲。萬古流不去。

兼道攜古墨來。墨面龍紋。墨背識云。保太九年。奉勅造。長春殿供御。龍印香煤。旁又識云。墨務官臣庭邽。監官臣夷中。臣子和。臣卞等進。蓋江南李氏物也。感之爲作此詩。

長春殿古生荆蒼。猶有前朝遺物在。錦囊珍重出玄圭。雙虬刻作蜿蜒態。枯皮剝製弄幾刳。斷玦精堅磨不殺。吾聞李氏據江左。文采風流高一代。當時好玩不獨此。器用往往窮奢汰。徵工選技填御府。不惜千金爲賞賚。治兵唐推英衛精。治民漢許龔黃最。惜哉取士不知術。妙手獨得庭邽輩。真主驅馳八極中。荒王逸樂孤城內。汗青得失更誰論。尤物競爲人寶愛。嗟余視此真糞土。事有至微猶足戒。投文欲往吊江流。幽魂未泯應慚悔。

劉兼道獵

劉侯好獵親馳逐。指呼雙犬如奴僕。朝衝唐石亂雲來。暮聽潭溪流水宿。何如著鞭走大梁。我亦與子同  
翱翔。今年獵叛醢彭越。明年獵胡犯德光。

觀二劉題壁

溫其題詩新歷寺。落筆風雨驚長林。眼高一世常欲罵。想見掀髯坐巖陰。致中題詩新興寺。壞壁歲久莓  
苔侵。山僧好事亦可喜。解誦鳥啼春意深。我來經覽渾如昨。玉友金昆念離索。投林倦翼不同棲。況復分  
飛在廖廓。故山終勝他山好。新交不如舊交樂。何況把酒問鷗盟。臥聽松風同一壑。

攜筇

晨起偶無事。攜筇出潭川。翩翩雙鳧飛。宛若導我前。林靜滴殘雨。村深澹寒煙。當春足膏澤。俯夏餘清妍。  
野溜綠交貫。山花紅接連。雄觀發新奇。勝地窮攀緣。據石弄驚急。班荆蔭連卷。幽懷脫塵拘。如超混茫先。  
向令作興來。未必勝偶然。榮觀事多乖。內取樂乃全。他時誰繼遊。此意遙相傳。

橫秋閣

秋山萬尺青。影落杯酒中。登臨豈不佳。寒色見遠空。未忘天下憂。胡塵起西風。

百花臺

森沈徑易迷。櫓筇爲徘徊。何處春光多。時登百花臺。主人澹無情。林花爲誰開。

清湖驟雨

快雨不相期。平湖忽蕭颯。坐久日明簷。繁聲靜中滅。

寄彭子靜

凍岫立高白。曉寒生太虛。閉門翻巾牋。偶見良友書。書中有長句。別懷陳鬱紆。吐鳳詞既絕。續貂理難如。起望新鄉雲。一讀三卷舒。繁思攬中局。賴此豁欲無。鵠鷄有潛化。蓬麻豈資扶。吾人交義深。不恨相見疎。但恐德不脩。心期愧非初。

夜行潭溪上念仲原致中喬年茂元伯達皆有入山期以詩趣之

長夏不見雨。裨暑故相病。及茲顛氣回。一夕飛灑併。攬衣步新涼。宇宙涵清潤。月離南山高。水循雙澗靜。流觀外既洽。至樂中潛應。緬懷平生友。契闊時光運。石峯許尋盟。有約殊未定。事紛莽如塵。欲掃那得盡。年衰覺世浮。慮澹知心勝。良遊莫蹉跎。小暇卽乘興。

讀曾吉甫橫碧齋詩

攜鉏引荒泉。偶步松岡北。冷然毛骨清。楚尾見秋色。稻氣馥初涼。檉陰淡微日。緬懷小齋居。樵檻增岑寂。曠度滅知聞。微吟數峯碧。若人端好修。珍駕動無迹。深窮伊水源。峻陟衡山極。終焉憩孔林。所樂惟自得。延和數酌醪。侑靜一編易。向來辱傾輸。洞見胸中白。思親道匪侔。既遠情不懌。矧余質冥頑。固未易刻畫。

尊生有遐心。克己無全力。以茲畏所知。負負常夕惕。餘波儻時漸。玉汝天其或。

同汪正夫行夫望鄱江

夜夢鄱江清。曉踏鄱陽縣。雲濤著眼新。還疑夢中見。寒聲彭蠡合。凍色廬峯現。時方冬氣深。水縮川原變。連沙突堆阜。派港分組練。蕭蕭逢髣風。瑟瑟葭叢霰。奇觀信幽絕。領略殊未徧。何當煙艇高。載我行鏡面。二難今勝流。賓客移清燕。飲酣生泰和。語妙融交戰。衰遲百不堪。一快天與便。回筇晚霽中。路壓滄浪轉。波光似流人。隨裾蕩華絢。

呂居仁惠建昌紙被

寒聲晚移林。殘臘無幾日。高人擁楮眠。擘卷意自適。素風含混沌。春煦回呼吸。餘溫偶見分。來自芝蘭室。乍舒魄流輝。忽捲潮無迹。未能澡余心。愧此一衾白。嘗聞盱江藤。蒼崖走虬屈。斬之霜露秋。漚以滄浪色。粉身從澣紈。蛻骨齊麗密。乃知瑩然姿。故自漸陶出。治物猶貴精。治心豈宜逸。平生感交遊。耳剽非無得。精神隨事分。內省殊未力。寸陰捐已多。老矣將何及。自從得此衾。夢覺常惕惕。清如夷齊鄰。粹若淵騫覲。獨警發鏗鐫。邪思戢毫忽。勿謂絕知聞。虛闡百靈集。鼎鼬或存戒。韋弦亦規失。則知君子惠。所以勵蒙塞。雲巖竹源二禪。俱與招客。三月二十一日。遂飯於竹源庵。謀諸野則獲也。劉奇仲有約不至。吳

周寶遊德華劉致中暨公望劉才仲陳聖叔某會焉。從容辨論。懷抱甚適。因賦詩以紀之。

雲巖市聲中。竹源山色處。平生幾兩屐。惟樂取意去。晨光霽老春。飛蓋雙溪路。沙平水漫流。雲散天全露。透迤經淺坂。窈窕穿崇樹。綠登方怒舒。紅竟忽繁雨。斯焉得小休。境熟來已屢。徵君常主盟。呼吸名勝聚。子休心鐵石。太叔語韶濩。鼎鼎吳劉陣。俱有不凡度。余衰氣不華。清傲慚輒與。未渠推遠之。政以枵然故。九賓既雲集。一士乃鴻翥。母多溷幽人。蔬茗煩草具。叢談雜莊諠。泛閱披黃素。豐鑄辨活筆。始畫窮真數。解衣半日許。萬古懷胸臆。西窗引虛明。汛灑延晚步。嬾身厭依隨。靜若超羈馭。博山真起予。浮煙一枝鶩。

同范智聞五月十四日夜賞月

微風淨郊原。暮色含清夏。層巔月欲上。炯炯木葉罅。豐姿一髮虧。爽氣千毫射。流光不著地。黃抹溪西舍。翩然釋嶠飛。雲浪鱗鱗化。常恐螺髻青。失此驪珠挂。借用奇觀天所吝。老眼得屢借。不嫌神太清。踈立高梧下。故人肯留連。一笑偶良夜。濁醪勿虛杯。庭縞醉可藉。

宿省軒

夜空合一寂。擾擾息萬勞。幽懷耿不寐。孤燈側殘膏。稍知山雨來。聲在橫林高。淒然卻成夢。夢泛秋江濤。

過報德庵

循溪踏危磴。路入篔簹塢。森森翠樞間。一幹橫清雨。茶煙日月靜。石壁軒扉古。盡茲北山旁。小勝無遺取。

次韻茂園獨速歌

大兒行文學蘇黃。暗潮無聲走茫茫。小兒分題擬甫白。手扶藁頤取冰魄。自成機杼誰如君。悲歌乃有可憐色。曉來春歸薺葉新。青女摧之良不仁。那知妙齡氣如許。一睨辟易驚千人。我亦歸爲村衰翁。接花成條欹屋紅。跣行肯追蹠躩步。杯飲不羨琉璃鐘。相逢他事不發語。醉面徹日承谿風。君不見豐碑模糊立峴首。又不見總帷虛掛百眉侑。何如吾儕見在身。有口猶堪著醇酎。陶陶兀兀未全非。赫赫炎炎豈長有。硯峯絕頂撫孤松。伊誰及此蒼髯壽。

韓幹畫馬闕四足龍眠榻而全之

吾聞兩臂天下重。馬失四蹄將底用。平生想似萬里逝。對此惟心惻然動。得非曾落駑駘羣。腕脫泥塗良已勤。又疑逸氣厭拘係。絕蹠徑欲超浮雲。諦觀事乃不爾劇。破練丹青老無色。軒昂自有尊足存。顧盼一株陰山碧。韓生筆法妙此圖。龍眠榻出了不殊。斷鼈自昔徒聞說。續鳧雖工計已疎。何如染作滄江遠。明滅要看追風蹴微雪。

寄魏元履

世清事虛文。十幅了一書。片言到肺腑。子獨不佞予。班班眼中秀。學膽誰似渠。平生幾兩屨。踏破牛斗墟。小言謁侯門。大言叫天都。歸來闢存室。默坐追亡逋。牀頭著韋編。盤礴萬古初。時拈紙上語。破的妙有餘。已甘酌對難。舌本噤不舒。矧予在半流。所見方模糊。蝸涎不自潤。詎敢相濡濡。人生強多知。於己固已疎。



睫邊遺太極。意上町六虛。獰猿繫尙跳。況乃拊檻呼。是神非吾神。滓穢政可奴。嘗聞不遠復。佩作三字符。煌煌杏壇春。一枝明清湖。蜂蝶未全知。佳處自不孤。惟子先著眼。時來採芳腴。何當共叩微。歸性有順塗。

新涼

新涼爲招客。勝集非預圖。前峯雨未散。冷風透吾廬。披襟沐清駛。合席隨霑濡。定知喧譁中。欲此一快無。興來擴以酒。草具來須臾。田翁偶過我。添杯坐其隅。爲言秋暑劇。稻畦日凋疎。寧辭抱甕勞。僅給園中蔬。喜茲甘澍足。普潤無遺墟。遙山莽難分。綠浪搖虛徐。我病不任耕。歲收仰微租。蒙成每自愧。一飽便有餘。連觴使之酬。醉語雜叫呼。野人無他腸。我輩恐不如。

吳傅朋游絲帖歌

園清無瑕二三月。時見遊絲轉空闊。誰人寫此一段奇。著紙春風吹不脫。紛紜糾結疑非書。安得龍蛇如許耀。神蹤政喜縈不斷。老眼只愁看若無。定知苗裔出飛白。古人妙處君潛得。勿輕漠漠一縷浮。力適可罍千鈞石。睠予弟兄情不忘。軸之遠寄悠然堂。謝公遺髯凜若活。衛后落鬢搖人光。翻思長安夜飛蓋。醉哦聲落南山外。亂離契闊三十秋。筆意與人俱老大。政成著腳明河津。外家風流今絕倫。文章固自有機杼。戲事豈足勞心神。傅朋王逢源外甥也

病中賞梅贈元晦老友

梅邊無與談。賴有之子至。荒寒一點香。足以酬天地。天地亦無心。受之自人意。韜白任新和。風味要如此。

過鄴中

逐鹿營營一夢驚。事隨流水去無聲。黃沙日傍荒臺落。綠樹人穿廢苑行。遺恨分香憐晚節。勝遊飛蓋尙高情。我來不暇論興廢。一點西山入眼明。

望楚

客浦舟凝滯。凭高識楚鄉。有愁關眺覽。何地不淒涼。草木詞人怨。江山霸主亡。悠然獨搔首。暮靄一星光。

井泉

石井水濺濺。寒莎映碧鮮。雨聲添溜急。天影入波圓。曉汲連山寺。春耕潤野田。杖藜三嚙罷。毛髮更蕭然。

巖桂

涼颼振遠村。寂寞度清芬。山路不知處。月窓時夜聞。孤根寒抱石。落子半飄雲。袖手空延佇。無才可賦君。

新灣

苒苒寒生水。面煙吳歌唱。罷月微偏。停橈又向灣前宿。一夜西風浪打船。

汴堤

參差歌吹動離舟。宮女張帆信浪流。轉盡柳堤三百曲。夜橋燈火看揚州。

天迴

天迴孤帆隱約歸。茫茫殘照欲沉西。寒鷗散亂知多少。飛向江頭一樹棲。

銅爵

金碧銷磨瓦面星。亂山依舊遶宮城。路人休唱三臺曲。臺上而今春草生。

中渡

渡南渡北是長亭。沙上行人立馬情。回音若無煙樹隔。只應猶望見高城。

江上

江上潮來浪薄天。隔江寒樹晚生煙。北風三日無人渡。寂寞沙頭一簇船。

雙廟

無復連雲戰鼓悲。英風凜凜在雙祠。氣吞驕虜方張日。恨滿孤城欲破時。幽鳥自啼詹際樹。夕陽空照路傍碑。平生不作脂韋意。倚棹哀吟兩鬢絲。

安仁道中

汨汨復汨汨。著鞭雞一號。老身緣底急。長路只徒勞。石亂春溪惡。山深曉月高。村沽得微醉。猶足張餘豪。

醱醑

顛風急雨退花晨。翠葉銀苞照眼新。高架攀緣雖得地。長條盤屈總由人。橫釵數朶開猶小。撲酒餘香韻絕倫。唯有金沙顏色好。年年相伴殿殘春。

海棠花

幽姿淑態弄春晴。梅借風流柳借輕。剩種直教圍野水。半開長是近清明。幾經夜雨香猶在。染盡煙脂畫不成。詩老無心爲題拂。至今惆悵似含情。

策杖

策杖農家去。蕭條絕四鄰。空田依壠峻。斷藁布窠勻。地薄惟供稅。年豐尙苦貧。平生飽官粟。愧爾力耕人。

疊嶂

益遣歸心快。愁霖喜乍晴。樹陰迎馬合。波影照人清。不見雲山路。時聞樵斧聲。暮雲偏自急。相伴隔溪行。

野步

野步忘歸遠。春心不自休。管弦非老伴。風雨定花讎。柳暗深深路。溪寒小小樓。謝娘歌白紵。此意可忘憂。

送原仲之荆南

風急塵埃滿漢關。送君行處路漫漫。不知爭戰幾時定。常恐別離相見難。三逕舊游松竹老。五湖新隱水雲寬。交朋日覺知音少。綠綺從今莫浪彈。

景陽鐘二首

景陽鐘動曉寒清。度柳穿花隱隱聲。三十六宮梳洗罷。卻吹殘燭待天明。  
一刀殘月淡觚稜。遙望林梢曉色升。寂寞小簾風露冷。玉盆脂水已生冰。

泊舟

莽莽荒茨岸。回回亂石灘。雨寒收市早。風急泊舟難。寓縣兵猶鬪。乾坤網正寬。慙慙囑龍劍。莫久臥波瀾。

次韻張守壺山詩

松根繫馬望巔岫。乘興攀躋不作難。日出漸看林霧散。潮來先覺海風寒。遙連釣石多紅樹。半出僧垣盡綠竿。不見雙旌來視稼。憶君對酒豈能歡。

莫田

打麥蓬蓬響莫田。兒童拾穗笑爭先。市頭米價新來減。一醉瓷甌五六錢。

途中

小市猶依海。橫橋欲跨汀。雨餘榕徑冷。春晚芋田青。薄宦低豪氣。浮生惜壯齡。急流歸亦好。憂患飽曾經。

次張守韻二首

促席山堂夜。寒燈吐碎金。酒分鄰甕美。栗爆地爐深。疎嬾難堪事。紛華易壞心。自憐貪寸祿。雙鬢老侵尋。

瓦白霜封縞。波清月漾金。柝沈秋壘靜。人語夜堂深。故國歸何日。寒衾事滿心。庭松憐手植。擢幹已彌尋。

悼李奉

選拔由親衛。時危遠出征。氣驍嘗忽敵。身歿始知名。故妾辭空帳。殘兵隸別營。傷心豺虎窟。冒險爾何輕。

次韻陳成季郡會

疾雨狂風恨若何。芳晨坐覺等閑過。惜花意欲春常在。對酒年來飲不多。雅會欣聞珠履集。新詞好付雪兒歌。風流閣老推前輩。喜客溫顏似醉醞。

出郊

路轉囊山北。扶輿憶舊過。乾坤征戰久。游宦別離多。瘴樹餘紅葉。春江又綠波。平生豪橫氣。未老半消磨。

偶書

風急胡塵暗九州。岸巾長嘯一登樓。故園卻憶桐孫在。薄宦端爲荔子留。湖海以南兵尙鬪。犬戎不死禍難休。似聞推轂皆飛將。盍有清談謝傅流。

與原仲至交溪橋

倦憩春橋午。回環翠碧重。亂溪流背海。新柳色欺松。厭市常思野。爲官不及農。喜逢湖上客。談話得從容。

春望

杳杳盡寒色。乘高望更迷。曉晴山氣上。春漲野橋低。幽鳥啼無伴。閒花發欲齊。幾多沉寂景。醉筆爲提撕。  
北風

雁起平沙晚角哀。北風回首恨難裁。淮山已隔胡塵斷。汴水猶穿故苑來。紫色鼉聲真倔強。翠華龍袞暫徘徊。廟堂此日無遺策。可是憂時獨草萊。

原仲溫其彥藻彥符致明集敝廬

清樽勸客且留連。亂後相從亦偶然。三徑生涯鄉社裏。一秋心事菊花前。向來憂喜皆陳迹。老去光陰逐斷弦。懷抱故人今有幾。只因情話可忘年。

宿雲際偶題

穀雨都無十日間。落紅棲草已斑斑。曉煙未放屋頭樹。春漲欲浮天際山。翠蓋縈風沈遠坂。漁舟驚浪落前灣。鐘聲認得林邊寺。歲歲籃輿獨往還。

客路

客路經春雨。淹留未得歸。徑泥黃染屨。林霧白侵衣。直氣何由吐。愁心只欲飛。東風如解事。吹夢落漁磯。

哭呂倅

瞑目荒山裏。攜家萬里來。旅塋猶借地。兒哭不勝哀。裂甑妖難測。藏舟事可猜。大賢應有後。天道信悠哉。

秋意

又見庭梧一葉飛。物華心事兩差池。百年未半老相逼。四序平分秋獨悲。過岸山川雲漠漠。殘燈院落雨絲絲。客懷料理須杯酒。哭向窮途定是癡。

屏跡

屏跡山樊避世喧。晚風落日靜柴門。寒泉遶竹通幽圃。小徑穿田入別村。散策微吟霜葉脫。鈎簾宴坐碧雲翻。閒中興味知何晚。絕口名途不更言。

絕句二首

目送孤鴻獨倚樓。晚風吹淚更橫流。蕉花落處蠻煙碧。六十三程是白州。  
竹遶茅簷水遶階。東風漸欲放春回。丁寧紅紫休爭發。待取山南刺史來。

寄蜀

有客傳歸信。愁懷得暫寬。兒童占鵲喜。鄰里借書看。離蜀秋方半。浮湘歲欲闌。柴門頻灑掃。夢相見征鞍。

野墅

野墅驚秋晚。殘年忽忽過。海潮通井淺。林日到窓多。酒盡鄰翁餉。詩成稚子哦。人生行樂耳。軒冕奈余何。

汴京紀事二十首



帝城王氣雜妖氛。胡虜何知屢易君。猶有太平遺老在。時時洒淚向南雲。  
玉璽相傳舜紹堯。壺春堂上獨逍遙。唐虞盛事今寥落。盡卷清風入聖朝。  
聖君嘗膽憤艱難。雙蹕無因日問安。漢節凋零胡地闊。北州何處是通汗。  
朝廷植黨互相延。政事紛更屬紀年。曾讀上皇哀痛詔。責躬猶是禹湯賢。  
聯翩漕舸入神州。梁主經營授宋休。一自胡兒來飲馬。春波惟見斷冰流。  
內苑珍林蔚絳霄。圍城不復禁芻蕘。舳艫歲歲銜清汴。纔足都人幾炬燒。  
空嗟覆鼎誤前朝。骨朽人間罵未銷。夜月池臺王傅宅。春風楊柳太師橋。  
御路丹花映綠槐。瞳瞳日照五門開。吾皇欲與民同樂。不惜千金築露臺。  
神霄宮殿五雲間。羽服黃冠綴曉班。詔許羣臣親授籙。步虛聲裏認龍顏。  
宮娃控馬紫茸袍。笑撚金丸彈翠毛。鳳輦北游今未返。蓬蓬艮嶽內中高。  
篤耨清香步障遮。並桃冠子玉簪斜。一時風物堪魂斷。機女猶挑韻字紗。  
萬炬銀花錦繡圍。景龍門外軟紅飛。淒涼但有雲頭月。曾照當時步輦歸。  
雲芝九榦麥雙歧。盍有嘉生瑞聖時。玉殿稱觴聞好語。時教張補撰宮詞。  
橋上遊人度鏡光。五花殿裏奏笙簧。日曛未放龍舟泊。中使傳宣趣鄆王。

天廐龍媒十萬蹄。春池蹴踏浪花飛。路人爭看蕭衙內。月下親調御馬歸。  
盤石曾聞受國封。承恩不與幸臣同。時危運作高城破。猶解捐軀立戰功。  
梁園歌舞足風流。美酒如刀解斷愁。憶得少年多樂事。夜深燈火上樊樓。  
倉黃禁陌夜飛戈。南去人稀北去多。自古胡沙埋皓齒。不堪重唱蓬蓬歌。  
河漢如雲掃沆寥。登東寒鐵響清宵。竹窗驚破高人夢。門外駸駸萬馬朝。  
輦轂繁華事可傷。師師垂老過湖湘。縷衣檀板無顏色。一曲當時動帝王。

題將軍巖

昔年棲險人何在。髣髴樓臺杳靄間。事去長空飛鳥沒。時清宴坐一僧閒。  
霜秋石壁黃金樹。月夜雲濤碧玉灣。杖策時來訪奇絕。漁樵幽興自相關。

訪原仲山居

寂寂臨湖屋。湖風爲掩門。鳥聲幽谷樹。山影夕陽村。好事長留客。雖貧亦置樽。  
平生枯淡意。去此欲誰論。

有懷十首

滿空寒雨雜飛煙。湖上先生擁褐眠。借問茅齋容客否。夜燈相伴讀韋編。  
結茅同隱水雲間。何日柴車不往還。憶得松林長嘯罷。歸時明月徧秋山。

胡原仲

劉溫其

山空墜石咽寒溪。雨濕浮雲晚更低。不見蕭屯劉處士。年年清夢遶瓜哇。劉致中  
當年册府仰才華。一跌青雲萬里賒。白首卻來蓮社裏。幅巾緇褐誦楞伽。鄭向明  
風驚枯葦白花浮。欲下橫橋晚更留。惆悵不逢吳季子。一溪寒水帶煙流。吳公路  
青錢學士妙文章。便合含毫侍帝傍。寂寂閩山餘舊隱。憶君時到讀書堂。張巨山  
松底柴門盡日關。主人西去幾時還。長鑱委地黃精老。時有寒猿嘯硯山。傅茂元  
馬蹴浮埃去路長。相逢端欲問行藏。未饒赤壁風流在。且向何家醉碧香。周元仲  
翁侯滿腹是精神。三謁金門計未成。卻跨蹇驢游雪上。秋風雄劍匣中鳴。翁德功  
曾訪高人上翠峯。至今清興逐松風。籃輿夢想行山處。白葛花開細雨中。密庵

### 送六四叔之茶陵

底用忽忽便據鞍。離觴縱滿不能歡。瀟湘萬里客愁遠。鷓鴣一聲春事闌。此去宦遊當益顯。時來功業是非難。似聞幕府資奇畫。好借雄風弄羽翰。

### 同詹明誠傅茂元游晞真館有詩因次其韻

橘柚垂紅古觀秋。歸途邂逅得尋幽。晴沙散策隨山遠。夜月回船信水流。勝處無詩端可恨。它時有酒更來游。相陪二妙平生友。老矣襟期共一丘。

邃老寄龍涎香二首

瘴海驪龍供素沫。蠻村花露挹清滋。微參鼻觀猶疑似。全在爐煙未發時。知有名香出海隅。幽人得得寄吾廬。明窗小爇跏趺坐。更覺胸懷一事無。

次韻溫其元日詩

曉來飛雨挾風顛。洗出韶容換故年。花動一紅明屋角。山寒亂碧到樽前。病如夜鶴孤還警。老似春蠶飽即眠。賴有故人開寂寞。錦囊詩句許時傳。

次韻熊叔雅七言

只今飄蕩賈長沙。來往三山躡絳霞。馬上新詩猶憶友。枕邊幽夢不離家。風驚枯葦連汀雨。霜着寒楓滿樹花。卻記梁園都識面。干戈豈料落天涯。

謝劉致中瓜

萬言不直一杯水。才似謫仙良可嗟。顧我小詩偏發市。年年博得蕭屯瓜。

分茶公美子應預爲白曬之約

夢裏壺山尋二妙。不因荔子鬢絲華。聊分茗盃應年例。故有筠籠來海涯。鮮苞尙想妃子笑。槁面何取西施羶。老饞惟作耐久計。一瞬紅紫真空花。

致中招原仲游武夷

病暑冠裳與體忘。一塵幽僻得深藏。微風時度澗光活。殘日忽無山氣涼。但想子綦方隱几。終慚南郭謾連牆。何時九曲尋幽事。船尾應須著漫郎。

同才仲入山有懷奇仲

客至那容嬾。牽筇入翠羅。山光知雨過。野色見秋多。妙語時相奪。微吟只自哦。吹墳來獨晚。此日恨如何。

次六四叔青字韻

寫出吳中勝。平生歷歷經。路窺煙渚靜。山入柁樓青。老氣何由逸。奔暉不肯停。北潭搖夢否。綠面照軒櫺。

時中良弼茂元慎儀集水閣

水色兼山影。漂搖小閣西。風來幽囀活。雨過萬紅低。炯炯杯中趣。喧喧枕裏迷。新年一聲笑。四友在潭溪。

寄張子平

老矣張平子。飄零客此州。清樽如有伴。白髮不知愁。雨燕稍簾入。風花擁檻浮。夢中家在否。歸興莫悠悠。

晚飲

招提聊駐屐。卻去白雲堆。老眼看山倦。餘懷向酒開。晚涼微雨送。秋意一蟬催。醉裏揮犀妙。方知有逸才。

次韻長汀壁間

竄鼠驚殘夢。蕭蕭老屋虛。風聲傳遠瀨。寒意入秋蔬。客路漂搖入。歸身憔悴餘。西窗滿殘照。髣髴似吾廬。



# 韋齋詩鈔

朱松字喬年號韋齋新安人文公朱子其嗣也第進士除祕書省正字建炎紹興間詩名籍甚聞河南程子之學捐棄舊習朝夕研討久而深有所得趙鼎督川陝荆襄招爲屬不就鼎再相除校書郎歷度支員外史館校勘司勳吏部郎秦檜主和議上章極言其不可檜諷御史論其懷異自賢出知饒州未至卒

## 至節日建州會詹士元

嗟予身百憂佳節過倥偬客愁隨線增歸思與灰動當年從子日未覺百慮重高堂遠牀呼一擲有餘勇那知客天涯相對寒骨聳歲月增幾何鬢絲今種種忍饑山藥煮附煖地爐擁深藏斷還往衰病脫拜拱興言望鄉關雲物方鬱滯空餘相屬意盃酒久不捧

## 寄題叔父池亭

一壑久藏勝數椽忽開亭方塘蔭瓦影淨見魴鯉行主人有嘉招轉柁失高城不知幾搖兀杙舟上崢嶸尊酒酌芳淥園蔬煮柔青翩翩射鴨弓一笑翻綵翎那知海陬姪斗粟忘歸耕餘生信萍梗歸夢識林垌漲水有回波故鄉豈無情一醉會有日因之濯塵纓

考亭陳國器以家釀餉吾友人卓民表民表以飲予香味色皆清絕不可名狀因爲製名曰武夷仙露仍賦一首

二年飲水閩中村忽見玉醴傾蠻尊涓涓醞醘灌熱惱耿耿沆瀣明朝暎旱塵久漲城市暗渴夢欲挽江湖吞何人遠致雙鯉信知我來扣羅雀門不須邀月已清絕尙恐熨齒當微溫要從華池汲真液豈獨玄髻薜愁根微芒已識投轄客斌媚似返當壚魂奇功誰續伯倫頌妙意要與淵明論胸中我自有涇渭筆下君已傾崑崙詩成寄與約他日飲君與我空瓶盆

久旱新歲乃雨

高田土可麓下田不受犁遺蝗憂插啄況乃麥未齊赤子天自憐溝壑忍見擠雨逐新歲來停雲忽淒淒莫辭三日霖爲作一尺泥汪汪旣沒膝濼濼仍拍隄漸看簑笠出笑語喧咿哇我欲與寓目父老同攀躋此身羣萬生擾擾舞甕雞曾亦無幾求脫粟配羹藜永言故隴耕老眼路淒迷好收斂版手鋤耨歸自攜

蔬飯

蕨拳嬰兒手筍解籜龍蛻薦羞杞菊開采斲煙雨外嗟予飯藜藿咽塞舟泝瀨朝來二美兼一飽良已泰充腸我誠足染指客應嘅平生食肉相蕭瑟何足賴王郎催牛炙韓老憶鯨鱠俠氣信雄夸戲語亦狡獪我師魯顏子陋巷翳蓬艾執瓢不可從一取清泉酌



戲贈吳知伯

條侯得劇孟。吳楚坐可滅。我知無能爲。失此一敵國。偉哉奇男子。俠氣橫八極。書生復何者。骯髒老筆墨。刺口論安危。事往竟何益。匹夫嘯空野。驚塵一方塞。區區空有意。浩蕩先鋒鏑。何如吳王孫。語輒面浮赤。交遊得朱亥。負販鄙膠鬲。腰間鐵絲箭。上鏃紫塞翮。笑指蛇豕區。滅此而後食。諸公未備知。欲薦恨無力。明日我過君。烹牛呼社客。當書游俠傳。令子姓名白。

十一月十九日與仲猷大年綽中美中飲於南臺

空山欲雪雲冥冥。玉梅半開吾眼青。此身垂欲走塵土。聊復舉酒看崢嶸。折腰向人不知恥。故園可鋤在千里。金昆石友一開眉。珍重道人相料理。楚江東岸先人廬。竹君安否久無書。歸歟何時應白首。我食吾言如此酒。

送志宏西上

九州眼一槩。餘子真瑣瑣。嶽立培塿中。喜此高岌峨。如公我輩人。取友亦到我。揮毫賦垂天。風雨卷蓬顆。相期八表遊。未覺夙心左。解龜醉江閣。酒面山月墮。起瞻帝鄉雲。感嘆不成坐。何須飛霞佩。自辦凌風舸。瀛州渺溟渤。萬里一掀簸。緘詩寄天涯。秉燭對新火。那知市門仙。斗祿事么麼。空餘腸九迴。上疏何日果。

寄陳陷元

我生少所可。靡靡世一律。如君素心人。指不三四屈。久與宵人遊。歸臥常自失。效尤起媮心。阿意增美疾。低回強酬酢。高論形敢出。緬懷參同子。蚤入伊洛室。聞道既先我。論詩又奇崛。縱橫談天口。卓犖扛鼎筆。勝我何足云。論交敢自必。桓公肯見規。寡過行有日。書來約過從。一笑破蕭瑟。新涼宜燈火。永夜勘書帙。豈無一尊酒。少促軟語膝。更呼小叢歌。未怕官長詰。跂予占騎氣。千嶺秋回鬱。着鞭及清境。灑灑月華溢。

月桂花

窗前小桂叢。著花無曠月。月行晦朔周。一再開復歇。初如醉肌紅。忽作絳裙色。誰人相料理。耿耿自開落。有如貧家女。信美乏風格。春風木芍藥。穠豔傾一國。芳根維無恙。歲晚但枯枿。

茱菊

海上作重九。菊揉青蕊香。近墟買茱萸。枯顆出藥囊。兒曹記土風。歉歉事祈禳。老夫未免俗。聊爾答風光。災祥理不僭。此柄孰主張。譌言眩末俗。吾欲案長房。

吉貝

炎海霜雪少。畏寒直過憂。駝褐阻關河。吉貝亦可裘。投種望着花。期以三春秋。茸茸鵝毳淨。一一野繭抽。南北走百價。白氎光欲流。似聞邊烽急。緣江列貔貅。裁襦襯鐵衣。愛此溫且柔。天平未厭亂。利厚人益媮。誰知海濱客。獨歎無人酬。

餽歲

歲晚追土風。獨甕誰與佐。人心感流光。臺餽屏奇貨。雞豚取牢柵。門戶隨小大。去鄉二十年。憶此但愁臥。兒癡元未識。但索梨釘坐。何時鷓鴣村。莫作驢轉磨。不須志四方。教子求寡過。歸哉及強健。老去煩劑和。

別歲

舊歲已趣駕。爲我不少遲。凡心畏增年。而歲豈容追。丈夫有螻屈。牢落天南涯。收功英妙年。豪傑彼一時。寧當如秦越。坐視瘠與肥。鄰翁意誠厚。酌酒寬愁悲。慙慙何時忘。祝我致好辭。撫世非吾事。諸公正扶衰。守歲

庭燎夜未央。旌旗煥龍蛇。九門一放鎖。萬馬誰能遮。亂離憶舊事。安眠夢無何。目眩燈燭光。坐厭兒女譁。念此亦土風。雖癡不容撾。更爲盧白戲。紛爭起橫斜。故歲不足計。新歲莫蹉跎。努力誦書史。從人笑翁誇。送沈昌時赴寧海令兼敘別

午潮平處落歸帆。已覺離情兩不堪。轉手便成千日別。悲歌聊倚一盃酣。波翻別壑聞車水。青遍柔桑趁浴蠶。歸路春深風日美。伴誰操筆賦幽探。

西湖泛舟

望湖樓下照衰顏。羞見塵埃兩鬢斑。風艇縱看山轉側。煙堤儘逐水回還。喚人歸去城鐘急。觸處相親嶺

月彎不用新詩摹絕境。定知長到夢魂間。

贈言命張生

俛仰塵埃的自羞。稍看寒餓復誰憂。小兒造物巧相戲。窮鬼逐人殊未休。我所不知煩子算。世如無取更何求。服箱挹酒真么麼。那用區區問斗牛。

贈僧

知有叢林特地過。幅巾迎笑出巖阿。杖藜同覓牛羊路。濯足來分鷗鷺波。豈不倦遊貪斗粟。坐令歸思動漁蓑。他年會有相逢日。稍食吾言聽子呵。

寒食

粥冷春餳凍。泥開臘酒斟。故鄉空淚滿。華髮正愁侵。山暝雨還住。煙孤村更深。誰知江海客。浩蕩濟時心。

答卓民表送茶

攪雲飛雪一番新。誰念幽人尙食陳。髣髴三生玉川子。破除千餅建谿春。喚回窈窕清都夢。洗盡蓬蓬渴肺塵。便欲乘風度芹水。卻悲狡獪得君嗔。

和人遊仙峰庵

千巖萬壑翠縈回。一洗衰翁病眼開。落日多情留別嶺。秋空無地着浮埃。雲閑出岫初無意。松老參天豈

願材。我是散仙君記取。更鞭鸞鳳少徘徊。

蘆檻

手斲修蘆着檻栽。使君公退幾徘徊。想當風雨翻叢急。疑卷江湖入座來。未辦松窗眠綠浦。且將屐齒印蒼苔。種成桃李人間滿。應念孤根首屢回。

董邦則求茶軒詩次韻

一軒新築敞柴荆。北苑塵飛客思清。更買樵青娛晚景。便應盧老是前生。千門北闕夢不到。一卷玉杯心自明。冷看田侯堂上客。醉中談笑起相烹。

送仲猷北歸二首

一丘胸次有餘師。空此淹留歲月遲。黃墨工夫憐我倦。簞瓢風味要君知。新詩落筆驚翻水。俗學回頭笑畫脂。伊洛參同得力句。還家欲舉定從誰。欲尋當日故山盟。身世今如海一萍。歸路上心真了了。愁根入鬢已星星。挽衣共酌東西酒。折柳送行長短亭。念我知君回首處。萱叢菖葉一時青。

寄吳致一

相逢一笑兩忘懷。夢遶親庭首重回。世事難磨三尺喙。離愁都付一分杯。秋生林薄歲時晚。水落江湖鴻

雁來。賸作新詩頻寄我。天涯時對兩眉開。

四月十五日上元道中

亂山身逐簡書來。梅子黃時雨未開。一葦橫斜風葉度。千灘最屬雪城摧。危機種種那容避。俗駕駸駸底未回。聊復浮遊隨造物。故園回首思悠哉。

送黃彥武西上

門揜蓬蒿氣浩然。西風筆勢更翩翩。未忘大學齏鹽味。時說定林文字禪。蘆篷風光傾上國。槐花心緒記當年。里門歸日車應下。置酒遲君沉水邊。

書室述懷奉寄民表兄是日得民表書

丈室無塵斐几橫。吏休鼻鷲散無聲。舞風竹影傲傲轉。縈夢鑪香嫋嫋清。已笑榮枯盧白戲。不須物我觸蠻爭。故人剪燭西窗約。知得何時話此生。

答人留別之什

家在大江東復東。去君一舍碧流通。那知臨水登山處。同寄飛蓬斷梗中。愁絕盃中千里月。夢縈江上一帆風。只今且作須臾意。更典雲裘醉小裘。

次韻李堯端見嘲食蕨

真人官府未夤緣。且向龍山作散仙。春入燒痕催采蕨。雨翻泥隴憶歸田。蔬腸我若枵蟬腹。詩格君如擊鷓拳。筋下萬錢謀更鄙。諸公飽死太官羶。

送友生

剝啄門前久未噴。定知我輩不羈人。午窗喚起夢魂好。一語便知風味真。身嬰世網坐營口。心識醉鄉慵問津。忽先秋燕背人去。四角何由生客輪。

贈范直夫

將軍競病詩成處。南浦春歸蘭玉叢。漸減心情身老大。久乖談笑路西東。鄉關落日蒼茫外。樽酒寒花寂歷中。且與寓公同放曠。浩歌相屬倚秋風。

招友生

雨收天氣欲清明。猶有餘寒在粥餠。馬隊客勤貪晝永。鱸堂人病想身輕。讀書有味齏鹽好。對境無情夢寐清。欲話此懷須我輩。一來蠟屐伴春行。

寄江

龍卷風雲一髮端。不妨聊作侍祠官。高情未許羣兒覺。萬事何須正眼看。問道從公春信近。談天容我酒盃寬。乘桴亦有平生意。回首紛紛行路難。

次釗彥仲傅茂先韻

強蹋府塵從傅子。立談江閣識釗郎。一尊此地見眉宇。十載相思成鬢霜。秋燈煜煜照情話。夜浪翻翻吹客牀。投名徑入農圃社。老矣不夢天門翔。

次張演翁林元惠韻

朱門小駐使君車。二老風流入畫圖。但有觥籌供笑語。從教歲月上髯鬚。詩成華燭留殘蠟。客醉高歌叩缺壺。更起爭棊誇得雋。不應局蹙守邊隅。

太康道中

一色春勻萬樹紅。坐愁吹作雪漫空。誰知榆莢楊花意。只擬春殘卷地風。

燈夕時在泗上五首

燈花作意照歸人。短棹扇舟寂寞濱。帝力如春蘇萬物。遙知太一不威神。雲窗月檻仰乘輿。俯看香車出繡襦。九陌人人歌帝力。不須微服過康衢。鸞駕翩翩馭晚風。積蘇宮闕夜濛濛。明朝遣覓鐵如意。應在涼州酒肆中。我欲安心未有方。至人遺跡已茫茫。自非窳堵波中老。誰直先生一瓣香。我觀世界只兒嬉。一戲相從更莫辭。綺語未忘餘習在。明朝與和紫姑詩。



鈇山僧齋假山

擘開華嶽三峰秀。疊就層峰數石寒。等是世間兒戲事。道人莫作兩般看。

石門寺四首

橘刺藤梢罽客衣。直緣微祿得奔馳。懸知投老歸田味。只似登山困睡時。  
行穿蒼麓瞰平岡。踏破青鞋到上方。城市紛紛足機穽。卻從山路得康莊。  
林棲相喚出幽谷。我亦欲起天未明。枕中泱泱響山溜。一似荒城長短更。  
真功那復歎蒸沙。靜笑飢腸日夜譁。老褐不須供茗粥。朝餐吾已辦丹霞。

以研墨送盧師子

明窗子石灑松腴。萬卷盧郎正要渠。何似黃梅碓下客。夜翻半偈倩人書。

春晚二首

梅子生仁柳絮催。春風塵跡只蒼苔。繁華一夢年年事。長是初鶯爲喚回。  
客路歸來芳節闌。杖藜隨處小盤桓。危紅數點藏深綠。須作春風爛熳看。

宿石龍寺

觸處爲家底是歸。浮生南北未忘機。道人身似南枝鵲。更盡秋宵一再飛。

寄人

西山相對臥寒齋。耿耿思君不滿懷。比似持雲來寄我。何如君自作雲來。

勻道人之玉山戲作小詩送之

道眼無塵萬景隨。滄江秋色入新詩。歸時人問江南好。只道君行到自知。

南浦小詩迎勞二弟

健碧倚天無數峰。眼前渾似故人逢。問來識面知何處。應在頤齋詩卷中。

和幾叟秋日南浦絕句簡子莊寄幾叟

兩翁相對語更闌。想見風生席石間。詩就南枝三轉鵲。樽前秋月半啣山。凜凜臞仙千載人。當年許卜一枝鄰。天高鬼惡堂堂去。誰識渠儂不壞身。不見陳公歲又除。七峯深處食無魚。終煩指似龜山路。會使人疑得異書。風雨交交耿夜燈。天涯兄弟對牀聽。莫嫌詩作江南語。一夢家山眼亦青。

書永和寺壁

胸中一壑本超然。投跡塵埃只可憐。斗粟累人腰自折。不緣身在督郵前。來解征衣日未斜。小軒泉竹兩清華。道人法力真無礙。解遣龍孫吐浪花。

九日送僧歸龍山

九日相攜積翠中。勝遊兼有道林同。枯顛一任君披拂。寄語龍山落帽風。

牛尾狸二首

壓糟玉面天涯見。琢雪庖霜照眼明。投筯羞顏如甲厚。南山白額正橫行。物生甚美世所忌。吹息雪中成禍胎。湯帆卯盃頻下筯。江南歸夢打圍來。

洗兒二首

行年已合識頭顱。舊學屠龍意轉疎。有子添丁助征戍。肯令辛苦更冠儒。舉子三朝壽一壺。百年歌好笑掀鬚。厭兵已識天公意。不忍回頭更指渠。

雜小詩八首

身將雙影背閩山。伴我江南去又還。欲寄道人簷下宿。此身都未似雲閑。俗學回頭笑畫脂。我今羞悔子何疑。恐輸靈運先成佛。莫學湯休苦覓詩。松風十里客襟涼。路入江南選佛場。欲問道人三世事。樓鐘重聽未應忘。江南風物略知津。便覺詩成筆有神。不向九江看五老。故應猶未是詩人。紛紛襜襪久相忘。只憶僧齋晝夢長。珍重道人留客語。君家無此北窗涼。

門外山光萬里濃。且將寥落共清風。箇中自有濠梁意。不用磨刀斫眼紅。  
道人鋤斧得從誰。無復當年隻影隨。笑我不求千戶郡。坐知成佛更難期。  
避世山中祇樹亭。綠陰遶舍忽青青。拋書自笑爬沙手。要挽天河洗甲兵。

立春日雷

陌上冬乾泣老農。天留甘雨付春工。阿香急試雷霆手。莫放人間有臥龍。

送輝雲際二首

三日雨行來款關。篝燈相語雪羶山。低回俗裏未能免。只有對君非強顏。  
認取芝峯鉢中影。要君歸去首重回。相思手折寄千里。想有南枝迎臘開。

題范才元湘江喚舟圖用李居仁韻

天涯投老髻驚秋。夢想長江碧玉流。忽對畫圖揩病眼。失聲便欲喚歸舟。

# 玉瀾集鈔

朱棹字逢年。文公之叔父也。少有軼才。自負其長。不肯隨俗俯仰。厄窮踉蹌。有人所難堪。而其節愈厲。其氣益高。其詩閒暇。略不見悲傷憔悴之態。因夢名堂曰玉瀾。梁溪尤延之。敍其詩。

## 二詩寄德粲并簡內觀諸友

春風本自掣肘去。那更病留過一旬。滿眼山川雖不改。連天桃李已成塵。銀河誰與洗兵馬。寶唾安能泣鬼神。悵望故人分雪此。飛雲落日在綸巾。九淵亭上二三子。見說年來事事新。隔水不容招手喚。曲窗已有畫眉人。醪醕香好急攜酒。鷓鴣聲繁催送春。笑我江南未歸客。飄然天地一閑身。

## 因蹈元看竹了軒因用去年方字韻作此

淇澳渭川那復夢。而今天遣出南方。要觀大節須霜雪。莫說此君無肺腸。照水形容殊不惡。臨風言語一何長。山僧豈識留連意。千里故人逢異鄉。

## 三山次潘靜之升書記韻

客路那知歲月長。掀眉一笑苾芻房。且傾徐邈聖賢酒。不問陳登上下牀。雲影翻空迷海嶠。秋聲隨夢到

江鄉明朝各聽船窗雨。猶憶枯碁戰四郎。

邈書寄出與李知哲唱和詩次韻

邂逅招提頓客輶。十年塵土且休休。三人月下從渠便。二老風流到我不。南北只今無好語。山川如許更悲秋。故應賸作鏘金句。莫羨羣兒萬戶侯。

老兵種菊以詩謝之

蔬畦雨徑策勳時。徒種鄰墻菊兩枝。九日無人過朱放。十分舉酒酌王尼。花裁梨玉秋風健。香近龍涎曉夢知。負口不應還負眼。長鑱煩爾鎮相隨。

九日與客語慨然有廬山之興

九日黃花笑白頭。分將牢落付荒丘。半川暝色聊償夢。別嶺秋聲旋寄愁。江國經年多浪語。匡廬入手是真休。未能免俗須登陟。睨視元龍百尺樓。

三山次鄭德予韻

日腳微明雨腳疎。誰將雲夢賦相如。西南山好君知不。一見全勝讀異書。何日歸舟片葉輕。白鷗相伴鷁微鳴。只應潮打蓬窗處。已作離騷一半清。

寓居南軒

雲氣披猖月意孤。冬青倒影上庭隅。燈橫老薺蛾方去。書掩新芸蠹已無。一世盡知關魯酒。十年不擬歎齊竽。支頤坐覺疎星沒。獨扣龍頭瀉酪奴。

答戲昭文梅花

臘到方留此日寒。雨多未覺過雲殘。共驚臺柳忽忽去。獨抱園花細細看。洗面不勞千點雪。薰衣剩破一分檀。詩人窮苦誰料理。只倚東風酒量寬。

延平道中

一溪春漲午晴初。日透波光綠浸裾。卻憶孤山山下路。石橋清澈看叉魚。雲間三十六峯高。北望思歸夢亦勞。來客雙峯莫相笑。少低吾眼爲兒曹。

舟次龍湖阻水因遊董山

山雨疎疎心又驚。起瞻天色斗微明。他年一枕江關夢。知憶蓬窗此夜聲。一川黃濁寫崐崙。苦恨南溪不盡吞。三老亦知行意速。時時插竹記沙痕。拂拂朝霞到客舟。苦疑雨意在鳴鳩。好峯天半元相識。且作僧牀挾策遊。夢好山晴曉不知。船邊今日見鬚眉。向來快寫崐崙地。元有薰風綠盡時。

僕自以四月十四日自延平歸所寓之南軒。積雨陰濕。體中不佳。二十五日夜夢至一處。流水

被道色清絕。若有欄檻而無屋宇。有筆硯皆浸水中。予驚問何地。旁有應者曰。此玉瀾堂也。夢中欲取水中筆硯作詩。詩未成而覺。意緒蕭爽。殆不類人世。鷄已一再鳴矣。因賦此。

蘧蘧飛夢過雲鄉。物色清輝眼界長。闐闐未招金馬士。蓬萊先立玉瀾堂。千尋濯足衣裘冷。六字哦詩筆硯香。當與瑤池作同社。紅巾青鳥兩相忘。

贈周功崇

閩嶺浮沉二十年。歸心日夜夢江天。謾題甲乙煩君看。若說功名只自憐。造物小兒知薄相。箇中老子已忘筌。一筇聞作東南去。豈欲求人在海邊。

夏夜極涼

素簡久辭夜。清風先戒秋。稻深羣蛤吠。草暗一螢流。舌在殊無計。心空尙有求。按圖尋分野。楚尾見吾州。

六月二十日二十一日立秋

天涯明日見秋風。錯莫誰驚碧樹空。豈意楚山招隱處。盡歸蜀客廣騷中。釣魚聊爾針方直。乞米茫然帖自工。獨臥南軒聽南澗。蠻花猶作杜鵑紅。

春間小詩書趙園壁追錄之

柳態隨時秀。花容近酒輕。綠窗京洛語。蓋抹早鶯聲。



小語不知夕。幽香無盡時。影寒人欲醉。明月照醪醅。

夜坐池上用簡齋韻

落日解衣無一事。移牀臨水已三回。斗沉北嶺魚方樂。月過秋河雁不來。疎翠庭前供答話。淺紅木末勸持杯。明明獨對蒼華影。莫上睢陽萬死臺。

書報國壁向年寓學於此嘗見虹下飲溪中復聞子規

昔與春風來此時。攜書齷齪伴兒嬉。山晴欄楯投雌霓。身病林巒號子規。短髮蕭蕭吹易盡。長江滾滾去何之。欲追舊事無言說。更作三生石上期。



# 北山小集鈔

程俱字致道。衢之開化人。以外祖鄧潤甫恩補官。坐上書論紹述罷歸。宣政間。進頌。賜上舍出身。歷官禮部郎。建炎直祕閣。知秀州。南渡航海。趨行在。紹興初。爲祕書少監。時庶事草創。俱撫三館舊聞。爲書曰麟臺故事。上之。擢中書舍人。兼侍講。旋除徽猷閣待制。晚病風痺。秦檜薦領史事。不至。卒年六十七。爲文典雅閎奧。詩則取塗韋柳。以闕陶謝。蕭散古澹。有忘言自足之趣。標致之最高者也。

## 雜興十首

一日復一日。百年如此耳。那將千百計。來日何窮已。逝者不可追。來者安可知。正恐聞道晚。勿言功用遲。誤點成駁牛。妙技有餘賞。作意畫虵足。至今猶撫掌。君看人間事。類此或往往。浩歎可奈何。悠然起遐想。中夜忽自省。昔我今是非。音聲故如昨。齒長鬚滿頤。有人夢中言。子念無乃癡。今猶昔人耳。昔人安在茲。濯濯簷下溜。刁刁樹間鳴。蟲號百鳥鬧。小大各有聲。聲多不留礙。響振元無形。何殊百千炬。光影各自明。胡葵向晨照。日引一尺長。松栽四五年。擢幹未出牆。溥溥露方晞。借此顏色芳。各留一寸心。試待九月霜。春鳩一何拙。社燕一何巧。天陰逐其婦。飲啄聊自了。嚼泥亦綢繆。託此華廈好。物生固有分。巧拙均一飽。穆穆新稟結。補此茅屋漏。問云力田人。歲事苦耘耨。終年手足胝。得此以自覆。香秔一過眼。糠覈餘滿竇。

昔年過吳江。戀戀不忍去。臨江塵思盡。廓若埽翳霧。茲爲三年留。已厭波濤怒。乃知常人情。趣新方捨故。軋軋田邊車。卷卷不得休。出之一寸痕。益以幾尺流。扶提暴中野。強作田家謳。車聲眞哭聲。天遠將誰尤。少小思振奇。頗恨身不長。身長益多累。信與憂俱生。回思二紀間。浪使儵忽爭。誰能補黥劓。反我孩與嬰。

吳縣遊靈巖

春物已如許。放舟出橫塘。扶橈漾淥漲。迨此白日長。草木有佳色。欣欣弄浮陽。幽禽靜相呼。乘和自翻翔。春風不著人。浩浩吹我裳。終年思煩促。於此興未央。捨舟得平地。陟彼萬仞岡。明霞墮山西。夜氣鬱已蒼。豈無從我遊。夾道鬚髯張。風來得好語。落落隨低昂。幽堂埽禪榻。靜對燈燭光。身輕浴新出。境寂慮欲忘。虛窗忽含曉。睡起日照梁。羣山發春姿。秀碧澹以芳。晨光晞薄露。草樹滋幽香。徜徉尋昔遊。步屣循長廊。振衣一長嘯。寸目了八荒。上嗟百世基。竟坐一笑亡。見劉禹錫詩當時館娃地。今作選佛場。乃知諸夢境。遁化豈有常。飄然詠歸歟。此適頃未嘗。重來會有興。肯使墮渺茫。旁人挽予言。借問身閒忙。吾方有公事。子去無相妨。

過方子通惟深

白日苦易晚。我懷多隱憂。憂思劇春浸。浩漫不可收。出門欲有適。舉步且復休。塵中等膠擾。念此將焉投。駕言城東北。閭閻即巖丘。是中有幽人。厲志凌霜秋。寸田荆棘盡。不假斤斧修。門無雜車馬。一飯乃見留。

虛堂芝朮香。下有百尺虬。蒼陰匝平地。老幹森下樛。堂中羅酒漿。耿耿燈燭幽。四天黜無光。萬籟肅以摯。炯然坐相向。更僕語益澹。我身動乖忤。夢寐喬松遊。常恐在泥滓。永爲天所囚。會當從之子。濯足萬里流。古情金谷草。生無限思。樓邊斜月爲誰明。

夜半聞橫管

讀神仙傳

騎龍上天入太清。繼世而往在我盈。握鈴而呼大司命。主非使者走折脛。乃知神仙非智巧。積功累行如邠鎬。專懷邪辟祈長年。誰言淮南雞犬飛上天。鯉魚腹中有隱符。白魚腹中有素書。鞭靈走石纔一戲。騎麟上天亦徒爾。誰能解衣涿水中。使人呼指赤鯁公。

莫作龍眉山頭客。三百年不得作直。故應未辦作李公。投身百斛旨酒中。鼓琴先生有怒色。有愛終當爲物役。江都王。勿預人事。俛蟲膏血。使誰從汝索。胥門著蔡經。市門著梅福。我爲松江吏。與汝相望亦相逐。高冠長劍衛士從。有口底事使蠟封。此身況不爲陳尉。就公蠟封三尺喙。不能擲米作珠爲狡獪。

古釣臺歌送阮閱休美成浚檄浙東

餓夫一往西山空。攫金胠篋清晝同。東方作矣事何若。玉柙未解裙襦中。排肩炙手日卓午。暮夜掉臂目送西飛鴻。謂言冰壺不受汗。正似馬耳經東風。我思一人去我千載。乃在澗水之東富春瀨。山嶽嶇兮矗雲漢。溪流喧豗白石亂。瀨聲盡處萬尋碧。蟠蜒蜿兮守斯人之故宅。旁人指山名釣臺。下視九土氛黃埃。投竿百轄何足道。直拂三珠挂瑤草。彼一人兮皎獨立。清風爲神冰爲骨。佩瓊蕤兮結明月。紉蘅蘭以薦枕兮。服龍淵之無缺。羊裘蒙茸溪水旁。大勝被袞升明堂。劉秀發兵誅不道。氣壓昆陽纔一埽。登牀撫腹坐太息。始信赤符非至寶。君房素癡定不癡。致位鼎足何其危。阿諛順旨腰領絕。安知直言身見殺。我昔客新定。挂帆七里灘。整冠拜祠下。巖巖千仞層臺巔。神遊八海極。髣髴聆其語。但覺萬古松風寒。滔滔舉世無不可。正自喪我非母我。嚴灘水清山翠微。貪廉懦立歸來兮。奎蹄絮縫不可以久棲。

卽事戲作四首

老鳥作巢一何拙。柳條垂絲今禿缺。銜枝復墮苦饒舌。編條作巢枝錯節。老鳥柳好汝勿傷。藏鳥待得春葉長。安巢令汝著哺母。密葉更能庇風雨。齊前數柳樹爲老鳥取新條作巢幾盡。

黃雀黃雀飛相逐。相呼門前啄遺粟。啄粟飽卽休。有人挾帚埽泥待作粥。數日門外輪苗。遺粒狼戾去。

泥。謂之埽。

鶴唳固有似。云何啄泥取蚯蚓。蚯蚓食泉曾不惡。鱸鮓蜿蜒尤不忍。何如忍飢向芝田。腥涎溷爾不得飛。

上天。畜一鶴。頗食腥穢。可厭。

烏啼未必惡。麾去恨不早。鵲噪兩耳聾。主人亦言好。安知一喙鳴。喜戚自顛倒。朝來羣鵲噪不已。童稚無知助吾喜。羣鵲自與烏爭巢。慎勿喜歡真誤爾。齊前羣鵲時噪。

### 謝人惠硯

帝鴻墨海世不見。近愛端溪青紫硯。溪流見底寒且清。光凝淺紺淵之精。斧柯千古遺仙局。雲暗半山含紫玉。割雲鑿玉巧如神。龍尾銅臺可奴僕。君來自南數千里。不載珠璣如薏苡。芊芊溪草裹石硯。文字之祥直送喜。明窗大几墨花春。爐山吐蘭千穗雲。虛中含默靜相對。那復草玄驚世人。劉禹錫有端溪石硯正草玄之句。

### 穹窿葬事回邑有感

生別萬里餘。會面終有期。死別不轉眸。一朝千古非。白日光在天。玄陰闕泉扉。盈盈閨中秀。土化成枯髀。冠笄共甘苦。謂見素髮垂。那知死生變。不待桑蔭移。室有病時茵。篋有嫁時衣。了了眼中事。閑妝靜容儀。垂楊手曾折。爲我當春稀。迅流無迴波。落英無還枝。空房閨無迹。新墳草離離。傷心北門道。同來不同歸。

### 過劉姓園居

負郭三頃稻。並田五畝園。人生如此足。安用華其軒。親戚居南陌。交遊在東村。有酒輒共醉。傾輸見情言。三徑雜桃李。九畦蒔蘭蓀。黃甘百頭奴。碧梧萬支孫。山供景無盡。石映溪不渾。桑麻中饋任。布刈鄰翁論。下以活妻孥。上以奉清溫。時從赤松子。亦訪吳市門。嗟我抱此志。十年若朝昏。家山眇天末。松菊豈復存。茲園臨官道。坐笑車馬奔。前山復場圃。疏築隨坳墩。我來適春穰。亂眼紅青紛。恍然動鄉思。夢寄東飛雲。

題海會寺

萬杉堆青沒山骨。雲埋七峯時出沒。飛泉拂石瀉哀湍。下有萬古蛟龍窟。藏頭睡熟呼不起。地坼三年蝗蝻出。千山脉理漬清甘。一罇涓涓流石液。同遊況與惠詢輩。許主簿遠首座納屐振衣何勃窣。大門當前新築道。跨水曲欄欹突兀。春鳴轆轤趁朝炊。水剛懸流機械發。搯筇對此自三歎。抱甕老人長搯搯。卻坐幽堂忽浩歌。回首已失西山日。

望九華

船發大雲倉五十里許。願江南衆山中有數峯奇爽特異。一見即知其爲九華。問篙人果然。因知褚季野於廣坐中識孟萬年。正應如此作詩一首。

卷簾對坐江南山。掠眼送青來疊疊。雲泉肺腸久厭飫。挂頰悠然聊復爾。奇峯遠澹忽四五。爽秀駸駸逼窗几。平生九華盛名下。一見定知真是矣。非關目力覩天奧。正覺羣山如聚米。好山如人有高韻。不獨江



州孟公子。直緣佳處無仕逕。落莫道邊同苦李。大是忘年耐久交。藜杖青鞵結終始。

山中對酒

秋容澹青山。爽秀雨皆足。清溪照千仞。空翠疑可掬。何年願兔窟。桂子墮山腹。老香散深林。屑玉綴黃粟。朝來客衣動。一葉下空谷。客心如夢絲。日月共煩促。胸中尙磊塊。陶寫賴新淥。要當酒千鍾。澆我愁萬斛。願有獨醒人。翛然倚枯木。

二月二日富陽城東

一春何許最佳處。柳色初勻思殺人。風揉雨練不可觸。明綠映空顏色新。舊雨來時花未齊。今雨一過花團枝。明朝試踏城西路。已復可憐枝上稀。

桐廬道中書事

一星熠熠初尙微。俄頃滿天如灼龜。溪流黯黹四山黑。怒芒當空唯太白。舉頭仰書天漫漫。飛星縱橫絕河漢。新月未高不可見。終夜起坐發三歎。

題張太丞明園亭

京華眞陸海。聲利之所闕。向來山林士。往往去不還。濡足未肯已。沒身何足歎。張侯翰林客。金龜著朝班。生平用一指。談笑起廢殘。紛紛多盧子。名譽莫敢攀。五十未云老。幡然歸故山。歸來謝奔走。治此五畝園。

養樹如養生。斤斧不浪干。醫花如醫疾。察標見其源。花譜有醫花法。上有十圍木。蔚然午陰寬。下有百步荷。紅鮮映清瀾。爽氣日多佳。西山挂簷端。安能九衢內。髀肉磨鞵鞍。我今坐奇窮。進退坎井間。違已恨紆轡。長飢思抱關。當時彭澤令。四壁唯瓢箪。折腰未爲辱。徑去曾無難。而我亦何者。栖栖猶強顏。

送崔閑歸廬山

琅琊山中水。韻入三尺桐。琅然醉翁操。發自玉澗翁。流泉不成音。寫寄十二宮。醉翁不可見。妙語聊形容。嘗聞三峽泉。上與天漢通。請君記餘響。相彼玉珮風。此聲倘可繼。那復有此公。

吾友胡少汲。結廬皖公城。灑山有小隱。背負紫翠屏。前臨一溪水。可以濯我纓。欲分青山半。留我谷口耕。信美非吾鄉。翩然遂宵征。聞君草堂處。亦復占地靈。虛簷倚蒼崖。下有玉澗鳴。樂哉不可到。因君懷友生。

有美一人

有美一人在昭君。藕絲爲衣蘭作裙。君初顧言淑且真。直欲載以黃金輪。人心變化如浮雲。明妝覺暗笑。作顰何當還之承華茵。今君宴寢凝清芬。

有美一人在煙汀。朱顏朝滌玉壺冰。素手暮理朱絲繩。語言窈窕丹鳳鳴。坐持紈扇睇秋螢。何當還之翡翠屏。爲君把鏡整衿纓。

有美一人在南浦。月明採珠光照渚。瑤衣被體金索縷。獨抱幽寒沫煙雨。何當置之白玉宇。爲君歌陽春。

激楚。有美一人。在南國以下四首亡。時鄒志完在昭州。曾子開在汀州。陳瑩中在合浦。

賦長興錢圃翁詩

學書要不成。學圃苦不早。向來執戟郎。何似於陵老。我無拏雲意。所念在一飽。閑門種蕪菁。抱甕澤枯槁。荒畦財一席。嚙嚙到春草。頗聞長城翁。八十顏色好。城西有寬閑。終歲常卻埽。安得五畝園。如翁一生了。

遊善權寺

放舟荆溪上。溪水清且徐。雲中離墨山。慘淡初有無。捨舟並松麓。下直浮屠居。榻來東軒上。爽氣已有餘。飛來定何年。無乃與此俱。奔流漱庭下。比竹梁寒渠。山深絕凡境。物物清以臞。蕭森倚巖秀。天矯懸崖枯。幽禽發寒唳。響振高林疎。我行亦良苦。卻步計已迂。解衣臥清晝。尉我千里劬。予自衢來姑蘇省女兄竟欲歸。卻行二百七十里。

訪江仲嘉於宜興。故有卻步之句。

善權洞

嘗聞包山境。中有林屋天。旁通號地脉。嶽瀆潛鈎連。茲山豈其類。瀕洞皆中穿。二巖岌山足。琤淙激奔泉。牛羊走大石。吐受無窮年。金堂下石液。雪積如烹煎。從來米鹽稱。浪播俚俗傳。一洞啓山腹。穹窿亦聯綿。誰題九斗字。大篆仍深鐫。中藏丈五石。屹若龍騰淵。回頭問主人。謂仲嘉。我輩定不凡。云何逐官牒。常得我。所耽。向來共幽討。九鑿藏芝巖。而我自林屋。翩然游皖瀟。洪崖儻可俯。不在南山南。

白馬洞

披榛不知疲。詰屈巖下路。俄然見深窞。偶步入巖戶。一泓窈而澄。百步清以驚。人言紫髯仙。白馬從此度。磷磷盡赤石。丹竈遺滓汙。收藏已兒啼。效速勝麻護。因知世盲聾。荒怪雜疑誤。虛空如許大。長嘯可平步。胡爲萬山底。躑躅向煙霧。

神魚泓是日與諸公流杯水中如西丘故事

柳州固奇士。戲好亦幽絕。遠懷西丘飲。千古清興發。徜徉恨無所。盤俎對羈紲。聊爲五里行。邂逅一壺挈。神魚伏山根。渟湛初一穴。侵侵決寒溜。沙石助清越。披莎得盤石。離坐若天設。實觴競乘流。眩轉亦飄瞥。爭持或三醕。遇坎時一蹶。歡來朱碧亂。笑罷巾帽脫。相望西丘游。詎易議優劣。

張公洞

昔年京江夜。飛夢投雲山。仍追謫仙老。嘯詠層崖巔。左盼俯無地。蒼巒生紫煙。當時賦幽賞。妙境竟莫宣。今我來自東。扶橈漾荆川。飽聞張公洞。怪絕駭所傳。聊從二三子。一結青山緣。北靈敞奇觀。下囑壺中天。恍然驚昨夢。了了墮我前。仄徑繚危棧。重扃護靈淵。奇疆玄坂倚。側洞時鈎穿。初疑天臺聚。納此一室間。夸娥運神化。不隘亦不顛。又疑清都客。翩然下雲輶。幢旒儼行立。導從森蟬聯。丹梯香霧濕。玉室珠璣懸。撐虛一柱屹。戴重三能騫。鈇竈久已冷。青驪那可鞭。香壇望八景。東晨開五便。坡陁忽度險。宛轉漫無邊。

或深如列廈。或迤纔容肩。高躋乍捫頂。偶步欲墊泉。不知行遠近。一步目九遷。噫嘻此天設。端在太古先。恨無少陵手。寫之黃絹篇。聊書夢中夢。投筆一粲然。公羊粲然皆笑。

借居毗陵東門四首

客去不能寐。翛然清夜闌。樓居俯長川。仰視天宇寬。長川濯雲漢。錯落星宿寒。青燈故可親。且還對塵編。其人骨已朽。千載與我言。掩卷三太息。虛簷清露溥。

急景不可挽。吾生豈無涯。吳中十年舊。鬚髻亦已華。嗟我壯且老。方知失林鴉。欲歸巷無廬。欲駕塗無車。而子亦羈滯。心事如蓬麻。人生無巧拙。命爾將如何。吳中十年舊。謂傅冲益。

猗猗隔河樹。羃羃緣堦草。時當長養候。顏色豈不好。萌芒忽柯葉。茂大旋枯槁。滔滔不自知。但見壯而老。人生亦草木。萬化迭侵擾。朱顏日夜變。素抱豈自保。

借居臨官道。堂陰俯長河。前車接來軫。後棹紛相摩。我獨居其間。超然嘯而歌。頗從故人語。安用高軒過。旁有五畝園。不知主誰何。時能曳屐往。豈異吾山阿。

和柳子厚讀書

事賤反多暇。居卑適無虞。人間不爭地。聊此謝畏途。豈無營營子。熟視付一吁。塵中亦何有。坐聽日月逾。展卷閱千古。置書忘萬殊。不妨權子母。亦復商有無。平生僅識字。乃與憂患俱。持此遊學海。層臺漸積蘇。

年來但遮眼。頗覺心恬愉。囊錢足自飽。肯怖騶朱儒。起臥一場間。兀如檝株拘。涼風北牕下。不減愚溪愚。誰能三萬卷。懸頭苦劬劬。小極正當寐。睡魔不須驅。

戲呈虞君明察院謨

三仕三已心如空。一壑一丘吾固窮。門施雀羅正可樂。車如雞栖良不惡。曾中九華初欲成。綵衣玉斧雙鬢青。世間何樂復過此。不失清都左右卿。

長安陸海如洪爐。五金出入無精粗。平生椎鈍堅重質。一往融液隨流珠。請觀五石大瓠種。正以濩落浮江湖。環中何者爲榮辱。千鍾何如三釜粟。坦途緩步東方明。大勝跨虎臨深谷。

秋夜寫懷呈常所往來諸公兼寄吳興江仲嘉八首

秋聲不關人。倦客偏入耳。蕭蕭舞黃葉。策策振疎葦。明知壯則老。搖落固其理。如何石心人。慨歎中夜起。蓬藿沒三徑。藤藁上瓜廬。時聞步屨聲。款關問何如。定坐無雜語。文章較精麤。馬融辭東觀。抗讎與世疎。

顧此窮巷士。華顛空著書。屬王元規防。

外監嗟已遠。吾猶識其孫。森然見孤韻。辯作懸河翻。低頭向螢窻。有類鶴在樊。讎書五千卷。字字窮根源。

頗攜未見書。過我樵無煙。屬賀方回鑄。

向來霜秋句。俯仰歲一終。人間有寒暑。方外無窮通。青青千丈松。不改冰雪容。坐閱蒲與柳。飄蕭隨雨風。

寒松老益高。蒲柳老益衰。流萍況無蒂。復與飛蓬期。卻埽計不早。出門欲何之。屬方子通惟深。賦詩有云

子。是中有幽人。厲志凌霜秋。又云。愧此高人。

剝啄驚午枕。軒昂見長身。蒼髯如脩竹。定非俯仰人。德公臥襄陽。不踏官府塵。此老頗似之。酒酣見天真。

結廬甚幽獨。已辦老圃鄰。披榛時一來。數面久益親。屬楊彝父

二士出吳下。諸生有楊王。相從寂寞濱。無乃計未良。縱橫三千字。坐可致玉堂。詞章乃糠粃。不直粟一囊。

我媿非子雲。文書味偏旁。窮居似韓子。草樹亦荒涼。時能出佳句。尉我秋夜長。屬王楊二

物色一如此。淒風薄人衣。遙憐卞山客。增歎雉朝飛。固知難為懷。舉滄念齊眉。勿使梨棗間。纏綿生繭絲。

清霜埽蕃廡。豈為一草木。方春萬物遂。苑籞及冰谷。乾坤本平施。憎愛豈有屬。不應懷偏慳。獨遇吾黨酷。

奇窮坐迂疎。此事計已熟。如何半世間。生理常刺促。二篇屬江仲嘉。仲嘉有氣節。多難。比有伉儷之戚。故云。

### 夜坐

飢鳥夜啼棲。復起。乞粟飛光透窻紙。捲簾萬瓦白生煙。桂影扶疎淨如洗。回腸正隨清漏轉。葉下空庭亂  
如霰。青燈耿耿夜何其。雲篆吐蘭初一線。歲云暮矣萬竅號。霜天旅鴈求其曹。月行虛空幾萬里。羣犬吠  
光聲正豪。蒲團瞑目空危坐。逝者如斯白駒過。悠悠昨夢不可攀。此身此心何日閑。

### 春日寫懷

春風遍芳華。一國盡狂醉。窮閭獨不知。但見長蒿薺。秋颿起蘋末。一華初未墜。幽懷獨先覺。意象已淒厲。故知春與秋。初不爲我計。危絃自應悲。寒木終易脆。要之夢中夢。憂樂同一寐。翻然詠軒丘。心量浩無際。

豁然閣

雲霞墮西山。飛帆拂天鏡。誰開一窗明。納此千頃靜。寒蟾發澹白。一雨破孤迥。時邀竹林交。或盡剡溪興。扁舟還北城。隱隱聞鐘磬。

讀陶靖節詩

吾觀靖節詩。三歎有遺音。臥看起詠之。惛惛澹多心。欲學靖節詩。慎勿學其語。心源如古井。衡氣光發宇。言無出言意。妙語自天與。譬如清冷淵。月湛不可取。嶽崎阨驚湍。乃若震雷鼓。斯言可深味。往往棄如土。

到官兩旬四走山野作詩以自勞云

上山偃伸如望天。下山偃仆如深泉。胡爲持此不貲寶。來試萬丈懸崖巔。前人見踵後見頂。反足烏道相攀牽。欬然置我章貢上。水激石罅奔雷填。荒塍曲澗無遠近。渺渺不見墟中煙。土岡鑿路狹如隧。蘇壁藤薛蛟虵纏。寒風颼颼失白日。上有萬木蒼陰玄。航溪之深揭其淺。碎石齧足聲號川。茗山發我一長喟。彼有吳市中仙。飛瓊練玉存故處。祗有井竈無霜鋤。我今正坐五斗米。悔不辟粒從期佺。向來吳松厭羈旅。三歲半逐鷗夷船。故教筦庫著疎曩。坐守兀兀聊窮年。安知求逸得奔走。豈異避挺蒙戈鋌。咄嗟萬事



無必計。努力唯有歸園田。按圖經茗山有梅福鍊丹竈。故有飛瓊之句。

九日雨中對菊忽忽塊坐用雨中對花韻三首

胸中有天游。一室未爲迫。永懷東籬翁。那復有此客。重陰敗佳辰。長雨不爲澤。堆豕對黃華。菜色被臧獲。黃華亦蕭條。伴我雙鬢白。猶能相啣濡。嫩葉供小摘。

去年蛾眉山。痛飲真得計。新蟾繼秋陽。明潔謝點綴。今年坐蝸廬。簷溜落空砌。花開信多雨。會少苦分袂。茫茫大塊間。游子況無蒂。百年能幾何。行復驚改歲。

急心如危絃。未斷先凜凜。風庭忽知秋。中夜不安枕。力行無遠途。積縷成重錦。男兒未蓋棺。雅志安得寢。榮衰非所念。身世固已審。亦復羨久生。聊爲老錢飲。

魏文與鍾繇書云。屈平悲冉冉之將老。思餐秋菊之落英。輔體延年。莫斯之貴。謹奉一

元夕塊坐因用葉翰林去年見寄元夕詩韻寫懷

兒童逐遨戲。先春禱春晴。心如飄風快。目若冰壺明。寧爲惜日計。所願佳節并。老來見紛麗。如乾闥婆城。流光不可挽。譬彼空中聲。那知節物佳。翛然謝將迎。幽燈對簡編。歷歷記所更。斯須閉關臥。鼻息驚雷鳴。寤念北山北。田家已催耕。胡爲異鄉久。空寒猿鶴盟。短日良易暗。凝陰有時晴。何人勸之照。燭燎皆爭明。今年春苦寒。寒威劇幽并。連綿積三白。雲埋闔廬城。深泥浹新雨。行路無人聲。藜燈不來下。箕卜豈復迎。

朝來日照梁。天氣忽已更。稍聞橋市間。簫鼓遠近鳴。吳人尚游樂。急如赴春耕。唯有窮巷士。守窮如守盟。

西安謁陸蒙老大夫觀著述之富戲用蒙老新體作

丈人意何長。縱目文史足。琅然五行落。洞視不再讀。作書兼遠契。衆妙探玄竺。公作莊頌般若。頌數百篇。時時歌四

始笑捧五經。腹高堂發新稿。重複羅籤軸。觀之類窺管。諷味得膏馥。蒙老號為連韻。如云風捧諷馥。

白頭書生黑頭翁。長安時花幽澗松。遠飛近啄雖異志。天命厚薄無雌雄。鈎深采博燥喉吻。守此一畝蓬

蒿宮。杜門不出交二仲。木陰澗曲遙相通。紫囊貝葉資藝苑。款關一見踰三冬。亭亭漫吏多所歷。乾死書

螢心似漆。王門賓閣不留行。赭顏跣足搜泉石。茅簷正欲結雲根。竹葉榴花薦餘瀝。當從元亮賦言歸。木

茹麻衣永投筆。蒙老號為合離。藥名如當歸木筆。

十月五日集季野家歸作

賢愚孰無營。急景信可惜。如何闔廬城。乃有此閑客。懷安豈初志。運甓有餘力。相從無何鄉。邂逅一日適。

虛窗得朝陽。寒凜作春色。琴書羅棊几。一一淨如拭。畫沙見奇蹤。落屑非近識。似追永和還。未覺正始隔。

崢嶸衡霍圍。莽蒼雲夢澤。時華玄低叩。幽鳥共深寂。誰驅此變幻。戲納方丈域。慚公慶春釀。澆我憂思積。

豈無車公語。謂方顧匪伯仁匹。自謂長檠蠟華摧。起視霜月白。酣歌美清夜。擁髻侍通德。參差吐幽妍。鑿

落豔芳碧。觥籌不留行。為問此何夕。言歸謝主人。五斗安可極。

戲示江協律漢

酸寒北山尉。憔悴孔州守。枯魚同處陸。濡沫賴詩酒。當時年尚壯。意氣亦何有。祇今雙鬢華。十載一回首。仕初君似遇。遊倦吾已醜。邂逅記昔遊。空嗟漢南柳。

江再和戲答

當年季將軍。晚節河東守。誰令一人譽。揮去坐使酒。長卿起遐陬。落筆賦烏有。要之乃雕篆。意不在黔首。窮通付造物。世俗浪妍醜。何必送五窮。呼奴結車柳。

空相僧舍書事

午景入疎竹。堂陰筠粉香。疏簾撲空翠。無風自微涼。碁聲破禪寂。日轉幡影長。霏煙觸垂爪。泛乳搜枯腸。投局起尋勝。徘徊雨花堂。巢蓮見靈龜。信有千歲祥。徐觀乃跛鼈。圍圍循菰蔣。笑罷能歎息。是非可兼忘。卻坐對談麈。冰松想千章。斯須二三子。矯若驚鴻翔。府中有料理。不作功曹狂。杜甫為功曹云。東帶發狂欲大叫。簿書何急來。

戲贈江仲嘉司兵

君不見謝公栖遲樂東土。起作司馬征西府。莫年談笑有穰孫。鶴唳風聲走強虜。又不見子猷剡川高興。肯隨鶴書落人間。不知騎曹底官職。朝來拄頰看西山。平生清真翠崑老。泉石膏肓偶同調。歲寒落落

見孤松。不忍低眉寧枯槁。年來無米繼朝炊。聞說吳興富魚稻。不妨來作古司兵。士卒投醪止鳧藻。美哉洋洋雪溪水。秋塘百里荷花繞。當年釣徒放浪處。醉目悠然送歸鳥。斯人不死世不識。往往凌波弄瑤草。君方參同平龍虎。我欲治荒種梨棗。會當月夜見厖眉。一笑超然凌八表。

張志和自號爲江湖釣徒。

送趙子書奉議歸睢陽用熊倅韻

紛華眩人劇朱碧。子獨好書如好色。王孫被服甚寒生。射策君門先破的。榮州書窟三萬卷。錦囊付此厖眉客。南遊句吳北大魏。亦復徒勞問刀筆。不唯脣齒腐經史。正自雲山鑱胸臆。老來息交思簡事。爲子忘劬廢晨昔。春風滿帆送歸舸。回首清游如昨日。知君名駿定千里。不待朝廷訪幽側。有書時寄鴈南飛。願我漁樵正爭席。

同趙奉議離吳興。江仲嘉與其兄仲舉送百餘里。醉中戲作此句一首。

大江飲酒如澆灰。小江飲酒顛如雷。扁舟相送不道遠。百二十里雲帆開。云亭老人窮不死。故園茅屋荒蒼苔。闔廬城中一畝地。已辨甕牖鋤蒿萊。吳興上佐吾黨士。十年縱賞西王臺。眉間黃色絃綵服。掩樓長嘯春風回。要須酩酊酬此別。不離萬頃添金杯。明朝相望卽湖海。縱有美酒何爲哉。

過毛達可友給事覽壁間舊詩次韻二首

堂前清颺發。樹外赤日西。坐令天壤間。氣候忽不齊。解帶席嘉蔭。長哦壁間題。故應有神護。塵土不得迷。

前年款公門。鸚鵡亦已啼。今年復羈旅。庭莎欲鳴雞。西游有底急。觸熱忘卑棲。似爲飢所驅。不計轍與蹄。綈袍意彌厚。槃餐洗羹藜。磊塊久不澆。醇醪代朝齏。襄陽乏新句。夜直難相攜。黃華非不佳。寒澹每見少。蕭蕭亦無言。懷抱不自曉。深嫌小桃夭。欲伴霜松矯。窺叢慰寂寞。時有南飛鳥。主人真賞奇。灌植勤便了。徘徊傍東籬。高興在塵表。坐有白頭生。臨風百憂繞。

北固懷古

阿瞞長驅壓吳壘。飲馬長江投馬箠。英雄祗數大耳兒。彷彿芒碭赤龍子。幄中況有南陽客。布衣躬耕無  
甌石。當時鼎足計未成。聊此一奇空赤壁。人隨流水去不還。臥羊頑石留空山。如今留石亦煨燼。山與長  
江相向閑。

秋華無幾尙有紫薇相對里巷間

晚花如寒女。不識時世妝。幽然草間秀。紅紫相低昂。榮木事已休。重陰闕深蒼。尙有紫薇花。亭亭表秋芳。  
扶疎綴繁柔。無復粉豔光。空庭一飄委。已覺巾裾涼。手中蒲葵箠。雖復未可忘。仰視白日永。淒其感冰霜。

秋雨三首

細字忽難讀。松窗失朝暉。開簾視天宇。屯雲凝如鬣。霏微乍噴灑。翕忽看淋漓。斯須建百川。中庭卽方池。  
秋雷亦動地。勢洶萬鼓聲。虛簷忽無聲。蒼狗變白衣。飄搖露穹碧。涼飈洗蒸炊。雨師真解事。作止適所宜。

十日儷辰次。如環了無端。人言秋甲子。畏濕不畏乾。向來譙門道。旁立三尺壇。故勤壁間緣。一起泥中蟠。青衣躍且躁。有如沐猴冠。先聲忽灑道。直此辰與干。邇來未旬浹。三見急雨寒。黃流抹河草。連檣度平瀾。良苗有佳色。未覺千畝寬。時暘亦須早。無使江湖翻。頃年吳江大水。斷長橋。吳人相傳爲太湖翻。華首三不遇。求田亦良圖。莫嗔湖海士。豪氣故不除。扶犁本吾事。二頃終勝無。繞舍生蒿蓬。閉門種英蕪。從渠百尺樓。笑此蝸牛廬。吳中久卜鄰。會從古人居。荆溪一塵地。儻與求羊俱。屠門過大嚼。一雨喜有餘。正恐二三子。聯翩躡雲衢。空令千里駕。悵望黃公壚。林德祖周憲之皆居蘇。郭慎求田園在陽羨。

過紅梅閣一首

春風如醇酒。著物物不知。能使死瓦色。化爲明艷姿。寒枯出繁秀。巧與節物期。江梅故幽獨。綽約不自持。居然北枝後。迨此白日遲。春風日浩蕩。醉色回冰肌。清妍有餘態。衆芳謝凡卑。憑虛一回睇。俯仰歲月馳。所恨培雪根。向來歲寒枝。差池弄芳晚。坐令顏色移。顏色固嫵媚。幽香無故時。

題蔣永仲蜀道圖

梓州別駕真雛鳳。賞古探奇坐飢凍。要窺瓊構蔚藍天。直上潼江歷秦宋。每逢佳處靜盤礴。流出胸中九雲夢。乾坤塊坱本無迹。我獨毫端發神用。戲驅萬變寄陶寫。軒豁端倪巧搏控。蒼筠擢秀飽冰雪。古餘撐空中梁棟。奇疆那得在山谷。回首何年委堅重。輪困偃蓋屈金鐵。天矯驚虬起巖洞。春江莽蒼迷東西。漢

南老柳參差垂。煙中遠近見木末。明星已沒城烏啼。平生險怪三峽水。古木巖窅陰風吹。石間雷雹般九地。出入噴薄無窮時。我身躡足半天下。偃蹇故是山林姿。南行瀟霍北嵩洛。應接不暇空狂癡。作詩寫意如捕景。況有三絕窮天機。清晨對此悅自失。眼中太白橫峨眉。請君十襲秘緹革。恐復仙去歸無期。

寄開化李令光

我行阡陌間。苗麥已復青。茅茨間新稿。雞犬有和聲。不見吏索錢。田家得其生。雞犬亦肥字。不遭無事烹。於斯可觀政。豈在赫赫名。父老亦相語。驩然就春耕。官祖及時了。卒歲樂無營。

山間古梅林。有鴉集其端。不飛亦不鳴。彈射莫敢干。下窺羣雀雛。啄顛剝其肝。欣然舐兩爪。意得良自安。飛來多凡鳥。助此凶且殘。安知萬山曲。亦復鳴棲鸞。相咻固不可見。嚇技亦殫。衆鳥既有恃。相期在歲寒。園居荒蕪。春至草生日。尋野蔬以供七筯。今日枯枿間。得蒸菌四五。亦取食之。自笑窮甚。戲作

此詩

平生囁嚅口。出語無媚悅。定非肉食姿。賦分在藜藿。僑居得空園。窮陋亦清絕。分陰豈不惜。飽睡送日月。蕪菁不須種。衆草今已茁。朝來一雨過。青細皆可掇。東籬有更生。杞狗僅堪埒。乃知天隨生。豈羨五鼎列。堂萱不吾負。芽甲破春雪。糜身薦瓢箪。解我憂思結。薺花雖未繁。著地爛於纈。驚雷發蒸菌。自可當夏鼈。馬蘭亦芳脆。人苧固凡劣。晴朝當炙背。俯僂事挑抉。家人各盈襜。汲井手自挈。滿炊太倉陳。侑以冬菹冽。

盤中長闌干。置饋每虛撤。恨無籜龍苞。此味那得闕。長謠青青槐。饑液想庭樾。妻孥覆相誚。男子志勳烈。君非老浮圖。菜本可長嚼。況茲閑草木。豈為刀七設。乃翁笑摩腹。萬事付一映。此中有真趣。勿為兒輩說。

九月七日夜夢王元規。詰旦其弟元矩適相訪。感而作詩一首。

故人入幽夢。彷彿平生懷。心知九泉隔。意象慘不開。哦詩不成章。撇悅誰能裁。曰此蕭爽士。寧當沒黃埃。  
夢中作詩兩句。似是此意。然不記本語。清晨客在門。乃自烏衣來。典刑見難弟。共歎一息乖。幽明不可詰。此夢何為哉。回

觀南園道微徑已蒿萊。

卜築西塢。和柳子厚南澗中題。

出處初漫浪。淹留失佳時。時英盡珠璞。寧復見誰差。一去四十年。伏櫪久已疲。幸此歲將暮。穿雲弄清漪。窈窕煙塢中。蒼陰晝森垂。茲焉寄茅屋。橫仄任所宜。谷口翳杉竹。柴門畏人知。誰言一丘壑。儻與汗漫期。

寄菱湖江仲長柔。和柳子厚初秋夜雨贈吳武陵。

急澗無止水。秋蘭無故叢。別來今幾年。坐閱毗嵐風。交親半鬼錄。生者仍衰窮。及茲過君家。樽酒一笑同。知我厭鞀鼓。煩君韻絲桐。相攜步林壑。暫覺萬慮空。樗社寄莊叟。自謂醉鄉著無功。謂仲醒來百憂集。尙

寐期無聰。

晨起梳頭髮白且稀有感



余髮已種種。我懷亦依依。風林無安巢。寒日無餘輝。束髮隨官牒。前言服良規。豈唯會計當。自詭牛羊肥。妄獻北闕書。野芹安足希。一挂邪士籍。徒嗟寸誠微。惓惓剛畝志。正作禍患機。羈危不如人。行行向知非。世變不可料。胡塵暗王畿。真人起白水。帝命式九圍。誤沐宣室召。白頭侍經幃。誰言螢爝光。敢近白日暉。誰言草木萌。敢試雷霆威。野馬立仗下。軒昂妄鳴嘶。棄之老牛阜。無復瞻龍墀。天公了無私。與奪適所宜。時方急功名。選悞安所施。士方貴才辯。安用鈍訥爲。常人與善士。何異於愚癡。譬之救焚溺。珮玉行逶迤。弃捐乃其理。刺天看羣飛。幸非高明室。百鬼浪見覩。自從伏湛巖。風淫得偏靡。有足不得行。有手不得持。每思林野娛。濟勝憂無期。堆豕不得往。如驥繫且韉。如盲不忘視。如寒不忘衣。如痿不忘起。如羈不忘歸。但願老窮健。長甘北山薇。豈復理鬚髻。峨冠待晨曦。

自仲嘉云亡未始見夢舟行夜入吳興境有夢如平生感而賦詩四首

江子隘斯世。翛然向方蓬。一朝成千古。寤寐不復通。夜入霅溪境。胡然見幽夢。高標何所似。俯仰風中松。談笑如平生。爛爛雙方瞳。去年經行地。陳迹亦已空。故應玄真老。相與遊無窮。諸人久不死。而使武子先。斯言太癡絕。愛惡無乃偏。君看雅正情。播在三百篇。秦人哀三良。百身寧可捐。相鼠有深刺。嗟哉胡不遄。此豈惑者歟。加膝墜諸淵。乃知孫楚狂。未必非公言。世以勢論士。君誠不如人。揚揚乘軒者。志滿氣甚振。外見七尺軀。中有萬斛塵。鑿柄固難入。鸚鵡豈相倫。

炙手苟可熱。行路爲雷陳。高棲冷如鐵。骨肉不得親。誰能獨無死。榮辱久乃真。皇天非無知。伯道固有後。百年能復幾。僅比一昏晝。久知彭錢天。不及殤子壽。向來簞瓢生。廟食至今侑。東陵雖飽死。千載有餘臭。梟蕃得刳腸。若折謾遺骸。試當問玄夫。此理或可究。

初到書局以萬七千錢得一老馬盲右目戲作古句自嘲一首

蹄間三尋汗流赭。九達雷雹爭飛灑。我窮那得騁追風。正擬虺體行果下。平生畏塗飽經歷。夜半臨深無馭者。故應造物巧相戲。卻比盲人騎瞎馬。李南知音當促步。廣漢騰嘲不相假。執鞭良稱寒翁兒。並轡聊從杜陵夏。龐然病顙豈其類。老矣問途那可捨。徑煩一夫事刷秣。似桂新芻不盈把。向來伯厚亦安在。結駟雞棲同土苴。他年東去把撩風。縱爾逍遙汴東野。

晁無斃將之錄示近詩有和其兄以道說之詩次韻以致區區兼簡以道

談詩如談禪。練性如練墨。以道深於明理頗喜造墨壯心悟龜毛。少作豈蛇足。平生甚元龍。未信今伯玉。十年得投閑。高臥謝寵辱。定知貧勝富。固自平爲福。著書著名山。會使山鬼哭。結廬近三休。爲米時一出。猶嫌佛場選。肯問燕臺築。俗人難與言。鏡鬢遺盲禿。前年客長安。正覓三釜粟。塵中一傾蓋。爽氣岷峨綠。別來更崎嶇。寡陋嗟我獨。塵埃篋中書。有手不暇觸。

次韻寄謝公表韓公朝請

世人如鯽魚。自蔽翻吐墨。猩熊亦何罪。不衛脣與足。要當時木鴈。安問定石玉。向來休休翁。老去稱耐辱。迹高名自汙。卒享清淨福。肯爲接輿生。叩木妄歌哭。韓公早聞道。垢濁久已出。終成九層臺。不棄一簣築。長安列戟第。桐影將缺秃。寧辭治中興。且食祠宮粟。胸中荆棘盡。華髮當更綠。抗塵我何庸。勇退公所獨。何如善刀藏。聊放虛舟觸。

和葉翰林送李從事

賞音真兩難。邂逅多契闊。一朝間容刀。三歲歌采葛。古人抱修能。初不露錐末。誠令處囊中。談笑堪式遏。豈無識玉人。顧恐鑠金奪。遂令緇衣好。斂迹裁自脫。畫地杯已疏。志鵠弓遽撥。徒嗟湖海上。髮白牙齒豁。懷公劇梅林。念至失焦渴。臨風賦新謠。憂思不可撥。

自寬吟戲效白樂天體

武陵謫九年。下惠仕三已。或窘如拘囚。或了無愠喜。吾生憂患餘。年忽及耆指。偏痺未全安。抱病更五禩。進爲心已灰。弃置甘如薺。坐狂合投閑。佚老宜知止。向令身安健。不過如是耳。每思古窮人。我幸亦多矣。照隣嬰惡疾。羈臥空山裏。纏綿竟不堪。抱恨赴潁水。文昌兩目盲。無復見天地。簡編旣長辭。游覽永無冀。吾今雖抱病。蹇曳非頓委。時時扶杖行。積步可數里。校之臥牀席。欲坐不能起。雖扶不能行。懸絕安可比。時從親故談。亦不廢書史。右臂故依然。運筆亦持匕。籃輿時出遊。初不廢牢體。況無他證候。色脉苦無異。

詳觀動息間。儻有全安理。侍祠了無庸。竊祿愧索米。借居浮屠宮。非村亦非市。廷堂甚爽塏。高屋敞窗几。郊林接溪水。眼界頗清美。嘗聞天地間。禍福更伏倚。藉令衰蹇身。終老只如此。何須苦嗟咨。未必非受祉。形如支離疏。飽食逸終世。目盲如宋人。全生免僇使。平生歎遠遊。今我在桑梓。田園接家山。區處及耘耔。平生困鞅掌。今我恬無事。寢興縱所如。出處不違已。病來益尊生。對鏡空相似。永無貪欲過。稍習衛生旨。不爲六賊牽。豈受三彭毀。人言病壓身。往往延壽紀。大鈞默乘除。萬一理如是。安全固自佳。蹇廢亦可爾。死生猶寤寐。況此一支體。細思安否閒。相去亦無幾。如何不釋然。萬事付疑始。

贈別吳忱宣德并序

余客都城。邂逅河南吳誠伯。偕寓興國僧舍。其爲人樂善嗜學。練熟世故。徙居蘄春。適再世耳。而蘄春人至都下者。無賢不肖。必來問訊。其廬所傾下。往往知名士。故舊有以急告。隨所厚薄。賙之。誠伯自言尉光山時。捕得強盜十許人。賞應第一等獄具。部送府。盜親戚望哭道旁。或扶老攜幼。號戀不忍聞。誠伯顧盜非素猾賊。爲人受害者。一旦迫飢寒。適爲盜。乃陷重辟耳。因以盜還送縣。稍緩其獄。久之皆得不死。賞固不論也。凡此過世俗遠甚。今茲同寓僧舍者。至數十人。乃獨見親厚。此又何也。余調官東歸。誠伯從余索詩爲別。匆匆不暇。還家作此寄之。

吳公河南守。薦士得賈生。偉茲天下士。何止千人英。吳公失名字。功業曖不明。要非萬頃陂。莫著橫海鯨。

當時好賢意。豈愧勃與嬰。蔽賢如面墻。自使兩目盲。好賢如力穡。穰穰嘉穀成。至今餘慶在。望著河南城。  
如君豈其裔。樂善莫與京。高門二千石。世德故可評。平生周旋士。往往凌青冥。作吏今十年。讀書不求名。  
向來光山政。何異古所稱。嗟哉士營已。寧使我負人。聊須借汝頭。一用朱吾輪。今君乃能爾。所弃如毛塵。  
故知古賢世。尙見風俗淳。猗予一畸士。落落良可憎。折腰務求合。俗眼竟不青。憧憧九衢內。邂逅蓋一傾。  
何從乃知我。頓有交舊情。相隨若形影。出語見肺膺。長安速化地。頑鈍終無營。中宵起歸思。襤被東南征。  
投林無擇巢。促步無安行。寧嫌蕞爾邑。要是衆不爭。紛紛同舍客。聚散兩不停。毛子去山邑。哦詩對崢嶸。  
想見簿領閒。爛如九秋鷹。毛世高深州戢羽翮。題輿重廬陵。胸中若懸鑑。圭角不自呈。上官闕石老故游  
倦。飄蕭數星星。崇山古惡地。無乃煩笞榜。音彭。石興宗振有子程翁頗專嘿。兩版晝夜扃。時時繫烏帽。  
匹馬挾二鯨。安知剎那間。一臥不復興。程興其餘復誰在。誰與交忘形。去駕雖結轍。來檣競揚舲。懷君尙  
留寓。京塵染裾纓。其誰念久要。佐子飛且鳴。況君緇衣後。世故飽所更。會當力推挽。橫絕非階升。卻願五  
湖上。有人方耦耕。

送林德祖致仕東歸并序

壯而仕。老而歸。理也。士溺於仕。故困而知返。病而能休。老而知止者。世則猶然貴之。若德祖於斯三者。  
無一焉。然去官如脫屣。是乃真可貴矣。德祖方未仕。以學行有盛名。四十起家。至爲部刺史。所歷皆儒

官入糾天府。於今爲要地。年始登六十。茹蔬飲水。神幹儼如也。一朝浩然有歸志。退自府舍。不謀於朋友。不告於妻子。夜半狀上府。晨朝可命下。斯亦奇矣。余行道南徐。過故人蘇承祖。出許振叔書。道德祖掛冠勇決之狀。余時冒初暑。向遠途。忽忽煩憤。聞之灑然。如挹寒流。而濯清風也。而或者疑焉。余曰。子無異也。士溺於仕久矣。其視爵祿。猶飢者之羨膏粱。渴者之赴水泉。寒者之陽。而暘者之陰也。意若攀垂綆而上千仞。不可須臾置也。今乃有人負通博之才。居軒冕之會。非有宜去之年。不得已之事也。然且一朝去之。彼以夸斃之心。計之是。豈不可駭而疑哉。且仕不仕。何常之有。德祖非爲亢者也。非要利者也。徒曰適吾之適。以遂吾之性而已。雖然。自砥節礪行之詔屢下。所以愧責貪競者之辭實深。聖主之所望。士夫之恥也。今觀德祖之去就重輕。亦足以振士風矣。夫仕者畢心力以奉所職處者。先廉退以風士類。是皆有益於時者也。德祖豈不賢遠於人矣哉。旣遇諸淮陰。舟翩然東。使人有冥鴻之歎。因爲詩以附諸公之末云。

浩浩聲利閒。靜躁同一區。排扃日中市。有類逐獸趨。中朝尺寸地。衆睇咸睢盱。安知大雲客。出與飛雲俱。翛然棄之去。初不計卷舒。紛紛軒裳士。瞠目口爲喏。茫然更歎息。不問賢與愚。乃知楊少尹。未足繼兩疎。時當老而傳。不失仕且居。非同會稽史。苦誓困簡書。不比狂季真。索身憂病餘。耆年了無事。方當騁亨衢。投簪逸湖海。沛若縱壑魚。雖無揮金事。日者誰公如。清風激多士。故是明時須。恨無采詩氏。儻有東歸圖。

餘杭法熹院。荆文公書堂。文公康定中讀書於此。

鍾山太傅起從龍。鼓動風雷指顧中。未見圖形求傅野。豈知徒步客新豐。青鞵曾訪餐芝老。許遠遊登崑  
茹芝。乃餘

杭山中白首唯餘擣藥童。寺僧言文公多養疾此堂。當時  
給侍童子。今八十餘歲矣。藏壁故應留斷簡。至今山鬼慟悲風。

送蔣主簿入都赴試一首

東南貢吏紫髯郎。一馬駸駸客路長。袖裏山林洗塵霧。腹中文字了縑箱。流年過我長如許。樂事知君詎

未央。行恐飢來驅我去也。遮西日上河梁。蔣有名畫小軸。常置  
懷袖。名壺中圖。

罷吏客郡城已數月。滯留忽已歲暮。浩然興歎作一首。

一行作吏向吳城。五見娵隅上薄冰。魏覬三章堪自約。殷源百尺敢言登。擲撇祗送人爲郡。噎媚初非我

負丞。鞅掌棲遲俱害性。不知鬚鬢欲侵凌。

寒夜遣懷一首

強醉重雲欲散鹽。三更飛霰忽驚簾。大呼何與癡人事。此意多應俗士嫌。出戶仰看天漫漫。持盃愁作夜

厭厭。消除心事都無處。下盡中軍三百籤。

許主簿見和過有推借再作奉呈

身謀自昔須三窟。世味端能敗一薰。醉裏閑愁濃似酒。春來歸思亂於雲。松栽咫尺傳盧老。棗實方將訪

許君。見許遠遊與王逸少書。卻喜雲孫共來往。扁舟時入白鷗羣。

用前韻作招許主簿

風騷無復見黃初。尙想應劉載後車。病骨不知緣底瘦。愁眉時得爲君舒。動人春色來隨鷺。入眼溪流靜見魚。祇有此中多好句。可來茅閣試憑虛。

謝江仲舉惠酒

山城無物可忘憂。但有平原病督郵。知我囊中無白水。煩君若下出青州。芳甘未謝三年醞。傲兀能消萬古愁。會待東郊春意動。鳴鞭乘興草堂遊。

次韻張祠部敏叔游滄浪蘇子美故園

醉倒春風載酒人。蒼髯猶想見長身。試尋遺址名空在。卻歎張羅事已陳。稍置曲欄穿徑竹。別開高閣俯汀蘋。拏舟更欲陪清賞。要看毫端藻繪春。

哦詩夜坐。餅壘久空。無以自勞。寄吳興趙司錄江兵曹。

詩成不直一杯水。年大常懷千歲憂。何須中令能強記。正要將軍爲破愁。故人久負丘壑志。公子欲尋梁宋游。相逢儻有蒲萄綠。肯向西涼博一州。

九日寫懷



節物驚心兩鬢華。東籬空繞未開花。百年將半仕三巴。五畝就荒天一涯。豈有白衣來剝啄。亦從烏帽自欹斜。真成獨坐空搔首。門柳蕭蕭噪暮鴉。高適九日詩。縱使登高秪斷腸。不如獨坐空搔首。

### 窮居苦雨

慢膚便腹轉疎慵。睡足茅簷目過鴻。墨客縱令三尺喙。木奴何似十年功。門前羅雀非吾病。竈底生蛙不世窮。舊雨未乾新雨漲。可憐愁絕力田翁。

### 避寇村舍

再脫兵戈裏。全家走路塵。百年同是客。萬事不如人。幻境終歸盡。生涯正要貧。故人知在否。魂斷楚江濱。寇至之日。江子支趙叔問適泊舟江口。未知今在亡。

### 和答何蒙聖刪定

胸中林壑寄商顏。門外紅塵了不關。年去人猶昔。人耳身游才與不。才間與君同覺夢。中夢願我長嗟山。復山何日方舟歸。里社韋編應許試窺班。蒙正深於易學。

### 和江仲嘉見寄

華門蓬舍不知春。車似雞栖甑有塵。千里傳情望雙鯉。一杯和影祗三人。交親離合同巢燕。身世羈危獨繭綸。四體不勤心擾擾。擬將玄旨問吳筠。江修練故有此句。

酬穎昌葉內翰見招

觸熱西遊沂濁波。京華旅食謝經過。年侵鏡裏今如此。歌缺壺邊可奈何。賓閣遙知懸玉塵。直廬應許到

金坡。唐孟浩然故事。須公一節趨環召。猶及昆明百步荷。

旅舍寫懷

半世江湖寄此身。冰墟何意及陽春。離騷痛飲非名士。款段還鄉亦善人。病木作花真強活。長魚沈陸恐摧鱗。清時英俊如麻葦。敢歎長年甑有塵。

林德祖有詩寄光祿蔣卿夢錫璿及送朱博士駿發終篇皆見及次韻寄懷

閉門那復賦三都。傳世何妨強著書。東海遺榮行路歎。南山歸隱故人疎。尙平婚嫁無餘累。摩詰身心即

淨居。六十挂冠雖早計。絕勝銜索泣枯魚。聞德祖兒近已娶婦。故有尙平之句。

金華玉府九天開。夜誦何人薦逸才。太學諸生終莫挽。長沙賢傅幾時來。別離傳恨空魚素。歲月如飛逐

管灰。亦欲相追老湖海。稽山肯放酒船回。德祖既休致。不復作都城書。余獨時致書問訊。故有空魚素之句。

和江子我端友

雨腳初收曉霧開。青鞵布襪好追陪。幽人無事長相見。佳句有時還自來。白業誰能超石壁。朱顏亦任發春醅。憂來忽憶燕南信。安得闔鄉老萬回。

別後有懷子我追用巾字韻作寄

漉酒空裁五柳巾。一觴相屬念情親。玉川奴婢今猶昔。錦里田園老更貧。冰洞清泉誰共酌。風篁幽徑好尋春。開年晴暖須歸去。還向江湖覓故人。子我東去。云欲居無錫。或過錢塘。故有冰洞風篁句。

鄭希尹大夫會吳中諸老唯方子通不至余作詩呈希尹

黑頭新貴擁朱輪。交會耆英久不聞。博識猶多漢郎吏。敦詩仍有晉將軍。一作悃。悃無華。漢郎吏。河流曲

曲靈光異。芝蓋莖莖瑞氣芬。是日九坐想城東隱君子。無心閒似嶺頭雲。張敏叔詞部。章伯成戶部。故有郎吏之句。

張仲謨嘗帥熙河。故有將軍之句。

### 會稽旅舍言懷

北山之北寄柴扉。茅屋參差倚翠微。老罷那知還作客。春來無奈苦思歸。淹留恐復荒三徑。潦倒寧堪扈六飛。乘鴈雙鳧成底事。不應容易裂荷衣。

次韻江子我見寄長句余時初忝秘書少監

泥行正作龜藏穴。霧隱初微豹一斑。豈有高標如冠玉。況無談舌解連環。一登文石趨宣室。三竊蟠桃向道山。早晚共尋雞黍約。林泉猶得半生閑。

### 山近

山近雲多態。身閑夢亦幽。紙窗先得曉。布被最知秋。海眼來陰冷。雲根逗暗流。結茅容我卜。投老為君留。

丁巳九日。攜酒要叔問登通道門樓。而江彥文寄玉友適至。因用己未歲吳下九日詩韻作。

涼秋風物正清華。極目高樓不見花。老境固知無樂事。醉鄉聊欲寄生涯。銀鈎遠寄清桐滑。玉液親題赤

印斜。笑引壺觴成一醉。歌筵遙想鬢堆鴉。聞彥文是日有盛集。

戊午歲九日。復與叔問登城樓。再用前韻作。

兀坐空哦服九華。衰顏深覺負黃花。但令無事長相見。敢歎百年生有涯。雉堞曉登千嶂抱。穀波秋淨一

溪斜。歸來更展新詩卷。醉墨淋漓似老鴉。盧仝有卻來案上翻墨汁。塗抹詩書如老鴉之句。

蕓蝸廬吳下用葉翰林見寄詩韻作

四海無廬置此翁。故營松竹儘囊空。明知計出栢馬下。正擬身全木雁中。東郭易成生草舍。南村先怯卷

茅風。向來豪氣今如此。敢與元龍較長雄。張志和結廬東郭。茨以生草。余結廬皆竹椽松柱。故有松竹之句。

和白樂天二首寫懷仍效其體

莫把蒼龜更問天。向來心事已蕭然。塵中恂悅常如失。夢裏呻吟半不眠。三徑松筠終問舍。五湖煙水不

須錢。艾耆相去能多少。早擬懸車十五年。

中臺退食每逡巡。不向重華即淨因。豈但語言都少味。亦知才術不如人。五雲華闕通閨籍。萬頃煙波擲

釣綸鳧雁去來何足道。從容居士宰官身。

和趙子雍游石園

長嘯西風一散襟。重陰疎影靜相臨。水通笠澤秋容淨。竹種玄池野思深。石磴埽雲留晚步。松谿隨鶴盡幽尋。舊遊回首成春夢。太息憑誰寫寸心。

太湖泐檄西原道卽事三首

司空山頭朝出雲。西源渡口十里陰。煙中雞唱未及午。白雨作泥泥已深。上崖下谷鳥道中。前屨後巾魚貫從。西山路暗光已夕。東山山頭餘日紅。道旁甕盎如汝陽。石間電雹如呂梁。不知身世在何許。舉頭四山鬱蒼蒼。

登富陽觀山亭

橋公宅中木參天。孫郎山前春燒煙。大橋不向五湖去。建康宮深空歲年。

題蔣崇德彞所藏明皇夜遊圖

燃膏飛控逐流光。露溢金盤樂未央。擬跨八龍窮轍迹。誰令一馬向銅梁。

七夕

阿母雲車下建章。茂陵秋草竟荒涼。漢庭卿相如麻葦。只數窺窻陸戟郎。

胥門老蔡定凡仙。會有神人與作緣。自笑塵容滯窮骨。不如雞犬上青天。

江仲嘉行邑將歸見寄絕句次韻

骯髒江公故不羣。八關三窟斷知聞。喜談狗馬從無鬼。獨抱冰霜似此君。  
常嫌小知漫間間。曠度蕭然只愛閑。不借黃梁留客醉。嚴關三鼓款銅環。  
勸農行稼亦看山。牛驥何妨共一閒。應笑云亭老頗僻。背崖無地結三間。  
漾漾扁舟拂水飛。飄飄蘋末細吹衣。傳呼匝地來連壁。東郭人知典午歸。  
仲嘉行縣歸。還府。率以爲常。

詩城端欲據天山。酒戶猶能敵飲仙。幽事相關公事了。如屏千嶂翠連綿。

三峯草堂

庭前雙梧一畝陰。禪房蕭森花木深。清霜脫葉空山響。夢覺寒窻松月林。  
雨洗千山翠欲浮。稻畦松澗已爭流。朝來風急凝雲盡。歷歷鐘聲過五州。

避寇儀真

北固山頭豎白旗。西津渡口僕姑飛。將軍笑引三千騎。洗馬鵝翎問道歸。  
是日聞浙西總管提兵自瓜洲趨杭。

茅茨低小對青山。准擬餘年向此閑。南望青山是黃鶴。欲憑黃鶴寄書還。

戲題畫卷

五載京塵白鬢鬚。丹青遐想寄衡巫。如今埽迹長林下。卻對真山看畫圖。曾中雲夢本無窮。合是人間老畫工。常恨無因繼三絕。倩人拈筆寫曾中。

答和江子我

長江袞袞葉蕭蕭。心與虛空自寂寥。過眼文書風度穴。迎秋衾枕帶忘腰。柳標橫擔入亂山。恍如黃鶴倦飛還。不妨步屣時來往。山北城南一望間。

駐蹕揚州。以提點刑獄公廨為尙書省。禮部在西北隅。卷書樓下。甲戌年。余嘗寓止焉。今寓直

其下有感。

三入南宮更白頭。夜寒持被卷書樓。那知跼足半天下。投老浮山省舊遊。

戲題郭慎求所寄書尾

老罷歸來寄一塵。交親南北散如煙。誦君雪暗天涯句。離合升沉二十年。慎求為海州幕官行縣。遊于初

去家。舉頭語天公。慙慙推日車。頗為吾黨所推。斷句云。

題叔問燕文貴雪景

一壑回環十二峯。茅茨送老白雲封。如今塵裏看圖畫。卻愧當年邴曼容。

新作紙屏。隆師爲作山水。筆墨略到。而遠意有餘。戲題此句。末句蓋取所謂柴門鳥雀噪。游子

千里至也。時守秀州。屢乞宮觀歸山居。未遂。

急雨初收山吐雲。清溪曲曲抱煙村。拋書午枕無人喚。歸夢真疑鵲噪門。

會稽喜得家書

黃耳東來一破顏。直從松竹報平安。遙知雲頂峯前住。霜鬢風篁六月寒。

試端溪古硯偶書二首

白首重來祗厚顏。有懷端欲向誰傳。語言相對都無味。色在蜚鴻落照邊。人生當復幾兩屐。我飲寧須三百杯。破硯猶堪磨老境。醉拈椽筆埽霜煤。

卽事

雲裏琤淙十九泉。茅茨深寄白雲邊。何年斷取仇池境。擲過荆吳萬里天。

偶作三首

薰風習習動林光。紫翠陰中草木香。山鳥一聲清晝永。白雲深處北窻涼。老向甘泉補侍臣。歸來還作臥雲人。一重一掩藏煙塢。三沐三熏屏世塵。



誰遣生駒玉作鞍。春來苜蓿徧春山。自知不入黃麾仗。振鬣長鳴出帝關。

書壽昌驛

歲暮白日速。風高黃葉稀。歸心與寒鴈。一夜向南飛。

和翁秘監彥深喜絕句四首

朝來喜氣溢層霄。側聽封人共祝堯。密雪正應歌九扈。疾雷先已破三苗。時初殄  
睦寇。  
卽看新綠歸千畝。還見陳紅積九年。便覺雨暘如有意。不須花草苦爭妍。  
九重誠意格天關。一夜風回萬壽山。銀闕瓊臺迷遠近。真疑羣玉接蕭閑。  
風鈴相語紙窻鳴。拭縮飢鴟凍下驚。卻憶剡中高興盡。雪消江草喚悲生。



# 竹洲詩鈔

吳儆字益恭。初名侑。避秀園諱改名。登紹興二十七年進士。調明州鄞縣尉。歷官至朝散郎。知邕州軍州。轉泰州。乞祠主管台州崇道觀。卒于淳熙十年。謚文肅。當時朱子及張南軒、呂東萊、陳龍川、范石湖、葉水心、陳止齋諸公咸與友善。其自邕而入對也。南軒書孔子之剛、曾子之勇、南方之強三章以誌別。嘗作尊己堂記。朱子見之喜曰：往者張荊州呂著作皆稱吳邕州之才。今讀其文。又見其所存。其爲聖賢所許如此。四方從學者尊爲竹洲先生。

吳子旣結茆竹洲以娛親。復於居之前沼爲亭。以朝爽名之。蓋亭西面於晨興看山爲宜。抱甕自灌園。勝游貴人門。有口自酌酒。勝與俗人言。園中多蔓草。晨夕費鋤芟。遇夜或風雨。安得久盤旋。村酒不常有。有亦多苦酸。而沉醉中語。繆誤人所嫌。不如飽喫飯。清風北窗眠。眠多則無覺。夢境仍多端。惟有古斷簡。言行皆聖賢。讀之未竟篇。眇昏如夢間。讀竟亦何爲。聚訟徒喧煩。厭煩以靜勝。又類枯木禪。揠苗不耘苗。亡羊兩茫然。何如池上亭。虛曠可看山。山色日夕佳。晨興夜氣還。宴坐日過午。清陰猶未遷。西山倦拄頰。南山興悠然。晚山雖好不遮日。誰能觸熱望長安。

和孫先生彥及棣華堂詩韻

伏蒙頒示棣華堂詩。引援古今。發明大義。使學者知不徒事翰墨而已。讀之凜然增手足之愛。佩仰厚賜。亡以爲喻。輒依元韻。亂道拜呈。

大雅久不作。聲色淫鄭紫。古來非一秦。焚厄故如此。西都盛經學。聚訟自茲始。建安委道真。典午事玄理。錦縠蔚雲霧。組紉亦信美。後生不着眼。千古空信耳。誦習號純儒。曠達稱高士。有如富賈賈。多藏不能使。又如病酒狂。沉酣糟粕旨。源流日以遠。循襲不爲恥。先生秉大雅。江東今夫子。持身不夷惠。漫仕無愠喜。學術心自得。筌蹄視經史。蘭舟翼桂楫。巨川端可涖。我家世從公。公欲出泥滓。愚不堪世用。非人不我以。破屋蔭蓬根。春薺老墻址。寂寞誰肯顧。公獨不我鄙。遺之珠玉篇。諄諄說友弟。直欲障頽波。肯與爲茅靡。觀公用意處。可與召穆比。弟兄吾手足。父母吾怙恃。盡此菽水歡。還勝有酒醕。古來願爲兄。日月不可弭。聖賢師百世。河海闊千里。公如大醫王。一世膏肓起。

寄題鄭集之醉夢齋

利欲醺人心。濃如飲醇酎。沉湎死不休。寧論千日久。豈知糟丘中。醒狂亦時有。天地育萬彙。亦各賦匹偶。人情豈相遠。好惡隨妍醜。集之年方壯。濯濯春月柳。性獨與人殊。無婦奉箕帚。丈室誇醉夢。作詩詔朋友。古來醉夢人。亡羊孰先後。寒儒醉糟粕。酸澁寧可口。莊生夢蝴蝶。幻境徒紛糾。富貴得志士。列屋羅螭首。象牀粲錦幄。疎綺深朱牖。酣寢喚不醒。鼻息春雷吼。梅花霜雪姿。紙帳蔬筍臭。問君有何好。甘作老鰥叟。

窮狀徒纍纍。鴛債長負負。猶如荷旂人。難論純綿厚。但問雪煎茶。何如羊羔酒。

汪叔耕見訪不數日別去惡語爲贈兼簡子用子美二友

負覺得老窮。掃軌事幽屏。蹙然羅雀門。有客頽而整。悲歡十年別。樽酒清夜永。妙句時驚人。盈軸肯傾廩。三日語未休。霜寒夢歸省。臨流分別袂。波光照孤影。重念吾故人。雪屋清燈冷。劉子抱遺經。深井級脩綆。曹子中庸學。天理窮性命。老驥鼓不作。舉旗望公等。天晴風日佳。何時過颺徑。石鼎然豆萁。冰菹煮湯餅。

題陳仲禮四知軒且當折柳之意

陳侯一世豪。筆力萬人敵。臥之百尺樓。平眎劉元德。收斂湖海氣。一室僅容膝。平生不欺心。自護如拱壁。客來問字細論文。旋糶官梁買酒樽。夜深四壁冷徹骨。酒酣一笑溫如春。三年官滿何所畜。滿船稚乳書幾束。長安侯門高於天。束薪炊米桂炊玉。問君持此將安歸。君言歲收可百斛。吾儕本無膏粱念。況今老矣。其何欲。宰相時來則爲之。切莫倒行夸食肉。

寄題淳安陳令君讀書林

能吏事深刻。商利謹毫釐。俗吏趨期會。簿書自羈縻。寥寥絃歌聲。千古空餘思。還淳山水邑。令君丘壑姿。邑民本無事。君亦何所爲。治己物自治。化行風漸移。君復何所欲。讀書常不足。拄腹五千卷。插架三萬軸。曾未出毫芒。萬室已蒙福。堂東松竹林。昔時闕荒榛。堂中燈燭光。昔時照紅裙。今何聲吾伊。蕭蕭風雨晨。

問君有社稷，亦復有人民。奈何獨自苦，學道則愛人。

陽村道中邂逅趙仁甫

脩途轉清溪，孤村帶寒月。瀟灑竹間亭，意行成小立。賓主莫誰何，悠然良自適。俄有貴公子，胡驄搖寶勒。下馬相勞苦，呼酒道疇昔。遂令麋鹿姿，頗爲人物色。佳實進霜堅，異釀引寒碧。興盡還獨歸，沙頭寒月白。

題祝聖寺浮梁道中

金碧照征涂，松竹開幽徑。山僧壽八十，腴貌偉視聽。囊鉢罄錙銖，棟宇視嚴整。如公方外人，眎世一泡影。辛勤畢此生，更欲傳不泯。當家弗父菑，居位蠹國政。眎公豈容誅，三歎發深省。

題古巖舊嘗侍孫先生題名巖中二首

白日瀟瀟松徑靜，紅渠冉冉洞門深。風涵廣宇生虛籟，夢破西窗上夕陰。景物眼前渾似舊，塵埃題處忍重尋。羸驂落日孤村路，塵土依然滿病襟。

覆簣一拳進，嵌空百肘寬。僧房因石室，蟻穴夢槐安。塵路十年別，松風六月寒。淒涼舊題處，不忍更重看。

過叢桂堂故叔祖教授讀書之所

古瓦頽垣迹已陳，孤猿別鶴自哀吟。可憐叢桂煙蕪沒，惟有一池春水深。秀木千章新過雨，寒山一帶暮傷心。清風明月時來此，夢斷雲飛何處尋。

送洪使君赴闕移節會府

使君文彩漢相如。暫向明時縮左符。爲郡似家身似客。視民如子吏如奴。魯公金石光千古。吏部文章妙兩都。戴白垂髻相與語。如公治行向來無。

拾梧子

雞犬三家市。蓬蒿一畝宮。春盤厭笋蕨。秋子積梧桐。客夢五年過。文盟千里同。時清臺省貴。袞袞看諸公。

送錢虞仲兄弟

燈火相從總角初。只今已是十年餘。窮愁懶漫吾猶故。文采雍容子甚都。借用連壁肯來同寂寞。歸鞍寧不少躊躇。風流一別應如雨。儻有來鴻細作書。

和呂守環秀堂三首

久合鳴珂上九關。一麾猶許飽看山。豐年諸縣公事少。燕寢清香兵衛閑。鳥度屏風明水鏡。雲生畫棟擁螺鬟。向來蛛網蝸涎污。勝處豈非天地慳。

一州如斗帶溪山。空翠家家遶畫欄。丘壑自非曾次有。雲煙誰暇靜中看。衣冠共識家風在。閭里方知漢法寬。戴白垂髻相與語。今年有飯飽加餐。

田家但識豐年樂。見說花城日更長。如獲從公時拄笏。尙能援筆侑飛觴。雞豚社壘年年酒。柿栗園林樹

樹霜更情漁郎問樵徑。深山深處是吾鄉。

休日飲直之運屬家

天與吾人臭味同。一官落魄郡城東。偶逢休暇追鳧鷖。閑拂塵埃勘鼎鐘。適意不知華袞貴。醉餘聊看舞裙紅。只愁寒漏催羣動。又踏朝靴逐曉風。

次徐令韻

少日曾披九虎關。誰憐投老卻乘邊。貳車謾說半刺史。多稼惟欣大有年。榆柳關河無犬吠。牛羊阡陌斷烽煙。玉關人老知無用。廟算如今出萬全。

清明陰雨呈同舍

薄薄輕寒作許陰。村村花柳爲誰新。良辰欣見百五日。冠者仍餘五六人。冷雨淒風連午夜。飛花流水一年春。窺園未阻江東興。陌上應多翠黛纒。

弋陽道中

積雨今朝霽。東臬晚日紅。人家深蔽樹。野水闊浮空。久客仍行役。青春已過中。嶺頭人望處。腸斷白雲東。

偶成

晚來一雨破炎蒸。蕉葉葵花照眼明。稍與燈花尋舊約。卻嫌庭樹作秋聲。



寓壺源僧舍三絕

風簷淅淅褪新青。書展殘燈翳復明。  
讀罷離騷還獨坐。此時此夜若爲情。  
悶來掩卷已三更。風露涓涓月滿庭。  
閑撲流螢衝暗樹。危梢點點墮寒星。  
歸來閉戶還高枕。牕隙微通月影斜。  
風急忽驚烏鵲起。空塔蔌蔌墮松花。



# 益公省齋藁鈔

周必大，字子充，一字洪道，廬陵人。第進士，中博學宏詞科。以教錄召試館職，授秘書正字。至監察御史，孝宗初，權給事中，請祠提點福建刑獄，除秘書少監，直學士院侍講，中書舍人，出知建寧，遷翰林學士，除尚書參知政事，拜樞密使，右丞相，封濟國公。光宗拜少保，益國公出判潭州。寧宗初，以少傅致仕。卒，贈太師，諡文忠。年七十九。韓侂胄禁僞學，指爲罪首，有集二百卷。詩格澹雅，由白傅而溯源浣花者也。

## 道中憶胡季懷

珍重臨分白玉卮，醉中那暇說相思。天寒道遠酒醒處，始是憶君腸斷時。

## 行舟憶永和兄弟

一挂吳帆不計程，幾回繫纜幾回行。天寒有日雲猶凍，江闊無風浪自生。數點家山常在眼，一聲寒雁正關情。長年忽得南來鯉，恐有音書作急烹。

## 次韻沈世得作式撫幹川泳軒

江山倏晴麗，雲月助色澤。向來面面景，天日誰洗滌。主人倚晴檻，回首笑謂客。府公實知己，餘事懶經畫。帡蒙廕大廈，軒窓開澤國。架簷逼象緯，植礎壓鹵斥。仰看天宇大，俯覺地軸窄。端如倩巨靈，妙手重開闢。

此興固非淺。無入不自適。華闕望中敞。棠陰坐上得。波光動藻井。帆影落几席。所欣魚依蒲。未許歸見壁。陰晴及朝暮。氣象知幾易。颺回有餘韻。鳥度無留迹。市聲沉浩浩。漁唱聞昔昔。油篲修然流。修然晉八伯。淋漓傅翰墨。縱擊間金玉。連壁嘉同志。倚玉許涼德。頻慙陂量容。未為俗駕勒。惡詩信非備。勿作春秋責。和仲寧中秋赴飲莊宅

方語頑陰蔽。月堂坐看涼。吹動枯楊疾。驅雲陣千重。翳盡放冰輪。萬丈光莫問。蚌珠圓合浦。且聽羯鼓打

西涼疎狂自我何。須撓撓取吹笙玉雪郎。來詩有妙曲撓周郎之句。

送趙富支彥博口倅洪州

期集分攜五載前。衝泥各上浙江船。如今再贈城南柳。依舊梅黃夜雨天。辛未四月晦。團司結局。今復以是日送君行。

次韻釀飲

層軒發天藏。初日照粉艫。韓退之高門塗粉艫。雄觀跨鵬背。煩促陋蠶箔。飛綬會蘭亭。傳觴寫桑落。飲興江海窄。

逸氣雲天薄。雖無漢侯鯖。粗勝周禮釀。清歡謝絲竹。賀厦驚燕爵。圍碁賭勝負。獻俳紛戲謔。涼風徧廣坐。

長夏失重燿。柳文赫炎重燿。高會方繼日。初筵今告朔。要令四難并。詎止一餉樂。明朝傳絕唱。百年無此作。薦

聞須狗監。賡獨恨鼠璞。今王馳蒲輪。之子尙蓮幕。行參瑚璉用。歸助梁棟託。謂沈相。讀書照青藜。視草詠紅

藥。回顧廣文寒。莫忘雞黍約。

次韻趙公直賞心亭釀飲古風

晉人誇新亭。假日輒高會。中間伯仁輩。未免楚囚對。江山猶古昔。人物已曖昧。東郊今保釐。翠華記行在。佳麗壓淮楚。追遊勝冠蓋。茲樓貫城雉。于邁無小大。令威雖不歸。丁謂靈光故無礙。黑雲互明滅。川郭相映帶。當年烏衣遊。此日思一概。從容值休沐。登臨多慷慨。幽懷忽軒豁。細故絕芥蒂。已尋詩社盟。更許食期戒。佳實滿坐上。好風來天外。舟移白鷺。洲名遠目送飛鳥快。方種淵明秫。粗免監河貸。一醉儻可期。與君時倒載。

送鄧曹根移帥揚州

聞道維揚地望雄。風流人物似江東。六龍前日臨淮海。五馬由來說醉翁。碧月幾橋留夜色。珠簾十里待春風。遙知九日平山會。笑插茱萸滿鬢紅。

送蔡德輝程教授

晚折臺城楊柳枝。夕登瓜步佛狸祠。請君收拾江山助。歸和薰風殿閣詩。

留別蘇仁仲通判

公才豈合尙題輿。天遣寒儒此曳裾。午夜燈花曾共賞。三春樂事未全疎。尊前窈窕傳新唱。耳畔瀾翻聽異書。此別不須勤戀惜。君王日日問嚴徐。

送光祿寺丞李德遠請春祠

君家臨川我廬陵。兩郡相望宜相親。長安城中初結綬。石灰橋畔還卜鄰。扣門問道日不足。篝燈照夜論心曲。寸莛那許撞洪鐘。跛鼈近將隨驥驟。聞君上書苦求歸。君今豈是當歸時。滿朝留君君不顧。我雖歎息何能爲。莫攀楊柳濤江岸。莫唱陽關動淒斷。行行但祝加飡飯。潮落風生牢繫纜。

恩許奉祠子中兄重寄

迂儒豈足助維新。日奉威顏謝主臣。可罷本非緣一事。致疑初不怨三人。弟兄有祿供溫飽。猷猷何階答聖神。此去讀書真事業。向來正字誤根銀。

次韻子中兄相迎詩中有奠松楸之語追念別後叔母子柔下世故卒章及之

浙水秦淮度十霜。官清誰薄簡編香。向來怪虛烏鳥樂。歸去喜同燈燭光。身近廣寒猶內熱。手遮赤日卻心涼。只愁初踏江邊路。封土纍然似斧堂。

重九竹園見梨花懷子中兄

習花著雨卽塵埃。何似深秋耐久開。菊尙無多饒瑞質。霜如有意護香腮。也知林下風光早。不爲山中曆日催。望斷行人思折寄。卻疑呼作嶺頭梅。

十月十七日大椿堂小集胡從周季懷以予目疾皆許送白酒彌旬不至戲成長韻

畏疾甚畏威。目昏口止酒。爾來時一中。免使論薄厚。儀康久廢祠。釀具散莫糾。採藥山已焚。種秫時轉後。門稀問字客。室乏借書缶。尙賴金石交。每顧貧病叟。前時相娛樂。如對疏廣受。有漿不待乞。似驗歲在酉。今日掃風軒。明日芎園藪。白衣兩不來。往往化烏有。頗聞繼高會。霑醉牛馬走。寧忘伐木詩。酤胥客朋友。或疑夾西江。耻復餉升斗。胡不玩易象。樽簋納吾牖。二義尙未然。諾責何爲負。君兮優阮籍。僕也減堯守。結交十五年。果可不飲否。食言能無肥。有孚乃免咎。速宜倒糟床。走送昔與醜。勿學比舍郎。夜半招吏部。送七兄監廟赴南宮兼呈大兄知縣

河梁曾誦送行篇。蝸角牛毛十五年。畢竟中間多夢爾。祇今相對各蒼然。蕭蕭暫隔連牀雨。蕩蕩初行萬斛船。誰近上林看躍馬。東陽詩句定先傳。

題神岡廟其神蓋六朝時劉竺使君也。

岸斷川平拔一峰。丹青剝落古靈宮。邦人歲久忘遺愛。賈客時來乞好風。二水有情猶磬折。霜楓無數尙旗紅。岡頭故趾宜亭榭。城郭江山在眼中。

甲申中秋。子中兄賦詩。有八月分圓二十年之句。蓋歎中間多難。且離別未嘗爲此會也。次韻。世事渾如蚋過前。刀頭喜對鏡飛天。陰晴萬里同茲夕。離別前時照幾年。此去莫令疎會合。從來無意必騰騫。幾思種秫迎佳節。窮鬼還來笑買田。近屢爲此計。垂成輒破。

夜坐困甚

馬通薪熱夜爐深。柱膝承顏夢欲成。不記坐來湯沸鼎。卻疑蓬底聽灘聲。

次韻王少府送蕉坑茶

昏然午枕困漳濱。醒以清風賴子真。初似參禪逢硬語。久如味諫得端人。王程不趁清明宴。野老先分浩蕩春。敢向柘羅評綠玉。待君同碾試飛塵。

二月十七夜與諸弟小酌嘗榘實誤食烏喙烏喙堇也古書云以堇實泔殺人戲成韻

伏神老芋不傷生。江蟹彭蜞禍亦輕。我獨好奇嘗泔堇。誤思榘實殺三彭。

永新賀升卿攜中原六圖相過論古名將出師道路形勢可指諸掌為賦詩

歷歷山河一卷書。博聞疑是古潛夫。金城未入職方考。玉坐正披輿地圖。取鏡不應須假道。勝齊終困用

真儒。從來美玉勞三獻。豈比巾箱襲碣砮。君嘗再上書

次韻芮曹國憶去年上元二首

使節番禺重。中朝社稷臣。喜沉刁斗夜。遠布玉墀春。古寺看紅葉。報恩寺菩提葉燈最佳。蕃街試幻人。餘歡曾畫否。

應記繞梁塵。

門外人隨月。窗前竹動風。老便佳節靜。病幸綠樽空。春至鴻聲北。人遙蝶夢東。隔年詩有債。生理固知窮。



病中次務觀通判韻

老眼亂蟬翼。樂事歎何有。今年不銜盃。更暇問濡首。愛山空在山。繡埴詎容走。塵埃登高帽。生澁彈碁手。三年一蒲團。近者坐欲朽。朝來獨何事。乾鵲窺甕牖。開門得新詩。刮膜如釋負。卷舒幾百回。呼舞駭鄰友。吾曹交以淡。悠久或采韭。此味只自知。它人薄玄酒。

曾英發運幹頃攜二詩相過。今復寄贈大篇。且惠漢唐金石刻。輒次前韻道謝。

君家奕葉播芳馨。室有圖書暴兩榮。詩什編成風雅頌。寶章臨徧草真行。興來文陣千軍掃。醉後談鋒一坐傾。已許春風來過我。從今日日聽嚴程。

屢空不擬論錢神。多病惟思對藥臣。驟獲斷碑勝與縞。徐觀妙語可書紳。起予字字興三歎。集古駸駸訪九垓。欲寄嘉州選何物。折楊聊復和韶鈞。

青衣道人羅尙簡論予命。宜退不宜進。甚契鄙心。連日求詩。爲賦一首。

亦知磨蝎直身宮。懶訪星官與曆翁。豈有虛名望蘇子。謾令簸惡似韓公。時清早退人誰肯。命薄當閑我自通。破戒問君君會否。九人於此不相蒙。

立春日飲羊羔酒

姚魏紛紛殆百家。天香一出自無譁。傷多莫厭扶頭酒。貴少翻嫌滿眼花。康樂舊聞宜水竹。翰林新調帶

煙霞從渠草木呈新巧。終愧吾公正且葩。

頃創碁色之論。邦衡深然之。明日府中花會戲。成二絕。

局勢方迷碁有色。歌聲不發酒無歡。明朝一彩定兩賽。國手秋脣雙牡丹。  
醉紅政不妨文飲。呼白從來要助歡。碁色應同三昧色。牡丹何似九秋丹。

池陽四詠之二

夜泊清溪弄水亭。棹謳徐起月華明。水晶宮畔西湖上。除卻兩邦無此情。右弄水亭。

天遣江山助牧之。詩材猶及杜筠兒。向來稍喜唐風集。今信樊川是父師。右杜荀鶴村。

再登翠微亭和同年湯平甫

相君早日翼天飛。晚落江湖罪以疑。好事一時開翠壁。佳名千古紀黃扉。朝遊要及鴉翻樹。夕返何妨螢溼衣。更得湯休奇絕句。後來誰憶謝元暉。

贈黃格非

詩社飄零二十年。春官老子復登仙。豫章幸有橫枝在。好覓鸞膠續斷絃。

次韻胡邦衡相迎

路逢驛使嶺頭回。喜得新詩勝得梅。情似春風綠楚柳。句如臈雪屑韓瑰。至今皇側求賢席。底事公銜樂

聖杯台路六符行復煥。丹心一寸未應灰。

向以書戲邦衡云某自廬山游西山當就近公召節今邦衡有詩督此語不驗次韻

慧遠遙同社。洪崖近拍肩。松枝年紀萬。棊實歲踰千。天池在廬山絕頂。有萬年松。有千年棊。徑欲通天漢。忙因

擢酒船。帥漕附致廚醞。四香城均一握。易地即皆然。邦衡所居。亦曰香城山。

### 遊廬山弔大林

上盡諸峯地轉平。天低雲近日多陰。古來南北通雙徑。此去東西啓二林。虞世南碑從泯沒。白居易序合推尋。康廬第一推仙境。遂使如今忍陸沉。

### 天池觀文殊燈

代馬腥羶暗五臺。南方世界且徘徊。一燈別是真知識。不用犇波學善財。

贈西賢藏主可昇眉州人。與予同庚。

我比同年百不能。只餘霜鬢愧師兄。慇懃覓句無言說。共撥寒灰聽水聲。

### 遊廬山舟中賦四韻

南北周廬阜。東西徧九華。宴安無酖毒。痼疾有煙霞。淡落村村酒。甘香院院茶。馳驅君莫厭。此出勝居家。

### 陳宰有詩來迎次韻

沿浙江湖樂有餘。滔滔何必歎東徂。賞心到處窮佳境。好事逢人得異書。風浪送颿時一快。魚龍潛穴不須驅。歸來正使無泥洗。合壓香醪作歲除。是行徧歷九華三茅匡廬西山。又獲書籍碑刻頗富。

登龜山次七兄韻

注波緣壁化城中。客慍奴嗔我亦慵。及至龜山還一上。爲憐高閣對雙峯。

贈崇壽寺僧善修

老僧九十視耽耽。二十年來不下山。我得九華充法供。亦能禁足老山間。

望皖公山

太婆嶺獨高秋浦。皖公山正望龍舒。端如牛女隔天漢。不似彭郎近小姑。

遊廬山佛手巖雪霽望南山

十日頑陰不見山。山中一夜雪封庵。伊予的有尋山分。日照北窗雲在山。

胡邦衡相過賞金鳳許詩未送復作木犀會二花殆是的對

身閒端合醉秋光。兩地名花況並芳。金作鳳形如許巧。木成犀裏若爲香。髻頭自笑辜釵色。沙面誰知識帶黃。莫問詩壇掩旗鼓。天生的對欠平章。

邦衡置酒出小鬟予以官柳名之聞邦衡近買婢名墊梅以爲對

濁水難攀清路塵。偶曾先後掌絲綸。歸來久侍茵憑舊。至後初逢梅柳新。湖水欹斜應有意。蘇詩日出冰漸湖水散。

野梅官柳 春光漏洩不無因。絳帷幸為天荒破。日日當為問道人。

先生豈比習池徒。薄醞仍慙校尉廚。獻糲聊將追粒粒。舖糟只欲伴屠酥。削肌知自何人手。灌頂疑嘗釋

氏醐。必許尋花兼問柳。敢辭挈榼更提壺。來詩有尋花句。

邦衡再送二詩。一和為甚酥。二和牛尾狸。

金谷烹煎豈我徒。磨春爭語夜闌廚。六年不賜湯官餌。除日猶分刺史酥。是日饑守送酥事。用小惠無多

真畫餅。大篇有味勝清醐。遙知發竅烘堂處。不見蒸鵝只瓠壺。

追跡猶應怨獵徒。截肪何敢恨庖廚。膾鱸湖上曾誇玉。煮豆瓶中未是酥。伴食偏宜十字餅。先驅正賴一

卮醐。卻因玉面新名字。腸斷元正白獸壺。牛尾狸一名玉面狸。

後兩日大雪。邦衡復用前韻作窮語戲和。

天憐寓客混緇徒。十日無煙香積廚。莫雪故教投碎米。饑涎那更忍流酥。旃毛嚼盡寒生粟。風絮吟時韻

怕醐。誰似維摩坐芳縛。散花別是一方壺。

己丑二月七日雨中讀漢元帝紀。效樂天體。

昭君顏如花。萬里度雞漉。古今罪畫手。妍醜亂羣目。誰知漢天子。祛服自列屋。有如公主親。尚許穹廬辱。況乃嬪嬙微。未得當獯鬻。奈何弄文士。太息爭度曲。生傳琵琶聲。死對青塚哭。向令老後宮。安得載簡牘。一時抱微恨。千古留賸馥。因嗟當時事。賢佞手反覆。守道蕭傅死。效忠京房戮。史臣一張紙。此外誰復錄。有琴何人操。有塚何人宿。重色不重德。聊以砭世俗。古今賦昭君曲。雖大賢所不免。僕矯其說。無乃過乎。

胡邦衡生日以詩送北苑八銜日注二瓶

賀客稱觴滿冠霞。樓名懸知酒渴正思茶。尚書八餅分閩焙。主簿雙瓶揀越芽。見梅聖俞謝宣城王簿詩。妙手合調

金鼎鉉。清風穩到玉皇家。明年勅使宣臺餽。莫忘幽人賦葉嘉。

邦衡再和次韻

金章紀出氣凌霞。不愧君王坐賜茶。講讀罷。例賜茶一甌。商嶺烹來思舊樣。王之詩云。樣標龍鳳號。題新嶺。

水。碾時空想建溪春。香于九畹芳蘭氣。圓似三秋皓月輪。愛惜不嘗惟恐盡。除將供養白頭親。洛泉煎處歎新芽。唐劉言史與孟郊洛北野泉煎茶詩云。粉洗越笋芽。

詩評未怕人生瘦。監濟惟防賊破家。賸欲蒼生蘇息否。剛嚴須是相王嘉。

邦衡用舊韻慶予生朝。賡續為謝。

蓬山落拓復經春。宦海茫洋懶問津。志節漸銷平日壯。鬢毛空比去年新。午橋早並緋衣相。一月還同赤

壁人。邦衡壬午六月生。予丙午七月生。同居廬陵。故特比裴度周瑜二公事實。天遣駑駘追驥驟。無如才德異疵醇。

賀范志能農圃堂

荒淫吳以顛。戰勝越云吉。是非兩安在。阡陌泐蕭瑟。公來開別墅。草莽手爬櫛。陰晴及寒暑。每到皆勝日。新詩弔興廢。收拾滿箱帙。有客師元亮。甫謝彭澤秫。幸分北窗風。容此易安膝。

入直召對選德殿賜茶而退

綠槐夾道集昏鴉。勅賜傳宣坐賜茶。歸到玉堂清不寐。月鈎初上紫薇花。

過鄔子湖

萬頃湖光似鏡平。蜿蜒得得導舟行。從來仕路風波惡。卻是江神不世情。

奉祠還姪繹以詩相迎次韻

聖朝有道合羞貧。清畫那容裏路珍。金馬玉堂辭漢殿。桃花流水訪秦人。敢吟莫莫休休句。且佚膠膠擾擾身。高會竹林欣有日。速篋玉友釣溪鱗。

前歲冬至與胡邦衡小語端誠殿下道直下舊事今年邦衡舉易緯六日七分之說輒用子美

五更三點爲對。後數日得劉文潛運使書記去年館中團拜人今作八處感歎成詩。

青城小語慶新陽。共向紅雲拜玉皇。六日七分驚歲月。五更三點憶班行。屬車誰從黃麾杖。釣艇還飛白羽觴。猶勝去年三館客。十人八處更相望。

十二月十九日餞劉文潛運使。明日書來云：醉夢中作小詩，但記後兩句，爲足成之。幽人門巷冷於冰，使節光華肯再登。今夕青燈話三館，明年何處說廬陵。

臘旦大雪，運使何同叔送羊羔酒，拙詩爲謝。

未雪冰廚已擊鮮，雪中從事到君前。淺斟未辦銷金帳，快瀉聊憑藥玉船。醉夢免教園踏菜，富兒休詫饌羅羶。爛頭自合侯關內，何必移封向酒泉。

簡提刑吳大卿宗旦勅四路獄二首

瑞節頻移意可知，西川西廣又江西。蘇黃到處君行部，物色分留待品題。堆勝橫看白鷺洲，青源穩着釣臺幽。魯公翰墨師川句，訪古何妨與一遊。

丁酉二月二十日，同部中諸公遊下竺御園，坐枕流亭，觀放闌桃花數萬，隨流而下，繼至集芳，亦禁籞也。是時海棠滿山，郁李滿欄，殆不類于人間世。明日入部，而桃花數枝，伶俚窗外，未時內直，則海棠郁李各一株方開，遂賦此二絕句云：

萬點紅隨雪浪翻，恍疑身在武陵源。歸來上界多官府，人與殘花兩不言。清勝堂前花萬重，玉堂署裏兩芳叢。應憐寓直清無侶，聊伴衰翁宿禁中。

季懷設醴，且示佳篇，再賦一章，以酬五詠。



卯飲高樓徹莫霞。絕勝茆屋已公茶。箬包句好逢真賞。荷葉甌深再嫩芽。詩老坐中容我輩。朝賢乞處藉吾家。詩來屢引歐公茶詩。故用箬包詩老事。孟郊憑周況于朝賢乞茶詩云。越甌荷葉空。從來佳茗如佳什。屢酌親朋味轉佳。

尚長道見和次韻二首

詩成蜀錦燦雲霞。宮樣宜嘗七寶茶。壓倒柳州甘露飲。子厚茶詩。猶同甘露飲。洗空梅老白膏芽。聖俞茶詩。春

睡魔豈是驚軍將。茗戰都緣避作家。怪底清風失炎暑。朝來吉甫誦柔嘉。連日雨

鍾山處士映高霞。止酒惟親睡起茶。遠向溪邊尋活水。閒于竹裏試陽芽。一甌休問帝前席。七椀且同僧

在家。所愧叔孫無五善。若為重拜晉君嘉。

頃雲夢至善生院賦詩一聯。己丑七月十三日因遊。續成一絕。

門外千竿竹繞墻。清風終日注回廊。五年未續夢中句。得得來追三伏涼。

七月十五日邦衡用前韻送薰衣香二帖韻為謝

天香猶帶曳裾霞。銀合行參到闕茶。故事召用兩府。將到闕中使賜銀合茶藥及香。臍馥欲沾吾臭味。普薰聊發善萌芽。心清

此去誇僧舍。意可由來出內家。乞與博山添正氣。嶄巖曾辱更生嘉。劉向薰爐銘云。加此正氣。嶄巖若山。

萬安韋邦彥字俊臣。攜王民瞻楊廷秀謝昌國絕句相過。次韻勉之。

盧谿筆力透天心。楊令文追正始音。更讀池塘惠連句。識君何待接清襟。

後學爭歆雨後巾。前賢久澤霧中文。韋郎勉力追三傑。它日人還傲五雲。

送梁山長老智顯

秦人溪畔漢人山。萬木參天六月寒。寫向湯休詩集裏。老夫要作畫圖看。

昨以清醇之酒為邦衡侍郎壽。乃蒙惠詩。且約深秋清集。至時侍郎當捨芙蓉而面三槐。某已

歸東籬。悠然見南山矣。次韻為謝。

觚稜回首六經春。重挈荷囊止要津。桑下未忘三宿戀。柳邊仍喜一番新。即開東閣招奇士。快與西湖作主人。濁酒誇張真過矣。如公詩句乃清醇。

從駕過德壽宮。馬上得程泰之次庚寅玉堂舊韻。有銀章金帶之戲。走筆為謝。

推敲也復從鳴鑾。鳳沼詩盟故未寒。兩制空煩舍人樣。僕近日誥命及答詔。皆年兄筆。外郎爭比大夫官。僕官朝請郎。年兄新轉

大夫。翰林今夜仍連直。講殿明朝豈兩般。畢竟五金如五味。莫因黃白議鹹酸。

程泰之昨有金帶銀章之句。十二月二十八日。乃因押伴北使赤岸御筵服重金。侍宴紫宸殿。

坐間嘗作數語為戲。後兩日復得其詩。亦再次韻。

甚日重黃侍御鑾。幾時八坐佩金寒。古詩云。工部云。眼赤何時雨。橫腰甚日重。杜殿庭屬目誇新貴。閣門

相問。部曲低頭拜舊官。秦之嘗二春官。今復借太宗伯。五日尹京非細事。四時仕宦固多般。秦之今春服綠。夏間階

藝也。重行隔品詩仍捷。應笑官卑語帶酸。

次韻徐元敏權貨同年

當年駕鶴忝驂鸞。對躡丹梯上廣寒。綠鬻旋同依帥府。華顛今並列王官。文才似我無多子。契分於君有四般。唐人與同年詩云。契分四般同。念舊不妨頻枉駕。甕頭隨意酌甘酸。

邦衡侍郎留金陵。再用津字韻賦詩。謝送賜茗。復以丙申小春四鈔寄贈。

淳熙又貢第三春。驛騎星馳渡劍津。七祖師泉難話舊。謂青原。八功德水且嘗新。雪亭烹處休裝景。火閣煎時卻可人。只恐春從官柳動。邦衡侍婢名。樂天還欲醉精淳。唐朱敬則傳。淳精流。糟粕棄。

聞西省賞醪醕芍藥。戲成小詩。奉簡泰之侍講。舍人年兄。併以丁香橄欖百枚助筵。卻求殘花數枝。

羣玉園中作主人。紫薇花底會嘉賓。風光總屬程夫子。好念文昌寂寞春。  
滿架冰肌含碧雲。翻階翠袖映紅裙。玉堂只有金沙在。伴直明朝又屬君。翰苑僅有此花。泰之明晚直宿。  
酒頰桐馬莫分甘。金賜麟蹄指敢尖。紅白賞殘堪底用。雨中折贈未傷廉。日歷所進書。賜金及酒多。  
從來引玉即拋磚。自笑囊空百不堪。賴得酒酣須茗飲。聊將青子助回甘。

次韻閣刑部才元楊梅

炎官傘照濤江紅。五月獻果明光宮。越人一枝古所重。蜀無他楊譜則同。蜀中絕無楊梅。玄珠更將赤水浴。流

火呈祥復王屋。下伴長安黑彈丸。殺吏驚人寒起粟。新詩字字含芳鮮。大書遺我敦同年。請君速訪天竺

老。食白追繼仇池仙。東坡寄天竺辨才詩云。且食白楊梅。蓋山中實有此果。而蜀人注此詩者。偶未知耳。閬亦蜀人。

六曹長貳觀潮。予以入直不預。晡時大雷雨。走筆戲蔡子平。

雷轟萬鼓勒潮回。無復庭前雪作堆。應為尙書慳且澀。宵風怪雨一時來。

次韻天官韓尙書七月十八日風雨中觀潮。予內直不赴。

禁直惟聞漏鼓催。潮聲遙聽訝蚊雷。忽傳傑句天邊得。如對洪濤海上來。大筆直能挾風雨。小才何敢助

涓埃。古今奇觀須秋半。好句重銜伯雅杯。

邦衡再送皇字韻詩來次韻

賓鴻列陣競隨陽。卻向丹山隱鳳皇。銀管題詩紛滿帙。金釵度曲儼分行。漢官蚤促三更席。梁苑行稱萬

壽觴。上頃諭公。早晚令卿觀朕大舉。同游大梁。又聞顧我飄零無着處。非公湔袂尙誰望。虞相陞辭奏云。今年當會於東都。上壽稱觴。

又次邦衡族姪長彥司戶韻

聖世恩榮盛孝章。北窗自欲傲義皇。通家喜燕雞豚社。治郡愁親鴈鷺行。陌上花開人鬪草。甕頭酒熟客

傳觴。及時行樂君休厭。召驛相將項背望。

近會同年賞芍藥。嘗櫻桃。楊謹仲教授有詩。次韻爲謝。兼簡周孟覺知縣。  
清晨自掃落花廳。小甕親窳竹葉清。簪盃同時過陋巷。臚傳相與記彤庭。階翻紅藥曾重見。僕十年間兩直西掖矣。  
勅使朱櫻亦屢經。老去飄零無此夢。詩來吟咏有餘馨。

同年楊謹仲示薊林諸帖。皆以老杜相期。惟童敏德謂不合學東坡。殆非知詩者。輒用此意。成惡語一篇。爲誕辰壽祝頌之意。見於末章。

過江人物向汪曾。一世龍門未易登。常恐斯文無砥柱。獨推佳句有師承。波瀾正使來西蜀。廉陛何妨逼少陵。天遣百年如衛武。會賡懿戒頌中興。

過餘干吳師中秀才以小詩惠歛硯次韻謝之

舊曾起草向明光。獨與羅文近赭黃。三載瓦池研竈墨。因君聊復夢羲皇。

送陸務觀赴七閩提舉常平茶事

暮年桑苧毀茶經。應爲征行不到閩。今有雲孫持使節。好因貢焙祀茶人。  
鸞棲枳棘已多年。父老猶傳主簿賢。扶杖喜迎新使者。赤帷何惜與高褰。  
疲驚久倦直明光。風味嘗思十八娘。擬請一麾依故舊。得無公道學蘇章。

進讀三朝寶訓終篇賜宴錫賚謝恩詩

藝祖提劍開八荒。太宗混一垂衣裳。眞皇破虜神武揚。夷夏憶寧法度彰。寶訓成書紀宏剛。有典有則萬  
 葉昌。憶昔壬午神龍翔。季秋庚子辰集房。肇開講席臨清廂。赭袍玉斧光照廊。台司夾侍書案黃。翰林進  
 讀天容莊。微臣簪筆近御牀。親聞玉音義甚長。君子小人初何嘗。非關時運弱與強。祇繫人主所否臧。當  
 年紀注此特詳。紹興壬午九月庚子。初開經筵。亦召宰執聽講讀。三朝寶訓第一卷。至太宗問呂蒙正君子少而小人多。蒙正曰。此繫時運盛衰。陛下宜諭云。  
不然。願人主好惡如何耳。臣時爲侍立官。退以聖語載起居注中。往來寒暑今一章。牙篋謬執心徬徨。終篇正直恩德洋。道山肆  
 筵酌天漿。宮花壓帽羅絲簧。硯來復古翰墨光。臣所得端硯。復古殿三字。刻馬出帝閑眞驪驪。閩山正焙隨寶香。君  
 賜如天不可量。歸美獨愧詞荒唐。恭惟聖治超百王。夙夜基命不敢康。文德旣修狄可攘。俎豆永掃旄頭  
 芒。三聖勳烈同煒煌。萬年億載娛慈皇。

文忠烈公居洛有丙午同甲會詩。今執政府凡三位。樞密使王季海。參政錢師魏。先在焉。前歲

夏某忝參預。連牆而居。適然齊年。時號丙午坊。次文公韻。簡二公。

文公八十會伊川。盛事于今有百年。豈意蒼顏華髮叟。亦陪黃閣紫樞仙。府居未至容連棟。班路前瞻愧  
 比肩。丁丙連干支合德。君臣慶會豈虛傳。

和龍舒兄春日出郊韻

庭束蒲鞭吏晝閑。禽聲人語兩關關。郊坰戎隊穿花裏。阡陌兒童戲雉間。禪語屢題投子寺。仁風常滿皖

公山薦書開道交宸几尺一封泥合錫還。

陶淵明有己酉重九詩一首。某以此年此日舟次吉水。距永和才一程耳。輒用其韻。先寄二兄。十三弟。并呈提舉七兄。

王觀十五載。歸來稀舊交。我髣昔已華。今茲固宜凋。去國甫重午。還家倏登高。永和有兄弟。咫尺如煙霄。緬懷江東使。地遠心更勞。遙知上翠微。江山勝金焦。豈無茱萸酒。望望思鬱陶。相從會有日。永矣非一朝。南園築小堂。鄰里侯陽獻。上梁文戲成。小詩記實解嘲。

半畝園林數尺堂。凡花疎竹小池塘。平泉綠野休相笑。事業功名合自量。

用邦衡韻贊其閒居之樂。且致思歸之意。

一別龍門不計春。思公夢渡太華津。遙知綠野朱顏好。應笑紅塵白髮新。午茗親烹留上客。夜碁酣戰調佳人。道腴有味詩彌勝。何止冰凝與蜜淳。

敷文閣學士李仁甫挽詞

經學淵源史筆高。文章餘力薄風騷。紛紛小技誇流俗。磨滅身名笑爾曹。鳴珮甘泉不乏人。誰能博古復通今。直如汲黯非游俠。忠似更生不鑄金。千卷長編已刻閩。爭傳副墨價兼金。冠篇不得同迂叟。遺恨猶應記玉音。

是是非非口卽心。掃除人僞只天真。身全五福仍通貴。造物因公勸善人。  
病後精神更湛然。挂冠剛欲及生前。去來自在渾無礙。撫掌僧徒浪學禪。





# 益公平園續藁鈔

上巳訪楊廷秀。賞牡丹於御書扁榜之齋。其東園僅一畝。爲街者九。名曰三三徑。意象絕新。楊監全勝賀監家。賜湖豈比賜書華。回環自斷三三徑。頃刻常開七七花。門外有田聊伏臘。望中無處不煙霞。卽慙下客非摩詰。無畫無詩只謾誇。

今年閏十月。僕營小圃。方兩月。而張坦夫履示腴莊圖。有起予之意。遂率筆成鄙句。百年種德十年栽。映帶雲巖與月臺。無問四時留客醉。何曾一日不花開。人人爭羨富登覽。物物豈知工剪裁。我比樊須身更老。只今學圃亦悠哉。

楊廷秀送牛尾狸侑以長句次韻

江南十月方肅霜。小槽初滴鵝兒黃。頗思指動異味嘗。門正張羅誰未將。披綿強來推不去。枯鰕欲進上之戶。羊羶豕腥猶可厭。肪截脂凝在何處。草玄子雲黃門郎。遺我黑面質白章。形之硬語努力強。寫以奇字伴史倉。愧無纖手色傾國。壓糟磨刀走臧獲。喜于左手持蟹黃。美勝八珍熟熊白。古來狸首歌侯門。名以牛後真屈君。從今玉汝洗俗諺。好與紈袖陪梁園。公詩如貂不煩削。我續狗尾句空着。

寄題高仲一夔殿撰識山堂長韻

買山老山間。乃識山之容。愛山無古今。此論誰非同。仇仙來唐廬。一轉語獨工。不識山面目。只緣在山中。譬之塵漠漠。又如水溶溶。人魚居其間。孰識礙與通。我昔少年日。自攜七尺筇。盤旋山南北。憩息林西東。朝看山之橫。暮看山之縱。貪多眼爲乏。陟險足已慵。拱揖且不暇。賞失良自蒙。方悟白司馬。草堂對穹窿。彼旣若獻狀。此亦如發矇。秀甲天下山。至言出心胸。今君欲繼之。築堂會奇峰。何嘗遠城市。而能目迎逢。山形不動體。山色含真空。風雲有蓄洩。氣象無終窮。雨餘四面翠。日麗千仞紅。氤氳香爐煙。挺拔雙劍鋒。最愛五老人。峻嶒美所鐘。可望不可即。有意容相從。羅列皆兒孫。几席次第供。山雖誇兩邦。茲焉實長雄。不爲空堂客。詎信山有宗。寄語遊山者。毋徒走憧憧。

送道士張惟深曾從楊廷秀學詩

出世須拋世俗文。休論何遜與陰鏗。但求仙伯三年艾。會向彌明頂上行。

彭孝求惟孝以綠野行送芍藥數種鄙句爲謝

占斷春光及夏初。琉璃剪葉朶珊瑚。休論花品同而異。牡丹初號木芍藥。蓋本同而未異。出王元之文集。且詠詩人樂且訐。北

第莫辭金鑿落。韓魏公北第賞芍藥詩。滿引莫辭金鑿落。南禪爭看玉盤盃。彭宣微恙何妨醉。自有嬌痴婢子扶。

魚兒牡丹得之湘中。花紅而蓋白。狀類雙魚。纍纍相比。枝不能勝。壓而下垂。若俛首然。鼻目良可辨。葉與牡丹無異。亦以二月開。因是得名。其幹則芍藥也。予名花而賦是詩。聞江東山谷

問此品甚多。

天教姚魏主芳菲。合有宮嬪次列妃。玉頸圓瑳宜粉面。霞裙深染學暈衣。枝頭窈窕魚雙貫。風裏蹁躑鳳對飛。又似金鳳花。莫把根苗方芍藥。留春不似送將歸。

太守趙山甫希仁示和篇次韻為謝

阿嬌金屋聚芳菲。當御連環聚妾妃。龍女墜天頰素頰。鮫人出水織纈衣。袖垂戶外瞻雙引。鸞語宮中第一飛。不用蟲魚箋爾雅。使君行合左苻歸。謂魚苻也。聊答公歸之句。

李子權時中屢求所居江月亭浴沂齋詩。老病未能作。坐上示及和花妃詩甚工。即席次韻一

首。所謂一彩兩賽也。

姚皇借黃字去後幾菲菲。湘水依然從二妃。雙淚一時紅作鬢。連枝千載綠為衣。檻前斑竹應同伴。波面文鴛欲共飛。吟徧世間閒草木。何如江月詠沂歸。

楊廷秀祕監萬花川谷中洛花甚多光榮俚語叙謝

萬花川谷第芳菲。也許湘靈媵伏妃。翠葉迎風牽苻帶。紅綃浴日濕宮衣。共船不妒龍陽釣。警乘猶疑洛渚飛。洛神賦云。騰文魚以警乘。李善注。文魚有翅能飛。誰把荒園一魚目。換將五十六珠歸。

乙卯楊廷秀訪平園即事

乘興不回安道舟。銷憂同倚仲宣樓。莫嫌四面酸風射。猶勝三場滯汗流。

次韻楊廷秀并序

萬花川谷主人爲海棠賦二首。妙絕古今。斷章有平生不帶看花福。不是愁中卽病中之歎。代花次韻。  
江國羣芳自有餘。詩才酒興不愁無。卻憐西蜀移根遠。醉向東風落筆初。  
傅粉施朱淡復濃。不辭沐雨更梳風。豈知命似佳人薄。不在吾公樂事中。

右三月二十八日春華樓前芍藥盛開。特招歐葛二兄。再爲齊年之集。次舊韻。

老去猶思飲吸川。靜中還喜日爲年。艾耆天俾如三壽。談辨人驚似八仙。洞鑠嵩峯偏入眼。丹成岫嶼遠齊肩。定知樂事年年共。更看新詩句句傳。

次楊子直使君韻

雪鹽冰絲結素華。天孫初織費縑車。花開金谷空千種。蕊疊瑤英自一家。下比山樊誰薄相。上攀瓊木各雄夸。集仙翰苑須公等。歸繼唐賢植此花。

次王伯奮淹通判韻

王乃文正公家吏部  
尚書震之曾孫

三槐交蔭盛京華。八坐摛文富五車。玉樹合教依故國。霜蕤何事到山家。幸經泥軾新題品。全勝雲駟昔誕夸。絕唱強酬書字大。固應傳笑眼昏花。

趙正則彥法司戶沿檄而歸。玉蕊已過。追賦車字韻詩奉答。

春深游客競繁華。寶馬香輪帶麴車。不為來看招隱樹。有誰肯願野人家。飛飛粉蝶須相映。皎皎銀蟾色

共夸。今得審言詩勝畫。傳神何必趙昌華。唐詩人杜審言。為吉州司戶。正則嘗刻其詩于廨舍。

丁巳二月甲子。蜀錦堂海棠盛開。適有惠以繡書錦堂記者。招伯威德源為齊年會。次舊韻。

曾因客夢到西川。萬戶疏封抵隔年。花重錦官思杜老。鶴飛沙苑看徐仙。衰顏尚許任諍齒。淺量深慚賜及肩。照眼蜀粧依繡幌。共驚十載識先傳。

曾無疑三異。以長韻送金橘。時已暮春。次韻。

茶蘼殿春枝滿霜。盧橘熟夏今乃黃。彈丸煌煌照坐光。老叟驚詫見未嘗。客言采果孟冬月。剖竹為符帶蒼雪。包之赫蹏滿貯中。纏以絲枲外合節。或藏綠豆飲醉翁。或雜寸棗仍緘封。三說未識將誰從。但覺色香新摘同。分甘安能與衆樂。祕方何惜都傳卻。已誇指下石化金。仙指併求君勿噓。

戊午仲春同甲小集舊次韻

會老三人似潁川。生同絳縣免疑年。各年七十三。尊常有酒何妨醉。事每無心即是仙。儉欲固應知足足。忘形

誰問是肩肩。香山已寫丹青像。德源近繪三壽圖。洛誦仍憑副墨傳。

紹興庚午。某與安成劉逢辰秋闈同薦。逢辰四子。伯德禮。淳熙甲午解魁登第。今宰臨川。仲德

仁拔癸卯解。叔德恭負雋聲。季德性紹興乙卯復冠鄉舉。出示當時小錄。手澤在焉。爲題二小詩於後。

丁年韋布逐槐忙。結綬王畿四紀強。已把衣冠挂神虎。夢回猶未熟黃梁。鹿鳴舊籍晚重看。翰墨場中興久闌。同榜諸郎皆舉首。老夫安得不衰殘。

新光州守趙師奭。字國佐。才高一世。任京口。以讒廢。宰太和。以憂歸。得郡待對。沒於逆旅。家會稽。又遭焚。識者憫之。今旣葬矣。其子寄行狀。求追挽。嗟悼不足。情見乎辭。

籍甚天支萬事通。傷哉人爵一生窮。飛英北闕讒何極。游刃西昌秩未終。千騎絕憐成畫餅。八人那忍助融風。只應快閣長流水。遺恨滔滔向浙東。

劉仙才仲子俊示其父醉庵詩集索鄙句

蹇步嬾姍到竹溪。病眸眩瞶刮金篦。清風滿座無塵事。遺墨盈編有舊題。久羨山人居水北。今知詩社續江西。醉吟跌宕誰能寫。髣髴琳瑯識介珪。

慶元戊午重九。天氣晴和。待王七兄提舉監丞早集清都臺。午飯讀詩書臺。晚集神岡西臺。皆古迹也。戲成小詩。

年豐和氣借春來。雨足黃花趁節開。要識重陽真富貴。弟兄一日歷三臺。  
陸士龍與兄書云。一日上三臺。曹公藏石墨十萬斤。又

蔡邕以侍御史轉治書侍御史。遷尚書三日之間。同歷三臺。

己未立春。留楊伯子長孺知縣小酌。夜聞窗竹有聲。伯子以為雪。或曰風也。已而果雪。詰旦敲門送詩。走筆戲和。

莫訝衰翁笑口開。故人風度繼歐梅。墮筵雪陳魚麗遠。踏跡詩仙鳳沼來。酒似茅柴居鬲上。句如桂子落天臺。新年春自相追逐。誰謂天公厭兩回。謂坐中舉東坡詩句。

己未二月十七日會同甲次舊韻

里人初不問山川。身健徒教換歲年。紅紫丁寧容老圃。丹青點化屬詩仙。情均鴈序兼鸞友。壽貫犀顛映鶴肩。東坡光道人賀海口。犀顛鶴肩。莫算酒行徵罰令。一株花下一杯傳。

賀升卿年垂八十。以書寄平園新詠二十二篇。又錄十年前簡予四詩。尚有訪戴之興。謹次最後一章韻為謝。

後一章韻為謝。

文與年高豈樂天。字隨心正亦公權。吟詩作賦晴窗裏。問柳尋花野水邊。升卿居永新縣東別墅。去縣百二十里。喜我新

巢三徑就。勞君舊句一時編。雪舟有興休回棹。共載期追李郭仙。

仲嘉致政敷學尚書。注兄寵和鄙句。且寄適軒記詩銘等。皆纂白樂天語也。敬以來意。盡用樂

天事次韻。

鄆川人物擬山川。公似香山更永年。楊柳櫻桃俱是幻。蓬萊兜率孰非仙。平生名脫虞卿曆。歲晚書齊夢得肩。近岸連檣多賈客。定攜新句海中傳。

徐商老夢莘參議直閣進書登瀛。創孺榮堂。來索鄙句。許示奏藁寄題。

三孔三劉歲月賒。後來儒術數君家。五枝舊折燕山桂。八月新乘海上槎。方履圓冠無愧怍。西崑東觀有光華。牙籤縱許窺青簡。銀海何堪眩黑花。

三月三日適值清明。會客江樓。共觀並蒂魏紫。偶成二小詩。約坐客同賦。

上巳清明共一時。魏花開處亦連枝。前身應是唐宮女。猶記昭容雙袖垂。

莫思樂事年年減。且喜春花日日開。兄弟相看俱八十。研朱贏得祝嬰孩。趙通判每云。朱書八十字于襁褓兒領上。欲其春如此。

正月三日胡季亨及伯信仲威叔賢昆仲歐陽宅之李達可同自永和來。雨中小集疊岫閣用

金鼎玉舟勸酒。下視林梅戲華。舉說命五說戲祝六君。蒙次前韻賦佳篇。各徵舊事。各以一

篇為謝。

未復中原近有淮。前朝該輔只時來。濟川用礪我無是。作醴和羹何有哉。正喜春晴知歲暮。初一初二頓皆晴。招兩蓋坐筵開。和詩更作齊兒語。老手屠龍合拊孩。

右答李季亨



舟浮江海達於淮。不盡詞源滾滾來。人自浴沂三益者。句成泛剡兩佳哉。千鍾但使尊中滿。札帙從教案上開。卻憶兒童聚嬉戲。爭騎竹馬弄泥孩。

右答胡伯信

元和頌聖雅平淮。韓柳文章付後來。聯璧照人今燦者。斷金定契古誰哉。白醪勸我頻霑醉。青眼逢君肯懶開。會散東風吹面纈。凍梨欣喜色如孩。

右答胡仲成

朱顏青綬憶秦淮。白鷺洲疑鷺駕來。側畔交遊欣忭者。中間賡和負康哉。新春漸覺風光好。陳迹時將日記開。惟有詩情不如昔。傍觀撫掌倒綳孩。李白金陵詩云。二水中分白鷺洲。城上有亭。紹興戊寅廬陵江中亦有白鷺洲。嘗創小樓。會客其上。懷舊及之。

右答胡賢叔

安流咫尺異踰淮。有興何妨疊擢來。茗椀茆柴殊易耳。萍螿豆粥豈難哉。談鋒不怕通宵直。燕席寧辭逐日開。況是上元佳節近。華燈萬點看蓮孩。謂孫孩蓮。

右答歐陽宅之

濁涇不必羨清淮。社燕賓鴻任去來。老子何曾憑日者。後生正合競時哉。圓規枉把方心鑿。塵世常令笑

口開八十老翁行未得，不如能說小兒孩。

右答李達可

周愚卿江西美劉棠仲同賦江珧詩牽強奉答周一字圓格。

東海沙田種蛤蜊，南烹苦酒濯瓊瑤。饌因暫棄常珍變，指為將嘗異味搖。珠剖蚌胎那畏鷓，柱呈馬甲更名珧。累人口腹吾何敢，慚愧三陰喜且謠。四月江珧，自小種而為大生。韓致行都廣間，則臘之近方以怪自呈。柱，即珧也。廣韻亦注蜃屬。甲可飾物。至玉珧似蚌殼中柱美。

元宵煮浮圓子前輩似未曾賦此坐間成四韻

今夕知何夕，團圓事事同。湯官尋舊味，竈婢詫新功。星燦烏雲裏，珠浮濁水中。歲時編雜詠，附此說家風。

再賦

時節吳三重。京師貴浙燈。東坡上元詩云。三吳重時節。勻圓萬里同。洩浮雖有法，烹煮豈無功。杜喜雲杪白，徐妨酒復中。策助俱是稊，適口不全風。

七月十四日江西美約周愚卿兄弟及許景陽相過，共觀鶴雛，羽毛褐色，因飲食雙酸新酒，擘

開中新荔於白蓮池上，遂成盛賞，明日西美有詩走筆奉和。

起來汗浹似翻漿，客帶清風變早涼。鶴子曳衣猶淺褐，鵝兒對酒已深黃。白蓮近揖三千女，丹荔遐招十

八娘。但把槐忙付年少。不妨老伴燕林塘。杜審言晏公主山池詩云。麝衛妓席。鶴子曳童衣。

某紹興甲子赴試。此地小居。今十年。三歷秋舉。每遇中秋。必與親舊歌舞之。今歲大病。使令輩

散遣蕭然。偶伯信伸威攜子姪相過。喜成四韻。

上元甲子此攻堅。卜築安居正十年。登堞遙觀燈奪盡。歸家卻賞月流天。丹臺旋葺新爐竈。絳帳都拋舊管絃。賴有故人將驥子。功名不斷復青氈。

江西美復送四景詩再次韻

西歲應知富酒漿。頻年暫輒奏伊涼。沼蓮不使紅侵碧。池鵠聊容白護黃。照坐雖無駢火寶。絮尊幸有絡絲娘。西風早晚驅殘暑。何日尋盟到野塘。

三次韻答江西美

菲飲簞壺食與漿。淡交非復世炎涼。佳名誰合戎州綠。妙語端由太史黃。無怨不須移孔議。有情未可老徐娘。荷香襲坐忘歸興。不覺昏鴉影度塘。

四次韻 同前

只因瑞露酌天漿。解后移尊赴晚涼。眼看碧幢擎蓋綠。心慚白鵠立槐黃。飲隨人量陳三雅。興入詩情談四娘。雲墨月離今驗矣。共欣甘雨溢陂塘。東坡催考校詩。門外白袍如立鵠。莊子。鵠不日浴而白。並音鶴。漢書注。黃鵠下太液池。似誤矣。黃鶴樓。

卽黃鵠。鵠鶴聲相近。其色亦然。

五次韻 同前

客嘉五饋合先漿。竹好仍生一味涼。天與冰肌勝傅粉。星馳火齊捷飛黃。將雛華表疑丁令。喚度京江憶杜娘。屢枉新篇誰可擬。一川煙草賀橫塘。

四景詩似欠一篇。五更枕上足成之。錄呈西美司書。勿勞屬和。僕亦偃旗閉壘矣。 同前

甘寒何必柘爲漿。也解逡巡造醴涼。更喜鶴鳴添子和。休因荔進引蕉黃。花如宋玉窺鄰女。詩似劉郎問泰娘。只欠西湖雙畫舫。便疑風景類錢塘。

劉訥畫廬陵三壽圖求詩

同辭宦路返鄉閭。兩驢驪中間以駑。前後顧瞻羞倚玉。支干引從偶連珠。三人不用邀明月。九老何妨續畫圖。從漢二疏唐尹後。相親相近此應無。

次韻楊廷秀待制瑞香花

灞橋忍凍兩相攢。漢殿含香別一般。粉面固宜垂紫袖。錦裳何必著中禪。禁庭侍史今同宿。宮帽花枝故自欒。咀嚼新詩懷舊直。刺貪寧不媿河檀。

楊子直以一詩送小兒歸省。又一絕及平園花木。校文苑英華。併次韻一笑。

老去何心悅盛華。觀書無奈眼昏花。但思載酒楊雲宅。細問三州二部家。作象隨卦云爾。栽花種竹滿平園。人道安閒似樂天。自笑鉛黃消永日。何如蠻素樂華年。

嘉興癸亥元日占寄呈永和乘成二兄

歸田初不隔江淮。底事心元未往來。賭酒彈棋真夢爾。幼年與兄以此守歲。不覺天明。膠牙藍尾亦悠哉。修禊歸來卻踏青。臨流謀野兩關情。不如省事遊春女。挑菜渚邊看水生。

王藉文學求讀書堂詩

倚相端能記典墳。子羔未可治人民。十年莫作攸之恨。萬卷方知甫也神。堂下從渠糟粕議。城南容我簡編親。鐵更三槌韋三絕。將聖猶然況後人。

次韻楊廷秀待制二首

某思規層宇。欲屈故人落之。乃未許枉駕。先貽二詩。曲盡登臨之勝。遂成絕唱。謹次原韻。其前自叙。其後敬簡。因致一來一往之意。

十年不侍殿東頭。臨水登山隱者流。一服瞳方無異相。三層句曲有巍樓。幸殊王粲非吾土。何事龐公不入州。至後臘前天欲雪。扁舟乘興肯來不。

官府新辭上界仙。碧瑤洞口晉桃源。默存常在清都境。歸去休無靖節園。爲問龍樓并鳳閣。何如佚老及

平原。明年大作南溪社。會訪拾遺花柳村。



# 文公集鈔

朱子文公諱熹字元晦一字仲晦徽州婺源人中紹興進士第歷事高孝光寧四朝仕至轉運副使崇政殿說書煥章閣待制致仕年七十一卒理宗贈太師封信國公改徽國屢經薦召爲小人所沮抑旋仕旋已道終不行知南康時建復白鹿洞書院遊武夷愛其山水奇宕築精舍論道其中所至生徒雲聚教學不倦天下攻僞學日急不顧也孝宗時侍郎胡銓以詩人薦同王庭珪內召故朱子自註詩云僕不能詩平生僥倖多類此然雖不役志於詩而中和條貫渾涵萬有無事模鑄自然聲振非淺學之所能窺此和順之英華天縱之餘事也

## 邵武道中

風色戒寒候歲事已透遲勞生尙行役遊子能不悲林壑無餘秀野草不復滋禾黍經秋成收斂已空畦田翁喜歲豐婦子亦嘻嘻而我獨何成悠悠長路岐凌霧卽曉裝落日命晚炊不惜容髻凋鎮日長空飢征鴻在雲天浮萍在青池微蹤政如此三歎復何爲

## 客舍聽雨

壬申

沈沈蒼山郭暮景含餘清春靄起林際滿空寒雨生投裝卽虛館簷響通夕鳴遙想山齋夜蕭蕭木葉聲

對雨

虛堂一遊囑。驟雨滿空至。的皪散芳塘。冥濛結雲氣。勢逐風威亂。望窮山景翳。煙靄集林端。蒼茫欲無際。涼氣襲輕裾。炎氛起秋思。對此景淒淒。還增沖淡意。

讀道書作

四山起秋雲。白日照長道。西風何蕭蕭。極目但煙草。不學飛仙術。日日成醜老。空瞻王子喬。吹笙碧天杪。

月夜述懷

皓月出林表。照此秋牀單。幽人起晤歎。桂香發窗間。高梧滴露鳴。散髮天風寒。抗志絕塵氛。何不棲空山。

冬雨不止

忽忽時序改。白日藏光輝。重陰潤九野。小雨紛微微。蒼山寒氣深。高林霜葉稀。田家秋成意。落落乖所期。曠望獨興懷。戚戚愁寒飢。事至當復遣。且掩荒園扉。

贈仰上人

澗谷秋雲曉。飄颻無定姿。氛氲升遠樹。凌亂起寒颼。雨罷成孤鶴。天高逐散絲。上人歸別嶺。心跡但如斯。

卽事偶賦

白煙竟日起。雨晦蒼山深。老菊不復妍。丹楓滿高林。抱病寢齋房。窗戶結愁陰。起望一舒情。遐眺豁煩襟。



人生亦已勞。世路方崎嶇。且詠招隱作。無爲名跡侵。

寄題咸清精舍清暉堂

山川佳麗地。結宇娛朝昏。朝昏有奇變。超忽難具論。千嵐蔽夕陰。百嶂明晨暎。穹林擢遙景。回澗盪秋氛。覽極慚未周。窮深遂忘喧。欲將身世遺。况託玄虛門。境空乘化往。理妙觸目存。珍重忘言子。高唱絕塵紛。

寄山中舊知

客子歸來晚。江湖欲授衣。路岐終寂寞。老大足傷悲。忼慨平生志。冥茫造物機。清秋鷓鴣上。萬里看橫飛。故園今夜半。林影澹逾清。曳杖南溪路。君應獨自行。潺湲流水思。蕭索早秋聲。盡向琴中寫。焉知離恨情。

述懷

夙尚本林壑。灌園無寸資。始懷經濟策。復愧軒裳姿。效官刀筆間。朱墨手持。謂言殫蹇劣。詎敢論居卑。任小才亦短。抱念一無施。幸蒙大夫賢。加惠寬箠笞。撫己實己優。於道豈所期。終當反初服。高揖與世辭。

喜晴

衝颺動高柳。淥水澹微波。日照秋空淨。雨餘寒草多。放懷遺簿領。發興託烟蘿。忽念故園日。東阡時一過。

曉步

初日麗高閣。廣步愛脩廊。重門掩秋氣。高柳廡方塘。閩海冬尚溫。晏陰天未霜。坐悲景物殊。亦念歲時荒。

故園屬佳辰。登覽遍陵岡。賓遊盡才彥。蕭散屏壺觴。別來時已失。懷思寧暫忘。宦遊何所娛。要使心懷傷。

憶齋中

高齋一遠眺。西南見秋山。景翳夕陰起。竹密幽禽還。賞愜慮方融。理會心自閑。誰料今爲客。寥落一窗間。

夢山中故人

風雨蕭蕭已送愁。不堪懷抱更離憂。故人只在千巖裏。桂樹無端一夜秋。把袖追歡勞夢寐。舉杯相屬暫綢繆。覺來卻是天涯客。簷響潺潺瀉未休。

南安道中

曉澗淙流急。秋山寒氣深。高蟬多遠韻。茂樹有餘音。煙火居民少。荒蹊草露侵。悠悠秋稼晚。寥落歲寒心。

九日

故國音書阻一方。天涯此日思茫茫。風煙歲晚添離恨。湖海尊前卽大荒。薄宦驅人向愁悴。舊游唯我最顛狂。細思萬石亭前事。辜負黃花滿帽香。

晚望

禾黍彌平野。淒涼故國秋。清霜凝碧樹。落日翳層丘。覽物知時變。爲農覺歲逾。不堪從吏役。憔悴欲歸休。

夜雨二首

擁衾獨宿聽寒雨。聲在荒庭竹樹間。萬里故園今夜永。遙知風雪滿前山。故山風雪深寒夜。只有梅花獨自香。此日無人問消息。不應憔悴損年芳。

留安溪三日按事未竟

縣郭四依山。清流出如駛。居民煙火少。市列無行次。嵐陰常至午。陽景猶氛翳。向夕悲風多。遊子不遑寐。我來亦何事。吏桀古所記。奉檄正淹留。何當語歸計。

安溪書事

清溪流不極。夕霧起嵐陰。虛邑帶寒水。悲風號遠林。涵山日欲晦。窺閣景方沉。極目無遺眺。空令愁寸心。六月十五日詣水公庵雨作

雲起欲爲雨。中川分晦明。纔驚橫嶺斷。已覺疎林鳴。空際旱塵滅。虛堂涼思生。頽澹滴瀝餘。忽作流泉傾。況此高人居。地偏園景清。芳馨雜悄蒨。俯仰同鮮榮。我來偶茲適。中懷澹無營。歸路綠泱泱。因之想巖耕。同僚小集梵天寺。坐間雨作。已復開霽。步至東橋。玩月賦詩二首。

傑閣翔林杪。披襟此日閒。層雲生薄晚。涼雨遍空山。地迥衣裳冷。天高澄霽還。出門迷所適。月色滿林關。空山看雨罷。微步喜新涼。月出澄餘景。川明發素光。星河方耿耿。雲樹轉蒼蒼。晤語逢清夜。茲懷殊未央。

梵天觀雨

持身乏古節。寸祿久棲遲。暫寄靈山寺。空吟招隱詩。讀書清磬外。看雨暮鐘時。漸喜涼秋遠。滄洲去有期。

兼山閣雨中

兩山相接雨冥冥。四牖東西萬木清。面似凍梨頭似雪。後生誰與屬遺經。

登閣

橫空敞新閣。高處絕炎氛。野迥長風入。天秋涼氣分。憑欄生逸想。投迹遠人羣。終憶茆簷外。空山多白雲。

和劉抱一

幾年牢落舊村墟。此日翛然水竹居。病起試尋春逕草。客來聊煮雪畦蔬。開樽細說平生事。信手同繙集古書。適意何勞一千卷。新詩閒出笑談餘。

梅花開盡不及吟賞感歎成詩聊貽同好

憶昔身無事。尋梅只怕遲。沉吟窺老樹。取次折橫枝。絕艷驚衰鬢。餘芳入小詩。今年何草草。政爾負幽期。

觀書有感二首

半畝方塘一鑑開。天光雲影共徘徊。問渠那得清如許。爲有源頭活水來。昨夜江邊春水生。蒙衝巨艦一毛輕。向來枉費推移力。此日中流自在行。

示西林可師二首

身世年來欲兩忘。一春隨意住僧房。行逢舊隱低回久。綠樹鶯啼清晝長。幽居四畔只空林。啼鳥落花春意深。獨宿塵龕無夢寐。五更山月照寒衾。

次韻劉彥采觀雪之句

朔風吹空林。眇眇無因依。但有西北雲。冉冉東南飛。須臾層陰合。慘澹周八維。凍雨不流淵。飛花舞妍姿。翳空乍滅沒。散影還參差。萬點隨飄零。百嘉潛潤滋。徘徊瞻詠久。默識造化機。上寒下必溫。欲積無根基。漸看谷樹變。稍覺叢篁低。浩然遂同色。宇宙乃爾奇。繁華改新觀。凜冽忘前悲。摛章愧佳友。佇立迎寒吹。感此節物好。嘆息今何時。當念長江北。鐵馬紛交馳。

次韻彥采病中口占

一榻流年度。篝燈遙夜闌。短衾閒自擁。清鏡莫頻看。竹密初驚雪。梅疎卻耐寒。從今花木夢。無復在雕欄。奉陪判院丈。充父平父兄。宿回向用知。郡丈壁間舊題之韻。

暮雨停驂處。僧廬古道邊。千峰環傑閣。一水下平田。行役無期度。經過幾歲年。明朝須飽飯。躡足上寒煙。數日前。與判院丈。有宋村之約。雪中有懷。奉呈判院通判二丈。

雲垂天闊歲將闌。一室翛然獨掩關。擁褐不知風折木。開軒惟見雪漫山。玄空杳靄低迷外。碧樹瓏璵掩映間。吟罷左思招隱句。扁舟無路過長灣。

奉陪彥集充父同遊瑞巖謹次莆田使君留題之韻

踏破千林黃葉堆。林間臺殿鬱崔嵬。谷泉噴薄秋逾響。山翠空濛晝不開。一壑祗今藏勝概。三生疇昔記曾來。解衣正作留連計。未許山靈便卻回。

伏讀二劉公瑞巖留題感事興懷至於隕涕追次元韻偶成二篇

誰將健筆寫崖陰。想見當年抱膝吟。緩帶輕裘成昨夢。遺風餘烈到如今。西山爽氣看猶在。北闕精誠直自深。故壘近聞新破竹。起公無路祗傷心。右懷寶學公作。近聞西兵進取關陝。其師即公舊部曲也。

投紱歸來臥赤城。家山無處不經行。寒巖解榻夢應好。絕壁題詩語太清。陳迹一朝成寂寞。靈臺千古自虛明。傳來舊業荒蕪盡。慚愧秋原宿草生。右懷病翁先生作。翁領崇道祠官。故有赤城之句。

入瑞巖道間得四絕句呈彥集充父二兄

憶昔南遊桂樹陰。歸來遺恨滿塵襟。籃輿此日無窮思。萬壑千巖秋氣深。翩翩一馬兩肩輿。路轉秋原十里餘。共說前山深更好。不辭迢遞款禪居。清溪流過碧山頭。空水澄鮮一色秋。隔斷紅塵三十里。白雲黃葉共悠悠。風高木落晚秋時。日暮千林黃葉稀。祗有蒼蒼谷中樹。歲寒心事不相違。

壽母生朝

秋風蕭爽天氣涼。此日何日升斯堂。堂中老人壽而康。紅顏綠鬢雙瞳方。家貧兒癡但深藏。五年不出門庭荒。竈經十日九不煬。豈辦甘脆陳壺觴。低頭包羞汗如漿。老人此心久已忘。一笑謂汝庸何傷。人間榮耀豈可常。惟有道義思無疆。勉勵汝節彌堅剛。烹前再拜謝阿娘。自古作善天降祥。但願年年似今日。老萊母子俱徜徉。

社後一日作

聖作重品節。等殺古所詳。里有秦社稷。僭差遂無章。王綱諒已頽。精意向不忘。尙論千載前。簡編有遺芳。侃侃陳孺子。恂恂萬春鄉。敬恭事耆老。禱賽謹田桑。悠悠我里居。歲事有故常。向來諸老翁。惇龐亦端莊。交神庶或享。與物同樂康。今我胡不樂。悵然下頽岡。古人不可見。今人自猖狂。

偶題三首

門外青山翠紫堆。幅巾終日面崔嵬。只看雲斷成飛雨。不道雲從底處來。擘開蒼峽吼奔雷。萬斛飛泉湧出來。斷梗枯槎無泊處。一川寒碧自縈回。步隨流水覓溪源。行到源頭卻惘然。始悟真源行不到。倚筇隨處弄潺湲。

借韻呈府判張丈既以奉箴且求教藥

一生江海迥無疇。材大應容小未周。景好身閑真復樂。酒酣耳熱卻堪憂。飛騰莫羨摩天鶴。純熟須參露

地牛我亦醒狂多忤物。頗能還贈一言不。

即事有懷寄彥輔仲宗二兄二首

一水方涵碧。千林已變紅。農收爭暖日。老病怯高風。徙倚非無計。心期莫與同。向來歡會處。離合太匆匆。聞說雙飛槩。翩然下廣津。江湖知子樂。魚鳥諒情親。淹速須關命。行藏不繫人。三山雖好在。惜取自由身。

次知府府判二丈韻

憶昨中秋夕。寒盟約重尋。幔亭權舉酒。江閣快論心。月墮俱忘記。壘空始罷斟。祇今千嶺隔。悵望一何深。

武夷之遊。張王二丈元履子厚。及熹與焉。江閣之集。于衡移具。知府丈亦賜臨屈。此詩併簡同會諸公云。

志士懷韜略。奇兵吼鑊干。關河那得往。肝膽不勝寒。壯節悲如許。雄圖渺未闌。皇輿方仄席。陋巷敢求安。

得浙中知舊書云。聖上留意武備。諸郡練卒。皆點名閱武。賜賚有加。戎士感奮。

題祝生畫

裴侯愛畫老成癖。歲晚倦遊家四壁。隨身只有萬疊山。祕不示人私自惜。俗人教看亦不識。我獨摩挲三太息。問君何處得此奇。和璧隋珠未為敵。答云衢州老祝翁。胸次自有陰陽工。峙山融川取世界。咳雲唾雨呼雷風。昨來邂逅衢城東。定交斗酒歡無窮。自然妙處容我識。為我掃此須臾中。爾時聞名今識面。回首十年齊掣電。裴侯已死我亦衰。祇君雖老身猶健。眼明骨輕鬚不變。筆下江山轉葱蒨。為君多織機中



練更約無事重相見

秀野以喜無多屋宇幸不礙雲山爲韻賦詩熹伏讀佳作率爾攀和韻劇思慳無復律呂笑覽之餘賜以斤斧幸甚

高人山水心結習自無始五畝江上園清陰遍桃李一堂聊自娛三徑亦可喜試問避俗翁何如尊賢里溫公獨樂園在尊賢里

門前車馬客無非朝大夫問公獨何事中歲遽此圖長安二三公髮白形枯臞隱憂念名節亦有此樂無

隱憂念名節張大參疏中語

君侯嗜圖史插架何其多徙居三十乘流汗幾橐駝千載誰晤語端居自絃歌至哉天下樂歲月如予何西山一何高雲氣出寒麓中有無事人鳴泉遶茅屋宴坐今幾何無以媚幽獨興至偶成篇呼兒爲余讀我居深山中茅舍破不補上見風攪林下有雲承宇聞公落新宮戶牖不可數懶惰心力衰念公亦良苦夜吟招隱詩月落寒泉井自非千載人誰與共清景散髮心朗寥凝神味淵永功名恐相期富貴非所幸仙人空山居道意妙羣物度世君則然脩身吾豈不飛行仰雲路趺坐探理窟獨夜扣星壇清齋且簪笏青山背夕陽茲景公所愛虛堂日落時遷坐一解帶嵐分疑有處鳥度知無礙須臾暮色來默默無與會端居屏塵慮萬事付一尊客來語世故舉白當浮君超搖謝衆甫樽沓從諸孫何以自怡悅窗中見秋雲

清溪何迢迢。上有千仞山。山中學仙侶。白石爲門關。丹經苦吟哦。至道窮躋攀。豈知人間世。風塵縈九寰。伏讀秀野劉丈間居詠。謹次高韻。率易拜呈。伏乞痛加繩削。是所願望。

積芳圃

樂事從茲不易涯。朱門還似野人家。行看靚艷須攜酒。對坐清陰只煮茶。曉起蒼涼承墜露。晚來光景亂蒸霞。平生結習今餘幾。試數毗那禰上花。

春谷

武夷高處是蓬萊。采得靈根手自栽。地僻芳菲鎮長在。谷寒蜂蝶未全來。紅裳似欲留人醉。錦障何妨爲客開。飲罷醒心何處所。遠山重疊翠成堆。

山人方丈

方丈翛然屋數椽。檻前流水自清漣。蒲團竹几通宵坐。掃地焚香白晝眠。地窄不容揮塵客。室空那有散花天。箇中有句無人薦。不是諸方五味禪。

挽蔬園

未覺閒來歲月頻。荷鋤方喜土膏勻。連畦已放瑤簪露。覆地行看玉本新。小摘登盤先餉客。晚炊當肉更宜人。卻憐寂寞公儀子。拔盡園蔬不嘆貧。

秋香徑

門外黃塵沒九達。坊中叢桂長樛枝。三秋冷蕊從開落。終歲清陰不改移。幽徑祇愁空翠滴。濃香一任晚風吹。攀援卻恨王孫遠。惆悵千林口口時。

曲池軒

去年種竹長新篁。今歲穿渠過野塘。自喜軒窗無俗韻。亦知草木有真香。林間急雨生秋思。水面微風度晚涼。卻厭端居苦無事。凭欄閒理釣絲長。

秀野劉丈寄示南昌諸詩和此兩篇

滕王閣下水初生。聞道登臨復快晴。帝子詎知陳迹在。長江肯趁曲池平。山楹雨罷珠簾卷。簷鐸風驚玉佩鳴。滿眼悲涼今古恨。人生辛苦竟何成。知向潮邊弄碧漪。闌干三撫漾晴暉。流傳妙語驚離闕。想像清游欲奮飛。公去不應停驛騎。我來直欲挂朝衣。南州高士何由見。且看新荷出水稀。

次秀野韻五首

史君簾閣對脩筠。起看名園雨後春。便賦新詩留野客。更傾芳酒酌花神。未酬管樂平生志。且作羲黃向上人。祇恐功名相迫逐。不容老子臥漳濱。

滿園紅紫已爭新。百轉幽禽亦喚人。蠟屐未妨泥步穩。珍叢終恨雨來頻。臥看曉色忻初霽。起約良游醉好春。卻笑當年金谷燕。相隨僕僕望車塵。惆悵春餘幾日光。從今風雨莫顛狂。急呼我輩穿花去。未覺詩情與道妨。羅帶不須吟杜若。角弓聊復賦甘棠。淋浪坐客休辭醉。飲罷晞身向九陽。知公久矣厭喧卑。造物尊前喚小兒。一醕未應峨側弁。十分聊爾快翻卮。治中寂寞凝塵日。令尹憂勞退食時。正好相尋發孤笑。莫教牢落負心期。當年共剪北山萊。脩竹成陰手自栽。書卷莫教春色老。柴荆肯爲俗人開。公能顧我傳新句。我欲留公發舊醅。悵望南園芳樹底。明年應放小車來。

留秀野劉丈二首

好雨當春過一犁。我公遠憶故園西。孤篷穩轉清灘急。十里行穿綠樹齊。路熟已欣經霧市。身輕未怕躡雲梯。諸孫剩欲留公住。細和新詩可指迷。一去屏山今幾春。歸來三逕但荒榛。剪除卻便風煙好。徙倚還驚物色新。樓外千林遮去路。塔前一水戀行塵。勸君更作留連計。同社追遊苦未頻。

次秀野滄波館刈麥二詩

傳聞泛宅賀新成。破月衝煙取次撐。鷓首斜飛寒浪急。篷窗側轉好山橫。知公興有江湖迥。願我詩無玉雪清。欲跨船舷還未敢。幾時得伴鏡中行。

貽謀夙昔但聲歌。今見郊園樂事多。且喜甌婁符善禱。未須蘆菔鑿去聲妖娥。霞觴政自誇真一。香鉢何煩問畢羅。我欲賣刀來學稼。不知還許受塵麼。

小說有人中麥毒夢。紅裳娘子悲歌。有一丸蘆菔火吾宮之句。

次秀野躬耕桑陌舊園之韻二首

郊園旱久只多蹊。昨夜欣沾雨一犁。已辦青鞋隨老圃。便驅黃犢過深溪。農談剩喜鄉鄰近。饁具仍教婦子攜。指點竹寒沙碧處。不知何似錦城西。

丈人高致邈難干。雲夢何如胸次寬。老去未妨詩律在。人來只怕酒杯乾。故開麥隴供家釀。更有蘭皋付客看。下走才慳慙屬和。願公物色稍留殘。

又和秀野一首

江皋晴日麗芳華。翠竹疎疎映白沙。路轉忽逢沽酒客。眼明惟見滿園花。望中景助詩人趣。物外春歸釋子家。向晚卻尋芳草徑。夕陽流水遶村斜。

次秀野詠雪韻三首

閉門高臥客來稀。起看天花滿院飛。地迥杉篁增勝概。庭虛鳥雀噪空飢。酒腸凍澁成新恨。病骨侵凌減

舊肥賴有袁生清興在。忍寒應未泣牛衣。  
一夜同雲匝四山。曉來千里共漫漫。不應琪樹猶含凍。翻笑楊花許耐寒。乘興正須披鶴氅。淪甘猶喜破龍團。無端酒思催吟筆。卻恐長鯨吸海乾。  
開門驚怪雪交加。亂落橫飛詎有涯。密竹不妨呈勁節。早梅何處覓殘花。山陰客子須乘興。洛下先生想臥家。病廢杯觴寒至骨。哦詩無復更豪誇。

次秀野極目亭韻

偶向新亭一破顏。高情直寄有無間。地偏已隔東西路。天闊長圍遠近山。浩蕩祇愁雲霧合。輪囷卻喜暮雲還。不堪景物撩人甚。倒盡詩囊未許慳。

又

坐看山花落幔顏。不知身在翠雲間。食寒到處雨復雨。客裏歸來山又山。口口孤燈閑口口。無心棲鳥暮忘還。世情分逐流年去。只有詩情老更慳。

次秀野春晴山行紀物之句

祇憑詩律作生涯。到處山林總是家。便與清尊臥芳草。不妨阜蓋拂殘花。側聞溫詔詢耆艾。好趁春風入殿衙。回首能忘舊猿鶴。一篇聊爾記年華。

再用韻題翠壁

孤亭一目盡天涯。俯瞰煙村八九家。翠壁長年懸布水。綠陰經雨墮危花。杖藜徒倚凝春望。覓句淹留到  
晚衙。珍重詩翁莫相惱。枯腸攪斷鬢絲華。

次山行佳句呈秀野丈

曠曠朝日出高巖。簌簌征衣曳曉嵐。口口向來孤舊意。林泉老去覺真貪。淒涼煙火一百五。零落交遊十  
二三。歎息口口口世事。臥吹橫笛過溪南。

次秀野雜詩韻

葺居

丈人高臥碧江頭。門掩西風萬木秋。重喜青山還遠屋。卻嫌黃葉漸平溝。開軒且放浮嵐入。決水徐通廢  
圃流。便覺園林頓蕭爽。不妨隨境味玄幽。

假山焚香作煙雲掬水爲瀑布二首

平地俄驚紫翠堆。便應題作小飛來。爐熏細度巖姿出。綫溜遙分壁色開。獨往但憑南郭几。遠遊休剪北  
山萊。人言造化無私力。珍重仙翁挽得回。

一簣功夫莫坐談。便教庭際湧千巖。眼中水石今成趣。物外煙霞舊所耽。泉細寒聲生夜壑。香銷暝靄變

晴嵐兒童也識幽棲地。共指南山更近南。

檳榔五絕卒章戲簡及之主簿

莫年藥裹關身切。此外翛然百不貪。薏苡載來綠下氣。檳榔收得為祛痰。  
錦文縷切勸加餐。蜃炭扶留共一椀。食罷有時求不得。英雄邂逅亦飢寒。  
向來試吏著南冠。馬甲蠔山得飫餐。卻藉芳辛來解穢。雞心磊落看堆椀。  
箇中有味要君參。螫吻春喉久不甘。珍重人心亦如此。莫將寒苦換春酣。

高士沈迷簿領書。有時紅糝綴玄須。定知不著金椀貯。兒女心情本自無。

劉穆之初仕為主簿。

答王無功在京思故園見鄉人間

王詩云。旅泊多年歲。志去不知迴。忽逢門外客。道發故鄉來。斂眉俱握手。破涕共銜杯。慙慙訪朋

舊。屈曲問童孩。衰宗多弟姪。若箇賞池臺。舊園今在否。新樹也應栽。柳行疎密布。茆齋寬窄裁。經移何處竹。別種幾株梅。渠當無絕水。石計總生苔。院果誰先熟。林花那更開。羈心秪欲問。為報不須猜。行當驅下澤。去剪故田萊。

我從銅川來。見子上京客。問我故鄉事。慰子羈旅色。子問我所知。我對子應識。朋遊總彊健。童稚各長成。  
華宗盛文史。連墻富池亭。獨子園最古。舊林間新坳。柳行隨堤勢。茅齋看地形。竹從去年移。梅是今年榮。  
渠水經夏響。石苔終歲青。院果早晚熟。林花先後明。語罷相歎息。浩然起深情。歸哉且五斗。餉子東臯耕。

題鄭德輝悠然堂



高人結屋亂雲邊。直面羣峰勢接連。車馬不來真避俗。簞瓢可樂便忘年。移筇綠幄成三徑。回首黃塵自一川。認得淵明千古意。南山經雨更蒼然。

長溪林一鶚。秀才有落髮之願。示及諸賢詩卷。因題其後二首。聞說當機百念休。區區何更苦營求。早知名教無窮樂。陋巷簞瓢也自由。貧里煩君特地過。金襴誰與換魚蓑。它年雲水經行遍。佛法元來本不多。

送德和弟歸婺源二首

十舍辛勤觸熱來。琴書曾未拂塵埃。秋風何事催歸興。步出閩山黃葉堆。十年寂寞抱遺經。聖路悠悠不計程。悞子南來卻空去。但將迂闊話平生。

次韻謝劉仲行惠筍

誰寄寒林新斲筍。開奩喜見白差差。知君調我酸寒甚。不是封侯食肉姿。

次王宰立春日大雪韻

是身已分老菟裘。肯爲春回作許愁。偶去尋芳朝信馬。卻來踏雪夜驅牛。鋪筵不見小垂手。聯句空慚高結喉。更約桃花紅浪暖。卻陪履鳥上蘭舟。

送張彥輔赴闕

執手何草草。送君千里道。君行入脩門。披膽謁至尊。問君此去談何事。袖有諫書三萬字。明堂封禪不要論。智名勇功非所敦。願言中興聖天子。脩政攘夷從此始。深仁大義天與通。農桑萬里長春風。朝綱清口軍律舉。邊屯不驚臥哮虎。一朝決策向中原。著鞭寧許它人先。

觀祝孝友畫卷

天邊雲遶山。江上煙迷樹。不向曉來看。詎知重疊數。草閣臨無地。江空秋月寒。亦知奇絕景。未必要人看。

祝孝友作枕屏小景以霜餘茂樹名之因題此詩

山寒夕颺急。木落洞庭波。幾疊雲屏好。一生秋夢多。

齋居感興二十首

余讀陳子昂感寓詩。愛其詞旨幽邃。音節豪宕。非當世詞人所及。如丹砂空青。金膏水碧。雖近乏世用。而實物外難得自然之奇寶。欲效其體。作十數篇。顧以思致平凡。筆力萎弱。竟不能就。然亦恨其不精於理。而自託於僊佛之間。以爲高也。齋居無事。偶書所見。得二十篇。雖不能探索微妙。追迹前言。然皆切於日用之實。故言亦近而易知。旣以自警。且以貽諸同志云。

昆崙大無外。旁薄下深廣。陰陽無停機。寒暑互來往。皇犧古神聖。妙契一俯仰。不待窺馬圖。人文已宣朗。

渾然一理貫。昭晰非象罔。珍重無極翁。爲我重指掌。  
吾翁陰陽化。升降八紘中。前瞻既無始。後際那有終。至理諒斯存。萬世與今同。誰言混沌死。幻語驚盲聾。  
人心妙不測。出入乘氣機。凝冰亦焦火。淵淪復天飛。至人秉元化。動靜體無違。珠藏澤自媚。玉韞山含暉。  
神光燭九垓。玄思徹萬微。塵編今寥落。歎息將安歸。  
靜觀靈臺妙。萬化從此出。云胡自蕪穢。反受衆形役。厚味紛朶頤。妍姿坐傾國。崩奔不自悟。馳騖靡終畢。  
君看穆天子。萬里窮轍迹。不有祈招詩。徐方御宸極。  
涇舟膠楚澤。周綱已陵夷。況復王風降。故宮黍離離。至聖作春秋。哀傷實在茲。祥麟一以踣。反袂空漣洏。  
漂淪又百年。僭侯荷爵珪。王章久已喪。何復嗟嘆爲。馬公述孔業。託始有餘悲。拳拳信忠厚。無乃迷先幾。  
東京失其御。刑臣弄天綱。西園植姦穢。五族沉忠良。青青千里草。乘時起陸梁。當塗轉凶悖。炎精遂無光。  
桓桓左將軍。仗鉞西南疆。伏龍一奮躍。鳳雛亦飛翔。祀漢配彼天。出師驚四方。天意竟莫回。王圖不偏昌。  
晉史自帝魏。後賢盍更張。世無魯連子。千載徒悲傷。  
晉陽啓唐祚。王明紹巢封。垂統已如此。繼體宜昏風。塵聚瀆天倫。牝晨司禍凶。乾綱一以墜。天樞遂崇崇。  
淫毒穢宸極。虐焰燔蒼穹。向非狄張徒。誰辦取日功。云何歐陽子。乘筆迷至公。唐經亂周紀。凡例孰此容。  
侃侃范太史。受說伊川翁。春秋二三策。萬古開羣蒙。

朱光徧炎宇。微陰眇重淵。寒威閉九野。陽德昭窮泉。文明昧謹獨。昏迷有開先。幾微諒難忽。善端本綿綿。  
掩身事齋戒。及此防未然。閉關息商旅。絕彼柔道牽。  
微月墮西嶺。爛然衆星光。明河斜未落。斗柄低復昂。感此南北極。樞軸遙相當。太一有常居。仰瞻獨煌煌。  
中天照四國。三辰環侍旁。人心要如此。寂感無邊方。  
放勛始欽明。南面亦恭己。大哉精一傳。萬世立人紀。猗歎歎日躋。穆穆歌敬止。戒燿光武烈。待旦起周禮。  
恭惟千載心。秋月照寒水。魯叟何常師。刪述存聖軌。  
吾聞包犧氏。爰初闢乾坤。乾行配天德。坤布協地文。仰觀玄渾周。一息萬里奔。俯察方儀靜。隕然千古存。  
悟彼立象意。契此入德門。勤行當不息。敬守思彌敦。  
大易圖象隱。詩書簡編訛。禮樂矧交喪。春秋魚魯多。瑤琴空寶匣。絃絕將如何。興言理餘韻。龍門有遺歌。

程子晚居龍門之南

顏生躬四勿。曾子曰三省。中庸首謹獨。衣錦思尙絢。偉哉鄒孟氏。雄辨極馳騁。操存一言要。爲爾挈裘領。  
丹青著明法。今古垂煥炳。何事千載餘。無人踐斯境。

元亨播羣品。利貞固靈根。非誠諒無有。五性實斯存。世人逞私見。鑿智道彌昏。豈若林居子。幽探萬化原。  
飄飄學仙侶。遺世在雲山。盜啓元命祕。竊當生死關。金鼎蟠龍虎。三年養神丹。刀圭一入口。白日生羽翰。

我欲往從之。脫屣諒非難。但恐逆大道。偷生詎能安。  
西方論緣業。卑卑喻羣愚。流傳世代久。梯接凌空虛。顧盼指心性。名言超有無。捷徑一以開。靡然世爭趨。  
號空不踐實。躡彼榛棘途。誰哉繼三聖。爲我焚其書。  
聖人司教化。鬢序育羣材。因心有明訓。善端得深培。天敍旣昭陳。人文亦褰開。云何百代下。學絕教養乖。  
羣居競葩藻。爭先冠倫魁。淳風反淪喪。擾擾胡爲哉。  
童蒙貴養正。孫弟乃其方。雞鳴咸盥櫛。問訊謹暄涼。奉水勤播灑。擁篲周室堂。進趨極虔恭。退息常端莊。  
劬書劇嗜炙。見惡逾探湯。庸言戒羸誕。時行必安詳。聖途雖云遠。發軔且勿忙。十五志於學。及時起高翔。  
哀哉牛山木。斤斧日相尋。豈無萌蘖在。牛羊復來侵。躬惟皇上帝。降此仁義心。物欲互攻擊。孤根孰能任。  
反躬良其背。肅容正冠襟。保養方自此。何年秀穹林。  
玄天幽且默。仲尼欲無言。動植各生遂。德容自清溫。彼哉夸毗子。咕囁徒啾喧。但逞言辭好。豈知神監昏。  
曰余昧前訓。坐此枝葉繁。發憤永刊落。奇功收一原。

卜居

卜居屏山下。俯仰三十秋。終然村墟迫。未愜心期幽。近聞西山西。深谷開平疇。茆茨十數家。清川可行舟。  
風俗頗淳朴。曠土非難求。誓捐三徑資。往遂一壑謀。伐木南山顛。結廬北山頭。耕田東溪岸。濯足西水流。

朋來卽共懽。客去成孤遊。靜有山水樂。而無身世憂。著書俟來哲。補過希前脩。茲焉畢暮景。何必營菟裘。

鵝湖寺和陸子壽

德義風流夙所欽。別離三載更關心。偶扶藜杖出寒谷。又枉籃輿度遠岑。舊學商量加邃密。新知培養轉深沉。卻愁說到無言處。不信人間有古今。

奉陪機仲宗正景仁太史期會武夷而文叔茂實二友適自昭武來集相與泛舟九曲周覽巖壑之勝而機仲景仁唱酬迭作謂僕亦不可以無言也衰病懶廢那復有此勉出數語以塞嘉貺不足爲外人道也

此山名自西京傳。丹臺紫府天中天。似聞雲鶴時降集。應笑磨螳空回旋。我來適此秋景晏。青楓葉赤搖寒煙。九還七返不易得。千巖萬壑渠能專。同遊幸有二三子。天畀此段非徒然。梁郎季子山澤臞。傅伯爰。盡瀛洲仙。相逢相得要彊附。卻恨馬腹勞長鞭。黃花未和白雪句。畫舸且共清冷川。回船罷酒三大息。百歲誰復來通泉。景仁數日屢誦此句盈虛有數豈終極。爲君出此窮愁篇。

復用前韻敬別機仲

君家道素幾葉傳。只今用舍懸諸天。屹然砥柱戰河曲。肯似落葉隨風旋。奮髯忽作蝟毛磔。浩氣勃若霄中煙。隱憂尙喜遺直在。壯烈未許前人專。武夷連日聽奇語。今我兩腋風冷然。初如茫茫出太極。稍似冉

冉隨羣仙。安能局促夜起舞。下與祖述爭雄鞭。終憐賢屈惜往日。亦念聖孔悲徂川。願君盡此一杯酒。預澆舌本如懸泉。沃心澤物吾有望。勒移忍繼鍾山篇。

讀機仲景仁別後詩語因及詩傳綱目復用前韻

道有默識無言傳。向來誤矣空談天。只今斷簡窺蠹蝕。似向追蠹看蟲旋。始知古人有妙處。未遑秦谷隨飛煙。終然世累苦妨奪。下帷發憤那容專。一心正爾思鵠至。兩手欲救驚頭然。書空且復罷咄咄。屢舞豈暇陪仙仙。酒。故云。止。兩年罷詩。止。功名況乃身外事。我馬辟兀甘回鞭。解頤果值得水井。謂詩。傳。鑒古亦會朝宗川。謂綱目。兩公知我不罪我。便可築室分林泉。十年燈下一夜語。閒日共賦春容篇。

讀通鑑紀事本末用武夷唱和元韻寄機仲

先生諫疏莫與傳。忠憤激烈號旻天。卻憐廣文官舍冷。只與文字相周旋。上書乞得聊自屏。清坐日對銅爐煙。功名馳騫往莫悔。鈇槩職業今當專。要將報答陛下聖。矯首北闕還潛然。屬詞比事有深意。憑愚護短驚羣仙。空言未秉太史筆。自幸已執留臺鞭。溫公以留臺領書局。時韓魏公與書。有執鞭之語。果然敕遣六丁取。香羅漆匣浮桐川。陰凝有戒竦皇鑒。恭聞上讀此書。有履霜堅冰之語。陽剝欲盡生玄泉。明年定對白虎殿。更誦大學中庸篇。頃

武夷宮。講正心誠意。

拜張魏公墓下

衡山何巍巍。湘流亦湯湯。我公獨何往。劍履在此堂。念昔中興初。孽豎倒冠裳。公時首建義。自此扶三綱。精忠貫宸極。孤憤摩穹蒼。元戎二十萬。一旦先啓行。西征奠梁益。南轅無江湖。士心旣豫附。國威亦張皇。縞素哭新宮。哀聲連萬方。黠虜聞褫魄。經營久徬徨。玉帛驟往來。士馬且伏藏。公謀適不用。拱手遷南荒。白首復來歸。髮短丹心長。拳拳冀感格。汲汲勤修攘。天命竟難諶。人事亦靡常。悠然謝台鼎。騎龍白雲鄉。坐令此空山。名與日月彰。千秋定軍壘。岌嶮遙相望。賤子來歲陰。烈風振高岡。下馬九頓首。撫膺淚淋浪。山頽今幾年。志士日慘傷。中原尙腥羶。人類幾豺狼。公還浩無期。嗣德煒有光。恭惟宋社稷。永永垂無疆。

登定王臺

寂寞番君後。光華帝子來。千年餘故國。萬事只空臺。日月東西見。湖山表裏開。從知爽鳩樂。莫作雍門哀。

次敬夫登定王臺韻

今朝風日好。抱病起登臺。山色愁無盡。江波去不回。客懷元老草。節物又疎梅。且莫催歸騎。憑欄更一杯。

風雪未已決策登山用敬夫春風樓韻

披風闌臺宮。看雨百常觀。安知此山雲。對面隔霄漢。濃陰匝寰區。密雪渺天畔。峨峨雪中山。心眼悽欲斷。吾人愛奇賞。遞發臨河嘆。我知沔寒極。見睨今當泮。不須疑吾言。第請視明日。蠟屐得鴈行。籃輿或魚貫。

雪消溪漲山色尤可喜口占



頭上瓊岡出舊青。馬邊流水漲寒汀。若爲留得晶熒住。突兀長看素錦屏。

羅漢果次敬夫韻

自勞足倦登喬嶽。吻燥腸枯到上方。從遣山僧煮羅漢。未妨分我一杯湯。

泉聲次林擇之韻

空巖寒水自悲吟。遙夜何人爲賞音。此日團欒都聽得。他時離索試追尋。

自方廣過高臺次敬夫韻

素雪留清壁。蒼霞對赤城。我來陰壑晚。人說夜燈明。貝葉無新得。蒲人有舊盟。咄哉寧負汝。安敢負吾生。

清疑作青。

石廩峰次敬夫韻

七十二峰都插天。一峰石廩舊名傳。家家有廩高如許。大好人間快活年。

過高臺攜信老詩集夜讀上封方丈次敬夫韻

十年聞說信無言。草草相逢又黯然。借得新詩連夜讀。要從苦淡識清妍。

贈上封諸老

夜宿上封寺。翛然塵慮清。月明殘雪裏。泉溜隔窗聲。楮衲今如許。綈袍那復情。爐紅虛室暖。聊得話平生。

十六日下山各賦一篇仍迭和韻

絕頂來還晚。寒窗睡達明。連牀眇歸思。三宿悵餘情。雲合山無路。風回雪有聲。嶽祇珍重意。只此是將迎。  
讀林擇之二詩有感自此後。係東歸亂藁。

筓輿隨望入寒煙。每誦君詩輒黯然。今夜定知連榻夢。一時飛墮錫山前。  
竹輿傲兀聽嘔啞。合眼歸心已到家。遊子上堂慈母笑。豈知行李尙天涯。  
馬上贈林擇之

與君歸思渺悠哉。馬上看山首共回。認取山中奇絕處。他年無事要重來。

梅溪陂下作

野牛浮鼻過寒溪。落木蘓蔞水下陂。俗手定應摹不得。無人說與范牛知。

舟中見新月伯崇擇之二友皆已醉臥以此戲之

舟中見新月。煙浪不勝寒。與問醉眠客。豈知行路難。殘陽猶水面。孤鴈更雲端。篷底今宵意。天邊芳歲闌。

次韻擇之進賢道中漫成

白酒頻斟當啜茶。何妨一醉野人家。據鞍又向岡頭望。落日天風雁字斜。  
笑指斜陽天外山。無端長作翠眉攢。豈知男子桑蓬志。萬里東西不作難。

夜宿林岡月滿川。歸期屈指正茫然。也知地脈無羸縮。只把陰晴更問天。  
誰作窗間擁鼻聲。更哦樂府短歌行。從教永夜清無寐。只恐晨雞不肯鳴。  
日暮重岡上。人勞馬亦飢。不妨隨野雀。容易宿寒枝。

山行兩日至金步復見平川行夷路計程七日可到家矣

行穿側徑度荒山。又踏深泥過野田。路轉忽然開遠望。眼明復此見平川。  
江煙浦樹悲重疊。楚水閩山喜接連。稅駕有期心轉迫。稜稜瘦馬不勝鞭。

次韻擇之金步喜見大江有作

江頭四望遠峰稠。江水中間自在流。並岸東行三百里。水源窮處卽吾州。  
此江發源分水嶺。有楚水閩山喜接連之句。故前詩。

鈇山立春六言二首

雪擁山腰洞口春。迴楚尾吳頭。欲問閩天何處。明朝嶺水南流。  
行盡風林雪徑。依然水館山村。卻是春風有腳。今朝先到柴門。

九日登天湖以菊花須插滿頭歸分韻賦詩得歸字

去歲瀟湘重九時。滿城寒雨客思歸。故山此日還佳節。黃菊清罇更晚暉。  
短髮無多休落帽。長風不斷且吹衣。相看下視人寰小。祇合從今老翠微。

歸報德再用前韻

幾枝藤竹醉相攜。何處千峰頂上歸。正好臨風眺平楚。卻須入谷避斜暉。酒邊泉溜寒侵骨。坐上嵐光翠染衣。踏月過橋驚易晚。林垞回首更依微。

次知郡章丈遊山之韻

前峰鸞鶴去無蹤。解后荒尋得故宮。但覺風煙隨意好。便驚塵土轉頭空。提壺命駕幽期遠。授簡哦詩妙處同。安得西山一丸藥。共隨簫鼓向雲中。

送林擇之還鄉赴選三首

青驪去路欲駸駸。回首猶須話此心。一別便成三數月。有疑誰講過誰箴。門外槐花似欲黃。高堂應望促歸裝。箇中自有超然處。肯學兒曹一例忙。今朝握手送君歸。馬上薰風拂面吹。不用丁寧防曲學。寒窗久矣共心期。

擇之寄示深卿唱和烏石南湖佳句輒次元韻

未識南湖景。遙欣二子遊。賞心并勝日。妙語逼清秋。賸欲攜書卷。相將買釣舟。微吟歸去晚。杜若滿汀洲。平湖渺空闊。積水暮生寒。但見綠千頃。不知深幾竿。人間元迫隘。世路足艱難。若了滄洲趣。無勞正眼看。擇之賢友歸途左顧。示以四明酬唱。煥爛盈編。三復咏嘆。想見聚遊之樂。輒用黃山卽事之韻。

賦呈擇之兼懷子重老兄順之賢友

十年身臥白雲堆。已分黃塵斷往回。不是幽人遺俗去。肯尋流水渡關來。三秋風月從頭說。千里湖山覿面開。久欲過逢須一快。豈知勞結倍難裁。

遊密庵分韻賦詩得還字

我行得佳友。勝日尋名山。春山旣妍秀。清溪亦潺湲。行行造禪扉。小憩腰腳頑。窮探意未已。理策重躋攀。入谷翳蒙密。俯澗隨泓灣。誰將百尺綯。挂此長林間。雄聲殷地厚。洪源瀉天慳。偉哉奇特觀。償此一日閒。所恨境過清。悄恰暮當還。顧步三嘆息。人生何苦艱。

遊密庵分韻賦詩得絕字

閩鄉饒奇山。仙洲故稱傑。巍然一峰高。復與衆山絕。傳聞極目處。天水遠明滅。萬里倏往還。三光下羅列。我來發孤興。徑欲躋巒嶠。病骨竟支離。何當攀去轍。

游晝寒以茂林脩竹清流激湍分韻賦詩得竹字

仙洲幾千仞。下有雲一谷。道人何年來。借地結茅屋。想應厭塵網。寄此媚幽獨。架亭俯清湍。開徑玩飛瀑。交遊得名勝。還往有篇牘。杖屨或鼎來。共此巖下宿。夜燈照奇語。曉策散游目。茗椀共甘寒。蘭臯薦清馥。至今壁間字。來者必三讀。再拜仰高山。愜然心神肅。我生雖已後。久此寄齋粥。孤興屢呻吟。羣遊幾追逐。

十年落塵土。尙幸不遠復。新涼有佳期。幾日戒征軸。宵興出門去。急雨遍原陸。入谷尙輕埃。解裝已銀竹。虛空一瞻望。遠思翻蹙。祖趾亟躋攀。冠巾如膏沐。雲泉增舊觀。怒響震寒木。深尋得新賞。一簣今再覆。同來況才彥。行酒屢更僕。從容出妙句。珠貝爛盈匊。後生更疊疊。俊語非碌碌。吾纓不復洗。已失塵萬斛。所恨老無奇。千毫真浪禿。

圭父約爲金斗之遊次韻獻疑聊發一笑

幾日春風未破寒。遠峰晴露玉巒岏。不成蠟屐攜筇去。且復鈎窗拄頰觀。聞道追遊當作意。故應期日尙能寬。陰崖凍合無垂練。卻恐詩翁興易闌。

奉酬圭父末利之作

玉藥琅玕樹。天香知見薰。露寒清透骨。風定遠含芬。爽致銷繁暑。高情謝曉雲。遙憐河朔飲。那得醉時聞。

雲關

白雲去復還。黃塵到難入。只有澗水聲。出關流更急。

蓮沼

亭亭玉芙蓉。迥立映澄碧。只愁山月明。照作寒露滴。

杉逕

南起雲關口。縈迂上草堂。天風發清籟。山月度寒光。  
雲莊

小丘橫翠几。層嶂復嵯峨。釋耒閒來看。巖姿此處多。

泉硤

入關但平田。復此得清響。何必問真源。神襟一蕭爽。

石池

兩岸蒼峭石。護此碧泓寒。秋月來窺影。驪珠吐玉盤。

山楹

山楹一悵望。恨此雲迷谷。仙人不可期。縹緲雙髻綠。

藥圃

長鑿斲靈根。蒔此泉下圃。珍劑未須論。丹萸已堪煮。

井泉

山高澤氣通。石竇飛靈液。默料谷中雲。多應從此出。

西寮

畚田種胡麻。結草寄林樾。珍重無心人。寒棲弄明月。

晦菴

憶昔屏山翁。示我一言教。自信久未能。巖棲冀微效。

懷仙

西望多奇峰。北瞰獨仙府。欲致武夷君。石壇羅杯醕。

揮手

山臺一揮手。從此斷將迎。不見塵中事。惟聞打麥聲。

雲社

自作山中人。卽與雲爲友。一嘯雨紛紛。無勞三奠酒。

桃溪

澗裏春泉響。種桃泉上頭。爛紅紛委地。未肯出山流。

休菴

別嶺有精廬。林巒亦幽絕。無事一往來。茶瓜不須設。

雲谷合記事。目效俳體戲。作三詩寄季通。



雲關須早築。基趾要堅牢。栽竹行教密。穿池岸欲高。乘春移菡萏。帶雪覓蕭椽。謂杉徑也。更向關門外。疏泉斬亂蒿。

堂成今六載。上雨復旁風。逐急添茆蓋。連忙畢土功。謂柱下貼塼。桂林何日秀。蘭逕幾時通。并築雙臺子。東山接水筒。

莊舍宜先立。山楹卻漸營。泉疏藥圃潤。堰起石池清。早印荒田契。仍標別戶名。想應頻檢校。祇恐欠方兄。  
彥集奉檄歸省示及佳篇次韻奉酬呈諸兄友

遊子思親久聚糧。不堪官裏簿書忙。平生況少鷹鷂意。此日尤慙時世粧。臘雪未消歡奉檄。春風初轉喜還鄉。上堂佳慶從容問。一嚼何妨累十觴。

彥集兄再適臨汀惠顧蓬華賦詩留別眷予良勤次韻祖行言不盡意

賸喜君才老更成。伊優叢裏見孤撐。官身未免心徒壯。親膝頻違淚欲橫。簿領不嫌春筍束。廉聲要比玉壺清。枉車投翰殷勤甚。安得仁言與贈行。

宿休菴用德功壁間韻贈陳道人

暮入千峯裏。寒棲一草菴。室連丹竈暖。廚引石泉甘。塵慮紛難到。神光暖內含。非君有道氣。孤絕詎能堪。

崇壽客舍夜聞子規得三絕句寫呈平父兄煩爲轉寄彥集兄及兩縣間諸親友

空山初夜子規鳴。靜對琴書百慮清。喚得形神兩超越。不知底是斷腸聲。  
空山中夜子規啼。病怯餘寒覓故衣。不爲明時堪眷戀。久知岐路不如歸。  
空山後夜子規號。斗轉星移月尙高。夢裏不知歸未得。已驅黃犢度寒臯。

入南康界閱圖經感陶公李渤劉凝之事戲作

長官定笑歸來晚。中允應嫌去卻回。惟有山人莫相笑。也曾還俗做官來。

立秋日。同子澄寺簿。及僉判教授二同寮。星子令尹。約周君。段君。同遊三峽。過山房。登折桂。分

韻賦詩。得萬字。輒成十韻。呈諸同遊。

抗塵幾何時。猿鶴共悲怨。豈知朱墨暇。乃適山水願。茲晨秋令初。休沐謹邦憲。佳賓忽四來。英僚亦三勸。  
駕言北郭門。謝此旃隼建。散目三崔嵬。縱轡路脩蔓。凭欄快倒峽。躋壑困脫輓。追攀林樾深。懽喜腳力健。  
登高眺遠浦。衆景爭自獻。何必仍丹丘。徑欲凌九萬。

分韻得眠意二字賦醉石簡寂各一篇呈同遊諸兄

驅車何所適。往至秋雲邊。企彼澗中石。舉觴酌飛泉。懷哉千載人。矯首辭世喧。淒涼義熙後。日醉向此眠。  
仰視但青冥。俯聽驚潺湲。起坐三太息。涕泗如奔川。神馳北闕陰。思屬東海壖。丹衷竟莫展。素節空復全。  
低徊萬古情。惻愴顏公篇。爲君結茅屋。歲暮當來還。醉石。

天秋山氣深。日落林景翠。亦知後騎迫。且復一流憩。環瞻峯列屏。迥矚泉下漚。永懷仙陸子。久挹浮丘袂。于今知幾載。故宇日荒廢。空餘醮壇石。香火誰復繼。更憐韋刺史。五字有真意。虎竹付歸人。悲風起橫吹。沉吟向絕迹。浩蕩發幽寄。來者知爲誰。念我儻三喟。簡寂。

遊白鹿洞熹得謝字賦呈元範伯起之才三兄并示諸同遊者

歲月有環周。窮臘忽受謝。眷眷山水心。幸此朱墨暇。招呼得良友。邂逅成夙駕。深尋故轍迹。喜見新結架。永懷拾遺公。藏器此待價。橫流詩書澤。下及楊李霸。炎神撫興運。制作流大化。石室萬卷藏。綸言九天下。規模未云遠。荒蕪良可詫。自非賢邑宰。誰復此精舍。會當求救賜。畢願老耕稼。更與盡心期。臨流抗風榭。

白鹿講會次卜丈韻

宮墻蕪沒幾經年。祗有寒煙鑱澗泉。結屋幸容追舊觀。題名未許續遺編。請爲洞主不報。青雲白石聊同趣。

謂西澗劉公。霽月光風更別傳。謂濂溪夫子。珍重箇中無限樂。諸郎莫苦羨騰騫。

和張彥輔初到南康之句

十年不共賦陽春。正有胸中萬斛塵。失喜清詩還入手。細看佳句轉驚人。知公近覺青山好。願我頻嗟白髮新。肯過寒齋共尊酒。向來心事請深陳。

秋日告病齋居奉懷黃子厚劉平父及山間諸兄友

出山今幾時。忽忽歲再秋。江湖豈不永。我興終悠悠。況復逢旱魃。農畝無餘收。赤子亦何辜。黃屋勞深憂。而我忝朝寄。政荒積愆尤。懷痾臥空閣。惻愴增綢繆。東南望故山。上有玄煙浮。平生采芝侶。寂寞今焉儔。朝遊雲峰巔。夕宿寒巖幽。爲我泛瑤瑟。泠然發清謳。裂牋寄晨風。問我君何求。洪濤捩君柁。狹硤摧君輟。君還若不早。無乃非良謀。再拜謝故人。低徊更包羞。桂華幸未歇。去矣從公游。

夜坐有感

秋堂天氣清。坐久寒露滴。幽獨不自憐。茲心竟誰識。讀書久已懶。理郡更無術。獨有憂世心。寒燈共蕭瑟。

戲贈勝私老友

槐花黃盡不關渠。老向功名意自疎。乞得山田三百畝。青燈徹夜課農書。勝私先侍講。著農書三卷。嘗

代勝私下一轉語

碓下泉鳴溜決渠。屋頭桑樹綠扶疎。朱虛正自知田事。馬服何妨讀父書。

和戴主簿韻

平生本自好樓居。況接高人永晝餘。共喜江山入尊俎。從教幕府省文書。感君肯出新詩句。恨我終思舊草廬。擬借韋編訂龍馬。免推納甲話蟾蜍。戴嘗有麻衣易說。以爲得之異人云。自

奉同尤延之提舉廬山雜詠十四篇

白鹿洞書院在郡城東北十五里。專見記文。

昔人讀書地。町疇白鹿場。世道有升降。茲焉更表章。矧今中興年。治具一以張。絃歌獨不嗣。山水無輝光。荒榛適剪除。聖謨已汪洋。亦有皇華使。肯來登此堂。問俗良懇惻。懷賢增慨慷。雅歌有餘韻。絕學何能忘。

折桂院黃雲觀在書院東北五里。院後作亭。取李白黃雲萬里動風色之句名之。

城中東北望。五老何蒼蒼。下有前朝寺。一原頗深藏。門前林澗幽。屋後雲木荒。閒窗亦明潔。著此瑞錦張。僧房有瑞香花。更能理枯筇。步上林北岡。仰視天宇闊。俯瞰江流長。即黃雲觀。受書彼何人。姓字不足詳。竹帛有

遺臭。桂樹徒芬芳。李逢吉嘗讀書此院。以故得名。

楞伽院李氏山房在折桂西十里。李公擇讀書處。有東坡記文詩。刻枯樹墨跋。

躡石循急澗。穿林度重岡。俛入幽谷邃。仰見奇峯蒼。李公英妙年。讀書此雲房。一去上臺閣。致身何慨慷。蘇公記藏書。文字有耿光。餘事亦騷雅。戲墨仍風霜。兩公不歸來。歲月忽已荒。何用建遺烈。寒泉薦孤芳。

棲賢院三峽橋在楞伽西五里。

兩岸蒼壁對。直下成斗絕。一水從中來。湧湑知幾折。石梁據其會。迎望遠明滅。倏至走長蛟。捷來翻素雪。聲雄萬霹靂。勢倒千滌嶮。足掉不自持。魂驚詎堪說。老仙有妙句。千古擅奇崛。尙想化鶴來。乘流弄明月。

西澗清淨退庵在棲賢西三里。劉凝之隱作。亭。取黃大史詩語名之。

凌兢度三峽，窈窕復一原。絕壁擁蒼翠，奔流逝潺湲。聞昔避世人，寄此茅三間。壯節未云遠，高風杳難攀。深尋得遺墟，縛屋臨清灣。坐睨寒木杪，飛泉闕雲關。茲游非昔游，累解身復閒。保此清淨退，當歌不能緩。  
解印後與友生游集·徘徊久之·

臥龍庵武侯祠在西澗西三里。

空山龍臥處，蒼峭神所鑿。下有寒潭幽，上有明河落。我來愛佳名，小築寄幽壑。永念千載人，丹心豈今昨。英姿儼繪事，凜若九原作。寒藻薦芳馨，飛泉奉明酌。公來識此意，願步慘不樂。抱膝一長吟，神交付冥漠。

莫杉寺在臥龍西十里。

休沐聊命駕，駕言何所之。行尋慶雲寺，想像昭陵時。門前杉徑深，屋後杉色奇。空山歲年晚，鬱鬱凌寒姿。當年雨露恩，千載有餘滋。匠石不敢睨，孤標儼相持。  
寺前後杉萬本皆天聖中植·有旨禁翦伐者·更啓石室藏，仰瞻天像垂。願以清淨化，永爲太平基。  
寺藏仁祖御飛白書·有清淨字·

開先漱玉亭  
在萬杉西二里·亭舊在橋上·今廢·

奇哉康山陽，雙劍屹對起。上有橫飛雲，下有瀑布水。崩騰復璀璨，佳麗更雄偉。勢從三梁外，影落明湖裏。平生兩仙句，詠嘆深仰止。三年落星灣，悵望眼空眯。今朝隨杖屨，得此弄清泚。更誦玉虹篇，塵襟諒昭洗。

簡寂觀  
在開先西五里·陸修靜所居·

高士昔遺世。築室蒼崖陰。朝真石壇峻。煉藥古井深。結交五柳翁。屢賞無絃琴。相攜白蓮渚。一笑傾夙心。晚歲更市朝。故山鎖雲岑。柴車竟不返。鸞鶴空遺音。修靜晚為宋明帝召至建康。卒于崇虛館。我來千載餘。舊事不可尋。四顧但絕壁。苦竹寒蕭慘。相傳竹是修靜手植。其萌即所謂甜苦筍者。

歸宗寺在簡寂西十里。

金輪紫霄上。寶界鸞溪邊。往昔王內史。願香有餘煙。相傳寺是王右軍故宅。千年今一歸。景物還依然。澗水既蕩滌。山花亦清妍。不辭原隰勞。樂此賓從賢。訪古共紆鬱。勞農獨勤拳。憐我乖勝踐。裂牋寄真詮。逃禪公勿遽。且畢區中緣。是日烹以事不得陪杖屨。

陶公醉石歸去來館在歸宗西五里。

予生千載後。尚友千載前。每尋高士傳。獨歎淵明賢。及此逢醉石。謂言公所眠。況復巖壑古。縹緲藏風煙。仰看喬木陰。俯聽橫飛泉。景物自清絕。優游可忘年。結廬倚蒼峭。舉觴酌潺湲。臨風一長嘯。亂以歸來篇。  
温湯在醉石南二里。

連山西南來。中斷還崛起。干霄幾千仞。據地三百里。飛峰上靈秀。衆壑下清美。逮茲勢力窮。猶能出奇偉。誰燃丹黃燄。爨此玉池水。客來爭解帶。萬劫付一洗。當年謝康樂。絃絕今已矣。水碧復流温。相思五湖裏。

康樂湖中詩云。水碧輟流温。豈未見此水也耶。

康王谷水簾

谷口景德觀。在溫湯西十五里。入谷又十五里。至簾下。

循山西北。驚崎嶇。幾經丘。前行荒蹊斷。豁見清溪流。一涉臺殿古。再涉川原幽。縈紆復屢渡。乃得寒巖陬。飛泉天上來。一落散不收。披崖日璀璨。噴壑風颼颼。追薪爨絕品。淪茗澆窮愁。敬酌古陸子。何年復來遊。

陸鴻漸茶經。第此水為天下第一。

落星寺在郡城南湖中。

浩浩長江水。東逝無停波。及此一回薄。湖平煙遊多。孤嶼屹中川。層臺起周阿。晨望愛明滅。夕游驚蕩磨。極目青冥茫。回瞻碧嵯峨。不復車馬迹。唯聞榜人歌。我願辭世紛。茲焉老漁蓑。會有滄浪子。鳴舷夜相過。

遊天池

三年落星渚。北望天池山。臨風幾浩歎。欲往無飛翰。今朝復何朝。陟此青雲端。高尋已奇絕。俯瞰何其寬。西窮濂溪源。東盡溢城關。渺然滄波外。淮山碧連環。我意殊未極。更思出塵寰。何當駕輕鴻。八表須臾間。視此長江水。滔滔儻西還。

山北紀行十二章章八句

祗役廬山陽。矯首廬山陰。雲峯不可覲。碧澗何由尋。昨朝解印章。結友同窺臨。盡彼巖壑勝。滿茲仁知心。  
予以閏月二十七日。罷郡。是夕出城宿羅漢。二十八日。宿白鹿。二十九日。登黃雲觀。度三峽。窺玉淵。憩西澗。飲西原。宿臥龍。四月一日。過開先。宿歸宗。二日。浴湯泉。



南·入康王谷·觀水簾·宿景德觀·三日·與清江劉清之子澄·永嘉張揚卿清叟·尋陽王阮

·溫陵吳兼善仲達·長樂林用中擇之·洛陽趙希漢南紀·會稽陳祖永慶長·武當祁真卿師忠

·隅占之·陳士直彥忠·廬陵許子春景陽·新安胡莘尹仲·建安王朝春卿·長樂涂·窺臨事若何

請從圓通說·透迤山門路·稍舊脩篁列·溪仍侯家名·屋是孱王設·何救黍離歌·唱焉傷覆轍·侯溪·本侯

氏所居·但門徑竹木·深舊可觀耳·無它·行逢石門雨·解驂寒澗東·朝隋錦繡谷·俯仰春冥濛·懸泉忽淙琤·雜

樹紛青紅·屢憩小亭古·幽探思無窮·石門澗正在天池山下·有小菴三四·橋背有亭·下又有亭基

二·小·竦身長林端·策足層崖表·仰瞻空界闊·俯歎塵寰小·天池西嶽崆·佛手東窈窕·杖履往復來·憑軒

瞰歸鳥·盡錦繡谷·登山稍高·無復林木·坡陀而上·至天池院·在小峯絕頂·乃有石池·又

有石榻·名遠·斯須暮雲合·白日無餘暉·金波從地湧·寶燄穿林飛·僧言自雄誇·俗駭無因依·安知本地

靈發見·隨天機·天池院西數步·有小佛閣·下臨絕壑·是遊人請燈處·僧去燈非禱不見·是

可誣·豈地氣·深尋兩林間·清波貫華屋·蓮社有遺蹤·草堂非舊築·修廊餘故刻·好醜雜珉玉·亦復記經

行·深慙後人讀·五日下山·至東西林兩寺·相去不百步·一溪清駛·橫貫其間·皆自方丈前

廢·近歲復剝數椽·制殊狹陋·然亦非其正處·行軒復東·鰲祠城當晚遊·胡然冠蓋集·不盡心期幽

夜厭百谷喧·且失千峯稠·出門有遺恨·回首空綢繆·晚至太平興國宮·唐九天使者祠也·江州教習

諸生·皆至·山水誠乃奇·云誰究終始·曩遠亦何人·神君豈其鬼·東西妄采獲·誣詔共恢詭·百世踵謬訛

彝倫日頽圯。東林慧遠。雜取孔老之言。以附佛學。嘗著沙門不敬王者論。唐明皇自言親見使者。降於殿庭。因立此宮。而羣臣造為妖妄。以迎合者甚衆。本朝仍賜宮額

神號。置提舉官云。以茲遊覽富。翻令懷抱傷。誰哉可告語。舉俗昏且狂。乾坤有真心。日月垂休光。茫茫宇宙內。

此柄孰主張。北渡石塘橋。西訪濂溪宅。喬木無遺株。虛堂唯四壁。竦瞻德容睟。跪薦寒流碧。幸矣有斯人。渾淪再開闢。平生勞仰止。今日登此堂。願以圖象意。質之巾几傍。先生寂無言。賤子涕泗滂。神聽儻不遺。

惠我思無疆。六日拜濂溪先生書堂遺像。子澄請為諸人說太極圖義。先生明晨江磯寺。尊酒聊對

設。孰是十日遊。遽成千里別。英僚樹嘉政。素友厲孤節。努力莫相忘。清宵共明月。七日薛洪持志。王仲

來。飲罷與張陳趙南還軍。子澄許張歸廬陵。南卿龜父還家。擇之之湖南。予與王余陳黃東渡湖口而歸。

買船至演平拜建康劉公墓下遂入城假館梅山堂感涕有作

維舟新曆口。步上秣陵阡。高丘忽嗟峨。宿草迷荒煙。拜起淚再滴。哀哉不能言。驅車且復東。借此虛堂眠。念昔堂中人。經營幾何年。一旦舍之去。千秋不言還。露井益清潔。風林更修鮮。思公獨不見。涕下如奔川。感慨西州門。愴恨山陽篇。晤歎日隱樹。悲歌月當軒。堂堂忠孝心。終古諒弗諼。尙與吳門子。歸來故山巔。

晚雨涼甚偶得小詩請問遊山之日并請劉平父作主人二首

幾年不踏仙洲路。夢入青藤古木間。好趁新秋一番雨。晝寒亭下弄潺湲。廬阜歸來祗短筇。解包茶茗粗能供。若須載酒邀賓客。付與屏山七老翁。

昨爲許進之書胎仙字因以名其室或疑欠舞字者故作此以解之

寒山寒月冷颼颼。隻影孤桐萬里遊。帝樂夢回三疊遠。胎仙舞罷一簾秋。未愁悄寂無人會。只恐踟躕不自休。卻笑蕊珠何處所。兩忘蝴蝶與莊周。

熹伏蒙休齋先生惠詩見留謹次高韻二首

忽驚蕭颯鬢毛秋。起向泉山覓舊遊。盤谷門前淚沾臆。雲臺溪上雪蒙頭。歸歟吾黨又千里。老矣心期但一丘。珍重休齋書滿屋。可無三宿爲君留。

望望西山日幾回。更憐一雨洗浮埃。遠遊莫說雲門寺。往事聊尋單父臺。雞犬蕭疎迷洞口。交親零落半巖隈。尊前見在君須鬪。速上籃輿相逐來。

奉酬九日東峯道人溥公見贈之作

幾年回首夢雲關。此日重來兩鬢斑。點檢梁間新歲月。招呼臺上舊溪山。三生漫說終無據。萬法由來本自閒。一笑支郎又相惱。新詩不落語言間。

伏承侍郎使君垂示所與少傅國公唱酬西湖佳句謹次高韻聊發一笑

越王城下水融融。此樂從今與衆同。滿眼芰荷方永日。轉頭禾黍便西風。湖光盡處天容闊。潮信來時海氣通。酬唱不誇風物好。一心憂國願年豐。

石馬斜川之集分韻賦詩得燈字

改歲風日好。出門欣得朋。復招里中彥。及此雲間僧。行行涉清波。斯亭一來登。徙倚綠樹蔭。摩挲蒼石稜。遙瞻原野春。仰視天宇澄。一水既紆鬱。羣山正峻嶒。時禽悅新陽。潛魚躍輕冰。卻念去年日。俯仰愁予膺。長吟斜川詩。日落寒煙凝。暝色變晴景。清尊照華燈。頽顏感川徂。稚齒歡年增。酒盡不能起。朱欄各深凭。

行視武夷精舍作

神山九折溪。沿泝此中半。水深波浪闊。浮綠春渙渙。武夷溪凡九曲。多急流亂石。此第

百仞聳雄觀。嶄巖露垠堦。突兀倚霄漢。此峯夷上削下拔。地峭立如淺麓下縈迴。深林久叢灌。胡然闕

千載。逮此開一旦。峯下小山重複。中有平地數十丈。喬木長藤。茂林修竹。交相蔽隱。我乘新

村船。輟棹青草岸。榛莽喜誅鉏。面勢窮考按。居然一環堵。妙處豈輪奐。左右矗奇峯。躊躇極佳玩。方經始

以病不能來。至是送別山西。始自新村買舟以來。視所縛屋三間。制度殊草草。然是時芳

節闌。紅綠紛有爛。好鳥時一鳴。王孫遠相喚。山多獼猴。暫遊意已愜。獨往身猶絆。珍重舍瑟人。重來足幽伴。

已約初夏。與同志皆往遊集。

淳熙甲辰仲春精舍閒居戲作武夷權歌十首呈諸同遊相與一笑

武夷山上有仙靈。山下寒流曲曲清。欲識箇中奇絕處。權歌閒聽兩三聲。

一曲溪邊上釣船。幔亭峰影蘸晴川。虹橋一斷無消息。萬壑千巖鎖翠煙。  
二曲亭亭玉女峯。插花臨水爲誰容。道人不復荒臺夢。興入前山翠幾重。  
三曲君看架壑船。不知停櫂幾何年。桑田海水今如許。泡沫風燈敢自憐。  
四曲東西兩石巖。巖花垂露碧氈毼。金雞叫罷無人見。月滿空山水滿潭。  
五曲高山雲氣深。長時煙雨暗平林。林間有客無人識。欸乃聲中萬古心。  
六曲蒼屏遶碧灣。茅茨終日掩柴關。客來倚櫂巖花落。猿鳥不驚春意閒。  
七曲移船上碧灘。隱屏仙掌更回看。人言此處無佳景。只有石堂空翠寒。  
八曲風煙勢欲開。鼓樓巖下水滢洄。莫言此處無佳景。自是遊人不上來。  
九曲將窮眼豁然。桑麻雨露見平川。漁郎更覓桃源路。除是人間別有天。

後二句。添得一本作卻憐昨夜峯頭雨。

過蓋竹作二首

二月春風特地寒。江樓獨自倚闌干。箇中詎有行藏意。且把前峰細數看。  
浩蕩鷗盟久未寒。征驂聊此駐江干。何時買得魚船就。乞與人間畫裏看。

答袁機仲論啓蒙

忽然半夜一聲雷。萬戶千門次第開。若識無心含有象。許君親見伏羲來。

半夜一本作平地。

觀林長仁書卷戲題問答

猿去山空鶴亦飛。柴門空掩釣魚磯。門前樹葉都黃了。何事幽人久不歸。  
為愛雲泉百尺飛。故將茅屋傍苔磯。幾年清夢黃塵裏。此日秋風一棹歸。

題嚴居厚溪莊圖

平生生涯一短篷。只今回首畫圖中。平章箇裏無窮事。要見三山老放翁。  
謂陸務觀時嚴居厚之官剡中。

承事卓丈置酒白雲山居。飲餞致政儲丈。叔通因出佳句。諸公皆和。烹輒亦繼韻。聊發坐中一

笑。此題一本作白雲寺送儲柯伯升。

老去讀書秋樹根。山林兒女定誰尊。偶緣送客來僧寺。卻似披雲臥石門。物外祗今成跌蕩。人間何處不

啾喧。一杯且為陽關盡。雙目從教別淚昏。  
東坡賦徐德占舊居。有一為兒女流。始覺山林尊之句。

丙辰正月三日贈彭世昌歸山

象山聞說是君開。雲木參天瀑響雷。好去山頭且堅坐。等閒莫要下山來。

懷潭溪舊居

憶住潭溪四十年。好峰無數列窗前。雖非水抱山環地。卻是冬溫夏冷天。邊舍扶疎千箇竹。傍崖寒冽一泓泉。誰教失計東遷繆。憊臥西窗日滿川。

戲答楊庭秀問訊離騷之句二首

昔誦離騷夜扣舷。江湖滿地水浮天。只今擁鼻寒窗底。爛卻沙頭月一船。

佛法不怕爛。卻禪家語也。杜蘅一名馬蹄香。本草辨偽。

藥云。細辛作杜蘅水浸令直。三峯。謂華陰也。

蒙恩許遂休致陳昭遠丈以詩見賀已和答之復賦一首

闌干苜蓿久空槃。未覺清羸帶眼寬。老去光華姦黨籍。向來辱羞侍臣冠。極知此道無終否。且喜閒身得

暫安。漢祚中天那可料。明年大歲又湑。湯昆灘。建隆庚申距今已未。二百四十年矣。嘗記年八十

年矣。嘆息久之。銘佩先訓。於今甲子。又復一周。而衰病零落。終無以少塞臣子之責。因和此詩。并記其語。以示兒輩。為之盡然感涕云。

己未九日子服老弟及仲宣諸友載酒見過坐間居厚廟令出示佳句歎伏之餘次韻為謝并

呈同社諸名勝

籬菊斑斑半吐黃。泝中又報紫萸香。輞川有茱萸。泝字與泝同。裝成令節秋還晚。擦得高情老更狂。載酒極知乖勝

踐。沾衣卻免歎斜陽。是日日本約會於周園。屬予有餘年只恐逢辰少。吟罷君詩引興長。

和劉叔通懷遊子蒙之韻

扣角聽君悲復悲。壯心未已欲何之。交遊半落丘山外。離別偏傷老大時。尚喜淵潛容賈誼。不須日飲教

袁絲病餘我更無。慙賴勉為同懷一賦詩。

余素不能作唐律。和韻尤非所長。年來追逐。殊覺晨

起書罷。欲記歲月。方覺是庚申開基節日。此亦難逢之會。感歎久之。

叔通老友探梅得句不鄙。垂示且有領客攜壺之約。次韻為謝。聊發一笑。

迎霜破雪是寒梅。何事今年獨晚開。應為花神無意管。故煩我輩著詩催。繁英未怕隨清角。疎影誰憐蘸綠杯。珍重南鄰諸酒伴。又尋江路覓香來。

寄江文卿劉叔通

文卿句律如詩律。通叔詩情絕世情。政使暮年窮到骨。不教吟出斷腸聲。

詩人從古例多窮。林下如今又兩翁。應笑湖南老賓友。兩年吹落市塵中。此戲子蒙。恐落窮籍。

我窮初不為能詩。笑殺吹竽濫得癡。莫向人前浪分雪。世間真偽有誰知。僕不能詩。往歲為澹菴胡公以此論薦。平生僥倖多類此云。

梅

姑射仙人冰雪容。塵心已共彩雲空。年年一笑相逢處。長在愁煙苦霧中。

次晦叔寄弟韻二首

聞道君歸湘水東。經行長在白雲中。詩成天柱峰頭月。酒醒朱陵洞裏風。舊學難酬香一瓣。流年誰管鬢



雙蓬書來爲指謫訛處。不涉言詮不落空。

試上閩山望楚天。雁飛欲斷勢還連。憑將袖裏數行字。與問雲間雙髻仙。我訪舊遊終有日。君歸故里定何年。祇今千里同心事。靜對簞瓢獨喟然。

次范碩夫題景福僧開窗韻

昨日土墻當面立。今朝竹牖向陽開。此心若道無通塞。明暗何緣有去來。

吳山高

行盡吳山過越山。白雲猶是幾重關。若尋汗漫相期處。更在孤鴻滅沒間。

苦雨用俳諧體

仰訴天公雨太多。纔方欲往又滂沱。九關虎豹還知否。爛盡田中白死禾。楚詞招魂云。虎豹九關。啄害下入些。

蘭

謾種秋蘭四五莖。疎簾底事太關情。可能不作涼風計。護得幽香到晚清。

讀十二辰詩卷掇其餘作此聊奉一笑

夜聞空篔齧飢鼠。曉駕羸牛耕廢圃。時才虎圈聽豪夸。舊業兔園嗟鹵莽。君看蟄龍臥三冬。頭角不與蛇爭雄。毀車殺馬罷馳逐。烹羊酤酒聊從容。手種猴桃垂架綠。養得鷓鴣鳴角角。客來犬吠催煮茶。不用東

家買豬肉。

水口行舟二首

昨夜扁舟雨一蓑。滿江風浪夜如何。今朝試卷孤蓬看。依舊青山綠樹多。  
鬱鬱層巒夾岸青。春山綠水去無聲。煙波一棹知何許。鷓鴣兩山相對鳴。

桐廬舟中見山寺

一山雲水擁禪居。萬里江樓遶屋除。行色忽忽吾正爾。春風處處子何如。江湖此去隨漚鳥。粥飯何時共木魚。孤塔向人如有意。他年來借一蘧蔭。

胡文廣仲與范伯崇自嶽市來同登絕頂舉酒極談得聞此日講論之樂

我已中峯住。君從何處來。莫留巖底寺。徑上月邊臺。濁酒團圍坐。高談次第開。前賢渺安在。清醪寄餘衰。

# 石湖詩鈔

范成大字致能。吳郡人也。紹興擢進士第。授戶曹監和劑局。遷正字。累遷著作佐郎。除吏部郎官奉祠。起知處州。入爲禮部員外郎。兼崇政殿大學士。使金國歸。除中書舍人。出知廣西靜江府。除敷文閣待制。四川制置使。召對除權吏部尙書。拜參知政事。奉祠起。知明州。除端明殿學士。尋帥金陵。進資政殿學士。再領洞霄宮。加大學士。卒。所居石湖在太湖之濱。阜陵宸翰扁之。其詩縟而不釀。縮而不窘。新清嫵媚。奄有鮑謝。奔逸俊偉。窮追太白。當是時。石湖與楊誠齋陸放翁尤遂。初皆南渡之大家也。誠齋言。余於詩豈敢以千里畏人者。而於公獨斂衽焉。

## 河豚嘆

鰕生藜苳腸。食事一飽足。腥腐色所難。況乃衷醜毒。膨亨強名魚。殺氣孕慘黷。既非養生具。宜謝砧几酷。吳儂眞差事。網索不遺育。捐生決下箸。縮手汗童僕。朝來里中子。饑吻不待熟。濃睡喚不磨。已落新鬼錄。百年三寸咽。水陸富肴簌。一物不登俎。未負將軍腹。爲口忘計身。饕死何足哭。作俑者誰歟。至今走末俗。或云先王意。除惡如薶菽。逆梟與毒獍。歲歲參幣玉。芟夷入薦羞。蓋欲殲種族。死生有定數。斷命烏可續。適丁是時者。未易一理局。鼃鼎子公怒。羊羹華元似。異味古所珍。無事苦畏縮。駢頭訂此語。戒諭祇取瀆。

聾盲死不悟。明知諒已燭。

續長恨歌七首

金盤激灑曉粧寒。國色天香勝牡丹。白鳳詔書來已暮。六宮鉛粉半春闌。  
紫微金屋閉春陽。石竹山花卻自芳。莫道故情無覓處。領巾猶有隔生香。  
聞道蓬壺重見時。瘦來全不耐風吹。無端卻作塵間念。已被仙宮聖得知。  
別後相思夢亦難。東虛雲路海漫漫。仙凡頓隔銀屏影。不似當時取次看。  
人似飛花去不歸。蘭昌宮殿幾斜暉。百年只有雲容姊。留得當時舊舞衣。  
驪山六十二高樓。突兀華清最上頭。玉羽川長湘浦暗。三郎無事更神遊。  
帝鄉雲馭若爲留。八景三清好在否。玉笛不隨雙鶴去。人間猶得聽梁州。

過平望

寸碧闌高浪。孤墟明夕陽。水柳搖病綠。霜蒲蘸新黃。孤嶼乍舉網。蒼烟忽鳴榔。  
波明荇葉顫。風熟蘋花香。鷄犬各村落。葦鱸近江鄉。野寺對客起。樓陰濯滄浪。  
古來離別地。清詩斷人腸。亭前舊時水。還照兩鴛鴦。

長安閘

斗門貯淨練。懸板淙驚雷。黃沙古岸轉。白屋飛簷開。是間裘丈許。舳艫蔽川來。  
千車擁孤隧。萬馬盤一坏。

篙尾亂若雨。檣竿束如堆。摧摧勢排軋。洶洶聲喧豗。偃仄復偃仄。誰肯少徘徊。傳呼津吏至。弊蓋凌高埃。嘒嘒議譏征。叫怒不可裁。吾觀舟中子。一一皆可哀。大爲聲利驅。小者飢寒催。古今共來往。所得隨飛灰。我乃畸旅人。胡爲乎來哉。

兩木

壬申五月。病臥北窗。惟庭柯相對。手植綠橘枇杷。皆森然出屋。枇杷已著子。橘獨十年不花。各賦一首。枇杷昔所嗜。不問甘與酸。黃泥裹餘核。散擲籬落間。春風拆勾萌。樸欖如榛菅。一株獨成長。蒼然齊屋端。去年小試花。瓏瓏犯冰寒。化成黃金彈。同登桃李盤。大鈞播羣物。斡旋不作難。樹老人何堪。攬鏡覓朱顏。頷髭爾許長。大笑欹巾冠。

落鴻

綠橘生西山。得自髯翁家。云此接活根。是歲當著花。俛仰乃十霜。垂蠹紛相遮。芳意竟寂寞。枯枝謾槎牙。風土諒非宜。翁言豈予夸。會令返故山。高深謝污邪。石液滋舊根。山英擢新葩。黃團掛霜實。大如崆峒瓜。當有四老人。來駐七香車。

浙江小磯春日

落鴻聲裏怨關山。淚濕秋衣不肯乾。只道一番新雨過。誰知雙袖倚樓寒。

客裏無人共一杯。故園桃李爲誰開。春潮不管天涯恨。更捲西興暮雨來。

二月三日登樓有懷金陵宣城諸友

百尺西樓十二欄。日遲花影對人閒。春風已入片時夢。寒食從今數日間。折柳故情都望斷。落梅新曲與誰關。詩成欲訪江南便。千里煙波萬疊山。

代聖集贈別

一曲悲歌水倒流。尊前何計緩千憂。事如夢斷無尋處。人似春歸挽不留。草色粘天鷓鴣恨。雨聲連曉鷓鴣愁。迢迢綠浦帆飛遠。今夜新晴獨倚樓。

寒食郊行書事二首

野店垂楊步。荒祠苦竹叢。鷺窺蘆泊水。烏啄紙錢風。媪引濃粧女。兒扶爛醉翁。深村時節好。應爲去年豐。隴麥欣欣綠。山桃寂寂紅。帆邊漁蕩浪。木末酒旗風。信步隨芳草。迷途問小童。賞心添腳力。呼渡過溪東。

初夏二首

清晨出郭更登臺。不見餘春只麼回。桑葉露枝蠶向老。菜花成莢蝶飛來。晴絲千尺挽韶光。百舌無聲燕子忙。永日屋頭槐影暗。微風扇裏麥花香。

曉行

篝燈驛吏喚人行。寥落星河向五更。馬上誰驚千里夢。石頭岡下小車聲。

秦淮

不將行李試開關。誰信江湖道路難。腸斷秦淮三百曲。船頭終日見方山。

白鷺亭

倦遊客舍不勝閒。日日清江見倚欄。少待西風吹雨過。更從二水看淮山。

脂井三首

昭光殿下起樓臺。拌得山河付酒盃。春色已從金井去。月華空上石頭來。  
午睡醒來一夢非。匆匆玉樹逐春歸。臙脂卻作千年計。不似愁魂四散飛。  
腰支旅拒更神遊。桃葉山前水自流。三十六書都莫恨。煩將歌舞過揚州。

九月三日宿胥口始聞雁

故人久不見。乍見雜悲喜。新雁如故人。一聲驚我起。把酒不能觴。送目問行李。曾云行路難。空濛千萬里。  
塞北多關山。江南渺雲水。風高吹汝瘦。旅伴今餘幾。斜行不少駐。滅沒蒼煙裏。羈遊吾亦倦。客程殊未已。  
扁舟費年華。短纜繫沙尾。物性各有役。冥心聽行止。江郊匝地熱。塲圃平如砥。歸期且勿念。共飽豐年米。

姑惡

姑惡水禽。以其聲得名。世傳姑虐其婦。婦死所化。東坡詩云。姑惡姑惡。姑不惡。妾命薄。此句可以泣鬼。余行茗雪。始聞其聲。晝夜哀厲不絕。客有惡之。以爲此必子婦之不孝者。余爲作後姑惡詩。姑惡婦所云。恐是婦偏辭。姑言婦惡。定有之。婦言姑惡。未可知。姑不惡。婦不死。與人作婦亦大難。已死人言尙如此。

大暑舟行含山道中。雨驟至。霆奔龍挂可駭。

隕雲驟前驅。連鼓訶後殿。駸駸失高丘。擾擾暗古縣。白龍起幽塾。黑霧佐神變。盆傾耳雙聵。斗暗目四眩。帆重腹逾飽。櫂潤鳴更健。圓漪暈雨點。濺滴走波面。伶俜愁孤鴛。颺閃亂飢燕。麥老枕水臥。秧穉與風戰。牛蹊岌城沈。蟻隧洶瓴建。水車競施行。歲事敢休宴。咿啞嘯簧鳴。轆轤連鎖轉。駢頭立婦子。列舍望宗伴。東枯駭西潰。寸涸驚尺澱。嗟予豈能賢。與彼亦何辨。扁舟風露熟。半世江湖徧。不知憂稼穡。但解加餐飯。遙憐老農苦。敢厭遊子倦。

題畫卷二首

鑿落秋江水石明。高楓老柳兩灘橫。君看疊巘雲容變。又有中宵雨意生。欹傾棧路繞山明。隔隴人家犬吠聲。無限白雲堆去路。不知誰識許宣平。

立春日郊行



竹擁溪橋麥蓋坡。土牛行處亦笙歌。麴塵欲暗垂垂柳。醅面初明淺淺波。日滿縣前春市合。潮平浦口暮帆多。春來不飲無兼句。奈此金旛綵勝何。

晚潮

東風吹雨晚潮生。疊鼓催船鏡裏行。底事今年春漲小。去年曾與畫橋平。

一篙

一篙新綠浦東西。雪絮漫江雁不飛。宿雨纔晴風又轉。片帆那得及時歸。

碧瓦

碧瓦樓前繡幙遮。赤欄橋外綠溪斜。無風楊柳漫天絮。不雨棠梨滿地花。

暮春上塘道中

客舍無煙野水寒。競船人醉鼓闌珊。石門柳絮清明市。洞口桃花上巳山。飛絮著人春共老。片雲將夢晚俱還。明朝遮入長安道。慚愧江湖釣手閒。

餘杭道中

落花流水淺深紅。盡日帆飛繡浪中。桑眼迷離應欠雨。麥鬚騷殺已禁風。牛羊路杳千山合。雞犬村深一徑通。五柳能消多許地。客程何苦鎮匆匆。

陳侍御園上坐

愁眼逢歡春水明。詩情得酒春雲生。花梢蝴蝶作團去。竹裏鶉鳩相對鳴。邂逅浮生此日好。纏綿俗累何時輕。擘牋沫墨乏奇句。擲笛當筵慚妙聲。

獨遊虎跑泉小庵

苔徑彎環入。茅齋取次成。蔓花緣壁起。閒草上階生。宿雨松篁色。新晴燕雀生。筒泉烹御米。聊共老僧傾。

樂神曲

豚蹄滿盤酒滿杯。清風瑟瑟神欲來。願神好來復好去。男兒拜迎女兒舞。老翁翻香笑且言。今年田家勝去年。去年解衣折租價。今年有衣著祭社。

繰絲行

小麥青青大麥黃。原頭日出天色涼。姑婦相呼有忙事。舍後煮繭門前香。繰車嘈嘈似風雨。繭厚絲長無斷縷。今年那暇織絹著。明日西門賣絲去。

田家留客行

行人莫笑田家小。門戶雖低堪灑掃。大兒繫驢桑樹邊。小兒拂席軟勝氈。木臼新春雪花白。急炊香飯來看客。好人入門百事宜。今年不憂蠶麥遲。

催租行

輸租得鈔官更催。踉蹌里正敲門來。手持文書雜嗔喜。我亦來營醉歸爾。牀頭慳囊大如拳。撲破正有三百錢。不堪與君成一醉。聊復償君草鞋費。

癸亥日泊舟吳會亭

去年春盤浙江驛。湛湛清波動浮石。今年春盤吳會亭。冥冥細雨濕高城。天邊作客風沙裏。去年今年成老矣。客心古井冷無波。過眼人情亦如水。憶昔三生住翠微。偶來平地著征衣。山中故人應大笑。扁舟坐穩何當歸。

題開元天寶遺事四首

御前羯鼓透春空。笑覺花奴手未工。一曲打開紅杏蕊。須知天子是天公。  
謝蠻舞袖貴妃絃。秦國如花虢國妍。不賞纏頭三百萬。阿姨何處費金錢。  
朝天車馬詔頻催。劇得新湯未敢開。忽報豬龍掀宇宙。阿瞞空讀相書來。  
剝啄延秋屋上烏。明朝箭道入東都。宮中亦有風流陣。不及漁陽突騎粗。

半塘

柳暗閨門逗曉開。半塘塘下越溪回。炊烟擁棹船船過。芳草緣堤步步來。

楓橋

朱門白壁枕彎流。積李無言滿屋頭。牆上浮圖路傍墮。送人南北管離愁。

橫塘

南浦春來綠一川。石橋朱塔兩依然。年年送客橫塘路。細雨垂楊繫畫船。

天平寺

舊遊彷彿記三年。轟飲題詩月滿山。山上白雲應解笑。又將塵土澆朱顏。三年前至。先兄與予同唐少

羅而下。夜已午。住持僧散。遣羣僮秉燭。求余三人。久而莫得。以為已仙也。是夜宿寺中。聯句達曉。東坡曰。自從有此山。白石封蒼苔。何嘗有此樂。將去復徘徊。至今往來于余心。

賀樂丈先生南郊新居

新堂燕雀喜。竹籬挂籐籬。崩奔風濤裏。得此巢龜荷。西山效爽氣。南浦供清波。會心不在遠。容膝何須多。先生淮海俊。踏地嘗兵戈。飄飄萬里道。芒鞋厭關河。風吹落下邑。楚語成吳歌。豈不有故國。荒垣鞠秋莎。無庸說當歸。到處皆南柯。卜遷不我遐。一水明青羅。門戶長獨佳。奈客剝啄何。會令蒼苔石。屐齒如蜂窠。

田舍

呼喚攜鉏至。安排斜圃忙。兒童眠落葉。烏雀噪斜陽。煙火村聲遠。林菁野氣香。樂哉今歲事。天末稻雲黃。

病中夜坐

村巷秋春遠。禪房夕磬深。飢蚊嘗遠鬢。暗鼠忽鳴琴。薄薄寒相中。稜稜瘦不禁。時成洛下詠。卻似越人吟。

十一月十二日枕上曉作

竹響風成陣。窗明雪已花。柴扉冷凍犬。紙瓦啄飢鴉。宿酒欺寒力。新詩管歲華。日高猶擁被。蓐食媿鄰家。

除夜書懷

運斗寅杓轉。周天日御回。夜從冬後短。春逐雨中來。鬢綠看看雪。心丹念念灰。有懷憐斷雁。無思惜疎梅。絮厚眼生纈。蔬寒腸轉雷。燭花紅瑣碎。香霧碧徘徊。昨夢書三篋。平生酒一盃。牀頭新曆日。衣上舊塵埃。搖落何堪柳。紛紜各夢槐。隙光能幾許。世事劇悠哉。岐路東西變。羲娥日夜催。頭顱原自覺。懷抱故應開。踴躍金何喜。青黃木自災。身謀同斥鷃。政爾願蒿萊。

題張氏新亭

水楊成幄翠相遮。猶有東風管物華。葉底青梅無數子。梢頭紅杏不多花。煩將練火炊香飯。更引長泉煮鬪茶。約我詩成須疥壁。莫嗔欹側似歸鴉。

病中絕句八首

空裏情知不著花。逢場將病作生涯。蒲團軟暖無時節。夜聽蚊雷曉聽鴉。溽暑熏天地湧泉。彎跽避濕挂行纏。出門斟酌無忙事。睡過黃梅細雨天。

石鼎颺颺夜煮湯。亂拋參朮鬪溫涼。化兒幻我知何用。祇與人間試藥方。  
病中心境兩俱降。猶憶江湖白鳥雙。一夜雨聲鳴紙瓦。聽成飛雪打船窗。  
簾頭排溜密如簾。溪上層陰寒解巖。最是看山奇絕處。白雲堆絮擁青尖。  
夜合稍頭蘸紫茸。菘葱頂上折黃封。去年團扇題詩處。依舊疎簾細雨中。  
盆傾瓴建夜翻渠。遶屋蛙聲一倍粗。想見西堂渾不睡。明朝踏濕看菖蒲。  
晴色先從喜鵲知。斜陽一抹照天西。竹雞何物能無賴。如許泥深更苦啼。

雲間湖光亭

微風不動歛濤湍。組練晶晶色界寒。斜照發揮猶未盡。月明殘夜更來看。

雪霽獨登南樓

雪晴風勁晚來冰。樓上奇寒病骨驚。雀啄空簷銀筍墮。鴉翻高樹玉塵傾。青帘閃閃千家靜。黃帽亭亭一  
水橫。坐久天容卻溫麗。一彎新月對長庚。

上沙遇雨快涼

刮地風來健葛衣。一涼便覺暑光低。雲頭龍挂如垂筍。雨在中峯白塔西。

自天平嶺過高景庵

卓筆峰前樹作團。天平頂上石成關。綠陰匝地無人過。落日秋蟬滿四山。

曉自銀林至東灞登舟寄宣城親戚

曉山障望眼。脉脉紫翠橫。澄江已不見。況乃江上城。結束治野裝。木末浮三星。羸馬隴頭嘶。小車谷中鳴。亭亭東灞樹。練練綠浦明。篙師笑迎我。新漲沒蘋汀。徑投一葉去。雲水相與平。聊將塵土面。照此玻璃清。懷我二三友。高堂晨欲興。風細桐葉墮。露濃荷蓋傾。凝香繞燕几。安知路傍情。

復自姑蘇過宛陵至鄧步出陸

漿家饋食槿爲藩。酒市停驂竹廡門。紅樹亭亭棲晚照。黃茅杳杳被高原。飲溪有迹於菟過。掠草如飛朴渥翻。車軌如溝平地少。飽帆天鏡憶江村。

南塘冬夜唱和

燃萁烘暖夜窗幽。時有新詩趨唱酬。爲問灞橋風雪裏。何如田舍火爐頭。寒釭欲暗吟方苦。凍筆難驅字更遒。絕笑兒癡生活淡。略無歲晚稻梁謀。

花山村舍

潦退灘灘露。沙虛岸岸頽。澗聲穿竹去。雲影過山來。柳菌粘枝住。桑花共葉開。庵廬少來往。門巷濕蒼苔。

清明日狸渡道中

灑灑沾巾雨。披披側帽風。花然山色裏。柳臥水聲中。石馬立當道。紙鳶鳴半空。墻間人散後。烏鳥正西東。

南塘寒食書事

埂外新陂綠。岡頭宿燒紅。裹魚蒸菜把。饋鴨鎖筠籠。酒侶晨相命。歌場夜不空。土風并節物。不與故鄉同。

高淳道中

路入高淳麥更深。草泥沾潤馬駸駸。雨歸隴首雲凝黛。日漏山腰石滲金。老柳不春花自蔓。古祠無壁樹空陰。一簞定屬前村店。袞袞炊煙起竹林。

宿牧馬山勝果寺

佛燈已暗還吐。旅枕纔安卻驚。日色看成曉色。溪聲聽作松聲。

自寧國溪行至宣城舟人云凡百八十灘

波驚石險夜喧雷。晚泊旗亭笑眼開。休問行人緣底瘦。適從百八十灘來。

晚步西園

料峭清寒結晚陰。飛來院落怨春深。吹開紅紫還吹落。一種東風兩樣心。

早發竹下

結束晨粧破小寒。跨鞍聊得散疲頑。行衝薄薄輕輕霧。看放重重疊疊山。碧穗炊烟當樹直。綠紋溪水趁



橋灣清禽百囀似吟客。正在有情無思間。

後催租行

老父田荒秋雨裏。舊時高岸今江水。傭耕猶自抱長飢。的知無力輸租米。自從鄉官新上來。黃紙放盡白紙催。賣衣得錢都納卻。病骨雖寒聊免縛。去年衣盡到家口。大女臨岐兩分首。今年次女已行媒。亦復驅將換升斗。室中更有第三女。明年不怕催租苦。

次韻子文衝雨迓使者道聞子規

夢魂翾蝶翅。鼻息吼鼉鼓。喚起治曉粧。馬嘶僮僕語。汨泥溷鳧鶩。慚愧黃鵠舉。猥吟陔隅池。浪廢桔槔圃。啼鵲撩客心。鉤引着何許。請歌蘇仙詞。歸耕一犁雨。

次溫伯用林公正劉慶充倡和韻

前山後山梅子雨。屯雲日夜相吞吐。長林絕壑望不到。時有樵歸說逢虎。奔溪朝來忽怒漲。夾岸柳梢餘尺許。屋頭未放濃嵐散。苦憶清光泛瓊宇。客行落此亂山中。但欲尋人訴羈旅。比鄰邂逅得清士。眉宇津津佳笑語。杯行起舞出新句。我氣已衰聊復鼓。明年與君航太湖。扁舟踏浪不踏土。沈沈玉柱闕仙扃。矯矯虹梁浮水府。目力無窮天不盡。卻笑向來誰縛汝。

次韻溫伯謀歸

官路驅驅易折肱。官曹隨處是愁城。隨風片葉鄉心動。過雨千峰病眼明。一樹何須嘗世味。寸田久已廢吾耕。羨君早作歸歟計。屈指從今幾合并。

慶充自黃山歸。索其道中詩書一絕問之。

鳴騶如電馬如雷。知是婆娑醉尉回。常日錦囊猶有句。況從三十六峯來。

賞雪騎鯨軒。子文夜歸。酒渴。侍兒薦茗飲蜜漿。明日以詫同遊。戲爲書事。邀宗偉同作。

溪山四時佳。今夕更奇絕。天公妙莊嚴。施此一川雪。飛花浩如海。眩轉寒空闊。水西萬株樹。玉塔照銀闕。碧漢不受凍。長灘清瀉咽。漁舟晚猶泛。樵擔寒未歇。懸知晝不到。未省詩能說。歸來強搜句。冰硯冷於鐵。不如嚴夫子。迎門生暖熱。梅香不可耐。但覺酒腸渴。蜜融花氣動。茶泛乳膏發。寧辭春筍寒。爲暖花瓷滑。曹騰畫屏暖。喚起眼餘纈。喚我獨何事。作此淡生活。想像高唐賦。何如徑排闥。

雪後守之家梅未開。呈宗偉。

瓦溝凍殘雪。簷溜黏輕冰。破寒一竿日。春隨人意生。端葉再三白。南枝尙含情。定知司花女。未肯嫁娉婷。官居若無賴。一笑如河清。落木露荒山。寒溪遶孤城。朝莫何所見。雲黃叫飢鷹。東風不早計。愁眼何當明。北鄰小橫斜。薜地可班荆。憑君趣花信。把酒撼瓊英。

次韻宗偉閱番樂

十日閒愁晝掩關。起尋一笑共清歡。罷休詩社工夫淡。洗淨書生氣味酸。盡遣餘錢付桑落。莫隨短夢到槐安。綉靴畫鼓留花住。剩舞春風小契丹。

五月聞鶯二首

桑陰淨盡麥頭齊。江上聞鶯每歲遲。不及曉風鴨鴂子。迎春啼到送春時。一聲初上最高枝。忙殺嘔啞百舌兒。老盡西園千樹綠。卻憐槐眼正迷離。

送子文雜言

陰谷雲低梅雨多。黃山滌源溪湧波。南風匝地送歸客。雙槳下瀨如投梭。嚴夫子。君舉酒。我其爲君歌。萬山叢叢石鑿鑿。官居破屋巢烟蘿。杜鵑曉啼猿莫叫。客行到此真蹉跎。窮愁無復理。一飲三嘆息。城東覺舍有佳人。邂逅使我加餐食。同鄉更同調。目擊心已傳。蟄蟲欲作雷奮地。萬籟方寂風行山。吹竽喚我醒。連鼓相追攀。飈車電轂不可輦。但覺兩腋生飛翰。狂歌不必終曲。戲弈不必滿局。有時不揖上馬去。出門大笑驚僮僕。窮鄉眼冷見未曾。道上喞喞相指目。云此陜隘何以有二士。直恐翩翩跨黃鵠。廣文組解登王畿。諸公貴人爭勸歸。常日心期有定論。贈行不惜重費詞。腰金佩玉衆目好。折簡沈碑千載癡。一尊有意重山嶽。五鼎無心輕網絲。嚴夫子。應領略。別後頻書相發藥。我旣爲萬頃之狎鷗。君勿作九臯之鳴鶴。

新館

露稻黏明璫。風芽衰高浪。荒荒白楊道。行行亂蟲響。日腳午未吐。雲頭晚猶漲。欣此半日涼。藍輿走清曠。病客不堪暑。茲行天肯相。蚊蟲掃無迹。秋意滿千嶂。相尋泉石盟。略褫簿書障。鴿原定相念。因風報無恙。

臨溪寺

萬山遶坼蛤。二水奔瀕洞。亭亭林中寺。金碧燦欄棟。解鞍得蒲團。臥受瓦爐供。少捐一炊頃。暫作百年夢。無人自驚覺。幽禽正清哢。倦客如殘僧。無力供世用。此行端爲山。紫翠迭迎送。漱井出門去。驚塵撲飛鞚。

盤龍驛

聞雞一唱罷。占星三斗沒。天高月徘徊。野曠山突兀。暗蛩泣草露。怨亂語還咽。涼螢不復舉。點綴稻花末。惟餘絡緯豪。悲壯殷林樾。小蟲亦何情。狐客心斷絕。魂驚板橋穿。足側石子滑。行路如許難。誰能不華髮。高城謾回首。疊嶂屹天闕。遙知秋衾夢。千里一飄忽。

竹下

松杉晨氣清。桑柘暑陰薄。稻穗黃欲臥。槿花紅未落。秋鶯尙嬌婉。晚蝶成飄泊。犬駭逐車馬。雞驚撲籬落。道逢行商問。平生幾芒屨。頰肩走四方。爲口不計腳。劣能濡簞瓢。何敢議囊橐。我亦糜斗升。三年去丘壑。二俱亡羊耳。未用苦商略。

寒亭

溝塍與澗合。隴畝抱山轉。向來六月旱。此地免焦卷。早穗已垂垂。晚苗猶剪剪。一川豐年意。比屋鬧雞犬。老農霜鬢髻。矍鑠黃犢健。自云足蹈地。常賦何能免。刈熟倩人輸。不識長官面。康年無復事。但恐社酒淺。我亦有二頃。收拾尙可繭。懷哉笠澤路。歸鋤犁頭蘚。

清逸江

微生本漁樵。長日渺江海。扣舷濯滄浪。尙說天宇隘。竭來車馬路。悒悒佳思敗。黃塵撲眉鬚。驅逐似償債。羸驂繫偈仄。狂犬吠荒怪。鄉心入旅夢。一葉舞澎湃。晨興過墟市。喜有魚蝦賣。眼明見清江。積雨助橫潰。褰裳喚扁舟。艱晚不勝載。不辭野渡險。弄水聊一快。

新嶺

瘦馬兀瞢騰。荒雞號蒼莽。絲窠冒朝露。籬落萬蛛網。宿雲拂樹過。飛泉擘山響。老桑踟潛蚪。怪蔓挂騰蟒。山行何許深。空翠滴羈鞅。釀愁積雨寒。破悶朝日放。曈曈赤幟張。昱昱金鉦上。浮動草花馥。清和野禽唱。僕夫有好語。沙平路如掌。惟憂三溪阻。橋斷山水漲。

送通守趙積中朝議請祠歸天台

城頭千峯青繞屋。城下灘流三百曲。誰云偈仄復偈仄。尙有高軒肯來辱。紅梅花下雨芳春。春風惠和如主人。搶攘塵土簿書裏。見此縑籍天球溫。厚祿故人車結轍。掉頭獨泛清溪月。不從世外得超然。世間誰

肯如公決。生平我亦一沙鷗。葦白蘆黃今正秋。送公使我歸思動。破烟衝雨憶扁舟。明年相見東山起。我亦煎茶石橋水。道逢篋笠把漁竿。卽是馬曹狂掾史。

送詹道子教授奉祠養親

新安學宮天下稀。先生孝友真吾師。斑衣誤作長裾曳。二年思歸今得歸。牋詞上訴人叵挽。璽書賜可羣公歎。青山百匝不留人。空留諸生遮望眼。白雲孤起越南天。向來恨身無羽翰。下馬入門懷橘拜。身今卻在白雲邊。鶴髮鬢鬢堂上坐。兒孫稱觴婦供果。世間此樂幾人同。看我風前孤淚墮。一盃送舟下水西。我欲贈言無好詞。徑須喚起東廣微。爲伊重補南陔詩。

嚴州

城府黃塵撲馬鞍。一篙重探水雲寒。耳邊眼底無公事。睡過嚴州二百灘。

釣臺

山林城市兩塵埃。邂逅人生有往來。各問此心安處住。釣臺無意壓雲臺。

富陽

不到江湖恰五年。歙山青遶屋頭邊。富春渡口明人眼。落日孤舟浪拍天。

餘杭

春晚山花各靜芳。從教紅紫送韶光。忍冬清馥薔薇醞。薰滿千村萬落香。

插秧

種密移疎綠穠平。行間清淺穀紋生。誰知細細青青草。中有豐年擊壤聲。

曬繭

隔籬處處雪成窩。牢閉柴荆斷客過。葉貴蠶飢危欲死。尙能包裹一絲窠。

次韻甄雲卿晚登浮丘亭

賓筵舊壓三千客。燕榭新高十二城。潑墨雲頭連樹暗。垂絲雨腳溪過生。葛巾羽扇吾身健。雪碗冰甌子句清。從此相從須痛飲。故應此事勝公榮。

古風上知府祕書二首

神仙絕世立功行。聞清都。玉符賜長生。繭雲遊紫虛。雞犬爾何知。偶舐藥鼎餘。身輕亦仙去。罡風與之俱。俯視舊籬落。眇莽如積蘇。非無鳳與麟。終然似蟲魚。微物豈有命。政爾謝泥塗。時哉適下。是邂逅真良圖。大鵬上扶搖。南溟聒天沸。斥鷃有羽翼。意滿蓬蒿裏。不如附驥蠅。掣電抹荆薊。誰云極么麼。俛仰且萬里。向來庭戶間。決起不踰咫。飄飄託方便。意氣乃如此。物生未可料。旦暮儻逢世。君看功名場。得失一交臂。

拄笏亭晚望

林泉隨處有清涼。山遶闌干客自忙。溪雨不飛虹尚飲。亂蟬高柳滿斜陽。

桑嶺

回腸山百盤。揮手天一握。俯驚危棧穿。仰詫飛石落。挽輿如挽舟。絕叫斷雙筇。怪蔓纏枯槎。瘠草披幽壑。此豈車馬路。誰云強刊鑿。人言遠遊好。呼來試着腳。

次景琳錄事贈別韻

放船鳴櫂便秦吳。送別空煩長者車。宿霧鎖山常羃羃。斷雲將雨忽疎疎。高城五嶺花深處。短棹三江木落初。賴得溪流通尺素。蒲根仍有一雙魚。

客中呈幼度

手板頭衙意已慵。墨池書枕興無窮。釀泥深巷五更雨。吹酒小樓三面風。草色有無春最好。客心去住水長東。今朝合有家書到。昨夜燈花綴玉蟲。

送汪聖錫侍郎帥福唐

承明纔入又南州。重見旌旗照柁樓。道義平生無捷徑。風波隨處有虛舟。如公未可違文石。稽古何妨欠碧油。我亦登門煩著錄。此行無力爲王留。

長至日與同舍遊北山



歲晚山同色。湖平霧不收。寒雲低閣雪。佳節靜供愁。竹栢森嚴立。蒲荷索莫休。瘦筇知腳力。政爾耐清遊。  
次韻胡邦衡祕監

斯言向來立。千古敢疵瑕。有命孤蓬轉。何心勁箭加。人窮名滿世。天定客還家。回首冥恩怨。虛空不着花。  
送周子充左史奉祠歸廬陵

黃鵠飄然下九關。江船載月客俱還。名高豈是孤臣願。身退聊開壯士顏。傾蓋當年真旦暮。霑巾明日有河山。後期淹速都難料。相對猶憐鬢未斑。

送陸務觀修編監鎮江郡歸會稽待闕

寶馬天街路。烟蓬海浦心。非關愛京口。自是憶山陰。高興餘飛動。孤忠有照臨。浮雲付舒卷。知子道根深。見說雲門好。全家住翠微。京塵成歲晚。江雨送人歸。邊瑣風雷動。軍書日夜飛。功名袖中手。世事巧相違。

送李仲鎮宰溧陽

相逢已歎十年遲。冷淡貧交又語離。玉筍換班通籍後。黃梅吹雨送帆時。月岩家世猶爲縣。仲鎮方叔孫也金瀨溪山好賦詩。喚起酸寒孟東野。倒流三峽洗餘悲。

次韻子永雪後見贈

雪瓴待伴半陰晴。竟日簷冰溜雨聲。九陌泥乾塵未動。南山石露塔猶明。稍聞吉語占農事。便覺歸心勝

宦情想得村田來歲好。瓦盆嘉釀灌愁城。

與正夫朋元遊陳侍御園

沙際春風轉物華。意行聊復到君家。年年我是重來客。處處梅皆舊識花。官減不妨詩事業。地寒猶辨醉生涯。城中馬上那知此。塵滿長裾席帽斜。

正月十四日雨中與正夫朋元小集夜歸

燈市淒清燈火稀。雨中風帽笑歸遲。月明想在雲堆處。客醉都忘馬滑時。老去尊前花隔霧。春來句裏鬢成絲。浮生不了悲歡事。作劇兒童總未知。

韓無咎檢詳出示所賦陳季陵戶部巫山圖詩。仰窺高作。歎息彌襟。余嘗考宋玉談朝雲事。漫稱先王時本無據依。及襄王夢之。命玉爲賦。但云頽顏怒以自持。曾不可以犯干。後世弗察一切。溷以媒語。曹子建賦宓妃。亦感此而作。此嘲誰當解者。輒用此意次韻。和呈以資撫掌。

瑤姬家山高插天。碧叢奇秀古未傳。向來題目經楚客。名字經度峨眉前。是邪非邪莽難識。喬林古廟常秋色。暮去行雨朝行雲。翠帷瑤席知何人。峽船一息且千里。五兩竿頭見幡尾。仰窺仙館至今疑。行人問訊居人指。千年遺恨何當申。陽臺愁絕如荒村。高唐賦裏人如畫。玉色頽顏元不嫁。後來飢客眼長寒。浪傳樂府吹復彈。此事牽連到溫洛。更憐塵鞮有無間。君不見天孫住在銀濤許。塵間猶作兒女語。公家春

風錦瑟傍。莫爲此圖虛斷腸。

次韻王夷仲正字同遊成氏園

秀巖堂上玉東西。把酒登臨望眼迷。天宇四垂黏地近。海山一抹帶潮低。絕知客好無塵事。聊記吾曾有醉題。倚賴羣仙聯姓字。他年誰敢一九泥。是日諸公令予題壁

送吳智叔檢詳直中祕使閩

抗章襪被豈公難。已說高風立懦頑。客路莫嫌河畔草。直廬須愛道家山。秋生蓮蒲船初泛。春滿茶溪騎趣還。卻訪故人西府舊。定煩書札墮田間。

次韻韓無咎右司上巳汎湖

休沐良辰不待晴。徑稱閒客此閒行。春衫欺雨任教冷。病眼得山元自明。抹黛濃嵐圍坐晚。揉藍新淥沒篙清。棲鴉未到催歸去。想被東風笑薄情。

王園官舍睡起

公退閉閣臥官居。如淨舫。屋角斷虹飲。日西楊柳黃。官來束我帶。客去書滿床。睡覺有忙事。煮茶翻斷香。七月二日上沙夜泛

困倚船窗看斗斜。起來雨露滿天涯。亭亭宿鷺明菰葉。閃閃涼螢入稻花。月下片雲應夜雨。山根炬火忽

人家江湖處處無窮景。半世紅塵老歲華。

長沙王墓在閩門外孫伯符

英雄轉眼逐東流。百戰工夫土一坯。蕎麥茫茫花似雪。牧童吹笛上高丘。

次韻耿時舉王直之夜坐

庭葉翻翻鬧。燈花粟粟穠。關山千里雁。風雨滿城鐘。隴上新登穀。江頭舊熄烽。今年吾計得。安穩讀三冬。

次韻馬少伊郁寂峰寄示同遊石湖詩卷三首

鏡面波光倒碧峰。半湖雲錦萬芙蓉。去年蕩槳香風裏。行傍石橋花正濃。紅皺黃團熟暑風。甘瓜削玉藕玲瓏。身謀已落園丁後。滿帽京塵日正中。得得來題小隱詩。拂花縈柳畫船移。湖邊好景春猶未。須到秋清月滿時。

與長文正夫遊北山

柳岸松門勝處通。馬蹄踏霧入空濛。春光有力欺遊子。天色無情沒斷鴻。雨腳遠連山腳暗。杏梢斜倚竹稍紅。駝裘擁鼻吾衰矣。年小猶嫌料峭風。

寓直玉堂拜賜御酒

歸鴉陸續墮宮槐。簾幙參差晚不開。小雨遂將秋色至。長風時送市聲來。近瞻北斗璿璣次。猶夢西山翠

碧堆慚愧君恩來甲夜。殿頭宣勸紫金杯。

李鞏知縣作亭西湖上。余用東坡語名之曰飲綠。遂爲勝槩。

芷葺蓮巢喚客遊。蘆鞭席帽爲君留。未論吹水堪添酒。且要移床學枕流。乍霽卻陰梅釀雨。暫暄還冷麥催秋。石湖也似西湖好。煩向蒼烟問白鷗。

送汪仲嘉待制奉祠歸四明分韻得論字。

丹霄碧海眇高騫。厭直承明卻自論。寶馬十年聽漏箭。扁舟一雨看潮痕。侍臣想憶松門遠。歸客還憐菊徑存。清潤要非山澤相。又煩一札下雲根。

初約鄰人至石湖

窈窕崎嶇學種園。此生丘壑是前緣。隔離石上浮天水。當戶山橫匝地烟。春入葑田蘆綻笋。雨傾沙岸竹垂鞭。荒寒未辦招君醉。且吸湖光當酒泉。

刈麥行

菊花開時我種麥。桃李花飛麥叢碧。多病經旬不出門。東陂已作黃雲色。腰鎌刈熟趁晴歸。明朝雨來麥帶泥。犁田待雨插晚稻。朝出移秧夜食麩。

壬辰九月十六日。侵晨真率會。石湖路中書事。

白葛烏巾稱老農。溪南溪北水車風。稻頭的皪黏霜露。步入明珠翠網中。

雙燕

底處雙飛燕。銜泥上藥欄。莫教驚得去。畱取隔簾看。

春日三首

藥欄花暖小鴉眠。雪白晴雲水碧天。煮酒青梅寒食過。夕陽庭院鎖鞦韆。  
西窗一雨又斜暉。睡起熏籠換夾衣。莫放珠簾遮洞戶。從教燕子作雙飛。  
雙鯉無書直萬金。畫橋新綠一篙深。青蘋白芷皆愁思。不獨江楓動客心。

汴河

指顧枯河五十年。龍舟早晚定疏川。還京卻要東南運。酸棗棠梨莫蓊然。

雷萬春墓在南京城南環以小墻榜曰忠勇雷公之墓

九隕元身不隕名。言言千載氣如生。欲知忠信行蠻貊。過墓胡兒下馬行。

宜春苑

狐塚獾溪滿路隅。行人猶作御園呼。連昌尙有花臨砌。腸斷宜春寸草無。

州橋

州橋南北是天街。父老年年等駕迴。忍淚失聲詢使者。幾時真有六軍來。  
宣德樓

曉闕叢霄舊玉京。御牀忽有犬羊鳴。他年若作清宮使。不挽天河洗不清。  
市街

梳行訛雜馬行殘。藥市蕭騷土市寒。惆悵軟紅佳麗地。黃沙如雨撲征鞍。

漸水

黃流日夜向南風。道出封丘處處逢。紫蓋黃旗在湖海。故應河伯欲朝宗。

舊滑州

大伾山麓馬徘徊。積水中間舊滑臺。漁子不知興廢事。清晨吹笛掉船來。

翠樓

連袵成帷迓漢官。翠樓沽酒滿城歡。白頭翁媪相扶拜。垂老從今幾度看。

臨洛鎮

竟日霜寒暮解圍。融融桑柘染斜暉。北人爭勸臨洛酒。云有棚頭得免歸。

真定舞

紫袖當棚雪鬢凋。曾隨廣樂奏雲韶。老來未忍耆婆舞。猶倚黃鐘袞六么。

內丘梨園

汗後鶯梨爽似冰。花身耐久老猶榮。園翁指似還三歎。曾共翁身見太平。

望都

荒寺疎鐘解客鞍。由山東畔白煙寒。望都風土連唐縣。翁媪排門帶瘦看。

安肅軍

從古銅門控朔方。南城烟火北城荒。臺家抵死爭滄灤。滿眼秋蕪襯夕陽。

燕賓館

九日朝天種落驩。也將佳節勸盃盤。苦寒不似東籬下。雪滿西山把菊看。

龍津橋

燕石扶欄玉雪堆。柳塘南北抱城迴。西山剩放龍津水。畱待官軍飲馬來。

自石林回過小玲瓏。巖竇益奇昔爲富人吳氏所有。今一子尙幼。檢校於官。

一丘乃中虛。洞中四無礙。卻略巖岫杳。黝糾石狀怪。蒼牛飲前池。碧罇澁微瀨。雕鏤具百巧。圖畫窮千態。哀湍寫壞磴。凍雨濕空翠。疎梅照草棘。瘦竹枝蹊隧。當時閭閻子。自力有塵外。孤童藐難料。奇事疑有待。



誰歟千金捐。來換把茅蓋。不仙亦足豪。衆垓皆纍塊。我評北山遊。絕勝此無對。玲瓏詎可小。孰能爲之大。  
乾道己丑。守括被召。再過釣臺。自和十年前小詩。刻之柱間。後五年。自西掖帥桂林。癸巳元日。  
雪晴復過之。再用舊韻三絕。

浮生渺渺但飛埃。問訊星官又獨來。天上人間最高處。爲君題作鬱蕭臺。  
拙疎何計補涓埃。慚愧雙旌去又來。三過溪門今老矣。病無腳力更登臺。  
界天山雪淨黃埃。江上扁舟夜泛來。匝地東風勸椒酒。山頭今日是春臺。

豫章南浦亭泊舟二首

繡檻臨滄渚。牙檣插暮沙。浦雲沉斷雁。江雨入昏鴉。野曠天何近。春寒歲未華。朝來風一席。隨處且浮家。  
閏歲花光晚。霜朝草色荒。趁墟猶市井。收潦再耕桑。客路東西懶。江流日夜忙。長歌情不盡。一酌醉滄浪。  
清江臺在臨郡西岡上。張安國題榜。

南來富壽岡。春勝此蟠結。岑岬戴南臺。欄檻了風月。蕭灘曳長煙。貝闕爛殘雪。江流當帶橫。練練浮木末。  
天風來無鄉。萬里吹醉纈。登臨信奇事。忍凍亦癡絕。故人春夢覺。遺墨秋蛇掣。浮雲真可哈。揮觴酌空闕。  
初入湖南醴陵界

崖柳陰陰夾暝途。出山歡喜見平蕪。一春客夢飽風雨。行盡江南聞鷓鴣。

醴陵驛

綠水橋邊縣門前柳已黃。人稀山木壽。土瘦水泉香。乍脫泥中滑。還嗟堠子長。櫺洲何日到。鼓枻上滄浪。

初見山花

三日晴泥尙沒鞦。幾將風雨過年華。湘東二月春纔到。恰有山櫻一樹花。

湘江舟尾快風挂帆

船頭雲浪吼奔雷。十丈高帆滿意開。我自只憑忠信力。風應不爲世情來。兒童屢惜峰巒過。將士猶教鼓角催。明日祝融天柱去。更煩先捲亂雲堆。

泊湘江魚口灘

知時社燕語檣竿。遊子奔波自鮮歡。趁客賣魚雙槳急。隔林沽酒小旗寒。瀟湘渾似日南落。嶽麓已從天外看。薄暮灘前收百丈。臥聞三老報平安。

馬鞍驛飯罷縱步

食飽勸輿馬。散策步前岡。意行踏芳草。蕭艾蒼生香。春事甚寂寥。山桃帶松篁。游蜂入菜花。此豈堪蜜房。今年蠶出遲。柘葉分寸長。好晴纔數日。樂事未渠央。

黃巖嶺

薄宦每違己。茲行遂登危。峻阪盪胸立。恍若對鏡窺。傳呼半空響。濛濛上烟霏。木末見前驅。可望不可追。躋攀百千盤。有頃身及之。白雲叵攬搗。但覺沾人衣。高木傲燒痕。葱蘢茁新萸。春禽斷不到。惟有蜀魄啼。謂非人所寔。居然見鉏犁。山農如木客。上下翺以飛。寧知有康莊。生死安嶮巇。室空了無處。恐尙檜巢棲。安得拔汝出。王路方清夷。

衡永之間。山路艱澀。薄晚吏卒闕云。漸近祈陽。路已平夷。皆有津津之色。

朝登赤土嶺。暮入黃泥谷。春江弄花月。歸夢恍在目。覺來行路難。杜宇叫高木。凹中泥沒踝。凸處石齧足。坐輿我尙病。想見肩輿僕。衡陽復祈陽。可暫不可宿。晚來出前岡。路坦亭堠促。將士走相賀。喜色如膏沐。人生本無悶。逆境要先熟。不從憂患來。安識平爲福。夷途不常遇。歷險始知足。

書浯溪中興碑後 并序

乾道癸巳春三月。余自西掖出守桂林。九日渡湘江。遊浯溪。摩娑中興石刻。洎唐元和至今。遊客所題。竊謂四詩各有定體。頌者美盛德之形容。以其成功告于神明者也。商周魯之遺篇。可以概見。今元子乃以魯史筆法。婉辭含譏。蓋之而章。而後來詞人。復發露之。則夫磨崖之碑。乃一罪案。何頌之有。竊以五十六字。刻之石傍。與來者共商略之。此詩之出。必有相詬病者。謂不合題破次山。此亦習俗固陋。不能越拘攣之見耳。余義正詞直。不暇卹也。

三頌遺音和者希。丰容寧有刺譏辭。絕憐元子春秋法。都寓唐家清廟詩。歌詠當諧琴搏拊。策書自管壁  
純疵。紛紛健筆剛題破。從此磨崖不是碑。

宿清湘城外田家

驅馬力猶彊。奏牀身始疲。淨淨雲拂帳。潏潏水鳴籬。未熟燈前夢。閒尋道上詩。湘中多夜雨。客枕最先知。  
次韻郭季勇機宜雪觀席上畱別。

絕勝尊前萬事休。縱非吾土且登樓。山迎雨腳俄經過。風約江聲欲倒流。野水新堪添酒面。夕陽依舊滿  
簾鉤。凭欄從此遲歸鞅。能及中秋對月不。

次韻許季韶通判雪觀席上

把酒臨風瑞露傾。瓊漿何用謁雲英。捲簾雨腳銀絲挂。倚杖江頭綠漲生。嶺海一涼蘇暑病。山林千籟試  
秋聲。茲遊奇絕忘羈宦。慚愧烟中短棹橫。

送周直夫教授歸永嘉

青燈相對話儒酸。老去羈遊自鮮歡。昨夜榕溪三寸雨。今朝桂嶺十分寒。知心海內向來少。解手天涯良  
獨難。一笑不須論聚散。少焉吾亦跨征鞍。

贈趙廉州

馬羣雜踏草蒙茸。刮日權奇一洗空。天末也煩行李到。歲寒聊得酒尊同。梅花夜夜湘南雨。榕葉年年海北風。少待佳晴看山去。玉筍高插翠雲叢。

食罷書事

甲子霖涔雨。東南溼蟄風。荔枝梅子綠。荳蔻杏花紅。捫腹蠻茶快。扶頭老酒中。荒隅經歲客。土俗漸相同。

次韻平江韓子師侍郎見寄三首

自古四愁湘水深。誰將城郭啓山林。有情碧嶂團欒繞。無數朱樓縹緲臨。蚌鼓揭天驚客座。象瓘航海厭蠻琛。三千客路長安遠。故舊書來直萬金。

靈泉杖履浙江頭。經濟長懷尙典州。堂上讀書朝氣爽。臺前呼月海光浮。交情尺素勤雙鯉。筆力枯松挽萬牛。已把三章翻樂府。爲君擊節變蠻謳。

前年衝雪過雙溪。風帽泥韉騎吹隨。爛醉依前逢錦瑟。好音誰是欠黃鸝。功名未試玉璜玦。離別頻傾金屈卮。疇昔北征煩吉夢。南征合有夢征時。

水鄉酌別但能之主管能之將過石康

南郭河橋市井喧。綠荷香處有江天。一簾梅雨鑪煙外。三疊陽關燭淚前。馬耳西山君並海。船頭北渚我歸田。後期直恐參商似。且醉金槽四十絃。

燕堂書事

歲稔齋鈴闕年。深屋暨摧狸。爭雷瓦過。蝮化雨窗來。盡日風長籟。無時地不梅。耳邊情話少。笑口若爲開。

酒邊二絕

團扇香中嫋嫋風。斷腸聲裏看羞紅。不須過處催乾盞。聽徹歌頭盞自空。  
日長綉倦酒紅潮。閒束羅巾理六幺。新樣築毯花十八。丁寧小玉謾吹簫。

甘雨應祈三首

晚稻成苞未肯肥。鵝鳩啼曉雨來時。黃紬被冷初眠覺。先向芭蕉葉上知。  
秋日雖蒙霰霰沾。浥塵終恨太廉纖。今朝健起巡簷看。恰似廬山看水簾。  
高田一雨免飛埃。上水綱船亦可催。說與東江津吏道。打量今晚漲痕來。

畫工季友直。爲余作冰天桂海二圖。冰天畫使北虜渡黃河時。桂海畫佛子遊巖道中也。戲題。  
許國無功浪着鞭。天教飽識漢山川。酒邊蠻舞花低帽。夢裏胡笳雪沒韉。收拾桑榆身老矣。追隨萍梗意茫然。明朝重上歸田奏。更放岷山萬里船。

甲午除夜猶在桂林。念至一弟使虜。今夕當宿燕山會同館。兄弟南北萬里。感悵成詩。

把酒新年一笑非。鵲鴿原上巧相違。墨濃雲瘴我猶住。席大雪花君未歸。萬里關山燈自照。五更風雨夢

如飛。別離南北人誰免。似此別離人亦稀。

乙未元日用前韻書懷今年五十矣。

浮生四十九俱非。樓上行藏與願違。縱有百年今過半。別無三策但當歸。定中久已安心竟。飽外何須食肉飛。若使一丘并一壑。還鄉曲調盡依稀。

再用前韻時被命帥蜀

休論今昨總皆非。世味誠甘與我違。蜀道雖如履平地。杜鵑終勸不如歸。三冬自若生毛穎。一夢微官陪鬢飛。夜久南枝翻倦鵲。茫茫月白衆星稀。

施元光在岷山病中遠寄次韻答之。

四海飄蓬客舍邊。幾多雲水與風煙。絕無膂力驅長轡。空有孤忠誓大川。參井忽隨征馬上。斗牛應挂故山前。親交情話知何許。詩到天涯喜欲顛。

鑿鬚

導江自海陽。至縣迺瀾迤。狂瀾既奔傾。中流遇鑿鬚。分爲兩道開。東灘北湘水。至今舟楫利。楚粵經萬里。人謀歟天造。史祿所經始。無謂秦無人。虎鼠用否耳。紫藤纏老蒼。白石溜清泚。是間可作社。牲酒百世祀。修慶者誰歟。配以臨川季。

清湘縣郊外。雜花盛開。有懷石湖。

午行清湘縣。妍暖春事嘉。柴關開桃李。冥冥一川花。故園豈少此。愈此百倍加。我寧不念歸。願作失木鴉。百年北窗涼。安用一天涯。君恩重喬嶽。敢計征路賒。鄉心與官身。鑿柄方聳牙。橘柚走珍貢。何如繫匏瓜。明當復露奏。天日臨幽遐。倘許清河使。曳尾還汙邪。

珠塘

林茂鳥烏急。坡長鱸馱鳴。坐輿猶足痺。負笈想肩頰。廢廟藤遮合。危橋竹織成。路傍行役苦。隨處有柴荆。

題湘山大施堂

重倚春林淚竹枝。南遊風物鬢成絲。難尋桂海千峯夢。更了湘山一段奇。來去別無心外法。行藏休問塔中師。若論大施門前事。竿木逢場且賦詩。

深溪鋪中二絕。追路寄呈元將仲顯二使君。

賀州歸去柳州還。分路千山與萬山。把酒故人都別盡。今朝真箇出陽關。祇有南風捲路塵。斷無南客送車輪。故人合在瀟湘見。卻見瀟湘別故人。

湘口夜泊。南去零陵十里矣。營水來自營道。過零陵下湘水。自桂林之海陽。至此與營會合爲

一江。



我從清湘發源來。直送湘流入營水。故入亭前合江處。暮夜檣竿轟沙尾。卻從湘口望湘南。城郭山川恍難紀。萬壑千巖詩不徧。惟有蒼苔痕屐齒。三年瘴霧亦奇絕。浮世登臨如此幾。湖南山色夾江來。無復瑤簫插天起。陂陀狠石蹲清漲。淡蕩光風浮白芷。騷入魂散若爲招。傷心極目春千里。我亦江南轉蓬客。白鳥愁烟思故壘。遠遊雖好不如歸。一聲鷓鴣花如洗。

題嶽麓道卿臺

山外江水黃。江外滿城綠。城外杳無際。天低到平陸。長烟貫楚尾。遠勢帶吳蜀。故園東北望。遊子欄干曲。連日風作。洞庭不可渡。出赤沙河。

金沙堆前風未平。赤沙河邊波不驚。客行但逐安穩去。三十六灣漲痕生。滄洲寒食春亦到。荻芽深碧蘂芽青。汨羅水飽動荆渚。嶽麓雨來昏洞庭。大荒無依飛鳥絕。天地惟有孤舟行。慷慨悲歌續楚些。彷彿幽瑟迎湘靈。黃昏慘淡艤極浦。雖有漁舍無人聲。冬湖落濡此暫住。春潦怒漲隨傭耕。吾生一葉寄萬里。況復搖落浮滄溟。漁蠻尙自有常處。羈宦方汝尤飄零。

泊衡州

客裏仍哦對雨吟。夜來星月曉還陰。空江十日無春事。船到衡陽柳色深。

步入衡山

應有人家住隔溪。綠陰亭午但聞雞。松根當路龍筋瘦。竹筍滿山鳳尾齊。墨染安雲猶似瘴。絲來小雨不成泥。更無騎吹喧相逐。散誕閒身信馬蹄。

四明人董嶧久居嶽市乞詩

祝融峯下兩逢春。雨宿風淪老病身。莫笑五湖萍梗客。海邊亦有未歸人。

鼎湖

漂泊離巢燕。彎跽負殼蝸。瘦嫌莞席硬。老覺畫屏奢。報道帆當落。傳呼鼓已撾。且投人處宿。未到已聞墓。

安鄉縣西晚泊

水闊鳥鳥倦。墟寒僮僕飢。一灣村縣過。百折暮江遲。曉夢孤燈見。春陰病骨知。簡書寧不畏。膂力奈先疲。

孫黃渡

捨舟從陸更間關。徑仄仍荒亦未乾。棘刺近人牢閉眼。泥塗兀馬緊扶鞍。茶山盜藪路程惡。麥隴人家懷抱寬。擔僕輿夫盡劬瘁。病翁那得更加餐。

發荊州

初上蓬籠竹笮船。始知身是劍南官。沙頭沽酒市樓暖。徑步買薪江墅寒。自古秦吳稱絕國。于今歸峽有名灘。千山萬水垂垂老。只欠天西蜀道難。

虎牙灘

傾崖溜雨色。慘淡水墨畫。辛夷碎花懸。瘳木老藤挂。翠莽楚甸窮。黃流蜀江下。一灘今始嘗。三峽此其亞。雨點鼓士摻。雲騰挽夫跨。驚心度石林。破眼見村舍。牛眠草色裏。犬吠竹林罅。步頭可橫船。安穩睡殘夜。初入峽山效孟東野

峽山偪而峻。峽水湍以碻。峽草如毳毛。峽樹多膠枝。峽禽惟杜鵑。血吻日夜啼。峽馬類黃狗。不能長鳴嘶。峽曉虎跡多。峽暮人跡稀。峽路如登天。猿鶴不能梯。僕夫負嶠哭。我亦呻吟悲。悲吟不成章。聊賡峽哀詩。

蛇倒退

山前壁如削。山後崖復斷。向吾達隴首。如海到彼岸。那知下嶺處。慄甚履冰戰。牽前帶相挽。縮後衣盡綻。健倒轍尋丈。徐行塵分寸。上疑綠竹竿。下劇袞金彈。豈惟蛇退舍。飛鳥望崖反。稍喜一徑平。猶有千石亂。仍逢新燒畚。約略似耕畔。心知人境近。顰末百憂散。山民茅數把。鬼質犢子健。腰鑷走迎客。再拜復三嘆。謂匪人所蹊。官來定何幹。倘爲飢火驅。平地豈無飯。意者官事迫。如馬就羈絆。我乃不能答。付以一笑粲。

大丫隘

峽行五程無聚落。馬頭今日逢耕鑿。麥苗疎瘦豆苗稀。椒葉尖新秬葉薄。家家婦女布纏頭。背負小兒領垂瘤。山深生理卻不乏。人有銀釵一雙插。

麻線堆

峽口驛前大山崛起。舊路攀援而上。縈紆如線。十五年前。浮圖德寶始沿澗伐木作新路。不復登山。余觀峽路。皆未嘗經修。感德寶之事。作麻線堆詩一首。以風夔路使者。及歸峽二州長吏。沈葉管熊四君。雲木盪胸起。鬱峨一峯危。上有路千折。纏縷如縈絲。是爲麻線堆。厥險天下稀。偪仄容半足。顛墜寧復稽。騰猿尙愁苦。遊子將安之。浮屠德寶者。悲智緒等慈。隨山刊古木。尋壑得長磯。輿梁捷飛度。布石綿階梯。自從新路改。重阨無齋咨。縣有孫少府。琬琰劖文詞。勿云此事小。惟有行人知。況觀峽山路。由來欠平治。官吏旣弗跡。誰肯深長思。天險固自若。當令路成蹊。土工運畚鍤。石工操鑿椎。烈火敗礪确。築沙填隙巖。多用百夫力。遠無五旬期。但冀米鹽給。不煩金幣支。非客敢竊議。道旁詢旄倪。身雖雪山戍。亦願助毫釐。工費嗟小哉。政須賢有司。東有管夷陵。西有葉秭歸。上維沈隱侯。夔臺今吏師。下維熊繹孫。長材佐州麾。豈吾金閨彥。不如林下緇。懸知議克合。了此一段奇。舟楫避潢潦。置郵疾飛馳。憧憧吳蜀客。來往當無時。仍磨鑽天石。大書四賢詩。不佞願秉筆。遠繼峽口碑。

判命坡

鑽天嶺上已飛魂。判命坡前更駭聞。側足二分垂壞磴。舉頭一握到孤雲。微生敢列千金子。後禍猶幾萬石君。早晚北窗尋噩夢。故應含笑老榆枌。

千石嶺

晨光挂高嶺。晴色媚遠客。哀湍吼叢薄。宿霧裊絕壁。露重薜花紫。風來蓬背白。迷山朴渥跳。飲澗於菟迹。層巔多朽木。迳磴有飛石。不知山幾重。杳杳入叢碧。

四十八盤

詰曲不前如宦拙。欹傾當面似交難。若將世路比山路。世路更多千萬盤。

入秭歸界

山根繫馬得漿家。深入窮鄉事可嗟。蚯蚓崇人能作瘴。茱萸隨俗強煎茶。幽禽不見但聞語。野草無名都着花。窈窕崎嶇殊未艾。去程方始問三巴。

歸州竹枝歌二首

東鄰男兒得湘纍。西舍女兒生漢妃。城郭如村莫相笑。人家伐閼似渠稀。東岸艤船拋石門。西山炊煙連白雲。竹籬茅舍作晚市。青蓋黃旗稱使君。

巴東峽口

水宿頻欹側。徒行又險艱。舟危神女峽。馬瘦鬼門關。照夜燒畚隴。緣雲種笮山。催成頭雪白。休說鬢絲斑。初入巫峽

讚火巴東岸。縱金峽口船。東江崖欲合。漱石水多漩。卓午三竿日。中閒一罅天。偉哉神禹跡。疏鑿此山川。

巫山高 井序

余舊嘗用韓无咎韻。題陳季陵巫山圖。考宋玉賦意。辨高堂之事甚詳。今過陽臺之下。復賦樂府一首。世傳瑤姬爲王母女。嘗佐禹治水。廟中石刻在焉。

溼雲不收煙雨霏。峽船作灘梢廟磯。杜鵑無聲猿叫斷。惟有飢鴉迎客飛。西真功高佐禹跡。斧鑿鱗皴倚天壁。上有瑤簪十二尖。下有黃湍三百尺。蔓花蚪木風煙昏。薜珮翠帷香火寒。靈旂飄忽定何許。時有行人開廟門。楚客詞章元是諷。紛紛餘子空嘲弄。玉色頰顏不可干。人間錯說高唐夢。

刺潰淖 井序

潰淖盤渦之大者。峽江水壯則有之。或大如一間屋。相傳水行峽底。遇暗石則潰起。已而下旋爲窩。然亦未嘗有定處。或無故突然而作。叵測也。舟行遇之。小則欹傾。大則與齋俱入。險惡之名聞天下。

峽江饒暗石。水狀日千變。不愁灘瀧來。但畏潰淖見。人言盤渦耳。夷險固有間。仍于非時作。未可一理貫。安行方礙穀。無事忽翻練。突如湯鼎沸。翕作茶磨旋。勢迫中成窪。怒霽外始暈。已定稍安尉。儵作更驚眩。漂漂浮沫起。疑有潛鯨噀。勃勃駭浪騰。復恐蟄鯨抃。篙師瞪褫魄。灘戶呀雨汗。逡巡怯大敵。勇往決鏖戰。幸免與齊入。還憂似蓬轉。驚呼招竿折。奔救竹竿斷。九死船頭爭。萬苦石上牽。旁觀競薄冰。撇過捷飛電。

前余叱馭來。險山固嘗徧。今者擊楫誓。豈復憚波面。澎澎三峽長。颭颭一葦亂。旣微掬指忙。又匪科頭漫。天子賜之履。江神敢吾玩。但催疊鼓轟。往助雙橈健。

嘲峽石并序

峽山江濱。亂石萬狀。極其醜怪。不可形容。舉非世間。諸所有石之比。走筆戲題。且以紀異。峽山狠無情。其下多醜石。頑質賈憎垂。傀狀發笑啞。粗類墳壤黃。沈漬鐵矢黑。或如溝泥澆。或似東壁坼。堆疑聚廩粟。侈若壞城堞。槎牙鏤朽木。狼籍委枯骼。礪礪包羸蚌。淋漓錮鉛錫。縱紋瓦溝隴。橫疊衣摺襞。鱗皴斧鑿餘。炊甍蹴踏力。云何清淑氣。孕此譎詭跡。我本一丘壑。嗜石舊成癖。端溪紫琳腴。洮河綠沉色。階册截肪膩。泗磬鳴球擊。嵌空太湖底。偶立韶江側。真陽劓千巖。營道剗寸碧。倦遊所閱多。未易一二籍。竭來茲山下。刺眼昔未覲。或云峽多材。奇秀鬱以積。絕代昭君村。驚世屈原宅。東家兩兒女。氣足豪萬國。山石何重輕。奚暇更融液。我亦味其言。作詩曉行客。

勞畚耕并序

畚田峽中。刀耕火種之地也。春初斫山。衆木盡蹶。至當種時。伺有雨候。則前一夕火之。藉其灰以糞。明日雨作。乘熱土下種。卽苗盛倍收。無雨反是。山多磽确。地方力薄。則一再斫燒。始可藝。春耕麥豆餅餌。以度。夏秋則粟熟矣。官輸甚微。巫山民以收粟三百斛爲率。財用三四斛。了二稅。食三物。以終年。雖平

生不識杭稻而未嘗苦饑。余因記吳中號多嘉穀。而公私之輸頗重。田家得粒食者無幾。峽農之不若也。詩以勞之。

峽農生甚艱。斫畚大山巔。赤埴無土膏。三刀財一田。顧其穴居智。占雨先燎原。雨來亟下種。不爾生不蕃。

麥穗黃剪剪。豆苗綠芊芊。餅餌了長夏。更遲秋粟繁。稅畝不什一。遺秉得壓餐。何曾識杭稻。捫腹常果然。

我知吳農事。請為峽農言。吳田黑壤腴。吳米玉粒鮮。長腰瓠犀瘦。齊頭珠顆圓。紅蓮勝彫胡。香子馥馥蘭。

或收虞舜餘。或自占城傳。早秬與晚糴。爛炊甑甌間。長腰米狹長。香子亦名箭子齊。頭白圓淨如珠。紅蓮色微赤。亦名九里香。斗米入數合作飯。

芳香滿案。舜王稻。糴。魚頭無須。俗為瞽瞍燒種。以上皆吳中米品也。不辭春養禾。但畏秋輸官。姦吏大

雀鼠盜胥衆。螟螣掠剩增。釜區取贏折。緡錢兩種致。一斛未免催租瘢。重以私債迫。逃屋無炊烟。晶晶雲

子飯。生世不下咽。食者定游手。種者長流涎。不如峽農飽。豆麥終殘年。

巫山縣自此復登陸。至夔門縣前。掉石灘。最險。登岸以過。舟謂之盤灘。城樓對高唐門。此去瞿塘不百里。縣人以郭西流石堆為水信流石沒。則灩澦

如馬矣。

借馬巫山縣。盤舟掉石灘。梅肥朝雨細。茶老暮烟寒。門對高唐起。江從灩澦難。流堆三尺在。旅夢一枝安。

燕子坡

大山如牆缺。小山如塚纍。衆山直下看。方知此峯危。木末見夔峽。一溝盎春泥。中有天下嶮。造化真兒嬉。



峯頂不滿笑。舟中鬚成絲。登高尙超覽。況乃絕俗姿。

夔州竹枝歌九首

五月五日嵐氣開。南門競船爭看來。雲安酒濃麴米賤。家家扶得醉人迴。  
赤甲白鹽碧叢叢。半山人家草木風。榴花滿山紅似火。荔枝天涼未肯紅。  
新城果園連瀼西。枇杷壓枝杏子肥。半青半黃朝出賣。日午買鹽沽酒歸。  
瘦婦趁墟城裏來。十五五市南街。行人莫笑女粗醜。兒郎自與買銀釵。  
白頭老媪簪紅花。黑頭女郎三髻丫。背上兒眠上山去。採桑已閒當採茶。  
百衲畚山青間紅。粟莖成穗豆成叢。東平屯田秔米軟。不到貧人飯甑中。  
白帝廟前無舊城。荒山野草古今情。只餘峽口一堆石。恰似人心未肯平。  
灩澦如樸瞿塘深。魚復陣圖江水心。大昌鹽船出巫峽。十日泝流無信音。  
當筵女兒歌竹枝。一聲三疊客忘歸。萬里江邊有船到。繡羅衣服生光輝。

雲安縣

春暮子規少。日斜紅鵠飛。兩山多布水。一鳥幾柴扉。蚓吐無窮壤。人行不斷磯。巴陽昨夜雨。灘上水先肥。  
杜子美詩云涪萬無杜鵑。雲安詩云終日子規啼。今萬州界固不聞杜鵑。而雲安已自少矣。又紅鵠飛時滿背純赤。或云即黃鵠也。峽中蚯蚓之盛。無如雲安。江濱潰壤。戢戢無際。又

多大石岸。有一石長里許者。杜子美詩云。禹功多斷石。其實甚長。兩山間雨後瀑。泉數十百處。尤可觀。

萬州

晨炊維下巖。晚酌橫南浦。波心照州榜。雲腳響衙鼓。前山如屏牆。得得正當戶。西江朝宗來。循屏復東去。  
此萬州形勢也。惟親歷者當知此言之工。官曹倚巖棲。市井喚船渡。瓦屋仄石磴。猿啼鬧人語。剔核杏餘酸。連枝茶贖苦。窮鄉固瘠薄。陋俗亦寒窶。土人賣杏。皆先剔其核。取仁以為藥也。土茶甚苦。不簡枝葉。雜茱萸煎之。營營謀食艱。寂寂懷甄訴。昔聞吏隱名。今識吏隱處。

峯門嶺遇雨泊梁山

窮鄉誰與話悲酸。駐馬看雲強自寬。酒力無端妨宿病。詩情不淺任塵官。虎狼地僻炊煙晚。風雨天低夏木寒。行盡峯門千萬丈。梁山鼓角報平安。

邛邛驛大雨

暮雨連朝雨。長亭又短亭。今朝騎馬怕。平日繫船聽。竹葉垂頭碧。秧苗滿意青。農疇方可望。客路敢遑寧。

墊江縣

青泥沒髀僕頻驚。黃漲平橋馬不行。舊雨雲招新雨至。高田水入下田鳴。百年心事終懷土。一日身謀且望晴。休入中州爭米市。暝鴉同宿墊江城。

巾子山又雨

百日籃輿困跼踖。三晨汎坂兀躋攀。晚晴幸自墊江縣。今雨奈何巾子山。樹色于人殊漠漠。雲容憐我稍班班。如今只憶雪溪句。乘興而來興盡還。

鄰山縣

山頂噓雲黑似烟。修篁高柳共昏然。鳥啼一夜勸歸去。誰道東川無杜鵑。

沒水鋪晚晴。月出曉復大雨。上漏下溼。不堪其憂。

晚色熹微暖似薰。兒童歡喜走相聞。無端星月照溼土。依舊山川生雨雲。吳諺曰。星月照溼土。明朝

燦然。必復雨。占之每驗。旅枕夢寒涪屋漏。征衫朝潤冷鑪熏。快晴信是行人願。又恐田家暴背耘。

金山嶺

阪峻身頻偃。崖深首屢回。雲浮平地出。路拂半天來。但閱關山過。都忘歲月催。湘南初上馬。猶插早春梅。

明日至鄰水又雨

昨日方無雨。今朝又不晴。滿山皆屐齒。隨處有泉聲。頗怪陰霖差。應催老病成。泥塗千騎士。與我共勞生。

望鄉臺

千山已盡一峯孤。立馬行人莫疾驅。從此蜀川平似掌。更無高處望東吳。

早晴發廣安軍。晚宿萍池村莊。

夜雨洗煩蒸。曉風薦清穆。雲頭隕鐵山。日腳迸金瀑。暑塗一日涼。遠客萬事足。羈人正奔波。觀者何陸續。翠蓋立嚴粧。青裙行跣足。俗陋介南徼。物華入東蜀。竹萌苦已青。蕻子酸猶綠。修蘆密成籬。直柏森似叢。泥乾馬蹄鬆。路坦亭堠速。暮投何人莊。窗戶暗修竹。

巴蜀人好食生蒜。臭不可近。頃在嶠南。其人好食檳榔。合蠣灰扶留藤。一名萋藤。食之輒昏然。已而醒快。三物合和睡如膿血可厭。今來蜀道。又爲食蒜者所薰。戲題。

旅食諳殊俗。堆盤駭異聞。南灰滄薦蠣。巴饌菜先輩。幸脫萋藤醉。還遭葫蒜薰。絲蓴鄉味好。歸夢水連雲。

小溪縣

刈麥千平壟。橫槎一小溪。梓花紅綻碎。粟穗綠垂低。村婦猶多跣。山猿遂少啼。東州雖已過。錦里尙雲西。曉發飛鳥晨霞滿。天少頃大雨。吳諺云。朝霞不出門。暮霞行千里。驗之信然。戲紀其事。

朝霞不出門。暮霞行千里。今晨日未出。曉氣散如綺。心疑雨再作。眼轉雲四起。我豈知天道。吳農諺云耳。古來占霧靄。說者類恢詭。飛雲走羣羊。停雲浴三豸。月當天畢宿。風自少女起。爛石燒成香。汗礎潤如洗。逐婦鳩能拙。穴居狸有智。蜉蝣強知時。商羊與聞計。埵鳴東山鶴。堂審南柯蟻。或加陰石鞭。或議陽門閉。或云逢庚變。或自換甲始。刑鵝與象龍。聚訟非一理。不如老農諺。響應捷如鬼。哦詩敢夸博。聊用醒午睡。

九月十九日衙散回。留火將及幕。屬飲清心堂。觀晚菊分韻。  
甲光射曾雲。雨腳不敢到。西山明古雪。秋日一竿照。先偏并絡密。後拒參旗掉。分弓滴博平。鳴劍伊吾小。  
君看天山箭。孤兔何足了。開邊吾豈敢。自治有餘巧。歸來翠帷卷。聊共黃花笑。雖無落帽風。亦復接籬倒。  
餘閒校筆陣。刻燭龍蛇掃。毛錐乃更剪。我亦鼓旗譟。

冬至日銅壺閣落成

走徧人間行路難。異鄉風物雜悲歡。三年北戶梅邊暖。萬里西樓雪外寒。已辦鬢霜供歲籥。仍拚髀肉了  
征鞍。故園雲物知何似。試上東樓且北看。

十二月十八日海雲賞山茶

追趁新晴管物華。馬蹄鬆快帽簷斜。天南臘盡風晞雪。冰下春來水激沙。已報主林催市柳。仍從掌故問  
山茶。豐年自是驪聲沸。更著牙前畫鼓撾。

雨後東郭排岸司申梅開方及三分戲書小絕令一面開燕

雨入南枝玉蘂皴。合江雲冷凍芳塵。司花好事相邀勒。不著笙歌不肯春。

鞭春微雨

旛勝絲絲雨。笙歌步步塵。一年新樂事。萬里未歸人。雲薄竟慳雪。酒濃先受春。送寒東作近。慚愧耦耕身。

丙申元日交福寺禮塔。

士女燃香挂幡以禳兵火之災。

嶺梅蜀柳笑人忙。歲歲椒盤各異方。耳畔逢人無魯語。蜀人鄉音極難解。其爲京洛音也。輒鬢邊隨我

是吳霜。新年後飲醪酥酒。故事先燃窰堵香。石笋新街好行樂。與民同處且逢場。

初四日東郊觀麥苗

去歲秋霖麥下遲。臘殘一雪潤無泥。相將飽喫滹沱飯。來聽林間快活啼。

櫻桃花

借暖衝寒不用媒。勻朱勻粉最先來。玉梅一見憐癡小。教向傍邊自在開。

再出東郊

晚景增年惜。官身作客諳。大都緣偶熟。豈是性能堪。昔者開三徑。它時老一龕。越溪親種竹。芸綠想毵毵。

上巳前一日學射山萬歲池故事。

北郊征路記前迴。三尺驚塵馬踏開。新漲忽明多病眼。好風如把及時杯。青黃麥隴平平去。疎密橙林整整來。遊騎不知都幾許。長堤十里轉輕雷。

寶相花

誰把桑條夾砌栽。壓枝萬朵一時開。爲君也著詩收拾。題作西樓錦被堆。

四月十日出郊

約東南風徹曉忙。收雲捲雨一川涼。漲江混混無聲綠。熟麥騷騷有意黃。吏卒遠時閒信馬。田園佳處忽思鄉。鄰翁萬里應相念。春晚不歸同插秧。

曉詣三井觀

路轉市聲遠。寬閒古城東。適從紅塵來。忽入蒼煙叢。槿心傾濃露。芋葉翻微風。秋陽澹籬落。殘暑不必攻。野老熟睡起。日高首如蓬。官身騎官馬。君應笑龍鍾。

秋雨快晴靜勝堂席上

一笑憧憧雁鶩行。簿書堆裏賦秋陽。心如墜絮沾泥懶。身似飛泉激石忙。雨後蹲鴟先稻熟。霜前浮蟻鬪粳香。天涯節物遮愁眼。且復隨鄉便入鄉。

新涼夜坐

吏退焚香百慮空。靜聞蟲響度簾櫳。江頭一尺稻花雨。窗外三更蕉葉風。日日老添明鏡裏。家家涼入短檠中。簡編燈火平生事。雪白眵昏奈此翁。

秋老四境雨已沛然。晚坐籌邊樓。樓下忽有東界農民數十人。訴山田卻要雨。須長

吏致禱感之作詩

歲晚羈懷有所思。秋來病骨最先知。鏡中公案已甘老。紙上課程休諱癡。西堰頗聞江漲急。東山猶說雨來遲。錦城樂事知多少。憂旱憂霖蹙盡眉。

有懷石湖舊隱

浩蕩沙鷗久倦飛。摧頽櫪馬不勝鞿。官中風月常虛度。夢裏關山或暫歸。橘社十年霜欲飽。鱸江一雨水應肥。冷雲著地塘蒲晚。誰爲披簑暖釣磯。

晚步宜華舊苑

喬木如山廢苑西。古溝疎水靜鳴池。吏兵窸窣番更後。樓閣崔嵬欲暝時。有露冷螢猶照草。無風驚雀自遷枝。歸來更了塵書債。目眇昏花獨穗垂。

西樓秋晚

樓前處處長秋苔。俛仰瓊杓又欲回。殘暑已隨梁燕去。小春應爲海棠來。客愁天遠詩無託。吏案山橫睡有媒。晴日滿窗鳧鷺散。巴童來按鴨爐灰。

明日分弓亭按閱再用西樓韻

眼看白露點蒼苔。歲月飛流首屢回。老去讀書隨忘卻。醉中得句若飛來。聞雞午夜猶能舞。射雉西郊不



用媒。自笑支離聊復爾。丹心元未十分灰。

丁酉重九。藥市呈座客。

余於燕山首句云。萬里漢家使。桂林云。萬里漢都護。成都云。萬里橋邊客。今歲倦游。賦此自戲。莫向登臨怨落暉。自緣羈宦阻歸期。年來厭把三邊酒。此去休哦萬里詩。烏帽不辭歌短髮。黃花終是欠東籬。若無合坐揮毫健。誰解西風楚客悲。

十一月十日。海雲賞山茶。

門戶謹呼十里村。臘前風物已知春。兩年池上經行處。萬里天邊未去人。客鬢花身俱歲晚。粧光酒色且時新。海雲橋下溪如鏡。休把冠巾照路塵。

二月一十七日。病後始能扶頭。

複幕重簾苦見遮。暮占棲雀曉占鴉。殘燈煮藥看成老。細雨鳴鳩過盡花。心爲早衰元自化。髮從無病已先華。更蒙厲鬼相提唱。此去山林屬當家。

病中聞西園新花已茂。及竹筵皆成。而海棠亦未過。

梅塢桃蹊斫竹初。三旬高臥信音疎。春雖與病無交涉。雨莫將花便破除。祗合蘧蘧隨夢去。何須咄咄向空書。頗聞蜀錦猶相待。去歲今朝已雪如。

枕上

一枕經春似宿醒。三衾投曉尚淒清。殘更未盡鴉先起。虛幌無聲鼠自驚。久病厭聞銅鼎沸。不眠惟望紙窗明。摧頽豈是功名具。燒藥爐邊過此生。

初履地

扶頭今日強冠簪。餘燼收從百戰酣。長脰閣軀如瘦鶴。衝風奪氣似枯柟。客來慵拄懶殘涕。老去寒同彌勒龜。何處更能容結習。任教花雨落毵毵。

病起初見賓僚時上疏丐詞未報

浪將冠服衣猿狙。因病偷閒稍自如。時有好懷誇得句。略無情語怕回書。邊城晏閉休傳箭。村巷春遊禾。荷鋤追北良辰公事少。天恩儻許賦歸歟。

三月十九日極冷

誰勒餘寒不放廻。春深猶暖地爐灰。鄉心忽向燈前動。夜雨先從竹裏來。鷓鴣已如鶯百轉。醅釀那復雪千堆。調糜煮藥東風老。慚愧茶甌與酒杯。

入崇寧界

桑間三宿尙回頭。何況三年濯錦遊。草草陣筒中酒處。不知身已在彭州。

懷古亭

朝來寫得故人書。雙鯉難尋雁亦無。付與離堆江水去。解從陴縣到成都。

過青城題索橋

以竹繩爲之

織簞勾鋪面。排繩強架空。染人高曬帛。獵戶遠張罾。薄薄難承雨。翻翻不受風。何時將蜀客。東下看垂虹。

上清宮

歷井捫參與未闌。丹梯通處更躋攀。冥濛蜀道一雲氣。破碎岷山千髻鬟。但覺星辰垂地上。不知風雨滿人間。蝸牛兩角渾如夢。更說紛紛觸與蠻。

最高峰望雪山

大面峰頭六月寒。神燈收罷曉雲班。浮空忽湧三銀闕。云是西天雪嶺山。

青城縣何子方使君同年園池

橙塍芋隴意中行。浩蕩薰風不計程。雨腳背人歸玉壘。江聲隨馬入青城。五橋今日新知路。千佛當年舊綴名。水竹光中同一笑。丐君荷露濯塵纓。

次韻陸務觀編修新津遇雨不得登脩覺山徑過眉州三絕

脩覺一望可見劍門

送客多情難語離。僕夫無情車載脂。平生漂泊知何限。少似新津風雨時。  
離合紛紛怕遠遊。遠遊仍怕賦登樓。何須一望三千里。望盡西州轉更愁。  
雨後暮頤山色開。玻璃江清已可盃。綠荷紅菱香四合。又入芙蓉城裏來。

次韻陸務觀慈姆巖別二絕

送我彌旬未忍回。可憐蕭索把離盃。不辭更宿中巖下。投老餘年豈再來。  
明朝真是送行人。從此關山隔故情。道義不磨雙鯉在。蜀江流水貫吳城。

玻璃江一首戲效陸務觀作

玻璃江頭春淥深。別時泔泔流到今。祗言日遠易排遣。不道相思翻苦心。烏頭可白我可去。菖花易青君  
易尋。人生若未免離別。不如碌碌無知音。

余與陸務觀自聖政所分袂。每別輒五年。離合又常以六月。似有數者。中巖送別至。揮淚失聲。  
留此爲贈。

宦塗流轉幾沉浮。雞黍何年共一丘。動輒五年遲遠信。常于三伏話羈愁。月生後夜天應老。淚落中巖水  
不流。一語相聞仍自解。除書聞已趣刀頭。

萬景樓

山谷來遊時未有此樓也

左披九頂雲。右送大峨眉。殘山賸水不知數。一一當樓供勝絕。玻璃錦濯遙相通。指麾大渡來朝宗。川霧胥命各東去。我亦順流呼短篷。詩無傑語慙風物。賴有丹青傳小筆。仍添書客倚欄看。令與山川相映發。龍彎歸路遶烏尤。棟雲簾雨邀人留。若爲喚得涪翁起。題作西南第一樓。

問月堂酌別

半明燈火話悲酸。此會情知後會難。四海宦遊多聚散。一生情事足愁歡。鬢絲今夜不多黑。酒量徹明無數寬。醉夢登舟都不記。但聞風雨滿江寒。

別後寄題漢嘉月榭

同年陸務觀所作

隱吏詩情卜築幽。同年惜別勸淹留。試傾萬景湖亭酒。來看半輪江月秋。川路雖長猶共此。夜船空載且歸休。碧巖勝處頻回首。好事誰能更小樓。

峨眉縣

窮鄉未省識旌旄。雞犬驩呼巷陌騷。村媪聚觀行績布。野翁迎拜聽然蒿。泉清土沃稻芒早。縣古林深槐

瘦高珍重里儒來獻頌。盛言千載此丘遭。

初入大峨

煙霞沈痼不須醫。此去真同汗漫期。曾款上清臨大面。仍從太白問峨眉。山中緣法如今熟。世上功名自古癡。賸作畫圖歸挂壁。它年猶欲臥遊之。

八十四盤

冥鴻無伴鶴孤飛。回首塵籠一笑嬉。八十四盤新拄杖。萬千三乘舊牙旗。石梯碧滑雲生後。木葉紅斑雪霽時。說與同行莫惆悵。人間捷徑轉欽巖。

婆羅平

仙聖飛行此是家。路逢真境但驚呀。神農嘗外盡靈藥。天女散餘多異花。嵐雨逼衣寒似鐵。冰泉炊米硬于沙。峰頭事事殊塵世。缺甃跳梁笑井蛙。

思佛亭曉望

栗烈剛風刮病眸。登臨何啻緩千憂。界天暑雪青城外。匝地晴雲瓦屋頭。浩蕩它年誇北客。蒼茫何處認西州。千巖萬壑須尋徧。身是江湖不繫舟。

韃爲江樓

河邊堵立看歸篷。三老開頭暮欲東。漲水稠灘連峽內。淺山浮石似湘中。無人驛路榛榛草。有客江樓浩浩風。種落塵稍少公事。賸裁新語寄詩筒。縣令能詩者

題譚德稱扇

蠻風吹雨瘴江肥。短草荒山鳥不飛。盡是瀘南腸斷句。如今分與故人歸。

題楊商卿扇

君歸我去兩銷魂。愁滿千山鎖瘴雲。後夜短檠風雨暗。誰能相伴細論文。

發合江數里寄楊商卿諸公

臨分滿意說離愁。草草無言祇淚流。船尾竹林遮縣市。故人猶自立沙頭。

過江津縣睡熟不暇梢船

西風扶艣似乘槎。水闊灘沉浪不花。夢裏竹間喧急雪。覺來船底哀鳴沙。

涪州江險不可泊入黔江機舟

黃沙翻浪攻排亭。潰淖百尺呀成坑。坳窪眩轉久乃平。一渦熨帖千渦生。篙師絕叫毆川霧。鳴鏡飛渡如奔霆。水從岷來如濁涇。夜榜黔江聊濯纓。玻璃徹底鏡面平。忽思短棹中流橫。釣絲隨風浮月明。

妃子園

涪陵荔子天寶所貢。

露葉風枝驛騎傳。華清天上一嫣然。當時若識陳家紫。何處蠻村更有園。

下巖

疇昔中巖一夢殘。下巖風景亦高寒。峽中無處堪停棹。雨後今朝始凭欄。不用苦求毫相現。祇教長挂水簾看。山僧勸我題蒼壁。坡谷前頭未敢刊。

夔門卽事

夔水不可飲。取之臥龍十里之外。

峽行風物不堪論。伴暑驕陽雜瘴氛。人入恭南多附贅。山從夔子盡侵雲。竹枝舊曲元無調。麴米新篛但有聞。試覓清冷一杯水。筒泉須自臥龍分。

瞿唐行

七月十九日。至夔子瀨。瀨徹髮不可犯。是夜水漲及山腹。詰旦視瀨。則已在水中。土人云。此青草齊也。可以冒險而入。遂鼓棹。略其頂而過。郡中遣候兵立山上。每一舟平安。則搖幟以召後舟。白鹽赤甲。皆峽口。大山黃嵌黑石。皆峽中至險處。入峽西岸有聖泉。舟人或向之疾呼曰。人渴也。泉卽迸下。杯許。復乾。余舟過甚急。未之試也。



川。霧。知。我。歸。有。程。一。夜。漲。痕。千。丈。生。中。流。擊。楫。洶。作。氣。夾。峰。旗。鼓。呀。失。聲。不。知。灑。瀨。在。船。底。但。覺。瞿。唐。如。鏡。平。鑿。峽。疏。川。很。石。破。號。山。索。飲。飛。泉。驚。白。鹽。赤。甲。轉。頭。失。黑。石。黃。嵌。拚。命。輕。草。齊。增。肥。無。泊。處。竹。枝。凝。葉。空。餘。情。人。間。險。路。此。奇。絕。客。裏。驚。心。吾。飽。更。劍。閣。翻。成。蜀。道。易。請。歌。范。子。瞿。唐。行。

鄂州南樓

誰。將。玉。笛。弄。中。秋。黃。鶴。飛。來。識。舊。遊。漢。樹。有。情。橫。北。渚。蜀。江。無。語。抱。南。樓。燭。天。燈。火。三。更。市。搖。月。旌。旗。萬。里。舟。卻。笑。鱸。江。垂。釣。手。武。昌。魚。好。便。淹。留。

梅根夾

辛。苦。凌。波。棹。平。安。八。夾。船。月。明。漁。浦。網。風。側。瓦。窰。煙。老。圃。容。挑。菜。村。巫。橫。索。錢。且。投。人。處。宿。終。夜。得。佳。眠。將。至。吳。中。親。舊。都。來。相。迓。感。懷。有。作。

望。見。家。山。意。欲。飛。古。來。燕。晉。一。沾。衣。回。思。客。路。豈。非。夢。乍。聽。鄉。音。真。是。歸。新。事。略。從。年。少。問。故。人。差。覺。坐。中。稀。不。須。更。說。桑。榆。暖。霜。後。鱸。魚。也。自。肥。

淳熙五年四月二日直宿玉堂懷舊二絕句

桂。海。冰。天。老。歲。華。直。廬。重。上。玉。皇。家。當。年。曾。識。青。青。鬢。惟。有。東。墻。一。架。花。雪。山。刁。斗。不。停。搗。夜。把。軍。書。敢。顧。家。珍。重。玉。堂。今。夜。夢。靜。聞。宮。漏。隔。宮。花。

初歸石湖

曉霧朝暎紺碧烘。橫塘西岸越城東。行人半出稻花上。宿鷺孤明菱葉中。信腳自能知舊路。驚心時復認鄰翁。當時手種斜橋柳。無限鳴蜩翠掃空。

贈舉書記歸雲山

一枕清風四十霜。孤生無處話淒涼。相看只有龐眉客。還在雲丘舊草堂。四股澗松霞斧碎。十圍巖桂燒痕枯。不知階下跳珠處。舊竹春來有笋無。青山面目想孤依。水石風林入夢思。白髮蒼顏心故在。只如當日看山時。

題查山林氏庵

庭戶清深宅翠微。雪如佳壁喚題詩。煙梢矗矗青圍屋。露葉鮮鮮綠滿籬。宿雨一春纔汎鳴。平蕪幾日已藏碑。山僧見客如枯木。疑是嬾殘南嶽師。

木瀆道中風雨震雷大作

惡風奔雲何壯哉。溪水欲立山欲摧。石岸迸裂纜邊樹。胡牀動搖船底雷。靈巖塔後雨腳挂。胥口廟前浪花來。篷漏衣沾不足惜。酒瓶傾側愁空罍。

光福塘上

指點炊烟隔莽蒼。午餐應可寄前莊。雞聲人語小家樂。木葉草花深巷香。春去已空衣尚絮。雨來何晚稻初芒。祇今農事村村急。第一先陂貯水塘。

秋前風雨頓涼

秋期如約不須催。雨腳風聲兩快哉。但得暑光如寇退。不辭老景似潮來。酒杯觸撥詩情動。書卷招邀病眼開。明日更涼吾已卜。暮雲橫作亂峰堆。

曉起聞雨

老年稍喜睡魔清。兀坐枯株聽五更。蕭索輪囷憐燭燼。飛揚跋扈厭蚊聲。登高事了從教雨。刈熟人忙卻要晴。莫道西成便無慮。大須濃日曬香秔。

嘲蚊四十韻

暑魃方肆行。羽孽亦厲習。肖翹極么麼。塊北累闢翁。溼生同糞蝸。腐化類宵熠。初來鬧郭郛。少進亘原隰。嚶如蠅聲薨。聚若螽羽緝。俄爲隱雷闕。逐作密霰集。口銜鋼鍼鋒。力洞衲衣襲。啾聲先計議。著肉便成吸。玄豹猶未定。卓錫已深入。血隨姑嘬升。勢甚輓轡汲。沉酣尻益高。飽滿腹漸急。晶晶紫蟹眼。滴滴紅飯粒。拂掠倦體煩。爬搔瘁肌澀。救東不虞西。擒一已竄十。新癢蓓蕾漲。宿暈斑斕浥。竟夜眠展轉。連牀歎於悒。云何人減欣。乃繫汝張歛。驅以葵扇風。熏以艾烟溼。檠長鎮藏遮。帳隙亟補葺。火攻憚穢臭。手拍嫌腥汁。

伏翼佐掃除。網蛛助收拾。薄暮洵交攻。大明訂未戢。牛革厚逾氈。絜介銛勝鋌。遭汝尙欲困。嗟人何以給。夏蟲雖衆多。罪狀相百什。蜂蠆豈房櫳。蟣蝨但禪褶。羊羶蝻登俎。驥逸蟲附鬣。蠓惟舞醯瓮。蠹止崇書袞。蚤爲鴟所撮。蠅亦虎能執。彼愆可貫死。汝罪當獻級。涼颿倏然至。醜類殆哉岌。一吹背吻破。再鼓翅翎縶。三千蹠頡利。百萬走尋邑。快哉六合內。蔑有一塵立。虛空旣清涼。家巷得寧輯。雞窗夜可誦。蛩機曉猶織。雨簾繡浪卷。風燭淚珠泣。客來添羽觴。人靜拂塵笈。恍還神明觀。似啓坏戶蟄。消長誰使然。智力詎能及。

晚步吳故城下

意行殊不計。榛菅風袖飄。然勝羽翰。拄杖前頭雙雉起。浮圖絕頂一鷗盤。醉紅匝地斜曛暖。熨練涵空漲水寒。卻向東皋望烟火。缺蟾先映樹林丹。

北山堂開爐來坐

困眠醒坐一龕多。竹洞無關斷客過。貪向爐中煨榾柮。懶從掌上看菴摩。間無雜念惟詩在。老不甘心奈鏡何。八萬四千安樂法。元無祕密可伽陁。

北城梅爲雪所厄

凍蘂黏枝瘦欲乾。新年猶未有春看。雪花祗欲欺紅紫。不道梅花也怕寒。

浙東舟中

處處槿樊圃。家家桃廡門。魚鹽臨水市。烟火隔江村。雨過張帆重。潮來汲井渾。彎跽短篷底。休說兩朱旛。  
東門外觀刈熟。民間租米船。相銜入城。喜作二絕。

菊莎杞棘爨無烟。日日文書橫索錢。今日甬東官況好。東津門外看租船。  
潮到靈橋綠繞船。海邊力穡屢豐年。澹青山色深黃稻。恰似胥門九月天。

重陽九經堂作

俗聞佳節自匆匆。老去愁秋又客中。青嶂卷簾三面月。黃花吹鬢幾絲風。十年故國新栽柳。萬里他鄉舊  
轉蓬。誰與安排今夜夢。片帆飛到小籬東。

大廳後堂南窗負暄

萬壑無聲海不波。一窗油紙暮春和。醉眠陡覺氍毹贅。圍坐翻嫌楮棹多。水暖玉池添嗽嚙。花生銀海費  
揩摩。端如擁褐茅簷下。祗欠烏烏擊缶歌。

晚步北園

刮地晴飈退海痕。出門無扇可障塵。麥黏瘠土何時雪。梅糝疎林昨夜春。天鏡風烟疑夢事。鬢霜時節尙  
官身。裹章束帶朝還暮。慚愧青鞋紫領巾。

春前十日作

臘淺猶賒十日春。官忙長愧百年身。雪摧未動詩無力。愁遣還來酒不神。節物何曾欺老病。書生自慣說悲辛。終朝戲促成何事。今古紛紛一窖塵。

懷歸寄題小艇

日出塵生萬劫忙。可憐虛費隙駒光。若教閒裏工夫到。始覺淡中滋味長。歲晚角巾思芋栗。年來手版愧耕桑。松風蘿月須相信。春水深時上野航。

元日

老來百味絮沾泥。期會關身尚火馳。幾夜鄉心欹枕處。今年腳力上樓時。酒缸幸有乾坤大。丹鼎何憂日月遲。莫道神仙無可學。學仙猶勝簿書癡。

體中不佳偶書

生平人比似維摩。試比尪孱不啻過。舊摘衰髯今雪徧。頻揩病眼轉花多。從來世味聊復爾。此去官身如老何。收拾頽齡加藥餌。尙堪風月對婆娑。

坐嘯齋書懷

老來窮苦事相違。兀坐鈴齋竟日癡。眼目昏緣多押字。胸襟俗爲少吟詩。月侵燈影吏方去。春遍梅梢官未知。直待食新方紱帶。明朝馬騎問陵陂。

致一齋述事

文書烟海困浮沉。不覺盤跚百病侵。隅問客年驚我老。忽聞鶯語歎春深。今朝麥粒黃堪麪。幾日秧田綠似針。除卻一犁春雨足。眼前無物可關心。

曉起信筆

午枕汗如洗。曉櫛氣稍蘇。莎蛩試風露。滿意鳴相呼。倦客感節物。流光不躊躇。秋聲已如許。殘暑何足驅。人言今歲熱。迥與常歲殊。此理恐未然。豈不知頭顱。年年有三伏。日日非故吾。婆娑今尚可。後當彌不如。病骨須一涼。未暇惜居諸。坐來有清思。西風搖井梧。

重九賞心亭登高

憶隨書劍此徘徊。投老雙旌重把杯。綠鬢風前無幾在。黃花雨後不多開。豐年江隴青黃徧。落日淮山紫翠來。飲罷此身猶是客。鄉心卻附晚潮回。

春晚

荒園蕭瑟懶追隨。舞燕啼鶯各自私。窗下日長多得睡。樽前花老不供詩。吾衰久矣雙蓬鬢。歸去來兮一釣絲。想見籬東春漲動。小舟無伴柳絲垂。

重九獨坐玉麟堂

江上西風動所思。又將清賞負東籬。年年客路黃花酒。日日鄉心白鴈詩。籠月秦淮無舊曲。馳烟鍾阜有新移。人生笑口真稀闊。況值官忙閱雨時。

公退書懷

昨者騰章奏發倉。今茲飛檄議驅蝗。四無告者僅一飽。七不堪中仍百忙。皦日自能臨俯仰。浮雲寧解制行藏。求田問舍亦何有。歲晚倦遊思故鄉。

癸卯除夜聊復爾齋偶題

五夜燈花重。東風角韻來。雪慳衣未續。春作句多梅。寂歷羅門亞。溫馨藥鼎煨。老嫌新歲換。病喜舊星回。鬱壘先題板。屠蘇後把杯。書扉無健筆。爆竹有寒灰。錫鑠牙難膠。椒盤眼倦開。陳人仍憊臥。身世兩悠哉。

甲辰人日病中吟六言六首以自嘲

攢眉輒作山字。啾耳惟聞水聲。人應見憐久病。我偏自厭餘生。目慌慌蟻旋磨。頭岑岑鼈負山。筆牀久已均伏。藥鼎何時可閒。政爾榮枯衛濫。剛云人厄天窮。歸咎四衝臨歲。乞將九曜過宮。復吉旣愆七日。泰來惟俟三陽。曆日今頒寅正。占星更候農祥。有日猶嫌開牖。無風不敢下簾。報國丹心何似。夢中抵掌掀髯。



壯歲喜新節物。老來惜舊年華。病後都盧不問。家人時換瓶花。

上元紀吳下節物排諧體三十二韻

斗野豐年屢。吳臺樂事并。酒壚先疊鼓。歲後即旗亭。以迎節意。燈市蚤投瓊。臘月即有燈市。相與呼盧。

采勝者。價喜膏油賤。祥占雨雪晴。貧簪仙子洞。坊巷燈多。以連枝竹縛成。菡萏化人城。蓮花燈最多。檣炬疑龍。

得燈。一舟人接竹危檣之表置。橋星訝鵲成。橋燈。小家麗獨踞。犬燈。高開鹿雙撐。鹿燈。屏展輝雲母。琉璃屏。

垂晃水精。琉璃。萬窗花眼密。萬眼燈。工夫妙天下。多至萬眼。砌千隙玉虹明。琉璃毬燈。亦妙天下。映映。蒼葛

丹房桂。燈。葡萄綠蔓縈。葡萄。方縑繙史册。生絹糊方燈。圓魄綴門衡。月燈。擲燭騰空穩。小燈。

時擲空。推毬袞地輕。大袞。映光魚隱見。琉璃壺瓶貯水。養轉影騎縱橫。馬騎。輕薄行歌過。顛狂社舞呈。民間。

鼓樂。大抵以滑稽取笑。不可悉。村田簞笠野。村田。街市管絃清。街市細。里巷分題句。每里門作花燈。官曹

別扁名。官或琉璃額。多以。旱船遙似泛。夾道陸行。為競渡之。水儼近如生。水戲照。鉗赭裝牢戶。獄燈。嘲

啗繪樂棚。山棚多畫一人。堵觀瑤席隘。喝道綺叢爭。禁鑰通三鼓。歸鞭任五更。桑蠶春繭勸。春繭自臘月。

所以為蠶。花蝶夜蛾迎。大白蛾花。亦以迎春物也。悉。鳧子描丹筆。紅畫鴨子。鵝毛剪雪英。剪鵝毛為雪花。寶

糖珍粗粒。糖指。吳中謂之寶。烏膩美飴錫。俗言能去烏膩。撚粉團樂意。糰子。熬稔膈膊聲。炒糯穀。

俗名李婁。北筵簞巫志怪。香火婢輸誠。俗謂正月百草靈。故帚帚卜拖裙驗。敝帚繫裙。箕詩落筆

驚即古紫姑。今微如針屬尾。以針姑卜伺其尾相屬爲兆。名針姑。賤及葦分莖葦莖分合爲卜。名葦姑。末俗難訶止。佳辰且放行。此時紛僕馬。有客靜柴荆。幸甚歸長鋏。居然照短檠。生涯惟病骨。節物尙鄉情。倚撫成排體。咨詢逮里忙。誰修吳地志。聊以助譏評。

曉枕三首

煮湯聽成萬籟。添被知是五更。陸續滿城鐘動。須臾後巷雞鳴。臥聞赤腳鼾息。樂哉栩栩蘧蘧。病夫心口相語。何日佳眠似渠。舒慘常隨天氣。關心窗暗窗明。日晏扶頭未起。喚人先問陰晴。

喜雨

昨遣長鬚借踏車。小池須水引鳴蛙。今朝一雨添新漲。便合翻泥種藕花。

風止

收盡狂飈卷盡雲。一竿晴日曉光新。柳魂花魄都無恙。依舊商量作好春。

重午

熨斗熏籠分夏衣。翁身獨比去年衰。已孤菖淥十分勸。卻要艾黃千壯醫。蜜粽冰糰爲誰好。丹符綵索聊自欺。小兒造物亦難料。藥裏有時生網絲。

積雨作寒五首

壓屋雨雲晝暗。環城霖潦夏寒。西池半沒荷柄。南蕩平沈芡盤。  
已報舟浮登岸。更憐橋踏平池。養成蛙吹無謂。掃盡蚊雷卻奇。  
熨貼重尋毳衲。補苴盡護紙窗。餘生雪鬢禪榻。昨夢雲帆漲江。  
婢喜蚊僵霧帳。兒噴蝸篆風樵。兀坐鼻端正白。忘懷眼底常青。  
山寒禪老不下。泥滑琴僧罕來。且喚園丁閒話。喜聞湖岸未頹。

題請息齋六言十首

洞門晝挂鐵鎖。閣道秋生綠苔。蒼下略同龜伏。瓜中且免蠅來。  
多謝紛紛雲雨。相忘渺渺江湖。坐隅但忌占鵬。屋上何煩譽烏。  
灑灑年年如馬。犬行日日摧車。笑中恐有義甫。泣裏難防叔魚。  
見影蟻猶鈿鈿。聞聲雁尙鴛鴦。問誰毛生名紙。知我角出車輪。  
不惜人扶難拜。非關我醉欲眠。勞君敬枯木耳。恐汝見濕灰焉。  
稅駕今吾將老。結廬此地不喧。恐妨蝴蝶同夢。笑倩顛當守門。  
口邊一任醜去。鼻孔慵將涕收。閑門冷落車轍。空室團欒話頭。

冷暖舊雨今雨。是非一波萬波。壁不禪枯達磨。室中病者維摩。親戚自有情話。來往都無雜言。酒熱竟須相報。文成聊與細論。園丁以時白事。山客終日相陪。竹比平安報到。花依次第折來。

富順楊商卿使君。曷與余相別于瀘之合江。渺然再會之期。後九年。乃訪余吳門。則喜可知也。今復分袂。更增惘然。病中強書數語送之。

合江縣下初語離。共說再會知何時。壽櫟堂前哄一笑。人生聚散真難料。青燈話舊語未終。船頭疊鼓帆爭風。草草相逢復相送。直恐送迎皆夢中。昨聞親上安邊奏。玉陛從容移禁漏。天香懷袖左魚符。歸作雙親千歲壽。我今老病塘蒲衰。君歸報政還復來。萬里倘容明月共。更期後夢如今夢。

初秋閒記園池草木五首

莪葵爛紫終陋。薺蔔薦黃亦香。醫俗膾延竹色。療愁催折萱房。牛牽碧蔓自繞。鷄聳朱冠欲爭。菱葩可範伯雅。蓼節偏宜麴生。旱地蓮花嬌小。水盆梔子幽芳。薇帳半年春豔。桂叢四季秋香。醉憐金盞齊側。臥看玉簪對橫。腥水留灌末莉。結香旋薰素馨。玉菌化生稚子。碧枝視現聲聞。馬齒任藏汞冷。鴻頭自勝硫溫。

巖桂三首

風簾疎爽月徘徊。悵望家人把酒杯。病著幽窗知幾日。瓶花兩見木犀開。  
越城芳徑手親栽。紅淺黃深次第開。不用小山招隱賦。身如強健日千迴。

一枝蕭索倚宣華。東苑香風屬內家。丹碧屠蘇銀燭照。平生奇絕象山花。

少城圃中。惟有一株。四明月桂。特奇。

藻侄比課五言詩。已有意趣。老懷甚喜。因吟病中十二首示之。可率昆季廣和。勝終日飽閒也。

舊歲連新歲。涼牀又暖牀。山川屏裏畫。時刻篆中香。畏壘安吾土。支離飽太倉。若教身更健。鶴背入維揚。  
認鹿紛紜夢。亡羊散亂心。眇昏遮眼讀。愁苦撚髭吟。幸覺行迷遠。其如臥病深。通身都放下。何用覓砭針。  
日暖衣猶襲。宵長被有稜。朝晡三椀飯。昏曉一缸燈。伴坐跽如几。扶行瘦比藤。生緣堪入畫。寂寞憩松僧。  
繩椅扶枵骨。蒲團閣悴膚。事疑償業債。形類窘囚拘。空劫真常體。浮生幻化軀。箇中元不二。無語對文殊。  
軟熟羞盤饌。芳辛實枕幃。候晴先晒席。占濕預烘衣。易粟鷄皮皺。難培鶴骨肥。頭顱雖若此。虛白自生輝。  
數息增晨清。伸眉愜晚晴。隙塵浮日影。窗穴嘯風聲。捫蝨天機動。驅蚊我相生。偶然成一笑。栩栩暫身輕。  
貴仕龜鑽筴。閑居馬脫鞵。冠塵昏舊製。帶眼剩新圍。堆案書郵少。登門刺字稀。揜關灰木坐。休示季咸機。  
目眊浮珠珮。聲塵籟玉簫。秋懷潘鬢禿。午夢楚魂銷。注水瓶花醒。吹薪鼎藥潮。南柯何處是。斜日上廊腰。  
靜裏秋先到。閒中晝自長。門闌終泄柳。尸祝漫庚桑。腹已枵經笥。身猶試藥方。強名今日愈。勃率負東牆。

汗漬筇枝赤。苔封屐齒青。有醫延上坐。無客抗分庭。霽月鑽窗看。鳴禽側枕聽。莫嗔猿鶴怨。岫幌兩年扃。  
視絮勞羣從。祇承愧闔家。乳泉供水遞。金液養丹芽。嘉釀厚如酪。旋春香勝花。百端扶老憊。無物報投瓜。  
學業荒呻畢。歡悰隔笑鹽。入秋先複幕。過夏亦疎簾。門客嗔愁思。家人獻吉占。尤憐小兒女。時報鵲鳴簷。

灼艾

血忌詳涓日。尻神謹避方。艾求真伏道。穴按古明堂。謝去羣巫祝。勝如幾藥湯。起來成獨笑。一病攪千忙。

白髭行

四十踰四髭始黃。手持漢節臨大荒。輿疾歸來皮骨在。兩髻尙作青絲光。俯仰行年四十九。萬里南馳復西走。班班頷下點吳霜。猶可芟夷誑賓友。屈指如今又十年。兩年憊臥秋風前。人生血氣能幾許。不待覽鏡知皤然。長安後輩輕前輩。百方染藥千金賣。煩攔包裹夜不眠。無奈露頭出光怪。病翁高臥門長扃。垂雪毵毵骨更青。兒童不作居士喚。喚作堂中老壽星。

甲辰除夜吟

一年三百六十日。日日三椽臥衰疾。傍人挪揄還嘆咨。問我如何度四時。我言平生老行李。蓐食趁程中夜起。當時想像閉門閑。弱水茗茗三萬里。如今因病得疎慵。腳底關山如夢中。重簾複幕白晝靜。戶外車馬從西東。若問四時何以度。念定更無新與故。瓶花開落紀春冬。窗紙昏明認朝暮。行年六十是明朝。不

暇白憐聊自嘲。婪尾三杯餉一樸。從今身健齒牙牢。

元夕二首

藥爐湯鼎煮孤燈。禪版蒲團老病僧。兒女強修元夕供。玉蛾先避雪鬚髯。  
落梅穠李趁時新。枯木崖邊一任春。尙愛鄉音醒病耳。隔牆時有賣餉人。

請息齋書事三首

覆雨翻雲轉手成。紛紛輕薄可憐生。天無寒暑無時令。人不炎涼不世情。栩栩算來俱蝶夢。啾啾能有幾  
雞鳴。冰山側畔紅塵漲。不隔瑤臺月露清。

刻木牽絲罷戲場。祭終雨後兩相忘。門雖有雀尙廷尉。食已無魚休孟嘗。蝨裏趨時真是賊。虎中宣力任  
爲俚。籬東舍北誰情話。雞語鷗盟意卻長。  
聚蚋醯邊鬧似雷。乞兒爭背向寒灰。長平失勢見何晚。栗里息交歸去來。休問江湖魚有沫。但斬雲水鶴  
無媒。巖扉岫幌牢扃鑰。不是漁樵不與開。

送文季高倅興元

素衣京洛悵成緇。青鬢吳江喜未絲。燭暗不眠談舊事。酒闌作惡問行期。留書情話須親戚。風雨殘春更  
別離。屈指歸來重一笑。掃除門巷著旌麾。

家人子輩往石湖檢校暮歸。

南浦回春棹。東城揜暮扉。兒修雞柵了。女挈菜籃歸。風力雖欺酒。花香尙染衣。衰翁牢守舍。腸斷釣魚磯。

次韻龔養正中秋無月三首。

詞客幕天清露下。老翁臥病破窗中。高吟大醉輸公等。不見嫦娥與我同。去年怪雨無端甚。今歲癡雲亦復然。減卻新詩酸卻酒。乘除添得一更眠。丙夜清光些子見。兒童驚喜強雄夸。闌珊高興應無幾。恰似春殘看落花。

殊不惡齋春晚閒吟五絕

西風入簾圖畫響。斜照穿隙網絲明。簷間雙雀有時鬪。壁下一蛩終日鳴。旁若無人鼠飲硯。塵之不去蠅登盤。天涼睡起枕痕暖。日晚慵來香字寒。就食遷居蟻墳壤。隨風作舍蛛裊絲。百年何處用三窟。萬事信緣安一枝。市聲洶洶鼓摧陣。日影駸駸潮漲痕。消磨意氣默數息。把玩光陰牢閉門。中秋昨已等閑過。重九今還如夢來。霜髻數莖羞墮幘。黃花三度笑空杯。

丙午新正書懷十首

不用桃符貼畫雞。身心安處是天倪。行年六十舊曆日。汗腳尺三新杖藜。祝我賸周花甲子。謝人深勸玉



東西春風若借筋骸便。先渡南村學灌畦。

瘦骨難勝過節衣。日高催起趁農炊。病憐柳栗隨身慣。老覺屠蘇到手遲。一飽但靳庚癸諾。百年甘守甲辰雌。莫言此外都無事。柳眼梅梢正索詩。

煮茗燒香了歲時。靜中光景笑中嬉。身閒一日似兩日。春淺南枝如北枝。朝鏡略無功業到。午窗惟有睡魔知。年來併束牀頭易。一任平章濟叔癡。

窮巷閒門本闐然。強將爆竹聒階前。人情舊雨非今雨。老境增年是減年。口不兩匙休足穀。生能幾履莫言錢。掃除一室空諸有。龐老家。人總解禪。吳諺云。一口不能著兩匙。

厲風翻海雪漫天。百計逃寒息萬緣。穩作披爐如臥炕。厚裁綿旋勝披氈。尊前見在嘗騰醉。飯後無何爛熯眠。斟酌出門高興盡。從教閒卻剡溪船。披爐綿旋。皆新得法。

俗情如絮已泥沾。因病偷閒意屬厭。鵬鷄相安無可笑。熊魚自古不容兼。灰埋楮楮多時暖。雪壓蔓菁滿意甜。溫飽閉門吾事辦。異時書判指如籤。

炭熟香濃石鼎煨。人言小閣是春臺。蕉心翠展一冬在。梅蕊粉融連夜開。肅肅九冰妨發育。溫溫三火護恢台。養生此外無遺說。梨棗元須趁暖栽。水芭蕉。經冬不瘁。

經過掃軌但幽栖。巢穩林深寄一枝。栗里歸來窗下臥。香山老去病中詩。東風馬耳塵勞後。半夜雞聲睡

熟時。俛仰平生盡陳迹。恰如膈膊幾枰棋。

窗明窗暗篆烟緜。珍重晨光與夕暉。東院齋鐘披被坐。南城嚴鼓岸巾歸。幾人霜滑騎朝馬。何處燈殘織

曉機。懶裏若承三昧力。始知忙裏事俱非。敘早眠晏起。

殊方節物記吾曾。海北天西一瘦藤。烏攬雞檳嘗老酒。酥花芋葉試新橙。瘴雲度嶺濃如墨。邊雲窺窗冷

欲冰。閒展兩鄉圖畫看。臥遊何必減深燈。此篇記桂林成都元日勝事。檳榔皆做盤中物。老酒十數年不壞者。

丙午新年六十一歲。俗謂之元命。作詩自貶。

歲復當生次。星臨本命辰。四人同丙午。初度再庚寅。長狄名猶記。沙隨會若新。童心仍竹馬。暮境忽蒲輪。

鏡裏全成老。尊前略似春。三年歸汶上。千日臥漳濱。剛長交新泰。陰消脫舊屯。網蛛縈藥裏。寶犬吠醫人。

窗下烏皮几。田間紫領巾。鯢淵方止水。鯤海任揚塵。波匿觀河見。維摩示病身。顰端還一笑。默識幼中真。

文潞公詩云。四人二百四十歲。況是同生丙午年。僕用此事也。

春來風雨無一日好晴。因賦瓶花二絕。

滿插瓶花罷出遊。莫將攀折爲花愁。不知燭照香薰看。何似風吹雨打休。

酒冷花寒無好懷。柴荆終日爲誰開。三分春色三分雨。正似東風本不來。

春晚卽事。留游子明正仲顯。

繡地紅千點。平橋綠一篙。棟花來石首。穀雨熟櫻桃。笑我生塵甑。慙君有意袍。故人能少駐。門徑久蓬蒿。

梅雨五絕

梅雨暫收斜照明。去年無此一日晴。忽思城東黃篋舫。臥聽打鼓踏車聲。  
己酉甲申雷雨驚。乘除卻賀芒種晴。插秧先插早秈稻。小忍數旬蒸米成。  
甲申乙酉雨則大水。風聲不多雨聲多。洶洶曉衾聞浪波。恰似秋眠隱靜寺。玉霄泉從牀下過。  
千山雲深甲子雨。十日地溼東南風。靜裏壺天人不到。火輪飛出默存中。  
雨霽雲閒池面光。三年魚苗如許長。小荷拳拳可包鮓。晚日照盤風露香。

次韻李永見訪二首

混俗休超俗。居家似出家。有爲皆影事。無念卽生涯。莫覓安心法。翻成捏目花。作糜須穀粟。千劫漫炊砂。  
有意能停棹。多情易憶家。清詩穿月脇。遠夢繞天涯。雨蝶衣濡粉。秋蚊喙吐花。新涼宜小駐。談笑有丹砂。

自詠瘦悴

皮下無多肉。老來瘦不禁。骨稜春焙鑄。筋蹙海山沈。蟣蝨從何有。蚊蠅枉見侵。惟餘老筇杖。相伴兩虛心。

四時田園雜興六十首并引

淳熙丙午。沉疴少紓。復至石湖舊隱。野外卽事。輒書一絕。終歲得六十首。號四時田園雜興。

柳花深巷午雞聲。桑葉尖新綠未成。坐睡覺來無一事。滿窗晴日看蠶生。  
土膏欲動雨頻催。萬草千花一餉開。舍後荒畦猶綠秀。隣家鞭笞過牆來。  
高田二麥接山青。傍水低田綠未耕。桃杏滿村春似錦。踏歌椎鼓過清明。  
老盆新熟杜茅柴。攜向田頭祭社來。巫媪莫嫌滋味薄。旗亭官酒更多灰。  
社下燒錢鼓似雷。日斜扶得醉翁回。青枝滿地花狼籍。知是兒孫鬪草來。  
騎吹東西里巷喧。行春車馬鬧如煙。繫牛莫礙門前路。移繫門西碌碡邊。  
寒食花枝插滿頭。舊裙青袂幾扁舟。一年一度游山寺。不上靈巖卽虎丘。  
郭裏人家拜掃回。新開醪酒薦青梅。日長路好城門近。借我茅亭暖一杯。  
步履尋春有好懷。雨餘蹄道水如杯。隨人黃犬攬前去。走到溪橋忽自迴。  
種園得果厪償勞。不奈兒童鳥雀搔。已插棘針樊笱徑。更鋪漁網蓋櫻桃。  
吉日初開種稻包。南山雷動雨連宵。今年不欠秧田水。新漲看看拍小橋。  
桑下春蔬綠滿畦。苾心青嫩芥臺肥。溪頭洗擇店頭賣。日暮裏鹽沽酒歸。

右春日田園雜興十二絕

紫青葍葉卷荷香。玉雪芹芽拔薤長。自擷溪毛充晚供。短篷風雨宿橫塘。

湖蓮舊蕩藕新翻。小小荷錢沒漲痕。斟酌梅天風浪緊。更從水外種蘆根。  
蛺蝶雙雙入菜花。日長無客到田家。雞飛過籬犬吠竇。知有行商來賣茶。  
滿裙水滿菜蘋洲。上已微寒嬾出游。薄暮蛙聲連曉鬧。今年田稻十分秋。上已蛙鳴無水。  
新綠園林曉氣涼。晨炊早出看移秧。百花飄盡桑麻小。夾路風來阿魏香。  
三旬蠶忌閉門中。鄰曲都無步往蹤。猶是曉晴風露下。采桑時節暫相逢。  
汙萊一稜水周圍。歲歲蝸廬沒半扉。不看茭青難護岸。小舟撐取葑田歸。  
茅針香軟漸包茸。蓬櫺甘酸半染紅。采采歸來兒女笑。杖頭高掛小筠籠。  
穀雨如絲復似塵。煮瓶浮蠟正嘗新。牡丹破萼櫻桃熟。未許飛花減卻春。  
雨後山家起較遲。天窗新色半熹微。老翁欹枕聽鶯囀。童子開門放燕飛。  
海雨江風浪作堆。時新魚菜逐春回。荻芽抽筍河魴上。棟子開花石首來。  
烏鳥投林過客稀。前山煙暝到柴扉。小童一棹舟如葉。獨自編欄鴨陣歸。

右晚春田園雜興十二絕

梅子金黃杏子肥。麥花雪白菜花稀。日長籬落無人過。惟有蜻蜓蛺蝶飛。  
五月吳江麥秀寒。移秧披絮尚衣單。稻根科斗行如塊。田水今年一尺寬。

二麥俱收斗百錢。田家喚作小豐年。餅爐飯甑無飢色。接到西風熟稻天。  
百沸縲湯雪湧波。縲車嘈噴雨鳴蓑。桑姑盆手交相賀。綿繭無多線繭多。  
小婦連宵上絹機。大耆催稅急于飛。今年幸甚蠶桑熟。留得黃絲織夏衣。  
下田戽水出江流。高壟翻江逆上溝。地勢不齊人力盡。丁男長在踏車頭。  
晝出耘田夜績麻。村莊兒女各當家。兒童未解供耕織。也傍桑陰學種瓜。  
槐葉初勻日氣涼。葱葱鼠耳翠成雙。三公只得三株看。閒客清陰滿北窗。  
黃塵行客汗如漿。少住儂家嗽井香。借與門前盤石坐。柳陰亭午正風涼。  
千頃芙蕖放棹嬉。花深迷路晚忘歸。家人暗識船行處。時有驚忙小鴨飛。  
采菱辛苦廢犁鉏。血指流丹鬼質枯。無力買田聊種水。近來湖面亦收租。  
蝸蟻千萬沸斜陽。蛙黽無邊聒夜長。不把癡聾相對治。夢魂爭得到藜牀。

右夏日田園雜興十二絕

杞菊垂珠滴露紅。雨蛩相應語莎叢。蟲絲罥盡黃葵葉。寂歷高花側晚風。  
朱門乞巧沸歡聲。田舍黃昏靜掩扃。男解牽牛女能織。不須邀福渡河星。  
橘蠹如蠶入化機。枝間垂繭似蓑衣。忽然蛻作多花蝶。翅粉纔乾便學飛。

靜看簷蛛結網低。無端妨礙小蟲飛。蜻蜓倒挂蜂兒窘。催喚山童爲解圍。  
垂成穡事苦艱難。忌雨嫌風更怯寒。牋訴天公休掠剩。半償私債半輸官。  
秋來只怕雨垂垂。甲子無雲萬事宜。穫稻畢工隨曬穀。直須晴到入倉時。  
中秋晴景屬潛夫。棹入空明看太湖。身外水天銀一色。城中有此月明無。  
新築場泥鏡面平。家家打稻趁霜晴。笑歌聲裏輕雷動。一夜連枷響到明。  
租船滿載候開倉。粒粒如珠白似霜。不惜兩鍾輸一斛。尙贏糠覈飽兒郎。  
菽粟瓶罌貯滿家。天教將醉作生涯。不知新滴堪未斲。今歲重陽有菊花。  
細擣棖螯有鱸魚。西風吹上四腮鱸。雪鬆酥膩千絲縷。除卻松江到處無。  
新霜徹曉報秋深。染盡青林作纈林。惟有橘園風景異。碧叢叢裏萬黃金。

右秋日田園雜興十二絕

斜日低山片月高。睡餘行藥繞江郊。霜風掃盡千林葉。閒倚筇枝數鶴巢。  
炙背簷前日似烘。暖醺醺後困蒙蒙。過門走馬何官職。側帽籠鞭戰北風。  
屋上添高一把茅。密泥房壁似僧寮。從教屋外陰風吼。臥聽籬頭響玉簫。  
松節燃膏當燭籠。凝煙如墨暗房櫳。曉來拭淨南牕紙。便覺斜陽一倍紅。

乾高寅缺築牛宮。卮酒豚蹄酹土公。牯犍無瘟犢兒長。明年添種越城東。  
放船開看雪山晴。風定奇寒晚更凝。坐聽一篙珠玉碎。不知湖面已成冰。  
撥雪挑來踏地菘。味如蜜藕更肥醲。朱門肉食無風味。只作尋常菜把供。  
榾柮無煙雪夜長。地爐煨酒暖如湯。莫嗔老婦無盤飧。笑指灰中芋栗香。  
煮酒春前臘後蒸。一年長饗甕頭清。塵居何似山居樂。秫米新來禁入城。  
黃紙蠲租白紙催。皂衣旁午下鄉來。長官頭腦冬烘甚。乞汝青銅買酒廻。  
探梅公子款柴門。枝北枝南總未春。忽見小桃紅似錦。卻疑儂似武陵人。  
村巷冬年見俗情。鄰翁講禮拜柴荆。長衫布縷如霜雪。云是家機自織成。

右冬日田園雜興十二絕

自晨至午起居飲食皆以牆外人物之聲爲節。戲書四絕。

巷南敲板報殘更。街北彈絲行誦經。已被兩人驚夢斷。誰家風鶴鬪鳴鈴。  
菜市喧時窗透明。餅師叫後藥煎成。閒居日出都無事。惟有開門掃地聲。  
北砦教回搗鼓遠。東禪飯熟打鐘頻。小童三喚先生起。日滿東窗暖似春。  
起傍東窗手把書。華顛種種不經梳。朝餐欲倒須巾裹。已有重來晚市魚。



閩門初泛二十四韻

新修小舫。因病禳祓。屯滯遂至北城。迤邐到楓橋。一路而還。

好在馳煙路。平生載酒行。摧藏身久病。契闊歲頻更。昨夜燈花曉。今朝稻把晴。出門新夢境。觸目舊詩情。水遠推篷眩。天寬倚棹驚。轉彎添繚繞。罨岸併篙撐。舫後裝兒女。艫前酌弟兄。醅香新麴嫩。茗味小春輕。紅皺分霜果。黃蕙撚夕英。纈林疎露屋。朱閣靜臨城。桃塢論今昔。楓橋管送迎。山腰樵擔動。木末酒旗明。竟日窳煙直。中流塔影橫。數帆殘照滿。一笛暮江平。曬網楓邊桁。牽罾柳際棚。岫雲縈石住。田水穴堤鳴。過渡牛歸速。穿籬犬吠獍。魚寒猶作陣。雁遠更聞聲。急櫂潮痕出。疎鐘暝色生。鄰翁欣問訊。逋客愧寒盟。一昨成歸臥。于今負耦耕。生涯都塌颯。心曲漫崢嶸。猿鶴休多怨。菰蓴尙可羹。藥囊吾厭苦。扶憊且班荆。

重陽後菊花二首

寂寞東籬溼露華。依前金鑿照泥沙。世情兒女無高韻。只看重陽一日花。過了登高菊尙新。酒徒詩客斷知聞。恰如退士垂車後。勢利交親不到門。

丁未春日瓶中梅殊未開二首

煖閣無人到。寒枝爲我橫。情鍾吹鍾破。靜極覺香生。老去魂休斷。春來眼且明。逃禪時索笑。百匝傍窗行。夜雪臘前凍。朝陽春後蘇。人憐疎蘂瘦。花笑病翁臞。露白能多少。尋春似有無。詩催全不力。煮水換銅壺。

題夫差廟

縱敵稽山禍已胎。垂涎上國更荒哉。不知養虎自遺患。只道求魚無後災。夢見梧桐生後圃。眼看麋鹿上高臺。千齡只有忠臣恨。化作濤江雪浪堆。

翻韞菴夜坐聞雨

閉門冷落靜無譁。小閣簾幃密自遮。日晚課程丹竈火。夜深光景佛燈花。人生寧有病連歲。身世略如僧在家。步履尋春非老伴。任教風雨喚雷車。

睡起

悠悠與世共兒嬉。兀兀從人笑我癡。閒裏事忙晴曬藥。靜中機動夜爭棋。心情書卷無佳句。時節梅花有好枝。熟睡覺來何所欠。氈根香軟飯流匙。

賞海棠二絕

芳春隨分到貧家。兒女多情惜歲華。聊爲海棠修故事。去年燈燭去年花。憶向宣華夜倚欄。花光妍暖月光寒。如今塌颯嫌風露。且只銅瓶滿插看。

午窗遣興家人謀過石湖

雲日初收破柱雷。小窗坐穩興悠哉。熏爐花氣朝醒解。茶鼎松風午夢迴。謝客門闌風動竹。惜春時節雨

肥梅。畫船破浪亦一快。聞道湖光如撥醅。

將至石湖道中書事

水綠鷗邊漲。天青雁外晴。柳堤隨草遠。麥壟帶桑平。白道吳新郭。蒼煙越故城。稍聞鷄犬鬧。僮僕想來迎。

三月十六日石湖書事三首

春事日以闌。暑陰正清美。拖筇入林下。秀綠照衣袂。盧橘梅子黃。櫻桃桑椹紫。荷依浪花顫。筍破苔色起。風日收宿陰。物色有新意。鄰曲知我歸。爭來問何似。病腦今有無。加飯日能幾。掀髯謝父老。衰雪已如此。種木二十年。手開南野荒。苒苒新歲月。依依舊林塘。汗萊擅下溼。芩蔚驕衆芳。菱母尙能瘦。竹孫如許長。憶初學圃時。刀笠冒風霜。今茲百不堪。裹帽人扶將。龍鍾數能來。猶勝兩相忘。

湖光明可鑒。山色淨如沐。閒心愜舊觀。愁眼快奇矚。依然北窗下。凝塵滿香麓。訪我烏皮几。拂我青氎褥。荒哉賦遠游。幸甚遂初服。老紅餞餘春。衆綠自幽馥。好風吹晚晴。斜照入疎竹。兀坐胎息勻。不覺清夢熟。

送遂寧何道士自潭湘歸蜀

書劍飄然席未溫。火雲撲地暑煙昏。山黃水濁湖南路。竹月荷風憶范村。

再遊天平。有懷舊事。且得卓菴之處。呈壽老。

訪舊光陰二十年。殘僧相對兩依然。木蘭已老無花發。石竹依前有麝眠。萬戶直須龜手藥。一龜何用買。

山錢從今半座須分我。共說昏昏一覺禪。

晚登木瀆小樓

萬象當樓繡繡張。欄干一士立蒼茫。雲堆不動山深碧。星出無多月淡黃。宿鳥盡時猶數點。歸鴻驚處更斜行。松陵政有鱸魚上。安得長竿坐釣航。

題米元暉吳興山水橫卷

道場山麓接何山。影落苕溪浸碧瀾。只欠荷花三十里。檣頭船上把漁竿。

素羹

氈芋凝酥敵少城。土諸割玉勝南京。合和二物歸藜糝。新法儂家骨董羹。

除夜地爐書事

節物閒門裏。人情老境中。雁聲凌急雨。燈影戰斜風。糟醖新醅白。紫錐軟火紅。家人愜夜話。我已困蒙茸。  
浮醅謂之撇醖

次韻虞子建見哈贖帶作醮

齋詞難著野衣冠。旋贖金章始見閒。臺架塵侵毬路暗。花書墨漬笏頭斑。當年驛騎傳呼賜。此日村童拂拭還。若比前廳荒驛舍。見存猶可一開顏。

兒女傳觀省見稀。病身聊復借光輝。莫嫌憔悴沈腰瘦。且喜間關秦壁歸。不是典來還酒債。亦非將去換蓑衣。塵魚甑釜時相阨。微汝誰能爲解圍。

顏橋道中

村村籬落總新修。處處田疇盡有秋。一段農家好風景。稻堆高出屋山頭。

書事三絕

爨婢請淘酒米園。丁催算花錢。如許日生公事。誰云窮巷蕭然。日日處方候脈。時時推筮禳災。門外誰無車轍。醫生卜叟猶來。簡子約同湖棹。周郎許過田廬。碧雲日暮空合。多病故人遂疎。

親鄰招集強往使歸

樂天漸老欲謀歡。大似蒸砂不作團。已覺笙歌無暖熱。仍嫌風月太清寒。氣衰況復三而竭。心賞猶于四者難。卻恐人嫌情太薄。聊將花作霧中看。

雪意方濃復作雨

擬看飛花陣。翻成建水聲。雨吾寧不識。雪汝幾時成。三白從今卜。千倉待此盈。黃雲如有意。青女莫無情。

春朝早起

莫笑眠常早。還憐起不遲。穠香溫夜氣。小雨溼春姿。瘦比中年甚。寒惟病骨知。羨渠兒女健。繞屋探南枝。

詠懷自嘲

簷溜春猶凍。門扉晚未開。退閑驚客至。衰懶怕書來。日日教澆竹。朝朝遣探梅。園丁應竊笑。猶自說心灰。

早衰

早衰頭腦已冬烘。信拙心情似苦空。僚舊姓名多健忘。家人長短總佯聾。一窗暖日棋聲裏。四壁寒燈藥氣中。晚景只消如此過。不堪拈出教兒童。

習閒

習閒成懶懶成癡。六用都藏縮似龜。雪已許多猶不飲。梅今如此尙無詩。閒看貓暖眠氈褥。靜聽狗寒叫竹籬。寂寞無人同此意。時時惟有睡魔知。

陰寒終日兀坐

東風微解綴簷冰。仍喜朝來井水清。臘淺得春全未暖。雪慳和雨最難晴。小窗日暖猶棋局。窮巷更深尙履聲。莫把摧頽嫌暮景。且將閒散替勞生。

親戚小集

避溼違寒不出門。一冬未省正冠巾。月從雪後皆奇夜。天向梅邊有別春。秉燭登臨空話舊。擁爐情味莫

懷新榮華勢利輸人慣。贏得尊前現在身。

睡覺

尋思斷夢半瞢騰。漸見天窗紙瓦明。宿鳥噪羣穿竹去。縣前猶自打殘更。

臘月村田樂府十首并引

余歸石湖。往來田家。得歲暮十事。採其語各賦一詩。以識土風。號村田樂府。其一冬春行。臘日舂米。爲一歲計。多聚杵臼。盡臘中畢事。藏之士瓦倉中。經年不壞。謂之冬舂米。其二燈市行。風俗尤競。上元一月前已賣燈。謂之燈市。價貴者數人聚博。勝則得之。喧盛不減。燈市其三祭竈詞。臘月二十四夜。祀竈。其說謂竈神異日朝天。白一歲事。故前期禱之。其四口數粥行。二十五日。煮赤豆作糜。暮夜闔家同饗。云能解瘟氣。雖遠出未歸者。亦留貯。口分至襁褓小兒。及僮僕皆預。故名口數粥。豆粥本正月望日祭門故事。流傳爲此。其五爆竹行。此它郡所同。而吳中特盛。惡鬼蓋畏此聲。古以歲朝。而吳以二十五夜。其六燒火盆行。爆竹之夕。人家各又于門首燃薪滿盆。無貧富皆爾。謂之相暖熱。其七照田蠶詞。與燒火盆同日。村落則以禿帚若麻蘘竹枝。輩燃火炬。縛長竿之杪。以照田。爛然徧野。以祈絲穀。其八分歲詞。除夜祭其先竣事。長幼聚飲祝頌。而散謂之分歲。其九賣癡獸詞。分歲罷。小兒繞街呼叫云。賣汝癡。賣汝獸。世傳吳人多獸。故兒輩諱之。欲賈其餘。益可笑。其十打灰堆詞。除夜將曉。雞且鳴。婢獲持杖。擊

糞壤致詞。以祈利市。謂之打灰堆。此本彭蠡清洪君廟中。打如願故事。惟吳下至今不廢云。

冬春行

臘中儲蓄百事利。第一先春年計米。羣呼步碓滿門庭。運杵成風雷動地。篩勻箕健無糶糠。百斛只費三日忙。齊頭圓潔箭子長。隔籬輝日雪生光。土倉瓦甕分蓋藏。不蠹不腐常新香。去年薄收飯不足。今年頓頓炊白玉。春耕有種夏有糧。接到明年秋刈熟。鄰叟來觀還歎嗟。貧人一飯不可賒。官租私債紛如麻。有米冬春能幾家。

燈市行

吳臺今古繁華地。偏愛元宵影燈戲。春前臘後天好晴。已向街頭作燈市。疊玉千絲類鬼工。剪羅萬眼人力窮。兩品爭先最先出。不待三五迎東風。兒童種麥荷鋤倦。偷閒也向城中看。酒壚博塞雜歌呼。夜夜長如正月半。災傷不及什之三。歲寒民氣如春酣。儂家亦幸荒年少。始覺城中燈市好。

祭竈詞

古傳臘月二十四。竈君朝天欲言事。雲車風馬少留連。家有杯盤豐典祀。猪首爛熟雙魚鮮。豆砂甘鬆粉餅圓。男兒酌獻女兒避。酹酒燒錢竈君喜。婢子鬪爭君莫聞。猫狗觸穢君莫嗔。送君醉飽歸天門。杓長杓短勿復云。乞取利市歸來分。



口數粥行

家家臘月二十五。浙米如珠和豆煮。大杓撩鐺分口數。疫鬼聞香走無處。鏤薑屑桂澆蔗糖。滑甘無比勝黃梁。全家團欒罷晚飯。在遠行人亦留分。襁中孩子強教嘗。餘波溥霑獲與臧。新元葉氣調玉燭。天行已過來萬福。物無疵厲年穀熟。長向臘殘分豆粥。

爆竹行

歲朝爆竹傳自昔。吳儂政用前五日。食殘豆粥掃罷塵。截筒五尺煨以薪。節間汗流火力透。健僕取將仍疾走。兒童卻立避其鋒。當堦擊地雷霆吼。一聲兩聲百鬼驚。三聲四聲鬼巢傾。十聲連百神道寧。八方上下皆和平。卻拾焦頭疊牀底。猶有餘威可驅厲。屏除藥物添酒杯。盡日嬉游夜濃睡。

燒火盆行

春前五日初更後。排門然火如晴晝。大家薪乾勝豆蕪。小家帶葉燒生柴。青煙滿城天半白。棲鳥驚飛啼格磔。兒孫圍坐鷄犬忙。鄰曲歡笑遙相望。黃宮氣應纔兩月。歲陰猶嬌風慄冽。將迎陽令作好春。政要火盆生暖熱。

照田蠶行

鄉村臘月二十五。長竿然炬照南畝。近似雲開森列星。遠如風起飄流螢。今春雨雹繭絲少。秋日雷鳴稻

堆小。儂家今夜火最明。的知新歲田蠶好。夜闌風焰西復東。此占最吉餘難同。不惟桑賤穀芄芄。仍更苧麻無節菜無蟲。

分歲詞

質明奉祠今古同。吳儂用昏蓋土風。禮成廢徹夜未艾。飲福之餘卽分歲。地爐火軟蒼朮香。飭盤果餌如蜂房。就中脆錫專節物。四坐齒頰鏘冰霜。小兒但喜新年至。頭角長成添意氣。老翁把杯心茫然。增年及爾減吾年。荆釵勸酒仍祝願。願翁尊前且強健。君看今歲舊交親。大有人無此杯分。老翁飲罷笑撚鬚。明朝重來醉屠蘇。

賣癡獸詞

除夕更闌人不寐。厭禳滯鈍迎新歲。小兒呼叫走長街。云有癡獸召人買。二物於人誰獨無。就中吳儂乃有餘。巷南巷北賣不得。相逢大笑相揶揄。櫟翁塊坐重簾下。獨要買添令問價。兒云翁買不須錢。奉賒癡獸千百年。

打灰堆詞

除夜將闌曉星爛。糞掃堆頭打如願。杖敲灰起飛撲籬。不嫌灰浣新節衣。老媪當前再三祝。只要我家長富足。輕舟出商重船歸。大特引犢雞哺兒。野繭可繅麥兩岐。短衲換卻長衫衣。當年婢子挽不住。有耳猶

能聞我語。但如我願不汝呼。一任汝歸彭蠡湖。

讀白傅洛中老病後詩戲書

樂天號達道。晚境猶作惡。陶寫賴歌酒。意象頗沈著。謂言老將至。不飲何時樂。未能忘暖熱。要是怕冷落。我老乃多戒。頗似僧律縛。閒心灰不然。壯氣鼓難作。豈惟背聲塵。亦自屏杯酌。日課數行書。生經一囊藥。若使白公見。應譏太蕭索。當否竟何如。我友試商略。

淨慈顯老爲衆行化。且示余所寫真。戲題五絕就作畫贊。

孤雲野鶴本無求。剛被差充粥飯頭。擔負一筵牙齒債。鐘鳴鼓響幾時休。冒雪敲冰乞米迴。齋堂如海鉢單開。衆中若有知恩者。一粒何曾敲破來。千里驅馳出爲人。顏容消瘦老于真。食輪轉後無餘事。莫學諸方轉法輪。何時平地起浮圖。化得冬糧但付廚。推倒禪牀並拄杖。飢來喫飯看西湖。殿中泥佛已丹青。堂上禪師也畫成。笑我形骸枯木樣。無禪無佛太粗生。

喜收知舊書。復畏答書二絕。

故人寥落似晨星。珍重書來問死生。筆意不如當日健。鬢邊應也雪千莖。強裁尺素答相思。兩日眵昏腕力疲。牽率老夫今至此。門前猶說報書遲。

重陽不見菊

冷蕊蕭疎蝶懶飛。商量何日是花時。重陽過後開無害。只恐先生不賦詩。

謝江東漕楊廷秀祕監送江東集並索近詩二首

遠道悠悠日暮雲。愁眉今夕爲君軒。殘燈獨照江東集。短夢相尋白下門。卽事想多梅蘂句。有誰堪共桂花尊。斯文賴有斯人在。會合何時得細論。

秃翁衰雪涕垂頤。髣髴三生懶散師。泱髓淪膚都是病。傾困倒廩更無詩。笑看筆格網絲徧。閒數窗櫺花影移。事業光陰今若此。故人休說舊襟期。

范村雪後

習氣猶餘燼。鍾情未濕灰。忍寒貪看雪。諱老強尋梅。熨貼愁眉展。勾般笑口開。直疑身健在。時有句飛來。塵居久不見山。或勸作小樓。以助登覽。又力不能辦。今年益衰。此興亦闌矣。

結廬占城市。初起卜云吉。謁醫并治庖。二事便衰疾。乘除徐自笑。翻覺此計失。經年不見山。無異處暗室。平生痼煙霞。歲晚成俗物。安得百尺樓。屋上高突兀。列岫擁青來。爽氣助佔畢。嘗試與匠謀。工費蝟毛出。俸餘強弩末。家事空囊澁。經營十年餘。高興竟蕭瑟。人生不如意。十事常六七。身今況遲暮。長算屈短日。縱成此段奇。髮白何由漆。且學商山翁。彎跽蟄霜橘。

新歲書懷

門閭知閑好。窗晴與睡宜。歲華書戶筆。年例探梅詩。看長棋三著。量添飯兩匙。豁除身外事。未是苦衰遲。

閏月四日石湖衆芳爛熳

北垞南岡總是家。兒童隨逐任驢譁。開嘗臘尾蒸來酒。點數春頭接過花。盡把園林蒙錦綉。多添門戶鎖煙霞。杖藜想被東風笑。扶卻衰翁管物華。

檢校石湖新田

今朝南野試開荒。分手耘鋤草棘場。下地若干全種秫。高原無幾謾栽桑。蘆芽碧處重增岸。梅子黃時早濬塘。田里只知溫飽事。從今拌卻半年忙。

連夕大風凌寒梅已零落殆盡三絕

枝南枝北玉初勻。半夜顛風捲作塵。春夢都無三日好。一冬忙煞探梅人。玉雪飄零賤似泥。惜花還記賞花時。賞花不許輕攀折。只許家人戴一枝。花開長恐賞花遲。花落何曾報我知。人自多情春不管。強顏猶作送春詩。

夢覺作

年增氣血減。藥密飲食稀。氣象不堪說。頭顱從可知。忽作少年夢。嬌癡逐兒嬉。覺來一惘然。形骸乃爾衰。

夢中觀河見。只似三歲時。方悟夢良是。卻疑夢爲非。



# 劍南詩鈔

陸游字務觀。越州山陰人。十二能詩文。蔭補登仕郎。鎖廳薦送第一。秦檜孫埴居次。檜不說。明年試禮部。復置游前列。檜顯黜之。繇是爲所嫉。檜死始赴寧德簿。以薦除敕令所刪定官。孝宗初。遷樞密院編脩。編類聖政所檢討官。召見賜進士出身。尋免去。五爲州別駕。西泝夔道。范成大帥蜀。爲參議官。以文字交不拘體法。人譏其放。因自號放翁。後累遷。與祠起知嚴州。再召見。曰。卿筆力回斡。非他人可及。同脩三朝國史實錄。陞寶章閣待制。致仕。封渭南伯。卒年八十五。詩稿最多。以居蜀久不能忘。統署其稿曰劍南。以見志。孝宗嘗問周必大曰。今詩人亦有如唐李白者乎。必大以游對。人因呼爲小太白。劉後村謂近歲詩人。雜博者堆隊仗。空疎者窘材料。出奇者費摻索。縛律者少變化。惟放翁記問足以貫通。力量足以驅使。才思足以發越。氣魄足以陵暴。南渡而下。故當爲一大宗。吾謂豈惟南渡。雖全宋不多得也。宋詩大半。從少陵分支。故山谷云。天下幾人學杜甫。誰得其皮。與其骨。若放翁者。不寧皮骨。蓋得其心矣。所謂愛君憂國之誠。見乎辭者。每飯不忘。故其詩浩瀚。峯嶽自有神合。嗚呼。此其所以爲大宗也與。

寄酬曾學士學宛陵先生體比得書云所寓廣教僧舍有陸子泉每對之輒奉懷

庭中下午鵲門外傳遠書。小印紅屈蟠。兩端黃蠟塗。開緘展矮紙。滑細疑卵膚。首言勞良苦。後問逮妻孥。中間勉以仕。語意極勤渠。字如老瘠竹。墨淡行疎疎。詩如古鼎篆。可愛不可摹。快讀醒人意。垢癢逢爬梳。細讀味益長。炙穀出膏腴。行吟坐臥看。廢食至日晡。想見落筆時。萬象聽指呼。亦知題詩處。綠井石髮麤。公閒計有客。煎茶置風爐。倘公無客時。濯纓亦足娛。井名本季疵。思人理豈無。居然及賤子。媿謝恩意殊。幾時得從公。舊學鋤荒蕪。古文講聲形。誤字辨魯魚。時時酌井泉。露芽奉瓢盂。不知公許否。因風報何如。

新夏感事

百花過盡綠陰成。漠漠爐香睡晚晴。病起兼旬疎把酒。山深四月始聞鶯。近傳下詔通言路。已卜餘年見太平。聖主不忘初政美。小儒唯有涕縱橫。

寄陳魯山陳時調官都下

天下無虞國論深。書生端合老山林。平生力學所得處。政要如今不動心。舊友幾年猶短褐。謫官萬里少來音。願公思此寬羈旅。靜勝炎曦豈易侵。

出縣

恩恩簿領不堪論。出宿聊寬久客魂。稻壠牛行泥活活。埜塘橋壞雨昏昏。槿籬護藥纔通徑。竹筧分泉自遍村。歸計未成留亦好。愁腸不用遶吳門。



東陽道中

風欹烏帽送輕寒。雨點春衫作碎斑。小吏知人當著句。先安筆硯對溪山。

東陽觀醪醕

福州正月把離杯。已見醪醕壓架開。吳地春寒花漸晚。此歸一路摘香來。

送杜起莘殿院出守遂寧

羽檄聯翩晝夜馳。臣憂願不在邊陲。軍容地密寧當議。陛下恩深不忍欺。白簡萬言幾慟哭。青編一傳可前知。平生所學今無負。未歎還鄉兩鬢絲。

聞武均州報已復西京

白髮將軍亦壯哉。西京昨夜捷書來。胡兒敢作千年計。天意寧知一日回。列聖仁恩深雨露。中興赦令疾風雷。懸知寒食朝陵使。驛路梨花處處開。

喜小兒輩到行在

阿綱學書蚓滿幅。阿繪學語鷺囀木。截竹作馬走不休。小車駕羊聲陸續。書窗浣壁誰忍噴。嗚呼也復可憐人。卻思胡馬飲江水。敢道春風無戰塵。傳聞賊棄兩京走。列城爭爲朝廷守。從今父子見太平。花前飲水勿飲酒。

送七兄赴揚州帥幕

初報邊烽照石頭。旋聞胡馬集瓜州。諸公誰聽芻蕘策。吾輩空懷吠畝憂。急雪打窗心共碎。危樓望遠涕俱流。豈知今日淮南路。亂絮飛花送客舟。

村居

富貴功名不擬論。且浮舴艋寄煙村。生憎快馬隨鞭影。寧作癡人記劍痕。樵牧相諳欲爭席。比鄰漸熟約論婚。晨春夜績吾家舊。正要遺風付子孫。

盆池

門外江濤湧雪堆。埋盆作沼亦何哉。兒曹不解渠翁意。新脫風波嶮處來。

次韻无咎別後見寄

平日盃行不解辭。長亭況是送君時。幾行零落僧窗字。何限流傳樂府詩。歸思恰如重醞酒。歡情略似欲殘棋。龍蛇飛動無由見。坐媿文園屬思遲。詩來彌月。乃能和會。故云。

望江道中

吾道非邪來曠野。江濤始此去何之。起隨烏鵲初翻後。宿及牛羊欲下時。風力漸添帆力健。艣聲常雜雁聲悲。晚來又入淮南路。紅樹青山合有詩。

去年余佐京口。遇王嘉叟從張魏公督師過焉。魏公道免相。嘉叟亦出守莆陽。近辱書報魏公已葬衡山。感歎不已。因用所遺拄頰亭詩韻奉寄。

河亭挈手共徘徊。萬事寧非有數哉。黃閣相君三黜去。青雲萬事一麾來。中原故老知誰在。南嶽新丘共此哀。火冷夜窗聽急雪。相思時取近書開。

### 自詠示客

衰髮蕭蕭老郡丞。洪州又看上元燈。羞將枉直分尋尺。寧走東西就斗升。吏進飽諳箱紙尾。客來苦勸摸牀稜。歸裝漸理君知否。笑指廬山古澗藤。廬山僧近寄藤杖甚奇。

### 上巳臨川道中

二月六夜春水生。陸子初有臨川行。溪深橋斷不得渡。城近臥聞吹角聲。三月三日天氣新。臨川道中愁殺人。纖纖女手桑葉綠。漠漠客舍桐花春。平生怕路如怕虎。幽居不省遊城府。鶴軀苦瘦坐長饑。龜息無聲惟默數。如今自憐還自笑。斂版低心事年少。儒冠未恨終自誤。刀筆最驚非素料。五更欹枕一悽然。夢裏扁舟水接天。紅蕖綠芰梅山下。白塔朱樓禹廟邊。

### 初夏道中

桑間甚熟麥齊腰。鶯語惺惺野雉驕。日薄人家晒蠶子。雨餘山客買魚苗。豐年隨處俱堪樂。行路終然不

自聊獨喜此身強健在。又搖團扇著絺蕉。

上虞逆旅見舊題歲月感懷

舴艋爲家東復西。今朝破曉下前溪。青山缺處日初上。孤店開時鷺亂啼。倦枕不成千里夢。壞墻閒覓十年題。漆園傲吏猶非達。物我區區豈足齊。

夜聞松聲有感

清晨放船落星石。大風吹颿如箭激。回頭已失廬山雲。卻上吳城觀落日。夜深龍歸擘祠門。入木數寸留爪痕。明朝就視心尙慄。腥風卷地雷霆奔。歸船買酒特自慰。性命平生驚屢戲。固知神怒有定時。波紋蹙作魚鱗細。如今衰病臥林垞。霜覆茆簷月滿庭。松聲驚破三更夢。猶作當時風浪聽。丙戌七月。自京口移官豫章。冒風濤

自星子解舟。半日至吳城山小龍廟。

送芮國器司業

往歲淮邊虜未歸。諸生合疏論危機。人材衰靡方當慮。士氣崢嶸未可非。萬事不如公論久。諸賢莫與衆心違。還朝此段宜先及。豈獨遺經賴發揮。

晚泊

半世無歸似轉蓬。今年作夢到巴東。身遊萬死一生地。路入千峰百嶂中。鄰舫有時來乞火。叢祠無處不

祈風晚潮又泊淮南岸。落日啼鴉戍堞空。

雨中泊趙屯有感

歸燕羈鴻共斷魂。荻花楓葉泊孤村。風吹暗浪重添纜。雨送新寒半掩門。魚市人煙橫慘淡。龍祠簫鼓鬧黃昏。此身且健無餘恨。行路雖難莫更論。

黃州

局促常悲類楚囚。遷流還歎學齊優。江聲不盡英雄恨。天意無私草木秋。萬里羈愁添白髮。一帆寒日過黃州。君看赤壁終陳跡。生子何須似仲謀。

石首縣雨中繫舟戲作短歌

庚寅去吳西適楚。秋晚孤舟泊江渚。荒林月黑虎欲行。古道人稀鬼相語。鬼語亦如人語悲。楚國繁華非昔時。章華臺前小家住。茆屋雨漏秋風吹。悲哉秦人真虎狼。欺侮六國囚侯王。亦知廢興古來有。但恨不見秦先亡。開窗酌汝一盃酒。等爲亡國秦更醜。驪山冢破已千年。至今過者無傷憐。

初寒

船尾寒風不滿旗。江邊叢祠常揜扉。行人畏虎少晨起。舟子捕魚多夜歸。茆葉翻翻帶宿雨。葦花漠漠弄斜暉。傷心到處聞礮杵。九月今年未授衣。

水亭有懷

漁村把酒對丹楓。水驛憑軒送去鴻。道路半年行不到。江山萬里看無窮。故人草詔九天上。老子題詩三峽中。笑謂毛錐可無恨。書生處處與卿同。

將離江陵

暮暮過渡頭。旦旦走隄上。舟人與關吏。見熟識顏狀。癡頑久不去。常恐遭誚讓。昨日倒檣干。今日聯百丈。買薪備雨雪。儲米滿瓶盎。明當遂去此。障袂先側望。卽今孟冬月。波濤幸非壯。潦收出奇石。霧卷見疊嶂。地嶮多崎嶇。峽束少平曠。從來樂山水。臨老愈跌宕。皇天憐其狂。擇地令自放。山花白似雪。江水綠於釀。竹枝本楚些。妙句寄悽愴。何當出清詩。千古續遺唱。

滄灘

百夫正謹助鳴鑼。舟中對面不得語。須臾人散寂無譁。惟聞百丈轉兩車。嘔嘔啞啞車轉急。舟人已在沙際立。霧斂蘆村落照紅。雨餘漁舍炊煙溼。故鄉回首已千山。上峽初經第一灘。少年亦慕宦遊樂。投老方知行路難。

黃牛峽廟

三峽東江流。崖谷互吐納。黃牛不負重。雲表恣蹴蹋。吳船與蜀舸。有請神必答。誰憐馬遭別。百歲創未合。

梅師浪犇走。烹斃陳酒榼。紛然餽神餘。羹齏爭嘔噀。空庭多落葉。日暮聲颯颯。奇文粲可辨。高古篆籀雜。村女賣秋茶。簪花髻鬢匝。襜兒著背上。帖妥若在榻。山寒雪欲下。虎出門早闔。我行忽至此。臨風久嗚咽。

巴東令廨白雲亭

寇公壯歲落巴蠻。得意孤亭縹緲間。常倚曲闌貪看水。不安四壁怕遮山。遺民雖盡猶能說。老令初來亦愛閒。正使官清貧至骨。未妨留客聽潺潺。

瞿唐行

四月欲盡五月來。峽中水漲何雄哉。浪花高飛暑路雪。灘石怒轉晴天雷。千艘萬舸不敢過。篙工梅師心膽破。人人陰拱待勢衰。誰敢輕行犯奇禍。一朝時去不自由。山腹空有沙痕留。君不見陸子歲暮來夔州。瞿唐峽水平如油。

山寺

籃輿送客過江村。小寺無人半掩門。古佛負牆塵漠漠。孤燈照殿雨昏昏。喜投禪榻聊尋夢。嬾爲啼猿更斷魂。要識人間盛衰理。岸沙君看去年痕。峽漲時。水高數十丈。至冬盡落。

寒食

峽雲烘日欲成霞。灑水生紋淺見沙。又向蠻方作寒食。強持卮酒對梨花。身如巢燕年年客。心羨游僧處

處家賴有春風能領略。一生相伴遍天涯。

風雨中望峽口諸山奇甚戲作短歌

白鹽赤甲天下雄。拔地突兀摩蒼穹。凜然猛士撫長劍。空有豪健無雍容。不令氣象少淳澹。常恨天地無全功。今朝忽悟始歎息。妙處元在煙雨中。太陰殺氣橫慘淡。元化變態含空濛。正如奇材遇事見。平日乃與常人同。安得朱樓高百尺。看此疾雨吹橫風。

久病灼艾後獨臥有感

白帝城高暮柝傳。幽窗搔首意蕭然。江邊雲溼初橫雁。牆下桐疎不庇蟬。計出火攻傷老病。臥聞鳶墮歎蠻煙。諸賢好試平戎策。歛退無心競著鞭。

小市

小市門前沙作隄。杏花雖落不霑泥。客心尙壯身先老。江水方東我獨西。顰憩軒窗仍汛掃。遠遊書劍亦提攜。子規應笑飄零慣。故傍茆簷盡意啼。

蟠龍瀑布

遠望紛珠纓。近觀轉雷霆。人言水出奇。意使行人驚。人驚我何得。定非水之情。水亦有何情。因物以賦形。處高勢趨下。豈樂與石爭。退之亦隘人。強言不平鳴。古來賢達士。初亦願躬耕。意氣或感激。邂逅成功名。



馬上

殘年流轉似萍根。馬上傷春易斷魂。烘燠花無經日葢。漲深水過去年痕。迷行每問樵夫路。投宿時敲竹寺門。不信太平元有象。牛羊點點散煙村。

鄰水延福寺早行

化蝶方酣枕。聞雞又著鞭。亂山徐吐日。積水遠生煙。流泊真衰矣。登臨獨惘然。桃花應笑客。無酒到愁邊。酒偶盡。市醕不可飲。

岳池農家

春深農家耕未足。原頭叱叱兩黃犢。泥融無塊水初渾。雨細有痕秧正綠。綠秧分時風日美。時平水有差科起。買花西舍喜成婚。持酒東鄰賀生子。誰言農家不入時。小姑畫得城中眉。一雙素手無人識。空村相喚看繅絲。農家農家樂復樂。不比市朝爭奪惡。宦游所得其幾何。我已三年廢東作。

果州驛

驛前官路堠纍纍。歎息何時送我歸。池館鶯花春漸老。窗扉燈火夜相依。孤鸞怯舞愁窺鏡。老馬貪行強受鞿。到處風塵常撲面。豈惟京洛化人衣。

聞杜鵑戲作

半世羈游厭路岐。憑鞍日日數歸期。勞君樹上叮嚀語。似勸饑人食肉糜。

老君洞有石刻。載唐明皇幸蜀。見老君於此。

丹鳳樓頭語未終。崎嶇蜀道復相逢。太清宮闕俱煨燼。豈亦南來避賊鋒。

簡章德茂

殊方邂逅豈無緣。世事多乖復悵然。造物無情吾輩老。古人不死此心傳。冷雲黯黯朝橫棧。紅葉蕭蕭夜滿船。箇裏約君同著句。不應輸與灞橋邊。

太息宿青山鋪作。

太息重太息。吾行無終極。冰霜迫殘歲。鳥獸號落日。秋砧滿孤村。枯葉擁破驛。白頭鄉萬里。墮此虎豹宅。道邊新食人。膏血染草棘。平生鐵石心。忘家思報國。卽今冒九死。家國兩無益。中原久喪亂。志士淚橫臆。切勿輕書生。上馬能擊賊。淒淒復淒淒。山路窮攀躋。僕病臥草間。馬困聲酸嘶。脫兔截道犇。窮狄上樹啼。崩湍一何哀。下落萬仞谿。昏黑投孤戍。洗我衣上泥。下愚不可遷。大惑終身迷。仕宦十五年。曾不飽糠粃。客路少睡眠。月白聞號雞。欲行且復止。虎來茆葉低。

閩中作

挽住征衣爲濯塵。閬州齋釀絕芳醇。鶯花舊識非生客。山水曾遊是故人。遨樂無時冠巴蜀。語音漸正帶咸秦。平生賸有尋梅債。作意城南看小春。

赴成都泛舟自三泉至益昌謀以明年下三峽

詩酒清狂二十年。又摩病眼看西川。心如老驥常千里。身似春蠶已再眠。暮雪烏奴停醉帽。秋風白帝放歸船。飄零自是關天命。錯被人呼作地仙。

雪晴行益昌道中頗有春意

杜陵雁下歲將殘。疋馬西游雪擁關。顛顛敢忘雙闕路。淹遲遍看兩川山。春回柳眼梅鬚裏。愁在鞭絲帽影間。安得黃金成大藥。爲人千載駐顏顏。

綿州魏成縣驛有羅江東詩云芳草有情皆礙馬好雲無處不遮樓戲用其韻

老夫樂興忽西游。遠跨秦吳萬里秋。尊酒登臨遍山寺。歌辭散落滿江樓。孤城木葉蕭蕭下。古驛灘聲瀟瀟流。未許詩人誇此地。茂林脩竹憶吾州。

晚春書懷

老客天涯心尙孩。惜春直欲挽春回。長繩縱繫斜陽住。右手難移故國來。暑近蚊雷先隱鱗。雨前螿埴正崔嵬。茹芝卻粒終無術。萬事惟須付一盃。

晚登望雲

一出修門又十年。輩流多已珥金蟬。衰如蠹葉秋先覺。愁似鰥魚夜不眠。輦路疎槐迎駕處。苑城殘日泛湖天。君恩未報身今老。徙倚危樓一泫然。

醉中感懷

早歲君王記姓名。只今顛顛客邊城。青衫猶是鷓鴣行。白髮新從劍外生。古戍旌旗秋慘淡。高城刁斗夜分明。壯心未許全消盡。醉聽檀槽出塞聲。

晚雨

蕭瑟度橫塘。霏微映繚牆。壓低塵不動。灑急土生香。聲入楸梧碎。清分枕簟涼。回頭忽陳迹。簷角挂斜陽。

社日

百穀登場酒滿卮。神林簫鼓晚清悲。蟬依疎柳長言處。燕委空巢大去時。幼學已忘那用忌。鄉俗小兒女社日忌習業微聾自樂不須醫。古謂社酒治聾傷心故里雞豚集。父老逢迎正見思。

寒夜遣懷

臨觴本不飲。憂多自成醉。四方行萬里。不見埋憂地。憶昔入京都。寶馬搖香鬃。酣飲青樓夜。歌聲在半空。去日不可挽。華髮忽垂頷。娟娟峨眉月。相對作淒冷。月落照空床。不寐聽寒螿。早知憂隨人。何用去故鄉。

登樓

從來好境遍人間。無奈勞生自欠閒。江近時時吹白雨。樓高面面看青山。歌聲哀怨傳三峽。行色淒涼帶百蠻。嘉陽近流落愛君心未已。夢魂猶綴紫宸班。

西園

半掩朱門薜徑斜。翠屏繡谷忽谿斜。高高下下天成景。密密疎疎自在花。江近夕陽迎宿鷺。林昏殘角促歸鴉。吾舟已繫津南岸。喚客猶能一笑譁。

得韓无咎書寄使虜時宴東都驛中所作小闋

大梁二月杏花开。錦衣公子乘傳來。桐陰滿地掃不得。金轡玲瓏上源驛。上源驛中搥畫鼓。漢使作客胡作主。舞女不記宣和粧。廬兒盡能女直語。書來寄我宴時詩。歸鬢知添幾縷絲。有志未須深感慨。築城會據拂雲祠。唐中受降城。在拂雲祠。

曉坐

低枕孤衾夜氣存。披衣起坐默忘言。餅花力盡無風墮。爐火灰深到曉溫。空橐時時聞鼠齧。小窗一一送鴉翻。悠然忽記幽居日。下榻先開水際門。

十二月初一日得梅一枝絕奇戲作長句今年於是四賦此花矣

高標已壓萬花羣。尙恐嬌春習氣存。月兔擣霜供換骨。湘娥鼓瑟爲招魂。孤城小驛初飛雪。斷角殘鐘半掩門。盡意端相終有恨。夜寒皴玉倩誰溫。

快晴

地闊天門斗柄回。今朝紅日遍池臺。新陽蘇醒春前柳。輕暖醫治雪後梅。瓦屋螺青披霧出。錦江鴨綠抱山來。衰翁也逐兒童喜。旋撥文書近酒盃。

春愁曲客話成都戲作

慮義至今三十餘萬歲。春愁歲歲常相似。外大瀛海環九洲。無有一洲無此愁。我願無愁但歡樂。朱顏綠鬢常如昨。金丹九轉徒可聞。玉兔千年空擣藥。蜀姬雙鬢姪姘嬌。醉看恐是海棠妖。世間無處無愁到底。事難過萬里橋。

遊修覺寺

上盡蒼崖百級梯。詩囊香椀手親攜。山從飛鳥行邊出。天向平蕪盡處低。花落忽驚春事晚。樓高剩覺客魂迷。興闌掃榻禪房臥。清夢還應到剡溪。

雨後集湖上

野水交流自滿畦。芳池新漲恰平堤。花藏密集多時在。鶯占高枝盡日啼。繡袂寶裙催結束。金樽翠杓共

提攜白頭自喜能狂在。笑擘蠻牋落醉題。

慈雲院東閣小憩

橫閣院東偏。翛然拂榻眠。香濃煙穗直。茶嫩乳花圓。巖倚團團桂。筒分細細泉。憑誰爲題版。榜作小壺天。

病後暑雨書懷

髮毛蕭颯疾初平。雲物輪囷氣未清。水漲小亭無路到。雨多幽草上牆生。窗昏頓減讎書課。屋老時聞墮瓦聲。止酒亡聊還自笑。少年豪飲似長鯨。

怡齋

東湖仲夏草樹荒。屋古無人亭午涼。萱房微呀不見日。筍籜自解時吹香。野藤蟠屈入窗罅。溼菌扶疎生屋梁。跨溝數椽最幽翳。漲水及檻雨敗牆。靜涵青蘋舞藻荇。閒立白鷺浮鴛鴦。芙蕖雖瘦亦瀾漫。照眼翠蓋遮紅粧。水紋珍簟欲卷卻。團團素扇嬾復將。天風忽送塔鈴語。喚覺清夢遊瀟湘。

寓驛舍予三至成都。皆館于是。

閒坊古驛掩朱扉。又憩空堂綻客衣。九萬里中鯤自化。一千年外鶴仍歸。遶庭數竹饒新筍。解帶量松長舊圍。惟有壁間詩句在。暗塵殘墨兩依依。

宴西樓

西樓遺迹尙英雄。錦繡笙簫在半空。萬里因循成久客。一年容易又秋風。燭光低映珠簾麗。酒暈徐添玉頰紅。歸路迎涼更堪愛。摩訶池上月方中。

江濱池醉歸馬上作

久住西州似宿緣。笙歌叢裏著華顛。每嗟相見多生客。卻憶初來尙少年。迎馬綠楊爭拂帽。滿街丹荔不論錢。浮生何處非羈旅。休問東吳萬里船。

醉書

似閒有俸錢。似仕無簿書。似長免事仕。似屬非走趨。病能加餐飯。老與酒不疎。婆婆東湖上。幽曠足自娛。時時喚客醉。小閣臨紅蕖。釣魚斫銀絲。擘荔見玉膚。檀槽列四十。遺聲傳故都。豈惟豪兩川。自足誇東吳。但恨詩不進。榛荒失耘耔。何當掃纖艷。傑作追黃初。

東園晚步

久客天涯憶故園。彊名官寺只衡門。秋桐蠹遍無全葉。古柳吹斜出半根。痛飲每思尊酒窄。微官空羨布衣尊。何時定下三巴去。思臥孤舟聽斷猿。

太平花

花出劍南。似桃四。出千百包。駢萃成朶。天聖中。獻至京師。仁宗賜名太平花。

扶牀踉蹌出京華。頭白車書未一家。宵旰至今勞聖主。淚痕空對太平花。



秋色

一段淒涼傍酒盃。中年剩作楚囚哀。迢迢似伴明河出。慘慘如隨落照來。客路半生常淚眼。鄉關萬里更危臺。蓼汀荻浦江南岸。自入秋來夢幾回。

秋聲

蕭騷拂樹過中庭。何處人間有此聲。漲水雨餘晨放閘。騎兵戰罷夜還營。閒憑曲几聽雖久。彊撫哀弦寫不成。暑退涼生君勿喜。一年光景又崢嶸。

龍眠畫馬

國家一從失西陲。年年買馬西南夷。瘴鄉所產非權奇。邊頭歲入幾番一作數皮。崔嵬瘦骨帶火印。離立欲不禁風吹。圉人太僕空列位。龍媒汗血來何時。李公太平官京師。立仗慣見渥洼姿。斷縑歲久墨色暗。逸氣尙若不可羈。賞奇好古自一癖。感事憂國空餘悲。嗚呼安得毛骨若此三千疋。銜枚夜度桑乾磧。

秋夜池上作

短髮颯颯病骨輕。臨池閒看露荷傾。月明何與浮雲事。正向圓時故故生。

夜食炒栗有感舍漏待朝。朝士往往食此。

齒根浮動歎吾衰。山栗炮燂療夜飢。喚起少年京輦夢。和寧門外早朝時。

晚登橫溪閣

樓鼓聲中日又斜。憑高愈覺在天涯。空桑客土生秋草。野渡虛舟集晚鴉。瘴霧不開連六詔。俚歌相答帶三巴。故鄉可望應添淚。莫恨雲山萬疊遮。

犂确坡頭筇竹枝。西臨村路立多時。賣蔬近市還家早。煮井人忙下麥遲。榮多鹽井。秋冬收薪茅最急。病客情懷常怯酒。山城老景盡供詩。晚來試問愁多少。只許高樓橫笛吹。

自唐安徙家來和義出城迎之馬上作

身如林下僧。處處常寄包。家如梁上燕。歲歲旋作巢。豈惟人所憐。顧影每自嘲。眼看佳山水。不得結把茅。造物困豪傑。如視餓虎哮。要令出精神。感激使叫呌。頗思投筆去。走馬盤雲旂。三更冒急雪。大戰梁楚郊。

花時遍遊諸家園

看花南陌復東阡。曉露初乾日正妍。走馬碧雞坊裏去。市人喚作海棠顛。爲愛名花抵死狂。只愁風日損紅芳。綠章夜奏通明殿。乞借春陰護海棠。翩翩馬上帽簷斜。盡日尋春不到家。偏愛張園好風景。半天高柳臥溪花。花陰掃地置清尊。爛醉歸時夜已分。欲睡未成欹倦枕。輪囷帳底見紅雲。宣華無樹著啼鶯。惟有摩訶春水生。故老能言當日事。直將宮錦裹宮城。

絲絲紅萼弄春柔。不似疎梅只慣愁。常恐夜寒花索寞。錦茵銀燭按涼州。

春寒連日不出

海棠花入燕泥乾。梅子枝頭已帶酸。老去嬾尋年少夢。春分不減社前寒。著書敢望垂千載。嗜酒猶須隱一官。正是閒時無客過。小庭斜日倚闌干。

馬上偶成

城南城北紫遊韉。盡日閒行看似忙。刺水離離葛葉短。連村漠漠豆花香。夕陽有信催殘角。春草無情上繚牆。我亦人間倦遊者。長吟聊復愴興亡。

夜宴

酒浪搖春不受寒。燭花垂燼忽堆盤。山川路邈人將老。絲管聲逾夜向闌。四海交朋更聚散。百年光景雜悲歡。自憐病眼猶明在。更把名花半醉春。是夕得范希元家。晚海棠數枝。繁麗一城所無。

錦亭

天公爲我齒頰計。遣飫黃甘與舟荔。又憐狂眼老更狂。令看廣陵芍藥蜀海棠。周行萬里逐所樂。天公於我元不薄。貴人不出長安城。寶帶華纓真汝縛。樂哉今從石湖公。大度不計聾丞聾。夜宴新亭海棠底。紅雲倒吸玻璃鍾。琵琶弦繁腰鼓急。盤鳳舞衫香霧溼。春醪凸盞燭光搖。素月中天花影立。遊人如雲環玉

帳詩未落紙先傳唱。此邦句律方一新。鳳閣舍人今有樣。

雨

映空初作繭絲微。掠地俄成箭鏃飛。紙帳光遲饒曉夢。銅鑪香潤覆春衣。池魚鱗鱗隨溝出。梁燕翩翩接翅歸。惟有落花吹不去。數枝紅溼自相依。

春殘

石鏡山前送落暉。春殘回首倍依依。時平壯士無功老。鄉遠征人有夢歸。苜蓿苗侵官道合。蕪菁花入麥畦稀。倦游自笑摧頽甚。誰記飛鷹醉打圍。

小飲房園

宦遊到處卽忘家。況得閒身管物華。疎索故人緣病酒。折除厚祿爲看花。泥新高棟初巢燕。萍匝荒池已集蛙。斟酌人生要行樂。燈前起舞落烏紗。

卜居

歷盡人間行路難。老來要覓數年閒。供家米少因添鶴。買宅錢多爲見山。池面紋生風細細。花根土潤雨斑斑。借春乞火依鄰里。剩釀村醪約往還。

小疾謝客

小疾深居不喚醫。消搖更覺勝平時。癡人未害看周易。名士真須讀楚辭。綠徑風斜花片片。畫廊人靜雨絲絲。晚來頓覺清羸甚。自置篝爐煮茗糜。

過野人家有感

縱轡江臯送夕暉。誰家井臼映荆扉。隔離犬吠窺人過。滿箔蠶飢待葉歸。吳人直謂桑曰葉。世態十年看爛熟。家山萬里夢依稀。躬耕本是英雄事。老死南陽未必非。

閒中偶題

楚澤巴山歲歲忙。今年睡足向禪房。只知閒味如茶永。不放羈愁似草長。架上漢書那復看。牀頭周易亦相忘。客來拈起清談麈。且破西窗半篆香。久矣雲衢斂羽翰。退飛更覺一枝安。七千里外新聞客。十五年前舊史官。花底清歌春載酒。江邊明月夜投竿。癡頑直爲多更事。莫怪胸懷抵死寬。

晚過五門

五門路。四月乳鴉啼綠樹。閒遊但喜日初長。薄暑始知春已去。樓頭風高舞雙旗。畫角聲中日還莫。馬蹄特特無斷時。老盡行人路如故。

月下醉題

黃鵠飛鳴未免飢。此身自笑欲何之。閉門種菜英雄老。彈鋏思魚富貴遲。生擬入山隨李廣。死當穿冢近要離。一樽彊醉南樓月。感慨長吟恐過悲。

和范待制秋興

策策桐飄已半空。啼螿漸覺近房櫳。一生不作牛衣泣。萬事從渠馬耳風。名姓已甘黃紙外。光陰全付綠尊中。門前剝啄誰相覓。賀我今年號放翁。睡臉餘痕印枕紋。秋衾微潤覆爐窠。井桐搖落先霜盡。衣杵淒涼帶月聞。佛屋沙燈明小像。經奩魚蠹蝕真文。身如病驥惟思臥。誰許能空萬馬羣。

春愁

春愁茫茫塞天地。我行未到愁先至。滿眼如雲忽復生。尋人似瘡何由避。客來勸我飛觥籌。我笑謂客君罷休。醉自醉倒愁自愁。愁與酒如風馬牛。

關山月

和戎詔下十五年。將軍不戰空臨邊。朱門沉沉按歌舞。廐馬肥死弓斷弦。戍樓刁斗催落月。三十從軍今白髮。笛裏誰知壯士心。沙頭空照征人骨。中原于戈古亦聞。豈有逆胡傳子孫。遺民忍死望恢復。幾處今宵垂淚痕。

和范舍人書懷

歲月如犇不可遮。卽今楊柳已藏鴉。客中常欠尊中酒。馬上時看檐上花。末路淒涼老巴蜀。少年豪舉動京華。天魔久矣先成佛。多病維摩尙在家。

幽居

殊方飄泊向誰論。小住僧廬亦所欣。得飽罷揮求米帖。愛眠新著毀茶文。摘蔬籃小霑清露。斲藥鉏輕帶溼雲。從此生涯足幽事。宦遊虛用半生勤。

浣溪女一作浣花女

江頭女兒雙鬢丫。常隨阿母供桑麻。當戶夜織聲咿啞。地爐豆蘘煎土茶。長成嫁與東西家。柴門相對不上車。青裙竹笥何所嗟。插髻燂燂牽牛花。城中妖姝臉如霞。爭嫁官人慕高華。青驪一出天之涯。年年傷春抱琵琶。

悲秋

一拋篋笠雪溪舟。八載涼州復益州。纔破繁華海棠夢。又驚搖落井梧秋。曉班無復趨行殿。晚境惟思老寢丘。病肺經旬疎酒盞。愁來惟是上南樓。

雨中山行至松風亭忽澄霽

煙雨千峯擁髻鬟。忽看青嶂白雲間。卷藏破墨營丘筆。卻展將軍著色山。

秋興

成都城中秋夜長。燈籠蠟紙明空堂。高梧月白繞飛鵲。衰草露溼啼寒螿。堂上書生讀書罷。欲眠未眠偏斷腸。起行百匝幾歎息。一夕綠髮成秋霜。中原日月用胡曆。幽州老曾著柘黃。滎河溫洛底處所。可使長作旃裘鄉。百金戰袍鷓鴣盤。三尺劍鋒霜雪寒。一朝出塞君試看。且發寶雞莫長安。

暇日行城上同行追不能及

疾步登城殊未衰。欣然一笑擲筇枝。正當閒似白鷗處。不減健如黃犢時。秋野煙雲橫慘淡。莫天樓閣倚參差。高吟醉舞忘歸去。乞與丹青畫怪奇。

江樓醉中作

淋漓百榼宴江樓。秉燭揮毫氣尚遒。天上但聞星主酒。人間寧有地埋憂。生希李廣名飛將。死慕劉伶贈醉侯。戲語佳人頻一笑。錦城已是六年留。退之詩云。越女一笑三年留。

曳策遊房園作

慈竹蕭森拱廢臺。醉歸曳策一徘徊。紛紛落日牛羊下。黯黯長空霰雪來。三峽猿催清淚落。兩京梅傍戰塵開。客懷已是淒涼甚。更聽城頭畫角哀。



謁漢昭烈惠陵及諸葛公祠宇

雨止風益豪。雪作雲不動。淒涼漢陵廟。衰草臥翁仲。畫妓空笙竽。土馬闕羈鞅。壤沃黃犢耕。柏密幽鳥哢。  
尚想忠武公。身任社稷重。整整渭上營。氣已無岐雍。少須天意定。破賊寧患衆。興亡信有數。星隕事可痛。  
陵邊四五家。茆竹居接棟。手鞞紙上箔。居民皆以造紙爲業。 醅熟酒鳴甕。雖嗟生理微。亦足道飢凍。劉葛固雄傑。  
閱世均一夢。論高常近迂。才大本難用。九原不可作。再拜臨風慟。

遠遊

遠遊行復歲華新。嬾學劉郎問大鈞。一點不蒙稽古力。十分合作臥雲身。苦寒與酒頓增價。小雨爲梅先  
辟塵。擬佩一壺江路去。花邊醉墮白綸巾。

簡譚德稱

幼輿骨相稱山巖。自要閒遊不避讒。錦里先生爲老伴。玉霄散吏是頭銜。探春苑路花簪帽。看月江樓酒  
滿衫。惟恨題詩無逸氣。媿君陣馬與風颿。

閒意

柴門雖設不曾開。爲怕人行損綠苔。妍日漸催春意動。好風時捲市聲來。學經妻問生疎字。嘗酒兒斟澀  
盃。安得小園寬半畝。黃梅綠李一時栽。

南定樓遇急雨

行遍梁州到益州。今年又作度瀘遊。江山重複爭供眼。風雨縱橫亂入樓。人語朱離逢峒獠。棹歌欸乃下吳舟。天涯住穩歸心嬾。登覽茫然卻欲愁。

漁翁

江頭漁家結茆廬。青山當門畫不如。江煙淡淡雨疎疎。老翁破浪行捕魚。恨渠生來不讀書。江山如此一句無。我亦衰遲慙筆力。共對江山三歎息。

龍興寺吊少陵先生寓居

中原艸艸失承平。戍火胡塵到兩京。扈蹕老臣身萬里。天寒來此聽江聲。以少陵詩考之。蓋以秋冬間。寓此州也。寺門聞江

聲甚壯。

楚城

江上荒城猿鳥悲。隔江便是屈原祠。一千五百年間事。只有灘聲似舊時。

出遊

萬里崎嶇蜀道歸。荊州非復壯遊時。行吟自怪詩情減。坐睡人驚酒量衰。卷地風號雲夢澤。黏天艸映伏波祠。一枝藤杖平生事。擊鼓開帆未恨遲。

初發荊州

淋漓牛酒起檣竿，健鷁飛如插羽翰。  
破浪乘風千里快，開頭擊鼓萬人看。  
鵲聲不斷朝陽出，旗腳微舒宿雨乾。  
堪笑塵埃洛陽客，素衣如墨據征鞍。

泊公安縣

秦關蜀道何遼哉，公安渡頭今始回。  
無窮江水與天接，不斷海風吹月來。  
船窗簾捲螢火鬧，沙渚露下蘋花開。  
少年許國忽衰老，心折柁樓長一作笛哀。

舟中偶書

老子西遊萬里回，江行長夏亦佳哉。  
晝眠初起報茶熟，宿酒半醒聞雨來。  
漢口船開催疊鼓，淮南帆落亞高桅。  
四方本是丈夫事，白首自憐心未灰。

舟行蘄黃間雨霽得便風有感

天青雲白十分晴，帆飽舟輕盡日行。  
江底魚龍貪晝睡，淮南艸木借秋聲。  
好山縹緲何由住，華髮蕭條只自驚。  
莫怪時人笑疎嬾，宦情元不似詩清。

六月十四日宿東林寺

看盡江湖千萬峯，不嫌雲夢芥吾胸。  
戲招西塞山前月，來聽東林寺裏鐘。  
遠客豈知今再到，老僧能記昔

相逢。虛窗熟睡誰驚覺。野碓無人夜自舂。

登賞心亭

蜀棧秦關歲月過。今年樂興卻東遊。全家穩下黃牛峽。半醉來尋白鷺洲。黯黯江雲瓜步雨。蕭蕭木葉石城秋。孤臣老抱憂時意。欲請遷都涕已流。

將至京口

臥聽金山古寺鐘。三巴昨夢已成空。船頭坎坎回帆鼓。旗尾舒舒下水風。城角危樓晴靄碧。林間雙塔夕陽紅。銅瓶愁汲中濡水。不見茶山九十翁。頃在京口。嘗取中濡水。寄曾文清公。

沂谿

射的峯前禹廟東。短篷三扇臥衰翁。閒攜清聖濁賢酒。重試朝南暮北風。水落痕留紅蓼節。雨來聲滿綠蒲叢。衝煙莫作匆匆去。擬看溪丁下釣筒。

歸雲門

萬里歸來值歲豐。解裝鄉墅樂無窮。甌炊飽雨湖菱紫。篋絡迎霜野柿紅。壞壁塵埃尋醉墨。孤燈餅餌對鄰翁。微官行矣閩山去。又寄千巖夢想中。

題齋壁

賁得湖邊屋數椽。茆齋低小竹窗妍。墟煙寂歷歸村路。山色蒼寒釀雪天。性懶杯盤常偶爾。地偏雞犬亦  
翛然。早知栗里多幽事。虛走人間四十年。

吾廬

吾廬雖小亦佳哉。新作柴門斲綠苔。拄杖每闌歸鶴入。釣船時帶夕陽來。墟煙隔水霏霏合。籬菊凌霜續  
續開。千里安期那可得。笑呼鄰父共傳杯。

自雲門之陶山。肩輿者失道。行亂山中有茅舍小塘極幽邃。求見主人不可。意其隱者也。  
陂池幽處有茅堂。井臼蕭條草樹荒。小鴨怯波時聚散。病蔬傷蠹半青黃。兒童衝雨收魚網。婢子聞鐘上  
佛香。我亦暮年思屏跡。數椽何計得連牆。

冬夜聽雨戲作

少年交友盡豪英。妙理時時得細評。老去同參惟夜雨。焚香臥聽畫簷聲。  
遠簷點滴如琴筑。支枕幽齋聽始奇。憶在錦城歌吹海。七年夜雨不曾知。

梅花絕句

濯錦江邊憶舊遊。纏頭百萬醉青樓。如今莫索梅花笑。古驛燈前各自愁。

蜀王小苑舊池臺。江北江南萬樹梅。只怪朝來歌吹鬧。園官已報五分開。  
成都合江園。蓋故蜀別苑。最梅盛。自初開。監官日報府。

來。報至開五分。則府主  
來晏。遊人亦競集。

探春歲歲在天涯。醉裏題詩字半斜。今日谿頭還小飲。冷官不禁看梅花。  
池館登臨雪半消。梅花與我兩無聊。青羊宮裏應如舊。腸斷春風萬里橋。

客思

裘馬平生喜遠遊。莫年顛頓向南州。文書與睡中分日。衰病和愁總怕秋。無復雪郊看射虎。但思煙浦聽呼牛。還家誰道無餘俸。倒囊猶堪買釣舟。

初秋夢故山覺而有作

昔我東歸時。父老迎船頭。開篷相勞苦。怪我領雪稠。故山何負君。且作數月留。豈知席未煖。疋馬來南州。  
蠻花四時紅。瘴霧日夜浮。歸哉不可遲。勿與婦子謀。  
杜宇真吾交。勸去恨不速。忠告輸肝肺。厚意均骨肉。陋哉鷓鴣語。揣我貧念祿。竹雞更鄙淺。泥淖憂車軸。  
秋風嚴瀨清。春雨戴溪綠。行矣勿復疑。照影巾一幅。

追感梁益舊遊有作

西遊萬里倚朱顏。肯放尊前一笑慳。蜀苑妓圍欺夜雪。梁州獵火滿秋山。晚途忽墮塵埃裏。樂事渾疑夢寐間。浮世變遷君勿歎。劇談猶足詫鄉關。

聞雁

過盡梅花把酒稀。薰籠香冷換春衣。秦關漢苑無消息。又在江南送雁歸。

登擬峴臺

層臺縹緲壓城闔。倚杖來觀浩蕩春。放盡尊前千里目。洗空衣上十年塵。縈迴水抱中和氣。平遠山如醜籍人。更喜機心無復在。沙邊鷗鷺亦相親。

雨中遣懷

病中草草度年華。睡起昏昏日易斜。抵死愁禁千斛酒。薄情雨送一城花。鏡湖煙水搖朱舫。錦里香塵走鈿車。此夢卽今都打破。不妨寂寞住天涯。

三月二十一日作

蹴踘牆東一市譁。鞦韆樓外兩旗斜。及時小雨放桐葉。無賴餘寒開楝花。明月吹笙思蜀苑。軟塵騎馬夢京華。懽情減盡朱顏改。節物催人只自嗟。

五月十一日夜且半。夢從大駕親征。盡復漢唐故地。見城邑人物繁麗。云西涼府也。喜甚。馬上作長句。未終篇而覺。乃足成之。

天寶胡兵陷兩京。北庭安西無漢營。五百年間置不問。聖主下詔初親征。熊羆百萬從蠻駕。故地不勞傳

檄下築城絕塞進新圖。排仗行宮宣大赦。岡巒極目漢山川。文書初用淳熙年。駕前六軍錯錦繡。秋風鼓角聲滿天。苜蓿峯前盡亭障。平安火在交河上。涼州女兒滿高樓。梳頭已學京都樣。

長歌行

燕燕尾涎涎。橫穿乞巧樓。低入吹笙院。鴨鴨鶩鶩。朝浮杜若洲。暮宿蘆花夾。嗟爾自適天地間。將儔命侶意甚閒。我今獨何爲。一笑乃爾慳。世上悲歡亦偶然。何時爛醉錦江邊。人歸華表三千歲。春入箜篌十四絃。

送客城西

倦客憑鞍半醉醒。秋光滿眼歎頽齡。月斜野渡放船小。風急漁村攤網腥。客思不堪聞斷雁。詩情彊半在郵亭。歸來更恨城笳咽。烟火昏昏獨掩屏。

休日

賜休暫許養衰殘。靜院翛然晝掩關。釀酒移花調護悶。弄琴洗硯破除閒。與人多忤讒消骨。報國無功愧滿顏。一寸歸心向誰說。小屏依約剡中山。

新釀熟小酌索笑亭

新酒黃如脫殼鵝。小園持盞暫婆娑。文章不進技止此。仕宦忘歸人謂何。宿業簿書昏病眼。夢遊煙雨溼



漁簑醉中笑向兒童說。白髮今年添幾多。

豐城高安之間憩民家景趣幽邃爲之慨然懷歸

數家聚雲根。細路入叢薄。濺濺石渠水。來往一略約。有無鄰里通。笑語婦子樂。濁醪時相就。青蔬缺鹽酪。日暮歸閉門。續火星煜燐。先期畢租稅。老不入城郭。嗟予獨何事。早插紅塵脚。故山未成歸。悵望有餘作。

北窗

九陌黃塵早暮忙。幽人自愛北窗涼。清吟微變舊詩律。細字閒鈔新酒方。艸木扶疎春已去。琴書蕭散日初長。破羌臨罷檣頭久。又破銅匱半篆香。

西村醉歸

俠氣崢嶸蓋九州。一生常恥爲身謀。酒寧剩欠尋常債。劍不虛施細碎讎。見孟東野詩岐路凋零白羽箭。風霜破弊黑貂裘。陽狂自是英豪事。村市歸來醉跨牛。

醉中登避俗臺

半醉行歌上古臺。脫巾散髮謝氛埃。但知禮豈爲我設。莫管客從何處來。剡曲煙波菱蔓滑。耶溪風露藕花開。老來世事渾成嬾。一櫂幽尋未擬回。

病中夜興

病瘡秋來久未平。艸堂遙夜不勝清。疾風遞響驚林葉。列宿收芒避月明。百計不能逃白髮。一生堪笑役虛名。釣車且作桐江夢。莫念安西萬里行。

霜天晚興

薄霜門巷不勝清。小立湖邊夕照明。紅顆帶芒收晚稻。綠苞和葉摘新橙。閒評琴價留僧話。靜聽松聲領鶴行。壯志消磨渾欲盡。西風莫動玉關情。

杜門

寂寞山深處。崢嶸歲暮時。燒灰除菜蝗。讀如橫字。去聲。送芋謝牛醫。覓水晨澆藥。燈窗夜覆棋。杜門君勿怪。遲

暮少新知。

忽忽

忽忽復悠悠。頻驚歲月遒。若無船貯酒。將奈斛量愁。列炬燕宮夜。成都故蜀時燕王宮。今屬張氏。海棠為一城之冠。呼鷹漢廟

秋。南鄭漢高帝廟。予從戎時。多獵其下。凋年莫多感。夢境付滄洲。

冬夜不寐至四鼓起作此詩

秦吳萬里車轍遍。重到故鄉如隔生。歲晚酒邊身老大。夜闌枕畔書縱橫。殘燈無焰穴鼠出。槁葉有聲村犬行。八十將軍能滅虜。白頭吾欲事功名。高麗有讖云。當有八十老將平之。李英公實膺是讖。

蔬圃

山翁老學圃。自笑一何愚。礲瘠財三畝。勤劬賴兩奴。正方畦畫局。微潤土融酥。剪闢荆榛盡。鉏犁磊塊無。過溝橫略彳。聚甃起浮屠。拾園中瓦礫作小塔隙地成瓜援。餘功及芋區。如絲細生菜。似鴨爛蒸壺。此事今真辦。東歸不爲鱸。

累日無酒亦不肉食戲作此詩

小築精廬剡曲傍。枵然蟬腹與龜腸。酒錢覓處無司業。齋日多來似太常。雲碓旋舂菰米滑。風爐親候藥苗香。明年更入南山去。要試囊中服玉方。

陶山遇雪覺林遷菴主見招不果往

山中大雪二尺彊。道邊虎迹如椀大。衰翁畏虎復畏寒。招喚不來公勿怪。梨花開時好風日。走馬尋公作寒食。不須沽酒飲陶潛。箭筈蕨芽如蜜甜。

夏夜舟中聞水鳥聲甚哀若曰姑惡感而作詩

女生藏深閨。未省窺牆藩。上車移所天。父母爲它門。妾身雖甚愚。亦知君姑尊。下牀頭雞鳴。梳髻著襦裙。堂上奉灑掃。廚中具盤飧。青青摘葵莧。恨不美熊蹯。姑色少不怡。衣袂溼淚痕。所冀妾生男。庶幾姑弄孫。此志竟蹉跎。薄命來讒言。放棄不敢怨。所悲孤大恩。古路傍陂澤。微雨鬼火昏。君聽姑惡聲。無乃遣婦魂。

雨夜

急雨如河瀉瓦溝。空堂臥對一燈幽。老雞多事彊知曉。落葉無情先報秋。身未蓋棺誰可料。尊常有酒莫閒愁。功名老大從來事。且復長歌起飯牛。

鄰曲小飲

早稻喜登場。相呼集野堂。迎霜新兔美。近社濁醪香。茆屋滴殘雨。竹籬圍夕陽。新豐不須作。真箇是吾鄉。

題酒家壁

明主何曾棄不才。書生飄泊自堪哀。煙波東盡江湖遠。雲棧西從隴蜀回。宿雨送寒秋欲晚。積衰成病老初來。酒香菰脆丹楓岸。強遣樽前笑口開。

幽居書事

莫嘆人間苦不諧。清時有味是歸來。已因積毀成高臥。更借陽狂護散才。正欲清言聞客至。偶思小飲報花開。紛紛爭奪成何事。白骨生苔但可哀。

紹興中與陳魯山王季夷從兄仲高以重九日同遊禹廟後三十餘年自三橋泛舟歸山居秋

高雨霽望禹廟樓殿重複光景宛如當時而三人者皆下世予亦衰病無聊慨然作此詩

重樓傑閣倚虛空。紅日蒼煙正鬱葱。鄉國歸來渾似鶴。交朋零落不成龍。人生真與夢何校。我輩故應情

所鍾。淚漬清詩卻回棹。不眠一夜聽鳴蛩。

過村店有感

細篾絡丹柿。枯籬懸碧花。炊煙生旅竈。野水漱寒沙。棲鳥爭投樹。歸牛自識家。恍然遊蜀路。搔首憶天涯。

骨相

骨相元知薄。功名敢自期。病侵彊健日。閒過聖明時。形勝輪臺地。飛騰瀚海師。江湖雖萬里。猶擬掇聲詩。

薏苡蜀人謂其實爲薏米。唐安所出尤奇。

初遊唐安飯薏米。炊成不減雕胡美。大如芡實白如玉。滑欲流匙香滿屋。腹腴項鬣不入盤。況復殮酪誇甘酸。東歸思之未易得。每以問人人不識。嗚呼奇材從古棄。艸菅君試求之離落間。

鄉人或病予詩多道蜀中遨樂之盛。適春日遊鏡湖。共請賦山陰風物。遂卽杯酒間作絕句。當

持以誇西州故人也。

嬾日輕雲淡。池天撲燈過後賣花前。便從水閣杭湖去。捲起朱簾上畫船。舫子窗扉面面開。金壺桃杏間尊壘。東風忽送笙歌近。一片樓臺泛水來。

病中

風雨暗江天。幽窗起復眠。忍窮安晚境。留病壓災年。客助脩琴料。僧分買藥錢。餘生均逆旅。未死且陶然。

初夏游凌氏小園

水滿池塘葉滿枝。曲廊危榭愜幽期。風和海燕分泥處。日永吳蠶上簇時。閒理阮咸尋舊譜。細傾白墮賦新詩。從來夏淺勝春日。兒女紛紛豈得知。度信詩云。夏淺卻勝春。鏡湖遊人。至立夏而止。

賽神曲

叢祠千載臨江渚。拜祝今年那可數。須晴得晴雨得雨。人意所向神輒許。嘉禾九穗持上府。廟前女巫巫遞。歌舞嗚嗚歌謳坎坎鼓。香煙成雲神降語。大餅如槃牲腍肥。再拜獻神神不違。晚來人醉相扶歸。蟬聲滿廟鎖斜暉。

秋夜

老病龍鍾不入城。濁醪麤飯餞餘生。未霜村舍秋先冷。無月江邊夜自明。出塞雖慙平賊手。下帷聊喜讀書聲。山童睡熟青燈暗。自撥殘爐候藥鐺。

得所親廣州書

音信連年恨不聞。書來細讀卻消魂。人稀野店山魈語。路僻蠻村荔子繁。毒草自搖春寂寂。瘴雲不動晝昏昏。此生相見應無日。且置清愁近一樽。

西路口山店

日薄霜清十月天。馬蹄聲裏送流年。店當古路三叉處。山似孤雲兩角邊。孤雲兩角在漢中。淹泊自悲窮不醒。衰殘更覺病相纏。榆關瀚海知何在。目送飛鴻入暮煙。

冬夜與溥菴主說川食戲作

唐安薏米白如玉。漢嘉楫脯美勝肉。大巢初生蚕正浴。小巢漸老麥米熟。龍鶴作羹香出釜。木魚淪菹子盈腹。未論索麩與饋飯。最愛紅糟并魚粥。東來坐閱七寒暑。未嘗舉箸忘吾蜀。何時一飽與子同。更煎土茗浮甘菊。

野飲

青山千載老英雄。濁酒三盃失阨窮。訪古頽垣荒塹裏。覓交屠狗賣漿中。平堤漸放春蕪綠。細浪遙翻夕照紅。已把殘年付天地。騎牛吹笛伴村童。

春晚至山中因訪陳道人

一春衰病集殘骸。太息流塵覆酒杯。僧鉢始知葶菜老。佛瓶初見杏花開。蘋溪小雨成幽討。松院斜陽又獨來。不爲愛閒從野叟。年來萬事學低摧。

病起

山村病起帽圍寬。春盡江南尚薄寒。志士淒涼閒處老。名花零落雨中看。斷香漠漠便支枕。芳草離離悔

倚闌收拾吟牋停酒椀。年來觸事動憂端。

芒種後經旬無日不雨偶得長句

芒種初過雨及時。紗廚睡起角巾欹。癡雲不散常遮塔。野水無聲自入池。綠樹晚涼鳩語鬧。畫梁晝寂燕歸遲。閒身自喜渾無事。衣覆熏籠獨誦詩。

秋夜泊舟亭山下

逢水逢山到處留。可憐身世寄孤舟。一汀蘋露漁村晚。十里荷花野店秋。羽檄未聞傳塞外。金椎先報擊衙頭。聞虜酋行帳。為壯士所攻。幾不煌煌太白高千丈。那得功名取次休。

初秋山中作

萬里西風吹幅巾。卽今真箇是閒人。堆盤菱熟燕脂角。藉藻鱸新淡墨鱗。姥嶺塞驢尋雪徑。娥江孤艇繫煙津。飄然樂事真當勉。遠付十年無此身。

臨安春雨初霽

世味年來薄似紗。誰令騎馬客京華。小樓一夜聽春雨。深巷明朝賣杏花。矮紙斜行閒作草。晴窗細乳戲分茶。素衣莫起風塵歎。猶及清明可到家。

飲張功父園戲題扇上



寒食清明數日中。西園春事又匆匆。梅花自避新桃李。不爲高樓一笛風。

聞傅氏莊紫笑花開急。棹小舟觀之。

日長無奈清愁處。醉裏來尋紫笑香。漫道閒人無一事。逢春也似蜜蜂忙。

鹹齏十韻

九月十月屋瓦霜。家人共畏畦蔬黃。小甕大甕盛滌濯。青菘綠韭謹蓄藏。天氣初寒手訣妙。吳鹽正白山泉香。挾書旁觀穉子喜。洗刀竭作廚人忙。園丁無事臥曝日。棄葉狼籍堆空廊。泥爲緘封糠作火。守護不敢非時嘗。人生各自有貴賤。百花開時促高宴。劉伶病醒相如渴。長魚大肉何由薦。凍齏此際價千金。不數狐泉槐葉麪。摩挲便腹一欣然。作歌聊續冰壺傳。

遣興

莫羨朝回帶萬釘。吾曹要可草堂靈。風來弱柳搖官綠。雲破奇峰湧帝青。聽盡啼鶯春欲去。驚回夢蝶醉初醒。從教俗眼憎疎放。行矣桐江酌客星。

小憩村舍

藤梢維艇子。煙際覓人家。小婦簪新麥。羣童摘晚茶。溪雲易成雨。崖樹少開花。聊寄平生快。青溪到若耶。

雨後

礎潤還成雨。雲收旋作晴。巖花分日發。林筍逐番生。筆硯行常具。軒窗晚更明。塵埃幸不到。那得廢詩情。

自上竈過陶山

宿雨初收見夕陽。縱橫流水入陂塘。蚤家忌客門門閉。茶戶供官處處忙。綠樹村邊停醉帽。紫藤架底倚胡牀。不因蕭散遺塵事。那覺人間白日長。

排悶

老去知心少。流塵鎖斷絃。尊空問字酒。囊罄作碑錢。掃葉供朝爨。和泥補漏船。胸中元浩浩。白眼望青天。

題齋壁

二十餘年此結茆。園公谿父日論交。風翻半浦亂荷背。雨放一林新笋梢。隔葉晚鶯啼谷口。唼花雛鴨聚塘坳。出門行罷還無事。借得丹經手自抄。

拜旦表

一封馳奏效嵩呼。清蹕何時返故都。只道建炎巡狩禮。誰知故事自祥符。

安流亭俟客不至獨坐成詠

憶昔西征鬢未霜。拾遺陳迹吊微茫。蜀江春水千帆落。禹廟空山百草香。馬影斜陽經劍閣。鶻聲清曉下瞿唐。酒徒雲散無消息。水榭憑欄淚數行。

歲晚書懷

早見龍翔上太清。紹興末游官玉牒所。即今孤宦老山城。靈丹不解換凡骨。薄命枉教生太平。積雪樓臺增壯觀。

近春鳥雀有和聲。如山吏牘何時了。惆悵西窗晚照明。

雪中忽起從戎之興戲作

狐裘臥載錦駝車。酒醒冰髭結亂珠。三尺馬鞭裝白玉。雪中畫字草軍書。

鷺堂春夜

南樓統統下疎更。一點紗籠滿院明。映月疎梅入簾影。讀書穉子隔窗聲。呻吟藥裏身寧久。汛掃胡塵意

未平。草檄北征今二紀。山城仍是老書生。游嘗為丞相陳魯公。史樞相張魏公。草中原及西夏書檄於都堂。

東齋偶書

華髮蕭蕭不滿簪。強扶衰病著朝衫。寒廳靜似阿蘭若。佳客少于優鉢曇。詩酒放懷窮亦樂。文移肆罵老

難堪。棄官若遂飄然計。不死揚州死劍南。顧況詩云。人生只合揚州死。而余嘗有歸蜀之意。

倚欄

閒岸紗巾小倚欄。吳中三月尚春寒。蜂脾蜜滿花初過。燕觜泥新雨未乾。老厭簿書思屏迹。病逢節物強

追歡。一樽又動流年感。城上斜陽畫角殘。

晚春園中作

小逢春歸未解悲。千篇曾賦傷春詩。可堪霜點鬢鬢後。更值綠暗園林時。楊花輕墮簷外影。杏子重壓闌邊枝。毬塲立馬漏聲靜。綺窗語燕簷陰移。向來春事渺何許。長空鳥跡何由追。鞦韆未拆已寂寞。日莫東風吹綵旗。

九月初郊行

九月吳中尚袂衣。江郊策馬踏斜暉。蕎花漫漫連山路。豆筴離離映版扉。蒼兔避鷹投磔去。黃鶴脫網傍人飛。農家光景關心事。不爲無才也合歸。

寄題朱元晦武夷精舍

先生結屋綠巖邊。讀易懸知屢絕編。不用采芝驚世俗。恐人謗道是神仙。蟬蛻巖間果是無。世人妄想可憐渠。有方爲子換凡骨。來讀晦菴新著書。身閒剩覺溪山好。心靜尤知日月長。天下蒼生未蘇息。憂公遂與世相忘。齊民本自樂衡門。水旱那知不自存。聖主憂勤常旰食。煩公一一報曾孫。山如嵩少三十六。水似邛邛九折途。我老正須閒處著。白雲一半肯分無。

秋郊有懷

檐頭買雙兔。市店取斗酒。還家埽北窗。歡言酌親友。家貧氣未餒。禮薄情更厚。高唸金石裂。健筆龍蛇走。酒闌起出門。孤月挂衰柳。大笑各散歸。吾輩可不朽。官身縛簡書。此樂寧復有。悵望秦稽雲。憑高一搔首。楚人固多孱。妄謂秋可悲。寧知河嶽間。氣俗樂此時。壯士鳴雕弓。健馬嚼枯莢。日馳三百里。榆關赴戰期。陣雲壓龍庭。殺氣搖參旗。熾火燎狐兔。倒瀉黃金卮。勒銘燕然石。千載鎮胡兒。安能空山裏。凍研哦清詩。秋山瘦益奇。秋水淺可涉。出城西風勁。拂帽吹脫葉。新霜拆栗罅。宿雨飽豆莢。枯柳無鳴蜩。寒花有穿蝶。郊行得幽曠。頗覺耳目愜。斷雲北山來。欣然與之接。挂冠易事爾。看鏡歎勛業。永懷桑乾河。夜渡擁馬鬣。

地僻

地僻天教養散材。流年況著鬢毛催。青山自繞孤城去。畫角常隨晚照來。几淨雙鈎摹古帖。甕香小啜試新醅。桑槎不是星躔遠。無奈先生興盡回。

冬夜聞角聲

嫋嫋清笳入雪雲。白頭老守臥中軍。自憐到老懷遺恨。不向居延塞外聞。憶在梁州夜雪深。落梅聲裏玉關心。山城老去功名忤。臥對寒燈淚滿襟。

荊州歌

楚江鱗鱗綠如釀。銜尾江邊繫朱舫。東征打鼓挂高帆。西上湯豬聯百丈。伏波古廟占好風。武昌白帝在

眼中倚樓女兒笑迎客。清歌未盡千觴空。沙頭巷陌三千家。煙雨冥冥開橘花。峽人住多楚人少。土鏹爭響菜萸茶。

芳草曲

蜀山遠處逢孤驛。缺甃頽垣芳草碧。家在江南妻子病。離鄉半歲無消息。長安城門西路去。細靄斜陽芳草暮。尊前一曲渭城歌。馬蹄萬里交河戍。人生誤計覓封侯。芳草愁人春復秋。只願東行至滄海。路窮草斷始無愁。

夢回

病骨便衾暖。羈懷怯夢回。鐘殘燈燼落。香冷雨聲來。老抱憂時志。狂非濟世材。明朝入冬假。燒兔薦新醅。到嚴十五晦朔。郡釀不佳。求於都下。既不時至。欲借書讀之。而寓公多祕不肯出。無以度日。殊惘惘也。

桐君放隱兩經秋。小院孤燈夜夜愁。名酒過於求趙璧。異書渾似借荊州。溪山勝處真難到。風月佳時事不休。安得連車載郫釀。金鞭重作浣花遊。

春殘

老墮空山裏。春殘白日長。庸醫司性命。俗子議文章。燭映一池墨。風飄半篆香。箇中有佳處。袖手看人忙。

三月二十日晚酌

暫因賜沐作閒身。太息纔餘一日春。委地落花新著雨。穿簾歸燕不生人。衛青此日怪長揖。王翰當年謀卜鄰。商略晚窗須小醉。朱櫻青杏正嘗新。

北窗閒詠

陰陰綠樹雨餘香。半捲疎簾置一牀。得祿僅償賒酒券。思歸新草乞祠章。古琴百衲彈清散。名帖雙鉤搨硬黃。夜出灞亭雖跌宕。也勝歸作老馮唐。

夜出偏門還三山

月行南斗邊。人歸西郊路。水風吹葛衣。草露溼芒屨。漁歌起遠汀。鬼火出破墓。淒清醒醉魂。荒怪入詩句。到家夜已半。佇立叩蓬戶。穉子猶讀書。一笑慰遲暮。

四鼓酒醒起步庭下

酒解夜過半。出門步中庭。天高河漢白。月淡煙霧青。重滴竹杪露。疎見樹罅星。壞甃啼寒蛩。深竹明孤螢。秋晚雖未霜。蠹葉時自零。四序逝不留。慨然感頽齡。平生茆一把。不博帶萬釘。鷗溝謝拍拍。鴻路追冥冥。

雲門感舊

總角來遊老未忘。背人歲月去堂堂。穉松看到偃霜蓋。廢寺憶曾開寶坊。佛几古燈寒焰短。齋廚新粟午

炊香興闌未忍登車去。更倚溪橋立夕陽。

行在春晚有懷古隱

老辱明時乞一官。逢春惆悵獨無歡。舊人零落北音少。市肆蕭疎民力殫。歸計已栽千箇竹。殘年合挂兩梁冠。石帆山路頻回首。箭茁蓴絲正滿槃。

次韻和楊伯子主簿見贈

齋戒叩頭賤天公。幸矣使我爲枯蓬。枯蓬於世百無用。始得曠快爽秋風。此生安往失貧賤。白髮蕭蕭對黃卷。今人雖鄰有不覲。古人卻向書中見。猿啼月落青山空。舊隱夢寂思東蒙。不願峨冠赤墀下。且可短劍紅塵中。終年無人問良苦。眼望青天惟自許。可憐對酒不敢豪。它日空澆墳上土。文章最忌百家衣。火龍黼黻世不知。誰能養氣塞天地。吐出自足成虹霓。渡江諸賢骨已朽。老夫亦將正丘首。杜郎苦瘦帽掀耳。程子久貧衣露肘。君復作意尋齊盟。豈知衰懦畏後生。大篇一讀我起立。喜君得法從家庭。鯤鵬自有天池著。誰謂太狂須束縛。大機大用君已傳。那遣老夫安注腳。杜興伯高。程有徽文若。皆近以詩文得名于諸公。而尤與予善。

醉中作行草數紙

還家痛飲洗塵土。醉帖淋漓寄豪舉。石池墨瀋如海寬。玄雲下垂黑蛟舞。太陰鬼神挾風雨。夜半馬陵飛萬弩。堂堂筆陣從天下。氣壓唐人折斂股。丈夫本意陋千古。殘虜何足膏礎斧。驛書馳報兒單于。直用毛



錐驚殺汝。

記夢

夢裏都忘兩鬢殘。恍然白紵入長安。睡教紙熟脩溫卷。傲得驢騎候熱官。紅葉滿街秋著句。青樓燒燭夜追歡。如今萬事消除盡。老眼摩挲靜處看。

野興

紅飯青蔬美莫加。鄰翁能共一甌茶。舍西日緊花房斂。港北風生柳腳斜。筇杖不妨閒有伴。茆簷終勝老無家。自驚七十猶強健。采藥歸來見暮鴉。

重午

葉底榴花蹙絳繒。街頭初賣苑池冰。會稽不藏冰。賣者皆自行在來。世間各自有時節。蕭艾著冠稱道陵。

梅雨

沐罷斜簪二十冠。斷雲殘靄暗江干。絲絲梅子熟時雨。漠漠楝花開後寒。剡采芸香辟書蠹。旋春麥麩續家餐。日長倦睫惟思閉。茗椀真須抵死寬。

醉歌

讀書三萬卷。仕宦皆束閣。學劍四十年。木血未染鏢。不得爲長虹。萬丈掃寥廓。又不爲疾風。六月送飛雹。

戰馬死槽櫪。公卿守和約。窮邊指淮淝。異域視京雒。於乎此何心。有酒吾忍酌。平生爲衣食。斂版靴兩腳。心雖了是非。口不給唯諾。如今老且病。鬢禿牙齒落。仰天少吐氣。餓死實差樂。壯心埋不朽。千載猶可作。

蝸廬

小葺蝸廬便著家。槿籬莎徑任欹斜。爲生草草僧行腳。到處悠悠客泛槎。孤蝶惜衣晴曝粉。穉蜂貪蜜晚爭花。有書懶讀吾堪愧。睡起何妨自磴茶。

故山

功名莫苦怨天慳。一櫂歸來到死閒。傍水無家無好竹。卷簾是處是青山。滿籃箭茁瑤簪白。壓擔稜梅鶴頂殷。野興盡時尤可樂。小江煙雨趁潮還。鏡湖。

禹祠行樂盛年年。繡轂爭先罨畫船。十里煙波明月夜。萬人歌吹早鸞天。花如上苑常成市。酒似新豐不直錢。老子未須悲白髮。黃公壚下且閒眠。禹廟。

老尉鴻飛隱市門。千年猶有舊巢痕。陸生於此寓棋局。予二十年前嘗寓居。曾丈時來開酒樽。曾丈謂文清公。渺渺帆

檣遙見海。冥冥蒲葦不知村。數僧也復投詩社。零落今無一二存。梅山。

落磡泉奔舞玉虹。護丹松老臥蒼龍。霜柑籬角寒初熟。野碓雲邊夜自舂。挈榼人沽村市酒。打包僧趁寺樓鐘。幽尋自是年來嬾。枉道山靈不見容。雲門。

冬晚山房書事

山澤何妨老太平。嶮嶮骨相本來清。月明滿地看梅影。露下隔溪聞鶴聲。未辨藥苗逢客問。欲訓琴價約僧評。胡奴仁祖今俱絕。且學湘纍拾菊英。屏迹山村病日增。烏皮几穩得閒凭。凍雲傍水封梅萼。嫩日烘窗釋硯冰。歲盡光陰饒袞袞。身閒醉夢且騰騰。蠻童采藥歸來晚。客至從嗔喚不響。

春雨絕句

恰喜西窗晚照明。虛簷又報雨來聲。端憂不用占龜兆。壞盡花時自解晴。千點猩紅蜀海棠。誰憐雨裏作啼粧。殺風景處君知否。正伴鄰翁救麥忙。天公似欲敗蚕麤。雨冒南山暮不收。駭女癡兒那念此。貪看科斗滿清溝。今年春半不知春。飛雹犇雷嚇殺人。縫得春衫元未著。免教惆悵洛陽塵。梅中最晚是細梅。一日來看欲百回。俗紫凡紅終避舍。不妨自向雨中開。蕭條冬令侵春晚。浙瀝寒聲滴夜長。更事老翁頑到底。每言宜睡好燒香。

山園

買得新園近釣磯。旋營茆棟設柴扉。山經宿雨脩容出。花倚和風作態飛。世事只成驚老眼。酒徒頻約典

春衣狂吟爛醉君無笑。十丈愁城要解圍。

東關

路入東關物象奇。角巾老子曳筇枝。蠶如黑蟻桑生後。秧似青鍼水滿時。穿市不嫌微雨溼。過谿翻喜壞橋危。當年野店題詩處。又典春衣具午炊。雲蹙魚鱗襯夕陽。放翁繫纜水雲鄉。一筇疾步人驚健。斗酒高歌自笑狂。風暝市樓吹絮雪。蚕生村舍采桑黃。東阡南陌無窮樂。底事隨人作許忙。

宿野人家

避雨來投白版扉。野人憐客不相違。林喧鳥雀棲初定。村近牛羊暮自歸。土釜暖湯先濯足。豆蘗吹火旋烘衣。老來世路渾諳盡。露宿風餐未覺非。

北窗

北窗本意傲羲皇。老返園廬味更長。犢健戴星耕白水。蚕飢衝雨采青桑。但儒朱墨開冬學。廟史牲牢祝歲穰。從此鬢毛雖似雪。未妨擊壤頌虞唐。

晚春感事

風惡房櫺燕子歸。雨多山路蕨芽肥。青瓷旋擣作寒食。白葛預裁充暑衣。穉子日長供課早。故人官達寄

書稀幽居自喜渾無事。又向湖陰坐釣磯。  
徙倚闌干送落暉。年華冉冉恨依依。護雛燕子常更出。著雨楊花又嬾飛。已爲讀書悲眼力。還因攬帶歎腰圍。親朋半作荒郊冢。欲話初心淚滿衣。

示兒

舍東已種百本桑。舍西仍築百步塘。早茶采盡晚茶出。小麥方秀大麥黃。老夫一飽手捫腹。不復舉手號蒼蒼。讀書習氣掃未盡。燈前簡牘紛朱黃。吾兒從旁論治亂。每使老子喜欲狂。不須飲酒徑自醉。取書相和聲琅琅。人生百病有已時。獨有書癖不可醫。願兒力耕足衣食。讀書萬卷真何益。

村居初夏

暮境難禁日月催。臘醅初見拆泥開。壓車麥穗黃雲卷。食葉蠶聲白雨來。薄飯蕨薇端可飽。短衫紵葛亦新裁。宦途自古多憂畏。白首爲農信樂哉。  
煮酒開時日正長。山家隨分答年光。梅青巧配吳鹽白。筍美偏宜蜀豉香。風暝緊催蠶上簇。雨餘閒看稻移秧。老夫見事真成晚。浪走人間兩鬢霜。  
天遣爲農老故鄉。山園三畝鏡湖傍。嫩莎經雨如秧綠。小蝶穿花似繭黃。斗酒隻雞人笑樂。十風五雨歲豐穰。相逢但喜桑麻長。欲話窮通已兩忘。

故鄉風物勝荆吳。流水青山無處無。列植園林多美菓。飽鉏畦壟富嘉蔬。橋邊來淬剝桑斧。池畔行芟縛纒菰。我有素紈如月扇。會憑名手作新圖。

新秋感事

江上清秋昨夜回。漁扉正對荻洲開。志存天下食不足。節慕古人讒愈來。風際紙鳶那解久。祭餘芻狗會堪哀。蕭然散髮聽秋雨。剩領新涼入酒盃。

秋思

一生書劍徧天涯。兩歲秋風喜在家。爛醉日傾無算酒。高眠時聽屬私蛙。園林夕照明丹柿。籬落初寒蔓碧花。便擬挂冠君會否。耳根不復耐喧譁。半年閉戶廢登臨。直自春殘病至今。帳外昏燈伴孤夢。簷前寒雨滴愁心。中原形勝關河在。列聖憂勤德澤深。遙想遺民垂泣處。大梁城闕又秋砧。

秋晚思梁益舊遊

幅巾筇杖立籬門。秋意蕭然欲斷魂。恰似嘉陵江上路。冷雲微雨溼黃昏。憶昔西行萬里餘。長亭夜夜夢歸吳。如今歷盡風波惡。飛棧連雲是坦途。滄波極目江鄉恨。衰草連天塞路愁。三十年間行萬里。不論南北怯登樓。

蔬圃

蔬圃依山腳。漁扉竝水涯。臥枝開野菊。殘枿出秋茶。病骨知天色。羈懷感物華。餘年有幾許。且灌邵平瓜。

農家

南畝勤菑穫。西城謹蓋藏。種蕎粢霽日。斫荻待微霜。谿碓新春白。山廚野蕨香。何須北窗臥。始得傲羲皇。

城南上原陳翁。以賣花爲業。得錢悉供酒資。又不能獨飲。逢人輒強與共醉。辛亥九月十二日。偶過其門。訪之。敗屋一間。妻子飢寒。而此翁已大醉矣。殆隱者也。爲賦一詩。

君不見會稽城南賣花翁。以花爲糧如蜜蠶。朝賣一株紫。暮賣一枝紅。屋破見青天。盎中米常空。賣花得錢送酒家。取酒盡時還賣花。春春花開豈有極。日日我醉終無涯。亦不知天子殿前宣白麻。亦不知相公門前築堤沙。客來與語不能答。但見醉髮覆面垂髭髻。

晚飯罷小立門外有作

此心何敢慕輕肥。尙媿無功飽蕨薇。浦面烏衝殘靄去。柳陰人荷一鋤歸。病嗟短髮紛紛白。老覺初心種種非。百步空庭著明月。黃昏手自掩荆扉。

觀梅至花涇高端叔解元見尋

春暎山中雲作堆。放翁艇子出尋梅。不須問信道傍叟。但覓梅花多處來。

山家暮春

遠屋清陰合。緣堤綠草纖。起蠶初放食。新麥已磨鎌。苦筍先調醬。青梅小蘸鹽。佳時幸無事。酒盡更須添。行飯獨相羊。扶藜過野塘。晴光生蝶粉。暝律變鶯吭。麩美羣兒競。蠶飢小婦忙。深知遊宦惡。窮死勿離鄉。

入雲門小憩五雲橋

穀雨初過換夾衣。園林零落到薔薇。鳴鳩日暝遙相應。雛燕風柔漸獨飛。臺省多才吾輩拙。江湖久客算年歸。雲門蹋月方清絕。且倚溪橋看夕霏。

春晚村居雜賦絕句

作堤蜿蜿六百尺。西崦東村成一家。春雨乍晴桑吐葉。秋風初冷稻吹花。鵝兒草綠侵行路。燕子花明照屋除。處處乞漿俱得酒。杖頭何恨一錢無。一篙湖水鴨頭綠。千樹桃花人面紅。茆舍青帘起余意。聊將醉舞答春風。朝書牛券拈枯筆。祭暮蠶神酌凍醪。閒放無憂窮有意。旁人錯羨此翁高。澆書滿把浮蛆螽。攤飯橫眠夢蝶牀。莫笑山翁見機晚。也勝朝市一生忙。午枕閉門無客攪。夜燈開卷有兒同。若爲賤與天公道。盡乞餘生向此中。

東坡先生謂。謂晨飲爲澆書。李黃門謂。午睡爲攤飯。

雨晴



閒曳枯筇自在行。曲廊小閣賞新晴。幽禽葉底吟風久。殘雨枝間照日明。茶映盞毫新乳上。琴橫薦石細泉鳴。亦知老健終難恃。且復蕭然得此生。

六月十四日微雨極涼

湖上清秋近。齋中白日長。雲來樹收影。雨過土生香。蓮小紅衣溼。瓜甘碧玉涼。晚來幽興極。移榻近方塘。

水亭晚眺

暑雨初晴浦面寬。水亭景物卷簾看。聯舟作陣圍漁隊。屈竹成籬護芡盤。四海諸公半丘壘。百年幾夕倚闌干。日沈未用忽忽去。待挽銀河濯肺肝。

蓬萊館午憩

驛門繫馬聽蟬吟。翻動平生萬里心。橋畔笛聲催日落。城邊草色帶煙深。關河歷歷功名晚。歲月悠悠老病侵。憶戍梁州如昨日。憑闌西望一霑襟。

夢遊散關渭水之間

平生望眼怯天涯。客裏何堪度歲華。但恨征輪無四角。不愁歸路有三叉。驛窗燈闇傳秋柝。關樹煙深宿暮鴉。叱犢老翁頭似雪。羨渠生死不離家。

秋夜將曉出籬門迎涼有感

迢迢天漢西南落，喔喔鄰雞一再鳴。  
壯志病來消欲盡，出門搔首愴平生。  
三萬里河東入海，五千仞嶽上摩天。  
遺民淚盡胡塵裏，南望王師又一年。

秋日郊居

秋日留連野老家，朱槃鮮鱸粲如花。  
已炊藟散真珠米，更點丁坑白雪茶。  
藟散米名。丁坑茶名。  
今年斟酌是豐年，社近兒童喜欲顛。  
半醉半醒村老子，家家門口掠神錢。

兒童冬學鬧比鄰，據案愚儒卻自珍。  
授罷村書閉門睡，終年不著面看人。  
農家十月所讀雜字百家姓之類。謂之村書。

新晴

積雨已淒冷，新晴還少和。  
稼收平野闊，木落遠山多。  
土潤朝畦菜，機鳴夜擲梭。  
時清年歲好，吾敢歎蹉跎。

晚眺

秋晚閒愁抵酒濃，試尋高處倚枯筇。  
雲歸時帶雨數點，木落又添山一峯。  
鳴雁沙邊驚客艣，行僧煙際認樓鐘。  
箇中詩思來無盡，十手傳抄畏不供。

九月一日夜讀詩藁有感走筆作歌

我昔學詩未有得，殘餘未免從人乞。  
力孱氣餒心自知，妄取虛名有慙色。  
四十從戎駐南鄭，酣宴軍中夜

連日打毬築場一千步。閱馬列廐三萬疋。華燈縱博聲滿樓。寶釵豔舞光照席。琵琶絃急冰雹亂。羯鼓手  
勻風雨疾。詩家三昧忽見前。屈賈在眼元歷歷。天機雲錦用在我。剪裁妙處非刀尺。世間才傑固不乏。秋  
毫未合天地隔。放翁老死何足論。廣陵散絕還堪惜。

小園

窄窄柴門短短籬。山家隨分有園池。客因問字來攜酒。僧趁分題就賦詩。晨露每看花蕊拆。夕陽頻見樹  
陰移。此二事非閒寂不知也。拂衣司諫猶忙在。此趣淵明卻少知。

九月二十三夜小兒方讀書而油盡口占此詩示之

徹骨貧來累始輕。孤村月上正三更。汝緣油盡眠差早。我亦尊空醉不成。南陌金羈良自苦。北邙麟冢半  
無名。書生事業期千載。得喪從來未易評。

今年立冬後菊方盛開小飲

胡牀移就菊花畦。飲具酸寒手自攜。野實似丹仍似漆。村醪如蜜復如螿。傳方卽解烹羊腳。破戒猶慙擘  
蟹臍。一醉又驅黃犢出。冬晴正要飽耕犁。

步至近村

藥物扶持病漸平。布裘絮帽出柴荆。荒堤經雨多牛跡。村舍無人有碓聲。數蝶弄香寒菊晚。萬鴉回陣夕

楓明老翁隨意閒成句。不似劉侯要取名。

夜讀范至能攬轡錄言中原父老見使者多揮涕感其事作絕句

公卿有黨排宗澤。帷幄無人用岳飛。遺老不應知此恨。亦逢漢節解沾衣。

書適

老翁垂七十。其實似童兒。山果啼呼覓。鄉儻喜笑隨。羣嬉累瓦答。獨立照盆池。更挾殘書讀。渾如上學時。

十一月四日風雨大作

僵臥孤村不自哀。尚思爲國戍輪臺。夜闌臥聽風吹雨。鐵馬冰河入夢來。

病起

少年射虎南山下。惡馬強弓看似無。老病卽今卽可說。出門十步要人扶。

書巢冬夜待旦

掃葉擁堦寒犬行。編茆護柵老雞鳴。風霜漸逼歲時晚。形影相依燈火明。史策千年媿豪傑。關河萬里愴功名。固應死抱無窮恨。老病何由更請纓。

冬晴閒步東村由故塘還舍作

紅藤拄杖獨相羊。路遶東村小嶺傍。水落枯萍黏蟹椀。鄉人植竹以取蟹謂之蟹假。雲開寒日上漁梁。洛陽二頃言

良是光範三書討本狂。歷盡危機識天意。要令閒健反耕桑。

寄宇文成州

成州太守比何如。夢裏依然把臂初。復起卿當用卿法。長閒吾實愛吾廬。五湖風雨狐舟夜。萬里關山一紙書。正使兩翁長隔闊。子孫宅日莫相疎。

春雨

午夜聽春雨。發生端及期。世憂殊未艾。天意固難知。士節承平日。人材南渡時。後生聞見狹。撫枕歎吾衰。

僧廬

僧廬土木塗金碧。四出徵求如羽檄。富商豪吏多厚積。宜其棄金如瓦礫。貧民妻子半菽食。一飢轉作溝中瘠。賦斂鞭笞縣庭赤。持以與僧亦不惜。古者養民如養兒。勸相農事憂其飢。露臺百金止不爲。尙媿七月周公詩。流俗紛紛豈知此。熟視創殘謂當爾。傑屋大像無時止。安得疲民免飢死。

贈劉改之秀才

君居古荊州。醉膽天宇小。尙不拜龐公。況肯依劉表。胸中九淵蛟龍蟠。筆底六月冰雹寒。有時大叫脫烏幘。不怕酒盃如海寬。放翁七十病欲死。相逢尙能刮眼看。李廣不生楚漢間。封侯萬戶宜其難。

春社

太平處處是優場。社日兒童喜欲狂。且看參軍喚蒼鶻。京都新禁舞齋郎。

村夜

寂寂山村夜。悠然醉倚門。月昏天有暈。風軟水無痕。迹為遭讒遠。身由不仕尊。敢嗟車馬絕。同社自雞豚。

困甚戲書

官如枝頭乾。不受雨露恩。身如水上浮。泛泛寧有根。刈茆以苦屋。縛柴以為門。故人分祿米。隣父餉魚殮。前門吏徵租。後門質襦裙。不敢謀歲月。且復支朝昏。雨餘幽花拆。亦可侑清尊。吾生信已乎。終老此山村。

戲詠山陰風物

萬里秦吳稅駕遲。還鄉已嘆髻成絲。城邊綠樹山陰道。水際朱扉夏禹祠。項里楊梅鹽可徹。太白梁國吟云。玉盤楊梅為君設。吳鹽如花皎白雪。不知楊梅酸者。乃薦以鹽。佳品未嘗用也。湘湖蓴菜鼓偏宜。蓴菜最宜鹽鼓。則非羊酪可敵。蓋盛言蓴羹之美。爾。圖經草草尙堪恨。好事它年采此詩。

癸丑七月二十七日夜夢遊華嶽廟

驛樹秋風急。關城暮角悲。平生忠憤意。來拜華山祠。牲碑偽正朔。祠祝虜衣冠。神亦豈堪此。出門山雨寒。

僕頃在征西大幕登高望關輔樂之每冀王師拓定得卜居焉暇日記此意以示子孫

八月殘暑退。秋聲滿庭樹。豈無四方志。衰病迫霜露。遼東黃頭奴。稔惡天震怒。南北會當一。老吾悲不遇。子孫勉西遷。俗厚吾所慕。約已收孤嫠。教子立門戶。黍稌暗阡陌。鶉雉足七箸。永爲河渭民。勿憚關山路。

秋夜感舊十二韻

冷螢綴蓬根。忽復照高樹。年光逝不留。百感集遲暮。往者秦蜀間。慷慨事征戍。猿啼鬼迷店。馬噤飛石鋪。鬼迷店在大散關下。飛石鋪在小益道中。常有崩石。危嶺高入雲。朽棧劣容步。天近星宿大。江惡蛟鼉怒。意氣頗自奇。性命那復顧。最懷清渭上。衝雪夜掠度。封侯細事爾。所冀垂竹素。兜鍪竟何成。豈獨儒冠誤。當時妄校尉。旗纛今照路。浩歌遂成章。聊慰老不遇。

秋晚閒步隣曲以予近嘗臥病皆欣然迎勞

放翁病起出門行。績女窺籬牧豎迎。酒似粥醲知社到。麩如盤大喜秋成。歸來早覺人情好。對此彌將世事輕。紅樹青山只如昨。長安拜免幾公卿。

雨夜

歲晚茆茨劣自容。齒搖將脫髮將童。心遊萬里關河外。身臥一窗風雨中。醫不可招惟忍病。書猶能讀足忘窮。夜闌睡覺蛩聲裏。時見燈花落碎紅。

夢至洛中觀牡丹繁麗溢日覺而有賦

兩京初駕小羊車。顛頓江湖歲月賒。老去已忘天下事。夢中猶看洛陽花。妖魂豔骨千年在。朱彈金鞭一笑譁。寄語氈裘莫癡絕。祈連還汝舊風沙。

秋夜獨酌

壯志隨年減。羈愁與夜長。月高寒暈淡。花坼露叢香。仕畏讒銷骨。歸判酒腐腸。青燈寫孤影。相勸盡餘觴。  
自嘲  
歲月推遷萬事非。放翁可是白頭癡。此生竟出古人下。有志尙如年少時。僻學固應知者少。長歌莫問和予誰。自嘲自解君毋怪。老大從人百不宜。

數日秋氣已深清坐無酒戲題長句

漸近重陽天氣嘉。數椽茆竹淡生涯。山童擁篲掃黃葉。鄰女傍籬收碧花。避俗要生輪四角。出門何啻路三叉。晚窗酒盡無多歎。試問前村好事家。

東村散步有懷張漢州

扶杖村東路。秋來始此回。寒鴉盤陣起。野菊臥枝開。憂國丹心折。懷人雪鬢催。房湖八千里。那得尺書來。

排悶

四十從軍渭水邊。功名無命氣猶全。白頭爛醉東吳市。自拔長劍割彘肩。



西塞山前吹笛聲。曲終已過雒陽城。君能洗盡世間念。何處樓臺無月明。

放歌行

君不見汾陽富貴近古無。二十四考書中書。又不見慈明起自布衣中。九十五日至三公。人生窮達各有命。拂衣徑去猶差勝。介推焚死終不悔。梁鴻寄食吾何病。安用隨牒東復西。獻諛耐辱希階梯。初無公論判涇渭。徒使新貴矜雲泥。稽山一老貧無食。衣破履穿面黧黑。誰知快意舉世無。南山之南北山北。

山頭石

秋風萬木實。春雨百草生。造物初何心。時至自枯榮。惟有山頭石。歲月浩莫測。不知四時運。常帶太古色。老翁一生居此山。腳力欲盡猶躋攀。時時撫石三歎息。安得此身如爾頑。

野興

老去癡頑百不能。非醒非醉日騰騰。敲門惟有徵租吏。好事元無送米僧。舊俗不還誰復念。古書雖在漸難憑。平生意氣今如此。惆悵西窗半夜燈。

古築城曲

築城聲酸嘶。漢月傍城低。白骨若不掩。高與長城齊。嶧山訪秦碑。斷裂無完筆。惟有築城詞。哀怨如當日。

山園

山泉引派漲清池。野蔓移根種短籬。藝果極知非老事。接花聊復効兒嬉。提壺言語開顏聽。斲木衣襦緩步窺。莫笑題詩還滿紙。小園幽事要君知。

古別離

孤城窮巷秋寂寂。美人停梭夜歎息。空園露溼荆棘枝。荒蹊月照狐狸迹。憶君去時兒在腹。走如黃犢爺未識。紫姑吉語元無據。況憑瓦兆占歸日。嫁來不省出門前。魂夢何因識酒泉。粉綿磨鏡不忍照。女子盛時無十年。

病起山居日有幽事戲作

鶴骨龜腸欲不禁。扶衰初喜罷呻吟。盆山冰釋書窗暝。藥竈香濃道院深。筆健乍臨新獲帖。手生重理舊傳琴。閉門局促還堪恨。雲海何時豁此心。

水村曲

山村今年晚禾旱。奏下民租蠲太半。水村雨足米狼戾。也放三分慰民意。看榜歸來迭歌舞。共喜清平好官府。老翁猶記軍興時。汝輩少年那得知。

賽神曲

擊鼓坎坎。吹笙鳴鳴。綠袍槐簡立老巫。紅衫繡裙舞小姑。烏白燭明蠟不如。鯉魚糝美出神廚。老巫前致詞。小姑抱酒壺。願神來享常懽娛。使我嘉穀收連車。牛羊暮歸塞門閭。雞鶩一母生百雛。歲歲賜粟年年蠲。租蒲鞭不施。園土空虛。束草作官。但形模。刻木爲吏。無文書。淳風復還。羲皇初。繩亦不結。況其餘。神歸人散。醉相扶。夜深歌舞官道隅。

涼州行

涼州四面皆沙磧。風吹沙平馬無迹。東門供張接中使。萬里朱宣布襖勅。勅中墨色如未乾。君王心念兒郎寒。當街謝恩拜舞罷。萬歲聲上黃雲端。安西北庭皆郡縣。四夷朝貢無征戰。舊時胡虜陷關中。五丈原頭作邊面。

七十

七十殘年百念枯。桑榆元不補東隅。但存隱具金鴉觜。卮夢朝衣玉鹿盧。身世蠶眠將作繭。形容牛老已垂胡。客來莫問先生處。不釣娥江卽鏡湖。

正月二十日晨起弄筆

深院窗扉曉色遲。新愁宿醉兩參差。雨聲欲與夢相入。春意不隨人共衰。零落殘梅臨小釣。縱橫野水赴清池。物華撩我緣何事。似恐新年漸廢詩。

新闢小園

西戍歸來鬢已霜，生兒又過乃翁長。眼明身健殘年足，飯軟茶甘萬事忘。學廢僅能書姓字，客來嬾復倒衣裳。山園寂寂春將晚，酷愛幽花似蜜香。

新展山園半畝強，笑人車馬出籠坊。山禽乍暖慙勸語，野蘂無風自在香。點點水紋迎細雨，疎疎籬影界斜陽。出門遙向隣翁說，釋耒相從共一觴。

久不得張漢州書

儘道三巴遠，邴無一紙書。衰遲自難記，不是故人疎。

春晚村居

一事元無可得忙，悠然半醉倚胡牀。牡丹枝上青春老，燕子聲中白日長。身世已如風六鷁，文章仍似閔黃楊。太平有象無人識，南陌東阡擣麩香。

遊雲山諸蘭若

花過木陰合，溪雲生暮涼。牛行響白水，鷺下點青秧。古寺宛如昔，穉松森已行。道傍松及三十年，則僧輒伐去，復種小者，予自

幼歲至今，已見三種矣。 耆年不下榻，童子爲燒香。

園中小飲

此老胸中萬頃寬。小園幽徑日追歡。寧教酒欠尋常債。就耻人求本分官。高柳陰濃煙欲暝。叢花紅溼露初溥。時月桂方盛開。要知澤國年光晚。已過清明尙淺寒。

烏啼

野人無曆日。烏啼知四時。二月聞子規。春畊不可遲。三月聞黃鸝。幼婦閔蠶飢。四月鳴布穀。家家蠶上簇。五月鳴鴉舅。苗稚憂草茂。人言農家苦。望晴復望雨。樂處誰得知。生不識官府。葛衫麥飯有卽休。湖橋小市酒如油。夜夜扶歸常爛醉。不怕行逢灞陵尉。

題陽關圖

誰畫陽關贈別詩。斷腸如在渭橋時。荒城孤驛夢千里。遠水斜陽天四垂。青史功名常蹭蹬。白頭襟抱足乖離。山河未復胡塵暗。一寸孤愁只自知。

夜分不寐起坐園中至旦

涼氣蘇衰疾。幽情入杖藜。月驚孤鵲起。天帶衆星西。松菊今彭澤。山川古會稽。清吟殊未愜。喔喔已晨雞。

醉睡初覺偶作

小圃醒還醉。幽窗起復眠。虛明炷香地。清潤斲花天。老去才雖盡。窮來志益堅。阿瞞那可語。平日笑橋玄。

閒中

閒中高趣傲羲皇。身臥維摩示病牀。活眼硯凹宜墨色。長毫甌小聚茶香。門無客至惟風月。案有書存但老莊。問我東歸今幾日。坐看庭樹六番黃。

悶極有作

貴己不如賤。狂應又勝癡。新寒壓酒夜。微雨種花時。堂下藤成架。門邊枳作籬。老人無日課。有興卽題詩。

三峽歌

乾道庚寅。予始入蜀。上下三峽。屢矣。後二十五年。歸畊山陰。偶讀梁簡文巴東三峽歌。感之。擬作九首。實紹熙甲寅十月二日也。

神女廟前秋月明。黃牛峽裏暮猿聲。危途性命不容恤。百丈牽船侵夜行。不怕灘如竹節稠。新灘已過可無憂。古粧峨峨一尺髻。木盎銀盃邀客舟。十二巫山見九峯。船頭彩翠滿秋空。朝雲暮雨渾虛語。一夜猿啼明月中。錦繡樓前看賣花。麝香山下摘新茶。長安卿相多憂畏。老向夔州不用嗟。險詐沾沾不媿天。交情回首薄如煙。東遊萬里雖堪樂。濫瀕瞿塘要放船。蠻江水碧瘴花紅。白舫黃旗無便風。涪萬四時常避水。棚居高出亂雲中。亂插山花簪子紅。蠻歌相和灑西東。忽然四散不知處。踏月捫蘿歸洞中。

萬州溪西花柳多。四鄰相應竹枝歌。問君今夕不痛飲。奈此滿川明月何。  
我游南賓春莫時。蜀船曾繫挂猿枝。雲迷江岸屈原塔。花落空山夏禹祠。

書室明煖終日。婆娑其間倦則扶杖。至小園戲作長句。

美睡宜人勝按摩。江南十月氣猶和。重簾不捲留香久。古硯微凹聚墨多。  
月上忽看梅影出。風高時送鴈聲過。一杯太淡君休笑。牛背吾方扣角歌。

初冬

老客人間百事慵。樂哉閉戶過今冬。朝爐獸炭騰紅焰。夜榻蠻氈擁紫茸。  
蝟刺坼蓬新栗熟。鵝雛弄色凍醅濃。題詩正自消閒日。本不爭先萬戶封。

幽居

雨霽雞棲早。風高雁陣斜。園丁刈霜稻。村女賣秋茶。缺井磨樵斧。枯桑繫釣槎。  
客來那用問。此是放翁家。

冬夜獨酌

寒水茫茫浸月明。疎鐘杳杳帶霜清。一樽濁酒有妙理。十里荒鷄非惡聲。  
物外雖增新跌宕。胸中未洗舊崢嶸。頽然坐睡蒲團穩。殘火昏燈伴五更。

雜詠園中菓子

不酸金橘種初成。無核枇杷接亦生。珍產已從幽圃得。濁醪仍就小槽傾。  
漿石榴隨餠作節。蠟櫻桃與酪同時。兩株偶向池邊種。可喜今年墜折枝。  
架垂馬乳收論斛。港種雞頭采滿船。龜鼎若爲占食指。麴車未用墮饑涎。  
山杏谿桃本看花。纍纍成實亦堪誇。鹽收蜜漬饒風味。送與山僧下夜茶。

歲莫感懷

家世本無年。甲子近一周。小子獨何幸。七十今平頭。往者收朝迹。亟欲求歸休。  
厚恩許奉祠。得祿歲愈憂。三釜不及親。顧爲妻子留。何由洗此媿。欲挽天河流。  
高皇昔中興。風雨躬沐櫛。一士未嘗遺。萬里皆馳日。廉聽闢言路。虛懷詢得失。  
孤臣實艸芥。亦獲對宣室。龍顏宛在目。德不報萬一。橋出松柏寒。淚盡史臣筆。  
王師宿梁益。行臺護諸將。腐儒添辟書。萬里至渭上。旌旗照關路。風雪暗戎帳。  
堂堂鐵馬陣。疊疊木牛餉。誰知骨相薄。空負心膽壯。回首二十年。撫事增悲愴。  
在昔祖宗時。風俗極粹美。人材兼南北。議論忘彼此。誰令各植黨。更仆而迭起。  
中更夷狄禍。此風猶未已。臣不難負君。生者固賣死。儻築太平基。請自厚俗始。  
井地以養民。整整若棋畫。初無甚貧富。家有五畝宅。哀哉古益遠。禍始開阡陌。  
富豪役千奴。貧老無寸帛。



困窮禮義廢。盜賊起促迫。誰能講古制。壽我太平脈。

贈應秀才

過宋不見元城公。渡淮不見陳了翁。當時人人皆太息。至今海內傾高風。老夫七十居鄉縣。齷齪龍鍾何足見。辱君雪裏來叩門。自說辛勤求識面。我得茶山一轉語。文章切忌參死句。知君此外無他求。有求寧踏三山路。

山園雜詠

祠祿留人未挂冠。山園三畝著身寬。百年竟向愁邊老。萬事元輸靜處看。花徑糝紅供晚醉。月天生暈作春寒。汗青事業都忘盡。時賴吾兒舉話端。殘春終日在林亭。散髮披衣醉復醒。科斗已成鼃閣閣。櫻桃初結子青青。魚遊滄海寧濡沫。禽慕雕籠卽翦翎。薄晚東風吹小雨。笑攜長鑷伴畦丁。

春晚懷山南

梨花堆雪柳吹綿。常記梁州古驛前。二十四年成昨夢。每逢春晚卽悽然。壯歲從戎不憶家。梁州裘馬鬪豪華。至今夜夜尋春夢。猶在吳園藉落花。身寄江湖兩鬢霜。金鞭朱彈夢猶狂。遙知南鄭城西路。月與梨花共斷腸。

春晚雜興

澤國固多雨。莫春猶薄寒。兒童葺茶舍。婦女賽蚕官。閱世年雖往。為農興未闌。窮途得一飽。亦足慰艱難。  
 池面萍初紫。墻頭杏已青。攜兒撐小艇。留客坐孤亭。相法無侯骨。生平直酒星。正須遺萬事。莫遣片時醒。  
 小市湖橋北。幽居石埭西。蒲深姑惡哭。樹密姊歸啼。山茗封青箬。村醪坼赤泥。平生汗簡手。投老慣扶犁。  
 病瘍無意緒。閉戶作生涯。草草半盂飯。悠悠一盃茶。笑穿居士屨。閒看女郎花。唐人謂辛夷為女郎花。園中有此花。一叢二百  
 朶。莫問明朝事。忘家即出家。

齋中雜題

列屋娥眉不足誇。可齋別自是生涯。閒將西蜀團窠錦。自背南唐落墨花。  
 棐几硯涵鸚鵡眼。古奩香斲鷓鴣斑。絕知造物慙懃意。成就衰翁到死閒。

上巳書事

單衣初著下湖天。飛蓋相隨出郭船。得雨人人喜秧信。祈蠶戶戶斂神錢。黃雞煮臠無停筯。青韭淹菹欲  
 墮涎。丞相傳聞又三押。衡茅未改日高眠。

春夏之交風日清美欣然有賦

芳潤園林不似貧。年光無盡逐番新。來禽顏色不禁雨。搏黍語言如惜春。身外豈關吾輩事。鏡中已換昔

時人神僊定未超塵俗。猶插金貂侍帝晨。

初夏行平水道中

老去人間樂事稀。一年容易又春歸。市橋壓擔蓴絲滑。村店堆盤豆莢肥。傍水風林鸚語語。滿園煙草蝶飛飛。郊行已覺侵微暑。小立桐陰換夾衣。

幽棲

閒人了無事。地僻稱幽棲。眇米留雞食。移琴避燕泥。桐生窗欲暗。筍長徑還迷。不作容車計。門閭儘放低。誰謂幽棲陋。茅茨足庇牀。雨便梧葉大。風度練花香。浴佛兒童喜。繅絲婦女忙。竭來三十載。吾鬢固宜霜。  
乾道丙戌始卜居鏡湖之三山。今甫三十年矣。

十月十七日。予生日也。孤村風雨蕭然。偶得二絕句。予生淮上。是日平日。大風雨駭人。及予墮地。雨乃止。

少傅奉詔朝京師。櫂船生我淮之湄。宣和七年冬十月。猶是中原無事時。我生急雨暗淮天。出沒蛟鼉浪入船。白首功名無尺寸。茅簷還聽雨聲眠。

枕上偶成

放臣不復望修門。身寄江頭黃葉村。酒渴喜聞疎雨滴。夢回愁對一燈昏。河潼形勝寧終棄。周漢規模要

細論。自恨不如雲際雁。南來猶得過中原。

舍北閒望作六字絕句

潘岳一篇秋興。李成八幅寒林。舍北偶然倚杖。盡見古人用心。

題庵壁

身似蝸牛麤有廬。卻緣無用得安居。地爐封火欺寒雨。紙閣油窗見細書。麪熟山僧分餽。船來溪友餉薪樗。閉門莫笑衰頽甚。讀易論詩亦未疎。

貧甚作短歌排悶

閒何濶。逢諸葛。畏人常憂不得活。事不諧。問文開。不謁權門更可哀。卽今白髮如霜草。一飽茫然身已老。惟有躬耕差可爲。賣劍買牛悔不早。年豐米賤身獨饑。今朝得米無薪炊。地上去天八萬里。空自呼天天豈知。

雨夜有懷張季長少卿

放翁雖老未忘情。獨臥山村每自驚。鼎鼎百年如電速。寥寥一笑抵河清。梅初破。藟行江路。燈欲成。花聽雨聲。正用此時思劇飲。故交零落愴餘生。

春思

七十老翁身退耕。可憐未減舊風情。典衣取酒那論價。秉燭看花每到明。江浦時時逢畫楫。寺樓處處聽新鶯。此生無復陽關夢。不怕樽前唱渭城。

丙辰上元前一日

弊裘破帽髮鬢髻。宛似山房罷講僧。身病不禁連夜雨。家貧只挂去年燈。修椽柳外掀樓角。危檻雲間露塔層。自笑閒遊本無定。與闌隨處倚枯藤。

懷舊

狼煙不舉羽書稀。幙府相從日打圍。最憶定軍山下路。亂飄紅葉滿戎衣。翠崖紅棧鬱參差。小益初程景最奇。誰向豪端收拾得。李將軍畫少陵詩。

幽居初夏

湖山勝處放翁家。槐柳陰中野徑斜。水滿有時觀下鷺。草深無處不鳴蛙。籊龍已過頭番筍。木筆猶開第一花。歎息老來交舊盡。睡餘誰共午甌茶。

六月二十四日夜分。夢范至能李知幾尤延之同集江亭。諸公請予賦詩。記江湖之樂。詩成而覺。忘數字而已。

露箬霜筠織短篷。飄然來往淡煙中。偶經菱市尋谿友。卻揀蘋汀下釣筒。白菡萏香初過雨。紅蜻蜓弱不

禁風吳中近事君知否。團扇家家畫放翁。

閒居自述

自許山翁嬾是真。紛紛外物豈關身。花如解笑還多事。石不能言最可人。淨掃明窗憑素几。閒穿密竹岸烏巾。殘年自有青天管。便是無錐也未貧。

秋雨初霽試筆

墨入紅絲點漆濃。閒將倦筆寫秋容。雨聲已斷時聞滴。雲氣將歸別起峯。斜日半穿臨水竹。好風遙送隔城鐘。遠遊更動輕舟興。太息何人解見從。

舍北搖落景物殊佳偶作

路擁新霜葉。溪餘舊漲沙。栖烏初滿樹。歸鴨各知家。世事元堪笑。吾生固有涯。南村聞酒熟。試遣小童賒。屋角成金字。溪流作縠紋。斜通小橋路。半掩夕陽門。孤艇衝煙過。疎鐘隔塢聞。杜門非獨病。實自厭紛紛。草徑人稀到。柴扉手自開。林疎鴉小泊。溪淺鷺頻來。簷角除瓜蔓。牆隅斲芋魁。東鄰臠肉至。一笑舉新醅。

醉中信筆作四絕句既成懼觀者不知野人本心也復作一絕

麥野桑村有酒徒。過門相覓醉相扶。朱門日日教歌舞。也有儂家此樂無。過得一日過一日。人間萬事不須謀。鄰家幸可賒芳醞。紅藥何曾笑白頭。

今朝賣穀得青錢。自出街頭買彘肩。艸火燎來香滿屋。未容下筯已流涎。  
老病人間足畏途。怕人渾似怕於菟。清明頗動青鞵興。先探門前有客無。  
治道巍巍本易成。狂言安得略施行。太平事業人皆見。不計封倫死與生。

睡起至園中

春風忽已遍天涯。老子猶能領物華。淺碧細傾家釀酒。小紅初試手栽花。  
野人易與輸肝肺。俗語誰能挂齒牙。更欲世間同省事。勾回蟻戰放蜂衙。

雨中作

三日雨頻作。昏昏饒睡眠。泥深散酒市。風惡惱燈天。茆屋松明照。茶鐺雪水煎。  
山家自成趣。撫枕寄悠然。短髮白如絲。梅花似舊時。掩屏愁入夢。隱几雨催詩。  
病爲陰天劇。春緣閏歲遲。非關畏車馬。衰甚實難支。

立春日

花壓烏巾酒滿卮。舊逢春日恨春遲。如今病臥孤村裏。過了新春也不知。

春行

九日春陰一日晴。強扶衰病此閒行。猩紅帶露海棠溼。鴨綠平堤湖水明。  
杜子美曉看紅溼處。花重錦官城。李太白蜀江紅且明。  
酒賤柳陰逢醉臥。土肥稻壟看深耕。山翁莫道渾無用。解與明時說太平。  
用溼字明字。可謂奪造化之功。世未有拈出者。

賞花至湖上

吾國名花天下稀。園林盡日敞朱扉。蝶穿密葉常相失。蜂戀繁香不記歸。欲過用愁風蕩漾。半開卻要雨霏微。良辰樂事真當勉。莫遣忽忽一片飛。

莫春

數間茆屋鏡湖濱。萬卷藏書不救貧。燕去燕來還過日。花開花落卽經春。開編喜見生平友。照水驚非曩歲人。自笑滅胡心尙在。憑高慷慨欲忘身。

七十三吟

七十三年事事新。涵濡幸作六朝民。髮無可白方爲老。酒不能賒始覺貧。末路已悲身是客。此心猶與物爲春。柴門勿謂常岑寂。時有鄉鄰請藥人。

舍北行飯書觸目

晚殮初潑一甌茶。曳杖閒行興未涯。煙樹參差墨濃淡。風鴉零亂字橫斜。夕陽偏傍平橋路。寒蝶猶依晚菊花。堪笑衰翁耐荒寂。短衣霑露未還家。

春近山中卽事

節物貧家有故常。春盤蠟粥逐時忙。悠悠歲月催雙鬢。草草雞豚薦一觴。人意自殊平日樂。梅花寧減故



時香。小園新展西南角。挂樹青蘿百尺長。

雪夜感舊

江月亭前樺燭香。龍門閣上馱聲長。亂山古驛經三折。小市孤城宿兩當。晚歲猶思事鞍馬。當時那信老耕桑。綠沉金鎖俱塵委。雪洒寒燈淚數行。

將進酒

我欲挽住北斗杓。常指蒼龍無動搖。春風日夜吹草木。只有榮盛無時凋。我欲剗斷日行道。陽鳥當空月杲杲。非惟四海常不夜。亦使人生失衰老。如山積麴高崔嵬。大江釀作蒲萄醅。頽然一醉三千盃。借問白髮何從來。

雜感

志士山棲恨不深。人知已是負初心。不須先說嚴光輩。直自巢由錯到今。百年鼎鼎成何事。寒暑相催卽白頭。縱得金丹真不死。摩挲銅狄更添愁。山人那信宦途艱。強著朝衣趁曉班。豪氣不除狂態作。始知只合死空山。故舊書來訪死生。時聞剝啄叩柴荆。自嗟不及東家老。至死無人識姓名。

幽居

小舫藤爲纜。幽居竹織門。短籬圍藕蕩。細路入桑村。魚膾槎頭美。醅傾粥面渾。殘年謝軒冕。猶足號黎元。

夏日

過眼春光久已空。曬絲擣麥又匆匆。新泥滿路梅黃雨。古木號山月暈風。角黍菱新間鱗俎。靈符墨溼照房櫳。歲華不爲衰翁駐。且付餘生一笑中。雨斷雲歸旋作晴。尙餘紅溼在簾旌。燕雛掠地飛無力。梅子臨池墜有聲。米糲解包供午餉。萍壑傍枕析朝醒。此翁不負頑軀處。捫腹時時遠舍行。

感舊

要識梁州遠。南山在眼邊。霜郊熊撲樹。雪路馬蒙氈。慘淡遺壇側。拜韓信壇。至今猶存。蕭條古廟塢。沔陽有蜀後主所立武侯

廟百詩猶可想。歎息遂無傳。予山南雜詩百餘篇。舟行過望雲灘。墜水中。至今以爲恨。

夜涉南沮水。朝過小益城。梯山天一握。度棧土微平。雨近秦雲暗。霜高隴月明。至今孤夢裏。喝馬有遺聲。

喝馬皆七字韻語。聞之悲愴動人。

早發金堆市。更衣石櫃亭。灘聲秋後壯。山色雨餘青。道濘愁車轍。橋危避駝鈴。功名竟何在。撫事感頽齡。

塵土暗貂裘。森然白髮稠。年光眞袞袞。吾事竟悠悠。馬宿平沙夜。軍中馬及廐卒。夏夜皆露宿沙上。烽傳絕塞秋。平安火並

南山來至山。南山下。故人零落盡。追寫只添愁。

秋夕露坐作

銀河半落露華清。南斗闌干北斗明。冉冉方悲老將至。纖纖又歎月初生。酒牀細滴香浮瓮。衣杵相聞聲滿城。萬卷讀書無用處。卻將耕稼報昇平。

秋思

身似龐翁不出家。一窗自了淡生涯。山薑零落初成子。石竹淒涼半吐花。寒澗挹泉供試墨。墮巢篝火喚煎茶。掩關本意君知否。兩耳衰年不耐譁。

豐歲

豐歲驩聲動四鄰。深秋景氣粲如春。羊腔酒擔爭迎婦。鼙鼓龍船共賽神。處處喜晴過甲子。家家築屋趁庚申。老翁欲伴鄉閭醉。先辦長衫紫領巾。

秋賽

柳姑廟前煙出浦。冉冉縈空青一縷。須臾散作四山雲。明日來爲社公雨。小巫屢舞大巫歌。士女拜祝肩相摩。芳茶綠酒進雜遝。長魚大截高嵯峨。常年徵科煩箠楚。縣家血溼庭前土。妻啼兒號不敢怨。期會常憂累官府。今年家家有餘粟。縣符未下輸先足。木刻吏蒲作鞭。自然粟帛如流泉。儲積不愁無九年。

小舟過吉澤效王右丞

澤園霜露晚。孤村煙火微。本去官道遠。自然人迹稀。木落山盡出。鐘鳴僧獨歸。漁家閒似我。未夕閉柴扉。

太息

自古才高每恨浮。偉人要是出中州。即今未必無房魏。埋沒胡沙死即休。關輔堂堂墮虜塵。渭城杜曲又逢春。安知今日新豐市。不有悠然獨酌人。

歲首書事

東風入律寒猶劇。多稼占祥雪欲成。雲陰作雪。彌旬。至開歲。雪意愈濃。鬱壘自書誇腕力。屠蘇不至今歲無餽。屠蘇者。呼盧院落。譁新歲。鄉俗歲夕聚博。謂之試年庚。賣困兒童起五更。立春未明。相呼賣。白髮滿頭。能且健。剩隨鄰曲樂昇平。

菴中獨居感懷

無錢溪女亦留魚。有雨東家每借驢。藜粥數匙晨壓藥。松肪一碗夜觀書。黃紬被暖閒無厭。白布衫長樂有餘。南陌東阡春事動。放翁作計未全疎。

春日園中作

杏花開過尙輕寒。盡日無人獨倚闌。久別名山憑夢到。每思舊友取書看。塵埃幸已賒腰折。富貴深知欠面團。老去逢春都有幾。一杯行復送春殘。

春日小園雜賦

市塵不到放翁家。繞麥穿桑野徑斜。夜雨長深三尺水。曉寒留得一分花。悶從鄰舍分春瓮。閒就僧窗試露芽。自此年光應更好。日驅秧馬聽縑車。

春思

兀兀治蠶酒未醒。霏霏潑火雨初晴。愁看入戶桃花片。閒聽爭巢燕子聲。百疾侵陵成老大。一春轉盼又清明。蘭亭禹廟渾如昨。回首兒時似隔生。

白樂天詩云。倦倚繡牀。愁不動。緩垂綠帶。髻鬟低。遼陽春盡無消息。夜合花前日又西。好事者畫之爲倦繡圖。此花以五六月開山中。多于茨棘。人殊不貴之。爲賦小詩以寄感歎。

王室東遷歲月賒。兩京漠漠暗胡沙。繡牀倦倚人何在。風雨漫山夜合花。

蜉蝣行

蜉蝣至細能知時。春風磴雨占無遺。蜻蜓滿空乃不知。庭除一出無歸期。樂哉蜻蜓高下飛。蜉蝣未盡何憂飢。簷間蜘蛛亦伺汝。吐絲織網腹如鼓。

村舍雜書

中春農在野。蚕事亦隨作。手種臨安青。桑名可飼蠶百箔。累累繭滿簇。繹繹絲上簞。老子雖安眠。衣帛可無作。

舍南種胡麻。三日幸不雨。晨起親按行。已見青覆土。窮人如意少。喜色漏眉宇。兒童勿惰偷。造物不負汝。五月新麵成。六月甘瓜熟。作麪及良時。火見金始伏。懸知桑落後。醅面濃如粥。再拜謝天公。無功叨美祿。  
予家釀法。用宛丘瓜麪。

折蓮釀作醯。采豆治作醬。開曆揆日時。汲井滌瓮盎。上奉時祭須。下給春耕餉。咨爾後之人。歲事不可曠。東山石上茶。鷹爪初脫鞵。雪落紅絲磴。香動銀毫甌。爽如聞至言。餘味終日留。不知葉家白。亦復有此不。逢人乞藥栽。鬱鬱遂滿園。玉芝來天姥。黃精出雲門。丹苗雨後吐。綠葉風中翻。活人吾豈能。要有此意存。軍興尙戎衣。冠帶謝褒博。秃巾與小襲。顧影每懷作。及今反士服。始覺榮天爵。出入阡陌間。終身有餘樂。讀書乃一癖。我亦不自知。坐書窮至老。更欲傳吾兒。吾兒復當傳。百世以爲期。君看北山公。太行尙可移。爵祿九鼎重。名義一羽輕。人見共如此。吾道何由行。湖山有一士。無人知姓名。時時風月夕。遙聞清嘯聲。

陳阜卿先生爲兩浙轉運司考試官。時秦丞相孫以右文殿修撰來就試。直欲首送。阜卿得予文卷。擢置第一。秦氏大怒。予明年旣顯黜。先生亦幾陷危機。偶秦公薨遂已。予晚歲料理故書。得先生手帖。追感平昔。作長句以識其事。不知衰涕之集也。

冀北當年浩莫分。斯人一顧每空羣。國家科第與風漢。天下英雄惟使君。後進何人知大老。橫流無地寄斯文。自憐衰鈍辜真賞。猶竊虛名海內聞。

東堂睡起

置身事外息吾黥。獨臥空堂一榻橫。簷影漸移知日轉。樹梢微動覺風生。每從山寺開經帙。間就園公辨藥名。若論胸中淡無事。八珍何得望藜羹。

五鼓起坐待旦

睡覺初聞雞一鳴。披衣危坐待窗明。殘軀已向閑中老。癡夢猶尋熟處行。南北迢迢悲往事。古今莽莽歎浮生。伯倫一鍤君休笑。冢象祁連亦已平。

遣興

湖海元為汗漫游。誤恩四領慢亭秋。掃空薄祿始無媿。閉上衡門那得愁。湯嫩雪瀉翻茗椀。火溫香縷上衣篝。牀頭亦有閑書卷。信手拈來倦即休。

書齋壁

平生憂患苦縈纏。菱刺磨成芡實圓。俗謂困折多者。謂菱角磨作鷄頭。天下不知誰竟是。古來惟有醉差賢。過堂未悟鐘將覺。睨柱寧知壁偶全。自笑為農行沒世。尚知驚雁落空弦。

無酒歎

不用塞黃河。不用出周鼎。但願酒滿家。日夜醉不醒。不用冠如箕。不用印如斗。但願身強健。朝莫常飲酒。

造物不少恕。虐戲逐段新。坐令古銅榼。經月常生塵。平生得酒狂無敵。百幅淋漓風雨疾。造物欲以醒困之。此老醒狂君未知。

舟中作

沙路時晴雨。漁舟日往來。村村皆畫本。處處有詩材。炊黍孤煙晚。呼牛一笛哀。終身看不厭。岸幘興悠哉。

秋晚

木落寺樓出。江平沙渚生。牛羊下殘照。鼓角動高城。寒至衣猶質。憂多夢自驚。羣胡方鬪穴。河渭幾時清。

西窗獨酌

卻掃衡門歲月深。殘骸況復病交侵。平生所學爲何事。後世有人知此心。水落枯萍黏破塊。霜高丹葉照橫林。一樽濁酒西窗下。安得無功與共斟。

種蔬

老翁老去尙何言。除卻翻書卽灌園。處處移蔬菜。小雨時時拾礫繞頽垣。江鄉地暖根常茂。旱歲蟲生葉未繁。四壁愈空冬祭近。更催穉子牧雞豚。

新治暖室

小堂穩暖紙窗明。低幌圍爐亦已成。日閱藏經忘歲月。時臨閣帖雜真行。詩才退後愁酣戰。酒量衰來喜



細傾從此過冬那復事。夜深時聽雪來聲。

歲晚

無窮世事浩難量。歲晚沉綿臥草堂。短褐坼圖移曲折。故書經蠹失偏傍。賣刀擬買春耕犢。挾筴曾忘舊牧羊。點檢生涯還自笑。菜畦殘葉帶新霜。

吳中冬蔬常茂。

齋中弄筆偶書示子聿

左右琴樽靜不譁。放翁新作老生涯。焚香細讀斜川集。候火新烹顧渚茶。書爲半酣差近古。詩雖苦思未名家。一窗殘日呼愁起。裊裊江城咽莫笳。

新籬

新籬三面北通門。藤架陰中細路分。天雨淡青成卵色。水波微皺作靴紋。參差村舍穿林出。縹渺漁歌隔浦聞。忽覺楚鄉來眼底。欲題幽句弔湘君。

村興

身老交情見孫生。口數添園丁上牛米。村婢博蚕鹽。粃粒堆盤白。餠餠出釜甜。閉門君勿謂。衰病正相兼。

小圃獨酌

少時裘馬競豪華。豈料今爲老圃家。數點霏微社公雨。兩叢閒淡女郎花。詩成枕上常難記。酒滿街頭卻

易賒自笑邇來能用短。只將獨醉作生涯。

春日

方池澗澗碧波平。曲徑纖纖細草生。席地幙天君但醉。苦無多日是清明。  
雪山萬疊看不厭。雪盡山青又一奇。今代江南無畫手。矮牋移入放翁詩。  
怕見公卿嬾入城。野橋孤店跨驢行。天公遣足看山願。白盡髭鬚卻眼明。

新晴野步

吹盡浮雲旋作晴。郊原高下水縱橫。煙蕪漫漫如添色。谷鳥關關已變聲。  
迨酒賤時須痛飲。得人扶處儘閒行。隔湖遙指蘭亭路。鄰叟追隨羨眼明。

夜行過一大姓家值其樂飲戲作

村豪聚飲自相歡。燈火歌呼鬧夜闌。醉飽要勝飢欲死。看渠也復面團團。

貧甚賣常用酒杯作詩自戲

桃李成塵渾不數。海棠也作胭脂雨。清明未到春已空。枝上流鶯替人語。  
逢春日日合醉歸。莫笑典衣窮杜甫。生時不肯澆舌本。死後空持醅墳土。  
門前三百里湖光。天與先生作醉鄉。銀杯羽化不須歎。多錢使  
入生窟郎。

東園小飲

乞得殘骸老故山。草亭終日對孱顏。孤雲百尺起江際。幽鳥數聲鳴竹間。衆死一身今獨健。人忙萬物本常閒。此心欲語知誰聽。賴有漁樵日往還。

龜堂晚興

九日春陰一日晴。回塘閒院愜幽情。小魚出水圓紋見。輕燕穿簾折勢成。今日揜關真佚老。向來涉世亦遺民。巡簷更有欣然處。新筍初抽四五莖。

齋中雜興十首以丈夫貴壯健慘戚非朱顏爲韻

成童入鄉校。諸老席函丈。堂堂韓有功。英槩今可想。從父有彥遠。早以直自養。始終臨川學。力守非有黨。紛紛名它師。有泚在其類。二公生氣存。千載可畏仰。士生學六經。是爲聖人徒。處當師顏原。出當致唐虞。斯文陣堂堂。臨敵獨援枹。異端滿天下。一掃可使無。乃知立事功。先要定規模。彼雖力移山。安能奪匹夫。公議在天下。如人有元氣。平居失護養。一旦可勝諱。神丹卒難求。百疾起如蝟。奄奄息僅屬。熟視吁可畏。大義在春秋。遺跡悲漢魏。君看徐孺子。底物視富貴。昔我自蜀歸。耆舊已凋喪。後來二三公。尙慰天下望。千里一紙書。殷懃問亡恙。嗚呼亦已矣。遺語寄悲愴。

我亦迫桑榆。便恐無輩行。夜窗對青燈。力憊心尙壯。  
餘齡垂八十。雖憊猶強飯。正如老病馬。風沙時一噴。玉關眇何許。道里何啻萬。目中埃歷歷。欲進不能寸。  
矯首望秋空。徒羨霜鶻健。葬骨亦何悲。吾非麒麟楮。  
琅琅誦詩書。尙記兩髦髡。誰料七十年。沉滯終坎窞。炊突映茅廬。日莫煙慘慘。忍窮端已熟。撫事空自感。  
狂言悔噬臍。衆訾驚破膽。尙有愛書心。還如嗜菖歎。  
去國已酉冬。忽見十頽曆。衰殘口兩齒。困阨家四壁。時看溪雲生。飽聽簷雨滴。悠然度寒暑。何處著欣戚。  
幽人豈知我。月夕聞吹笛。何當五百歲。相與摩銅狄。湖中風月佳時。每聞笛聲。凄甚。莫知何人。意其隱君子也。  
扁舟東下峽。日月去若飛。當時筆硯舊。久已晨星稀。俊逸如伯渾。簡詣如知幾。天高鬼神惡。回首萬事非。  
我欲泝黃牛。買屋居青衣。九原不可作。哀哉誰與歸。  
荷鋤草堂東。藝花二百株。春風一朝來。白白兼朱朱。南列紅薇屏。北界綠芋區。偃蹇雙松老。森聳萬竹隴。  
餘地不忍蕪。插援引瓠壺。何當拂東絹。畫作山園圖。  
閒居寂無客。柴門晝常關。孤舟小於葉。放浪煙水間。樹暗楊梅村。露下白蓮灣。釣魚樵風涇。買酒石帆山。  
向來支許輩。恐亦無此閒。道逢若耶叟。握手開蒼顏。

觀畫山水

古北安西志未酬。人間隨處送悠悠。騎驢白帝城邊雨。挂席黃陵廟外秋。大網截江魚可膾。高樓臨路酒如油。老來無復當年快。聊對丹青作臥遊。

讀蘇叔黨汝州北山雜詩次其韻

暑耘日炙背。寒耕泥沒腳。衆人占膏腴。我獨治磽确。力盡功未見。厥土但如昨。豈惟窘糠粃。直恐轉溝壑。今年雨暘時。天如相耕穫。屋傾未暇扶。且復補籬落。祠官粟一囊。不贍驅七尺。前年蒙寬恩。例許乞骸骨。聯翩三兒子。俱作鶴雀碧。賦祿雖尙遠。亦足慰衰白。幅巾茆簷下。稱病謝來客。從今門前路。永掃車馬跡。德孫秀眉宇。慨然修初服。枯腸貯詩書。十飯九不肉。成童將覓舉。想見袍立鵠。先澤儻未衰。豈無五秉粟。汝能記吾言。併以告阿福。閉門勿雜交。一經萬事足。

枕上作

蕭蕭白髮臥扁舟。死盡中朝舊輩流。萬里關河孤枕夢。五更風雨四山秋。鄭虔自笑窮耽酒。李廣何妨老不侯。猶有少年風味在。吳牋著句寫清愁。

示友

道向虛中得。文從實處工。凌空一鷲上。赴海百川東。氣骨真當勉。規模不必同。人生易衰老。君等勿怱怱。

開東關路北至山脚因治路傍隙地雜植花草

清溝東畔翦蓁菅。雖設柴門盡日關。遠引寒泉成碧沼。稍通密竹露青山。幽花泣露開仍落。好鳥穿林去復還。更上橫岡吾所愛。小兒試覓屋三間。

父子追隨一笑傾。東園東畔路初成。夾栽芳草如繩直。前出籬門似砥平。春近野梅香欲動。雨餘溝水細無聲。今朝有喜誰能識。不用人扶亦自行。

病眼逢人每嬾開。正須此地洗氛埃。數枝梅向林梢出。一脈泉從嶺背來。藤杖有時緣石磴。風爐隨處置茶杯。殘軀自笑如春草。又喜天邊斗柄回。

連日治圃至山亭又作五字

好竹千竿翠。新泉一勺冰。殘蕪襯落日。老木上寒藤。細磴欹難過。危欄曲可憑。歸時忽已暮。點點數漁燈。

歲莫書懷

世事從來不可常。把茆猶幸得深藏。牀頭酒瓮寒難熟。瓶裏梅花夜更香。薄命元知等蟬翼。畏途何處不羊腸。詩成讀罷仍無用。聊滿山家骨董囊。

初春感事

馬跡連聲是處忙。經旬無客到龜堂。水初泛溢黏天綠。梅欲飄零特地香。世事紛紛人自老。歲華冉冉日

初長百錢不辦旗亭醉。空愛鵝兒似酒黃。

先少師宣和初有贈晁公以道詩云。奴愛才如蕭穎士。婢知詩似鄭康成。晁公大愛賞。今逸全篇。偶讀晁公文集。泣而足之。

士不逢時勇退耕。閉門自號景迂生。遠聞佳士輒心許。老見異書猶眼明。奴愛才如蕭穎士。婢知詩似鄭康成。早孤遇事偏多感。欲續殘章涕已傾。

### 追感往事

諸公可歎善謀身。誤國當時豈一秦。不望夷吾出江左。新亭對泣亦無人。

紹興辛酉。予年十七矣。距今已六十年。追感舊事作絕句。

常憶初年十七時。朝朝烏帽出從師。與許子威輩。同從鮑季和先忽逢寒食停供課。正寫礬書作贗碑。

### 雨晴風日絕佳徙倚門外

茶醞無端廢午眠。杖藜信步到門前。青裙溪女結蠶卦。白髮廟巫催社錢。

章老三年病方死。吳翁一夕呼不醒。獨有此身頑似鐵。倚門常看莫山青。章吳皆鄰人。以去冬死。

### 春遊

春風隄上草萋萋。草軟沙平護馬蹄。似蓋微雲纔障日。如絲小雨不成泥。千秋觀裏逢新燕。九里山前聽

午雞追憶舊遊愁滿眼。綵船曾繫畫橋西。

春雨

狼藉殘花滿地紅。擁衾孤夢雨聲中。人生十事九堪歎。春色三分二已空。但有老盆傾濁酒。不辭衰鬢對青銅。長貧博得身強健。久矣無心咎化工。

藥爐茶竈淡生涯。聽雨猶能惜物華。蘸岸頓添三尺水。沾泥不貸一城花。問摩病眼開書卷。時傍危欄弄釣車。稚子孤行八千里。喜聞炊熟可還家。家僮自行在來報。子布寒食前可到。家。唐人以寒食前一日爲炊熟。

自笑平生嬾自真。閉門高枕動兼旬。海棠千斤已隨水。杜宇一聲無復春。綠酒盈樽足忘老。朱櫻上市正嘗新。今朝雨止通溪路。又向沙頭岸幅巾。

三月十六日至柯橋迎子布東還

江國常年秋鴈飛。吾兒遠客寄書稀。道途一見相持泣。鄰曲聚觀同載歸。草草杯盤更起舞。匆匆刀尺旋裁衣。從今父子茆簷下。回首人間萬事非。我似傷禽帶箭飛。更憐汝作鴈行稀。異時恐抱終身恨。此日寧甘徒步歸。萬里外應勞遠夢。三年前已挂朝衣。斷編蠹簡相從老。絕念功名亦未非。

初夏野興



扇墮巾欹午夢回。鳴鳩又喚雨絲來。數行褚帖臨窗學。一卷陶詩傍枕開。糠火就林煨苦筍。蜜甕沉井漬青梅。艾人行復巍然出。老大難堪節物催。

衡門

曲徑衡門短短籬。槐楸陰裏倚筇枝。老來百事不入眼。惟愛青山如舊時。

朝飢示子聿

水雲深處小茆茨。雷動空腸慣忍飢。外物不移方是學。俗人猶愛未爲詩。生逢昭代雖虛過。死見先親幸有辭。八十到頭終強項。欲將衣鉢付吾兒。

晨興

小雨過郊墟。晨興一事無。殘榴重結葉。新燕續生雛。書細猶能讀。行遲漸要扶。蔬畦恐蕪沒。且復課僮奴。

西村

亂山深處小桃源。往歲求漿憶叩門。高柳簇橋初轉馬。數家臨水自成村。茂林風送幽禽語。壞壁苔侵醉墨痕。一首清詩記今夕。細雲新月耿黃昏。

放歌行

少年不知老境惡。意謂長如少年樂。朝歌夜舞狂不休。逢人欲覓長生藥。三二十年底難過。屈指朋儕餘

幾箇就令未死身日衰。朱顏已去誰能那。人間萬事如奕棊。我亦曾經少壯時。兒曹紛紛不須校。歲月推遷渠自知。

閉戶

收身歸死鏡湖傍。閉戶悠悠白日長。巷僻斷非容駟路。腸枯那有蹴蔬羊。書生正可蹈東海。世事漫思移太行。睡起不知天早莫。坐看螢度篆盤香。

長飢

病臥窮閭負聖時。本來吾道合長飢。朝不及夕未妨樂。死何如生行自知。早年休學仗下馬。末路幸似泥中龜。煙波一葉會當逝。吹笛高人有素期。

山齋書事

山榴子結又重開。巢燕雛飛卻續回。燕有三生雛乃去者雨足人畦千頃稻。日長風舞一庭槐。浩歌縱酒愁仍在。作意觀書睡已來。常恨流年不相貸。若爲更著莫蟬催。

晚至新塘

青鞵隨意出柴荆。聊向南唐曳杖行。歸鳥已從煙際沒。斷虹猶在柳梢明。城頭層塔凌空立。浦口孤舟並岸橫。向道有詩渾不信。爲君擁鼻作吳聲。

早秋南堂夜興

水注橫塘藻荇香。候蟲唧唧滿空廊。風前落葉紛可掃。天際疎星森有芒。夜漏漸長愁少睡。秋衣未製怯新涼。明朝知有欣然處。寫得黃庭又幾行。

新涼書懷

藥物扶持病少蘇。殘年不恨老菰蘆。潦收溪澗魚爭售。歲樂村場酒易沽。無日橙林無墜葉。橙木自夏至。日有落

葉。不可勝掃。有時燕戶有新雛。今年燕屢生雛。七月望猶未止。秋風磔起扁舟興。安得州家復鏡湖。

鄰曲今年又有年。垂髻戴白各欣然。先輸官庾無逋賦。共賽神祠有社錢。退傅寄聲情緝密。連得周丞相書。細字滿幅。

晦翁入夢語蟬聯。昨夕夢朱元晦甚款。燈前細與兒曹說。蠹簡猶堪數世傳。

燒香

寶熏清夜起氤氳。寂寂中庭伴月痕。小斲海沉非弄水。旋開山麝取當門。蜜房割處春方半。花露收時日未暝。安得故人同晤語。一燈相對看雲屯。

枕上

呼兒初夜上門關。怕冷貪眠自笑孱。月色橫分窗一半。秋聲正在樹中間。莫年不復樽前樂。浮世無如枕上閒。鍊句未安姑棄置。明朝追記尚斑斑。

山園書觸目

山近雲生易。人稀鳥下頻。瘦篁穿石竅。古蔓絡松身。熟摘巖邊果。乾收澗底薪。經過不相識。喚作避秦人。

村舍

篠屋楓林下。山中人以篠覆舍。厚密過于茅。柴門芡浦旁。先鳴雞臙膊。徐上日蒼涼。服藥貧寧輟。觀書老有常。仍須教

童穉。世世力耕桑。

生理嗟彌薄。吾居久未完。蝶飛窗紙碎。龜坼壁泥乾。小雨牛欄溼。微霜碓舍寒。晚禾蟲獨少。鄰里共相寬。

今年晚禾苦蟲蛇。予鄉獨免。

對食戲詠

一飽欣逢歲小穰。時憑野餉誑枯腸。橙黃出白金齏美。菰脆供盤玉片香。客送輪囷霜後蟹。僧分磊落社前薑。秋來幸是身強健。聊爲佳時舉一觴。

懷昔

偶住人間日月長。細思方覺少年狂。衆中論事歸多悔。醉後題詩醒已忘。鼉作鯨吞吁莫測。谷堦山塹浩難量。老來境界全非昨。臥看縈簾一縷香。

養神

歲熟鄉鄰樂。辰良祭賽多。荒園拋鬼飯。高杙置神鵝。村人謂祭神之牲。曰神豬神鵝。人散叢祠寂。巫歸醉臉酡。飢鴉更堪笑。鳴噪下庭柯。

小立

紅樹園廬晚。碧花籬落秋。荒陂船護鳴。斷岸笛呼牛。酒賤村村醉。山寒寺寺幽。聊須岸烏幘。小立埭西頭。

秋晚湖上

已過西成賽廟期。家家下麥不容遲。夕陽遍野人歸後。秋水生灘鷺集時。靈藥不治懷抱惡。好詩空益鬢毛衰。從來未識蘇司業。愁絕西風滿酒旗。

明日又至山園天微陰再賦

河岸風檣遠。村陂牧笛長。短籬圍麋眼。幽徑繚羊腸。照水鬚眉見。搓橙指爪香。衣裘又關念。礎杵滿斜陽。不寐

麗譙聽盡短長更。幽夢無端故不成。寒雨似從心上滴。孤燈偏向枕邊明。讀書有味身忘老。報國無期涕每傾。敢爲衰殘便虛死。誓先鄰曲事春耕。

弊廬

弊廬雖陋甚。鄙性頗所宜。欹傾十許間。草覆實半之。碓聲隔柴門。續火出枳籬。縛木爲庵牢。附垣作雞埭。

黃犢放林莽。蒼鵝戲陂池。傭耕食于我。客主同爨炊。瓦盎設大杓。菹苒羹園葵。一飽荷鋤出。作勞非所辭。上以奉租賦。下以及我私。有錢卽沽酒。阡陌恣遊嬉。亦有扶持者。婢跣奴髻椎。欲畫恨無人。後世考此詩。

園中作

誰采桃榔寄一枝。北來萬里爲扶衰。風光最愛初寒候。懷抱殊勝未老時。閒引微泉成曲澗。盡除枯蔓補疎籬。花前自笑童心在。更伴羣兒竹馬嬉。

夜四鼓睡覺起行簷間觀新作南籬

星斗闌干天宇清。起披短褐繞廊行。葉聲颯颯飛霜重。籬影疎疎落月明。沙冷斷鴻投別浦。風高殘漏下孤城。衰遲自笑情猶在。一首新詩取次成。

客去追記坐間所言

征西幙罷幾經春。歎息兒音尙帶秦。每爲後生談舊事。始知老子是陳人。建隆乾德開王業。溫洛滎河厭虜塵。倘得此生重少壯。臨危敢愛不貲身。

追憶征西幙中舊事

大散關頭北望秦。自期談笑掃胡塵。收身死向農桑社。何止明明兩世人。小獵南山雪未消。繡旗斜卷玉驄驕。不如意事常千萬。空想先鋒宿渭橋。

憶昨王師戍隴回。遺民日夜望行臺。不論夾道壺漿滿。洛筍河魴次第來。在南鄭時。關中將吏有獻此二物者。關輔遺民意可傷。蠟封三寸絹書黃。亦知虞法如秦酷。列聖恩深不忍忘。關中將校密報事宜。皆以蠟書至宣司。

冬夜

颼颼黃葉欲辭枝。況著霜風抵死吹。投老難逢身健日。讀書偏愛夜長時。孤村月白聞衣杵。破竈煙青煮芋糜。不是用心希陋巷。為儒自合耐寒飢。

冬日

室中恰受一蒲團。也抵三千世界寬。上策莫如扃戶坐。苦閒猶復取書看。蔬青飯軟枝梧老。窗白爐新準備寒。堪笑此翁幽獨慣。卻嫌兒女話團圓。

寒夕

夜扣銅壺徹旦吟。了無人會此時心。燈殘焰作孤螢小。火冷灰如積雪深。風急江天無過雁。月明庭戶有疎碁。此身畢竟歸何許。但憶藏舟黃葦林。

辛酉冬至

今日日南至。吾門方寂然。家貧輕過節。身老怯增年。鄉俗謂喫冬至飯。即添一歲。畢祭皆扶拜。分盤獨早眠。惟應探春夢。已繞鏡湖邊。

客至

何處軒車客。能來桑麥村。一奴先入市。此老自磨門。野果嘗皆澀。村醅壓尙渾。殘年亦何恨。治世作黎元。

冬夜讀史有感

短檠膏涸夜將殘。感事懷人興未闌。酌酒淺深須自度。圍棋成敗有旁觀。斷糶作飯終年飽。大布裁袍稱意寬。世上閒愁千萬斛。不教一點上眉端。

小飲梅花下作

脫巾莫歎髮成絲。六十年間萬首詩。予自年十七八學作詩。今年六十年得萬篇。排日醉過梅落後。通宵吟到雪殘時。偶容後死寧非幸。自乞歸耕已恨遲。青史滿前閒卽讀。幾人爲我作著龜。

箕卜

孟春百草靈。古俗迎紫姑。廚中取竹箕。冒以婦羣襦。豎子夾扶持。插筆祝其書。俄若有物憑。對富不須臾。豈必考中否。一笑聊相娛。詩章亦間作。酒食隨所須。興闌忽辭去。誰能執其祛。持箕畀竈婢。棄筆臥牆隅。几席亦已徹。狼籍果與蔬。紛紛竟何益。人鬼均一愚。

梅花絕句

幾年不到合江園。說著當時已斷魂。只有梅花知此恨。相逢月底卻無言。



當年走馬錦城西。曾爲梅花醉似泥。二十里中香不斷。青羊宮到浣花溪。  
聞道梅花坼曉風。雪堆遍滿四山中。何方可化身千億。一樹梅前一作一放翁。  
小亭終日倚闌干。樹樹梅花看到殘。只怪此翁常謝客。元來不是怕春寒。  
亂簾桐帽花如雪。斜挂驢鞍酒滿壺。若得丹青如顧陸。憑渠畫我夜歸圖。  
紅梅過後到緗梅。一種春風不並開。造物無心還有意。引教日日放翁來。

送子龍赴吉州掾

我老汝遠行。知汝非得已。駕言當送汝。揮涕不能止。人誰樂離別。坐貧至于此。汝行犯胥濤。次第過彭蠡。波橫吞舟魚。林嘯獨腳鬼。野飯何店炊。孤權何岸檣。判司比唐時。猶幸免笞箠。庭參亦何辱。負職乃可恥。汝爲吉州吏。但飲吉州水。一錢亦分明。誰能肆讒毀。聚俸嫁阿惜。擇士教元禮。我食可自營。勿用念甘旨。衣穿聽露肘。履破從見指。出門雖被嘲。歸舍卻睡美。益公名位重。凜若喬嶽峙。汝以通家故。或許望燕几。得見已足榮。切勿有所啓。又若楊誠齋。清介世莫比。一聞俗人言。三日歸洗耳。汝但聞起居。餘事勿挂齒。希周有世好。敬叔乃鄉里。豈惟能文辭。實亦堅操履。相從勉講學。事業在積累。仁義本何常。蹈之則君子。汝去三年歸。我儻未卽死。江中有鯉魚。頻寄書一紙。

六日雲重有雪意獨酌

遍遊藪澤一漁舸。盡歷風霜只縑袍。天爲念貧偏與健。人因見嬾誤稱高。地連海澨濤聲近。雲冒山椒雪意豪。偶得名罇當痛飲。涼州那得直蒲萄。

舟中作

娥江西路石帆東。身寄鷗波浩蕩中。疊疊沙痕留浦岸。疎疎日影透漁篷。詩人無復同盟在。酒債何時一洗空。已迫耄年宜易感。人生五十卽稱翁。晤語無人與遣愁。出門聊復弄輕舟。山穿煙雨參差出。水赴陂塘散漫流。隔葉雄雌鳴谷鳥。傍林子母過吳牛。數家清絕如圖畫。炊黍何妨得小留。

湖村春興

桑柘相望雨露新。桃源自隱不緣秦。稻陂正滿初投種。蠶子方生未忌人。酒借鵝兒成淺色。魚憑雲母作脩鱗。賽神歸晚比鄰醉。一笑猶關老子身。

村居書事

藥物枝梧病漸蘇。門前野老笑相呼。春深水暖多魚婢。雨足年豐少麥奴。小飲盃盤隨事具。閒行巷陌倩人扶。題詩非復羌村句。誰與丹青作畫圖。李伯時有羌月圖傳於世。

題廬陵蕭彥毓秀才詩卷後

詩句雄豪易取名。爾來閒淡獨蕭卿。蘇州死後風流絕。幾許工夫學得成。  
法不孤生自古同。癡人乃欲鏤虛空。君詩妙處吾能識。正在山程水驛中。

示客

一點昏燈兩部蛙。客來相對半甌茶。典衣未贖身饒蝨。治米無工飯有沙。每爲采菱浮野艇。時因賣藥宿山家。青鞋到處堪乘興。不獨雲門與若耶。

喜晴

葛衣初著喜新晴。寂寂虛堂一榻橫。乍坼孤花藏葉罅。晚歸雙燕拂簾旌。舞空不斷游絲直。掠地還飛落絮輕。剩欲倚闌尋好句。清笳已復動高城。

閒詠園中草木

剪刀葉畔戲魚回。帔子花頭舞蝶來。領略年光屬閒客。一樽自勸不須推。  
一樹山櫻鳥啄殘。懸鈎半舍亦甘酸。兒童采得爭來餉。應念衰翁舌本乾。  
綠侵小徑葦衣艸。青絡疎籬鬼帶籐。未暇開編尋本草。且將名品問山僧。

過鄰家

老病在臂踝。終日不喜動。溪雲忽過前。袖手以目送。今晨光景佳。霽色入鳥哢。駕言出柴荆。暫作湖山夢。

東村望鶴巢。西阜過糴峒。父老意欣然。爲我撥春瓮。豈惟澆舌燥。亦用輒腳痛。形骸去繩檢。談笑得少縱。吳蠶初上簇。陂稻亦已種。端午數日間。更約同解纒。

九月初作

九月都門凜欲霜。羸軀恩免立鴈行。細書付吏膽初豪。和藥呼兒對古方。陋巷閉門常謝客。高齋掃地獨焚香。此生自計終何取。似有山林一日長。實錄有初稟二稟

無客

今日了無客。翛然塵柄閒。硯涵鷓鴣眼。香斲鷓鴣斑。木落風初勁。雲低雨尙慳。西湖未暇到。臥看曲屏山。

懷故山

老怯京塵化素衣。無端拋擲釣魚磯。碧雲又見日將暮。芳草不知人念歸。萬事莫論羈枕夢。一身方墮亂書圍。岷山學士無消息。空想燈前語入微。張季長祕閣久不得書

晚歸

無事經秋別鏡湖。詩囊隨處累奚奴。樓頭寒日低將盡。陌上殘泥踏欲無。軒冕豈容關喜慍。簞瓢亦未費枝梧。畫橋綠浦歸來晚。一醖昏燈得自娛。

題史院壁

白髮無餘鬢。蒼顏失故丹。旅遊多敗意。大屋每饒寒。出畏霜侵褐。歸乘日暖鞍。若非時得句。何以慰衰殘。  
苔衾平分路。銅環半掩扉。殘蕪寒不死。敗葉落還飛。責重何由塞。愁生但念歸。非無茅一把。世事苦相違。  
石渠剩辨殺青君。記取龍庭焚盡始成書。

寄題儒榮堂

朝散大夫徐夢莘著北盟錄上之。除直祕閣。訓辭有儒榮之語。因以名堂來求賦詩。

雜興十首以貧堅志士節病長高人情爲韻

仕宦徧四方。每出歸愈貧。寒暑更質衣。笑到鄰里人。今年作史官。坐糜太倉陳。無如思歸何。日夜望絕麟。  
區區牛馬走。齷齪蟣蝨臣。恩深老不報。肝膽空輪囷。  
孟子闢楊墨。吾道方粲然。韓愈排佛老。不失聖所傳。伐木當伐根。攻敵當攻堅。坐視日月食。孰探天地全。  
一木信難恃。要憂大廈顛。安得孟韓輩。出爲吾黨先。  
聖人固多能。藝乃不以試。嗟予少貧賤。日月成坐棄。矧今耄已及。甘食而美睡。道衰朋友散。斯文凜將墜。  
閉戶輒竟日。孰與講仁智。厭厭生意盡。何暇議李志。  
少年喜結交。患難謂可倚。寧知事大謬。親友化虎兕。出仕五十年。危不以讒死。始畏囊中錐。寧取道傍李。  
老來多新知。英彥終可喜。豈以二三君。遂疑天下士。

昔我遊廬山。夜雨東林雪。灰深火正熟。膏滅燈半滅。童驚林虎過。僧惜澗松折。至今每追想。可解肺肝熱。那知蓬山夢。忽繼此清絕。殊勝蘇子卿。餐氈持漢節。觀人如觀玉。拙眼喜譏評。得失顧在人。玉固非所病。慶曆嘉祐間。人才於斯盛。王回僅一招。石介棄不聘。乃知天下士。成敗各有命。願君姑安之。天定豈不勝。兩山如峨眉。一水若車輞。吾昔廬其間。百里臨蒼莽。少年手藝木。條榦日夜長。咿啞駕獨轅。迢遞搖兩漿。平生會心地。今乃寄夢想。何時喚鄰翁。煙水行布網。貨財不可居。祿位不可饜。我爾本一家。何至臯闌塵。小夫謀人國。紛紛日煎熬。或謂性本惡。或謂經無裒。誤人方自此。孰如飲醇醪。清言亦自佳。遺事非徒高。魯山粹而博。韶美曠且真。石渠東觀中。久矣無若人。飛仙驂鳳鸞。豈久混世塵。空餘文章在。常與日月新。我雖不足數。疇昔忝交親。尙想秋燈下。對影敬幅巾。陳山魯山劉儀鳳韶美君子尙大節。又甚惡不情。魯連故可人。用意終近名。千載高夷齊。采薇忘其生。周公述易象。所以貴幽貞。去聖雖已遠。江左見淵明。我讀飲酒詩。朱絃有遺聲。

謝韓實之直閣送燈

玉作華星綴絳繩。樓臺交映莫天澄。東都父老今誰在。腸斷當時諫浙燈。

舊友年來不作疎。華燈乃肯寄蝸廬。寧知此老蕭條甚。二尺檠前正讀書。

歎老

鏡裏蕭蕭白髮新。默思舊事似前身。齒殘對客豁可恥。臂弱學書肥失真。漸覺文辭乖律呂。豈惟議論少精神。平生師友凋零盡。鼻堊揮斤未有人。

冬曉

恩免宵興趁曉班。養慵終覺媿吾顏。浮名半世虛催老。高臥何時復得閒。兩岸夕陽漁浦市。數峯寒靄沃洲山。扁舟來往無窮樂。此事天公豈所慳。

有懷梁益舊遊

土堠纍纍雙復隻。悠然殘夢對寒缸。亂山落日葭萌驛。古渡悲風桔柏江。虎印雪泥餘過跡。樹經野火有空腔。四方行役男兒事。常笑韓公賦下瀧。

孤坐無聊每思江湖之適

世上元無第一籌。此身只合臥滄洲。鰲搖漁浦蒼茫月。帆帶松江浩蕩秋。有酒人家皆可醉。無僧山寺亦閑遊。老來閱盡榮枯事。萬變惟應一笑酬。

子聿欲暫歸山陰。見乃翁作惡。遂不行。贈以此詩。

鐘鳴豈復夜行時。文字相娛賴此兒。欲去復留知汝孝。未言先泣歎吾衰。兩篇易象能忘老。百畝山畚可免飢。但報家僮多釀酒。一欄紅藥是歸期。明年春晚。史院奏書必得歸矣。

暇日弄筆戲書

草書學張顛。行書學楊風。平生江湖心。聊寄筆硯中。龍蛇入我腕。疋素忽已窮。餘勢尙隱鱗。此興嗟誰同。

謝王子林判院惠詩編王從楊廷秀甚久。

文章有定價。議論有至公。我不如誠齋。此評天下同。王子江西秀。詩有誠齋風。今年入修門。軒軒若飛鴻。人言誠齋詩。浩然與俱東。字字若長城。梯衝何由攻。我望已畏之。謹避不欲逢。一日來叩門。錦囊出幾空。我欲與馳逐。未交力已窮。太息謂王子。諸人無此功。騎驢上灞橋。買酒醉新豐。知子定有人。豈必老鈍翁。

對酒作

羨門安期何在哉。河流上拆崑崙開。白雲不與隱居老。孤鶴自下遼天來。春江風物正開美。綠浦潮平柂初起。莫吹長笛發巴陵。曉挂高帆渡湘水。世間萬變更故新。會當太息摩銅人。脫裘取酒籍芳草。與子共醉壺中春。

西湖春遊

靈隱前。天竺後。鬼削神剜作巖岫。冷泉亭中一樽酒。一日可敵千年壽。清明後。上巳前。千紅百紫爭妖妍。



瑟瑟鼓聲鞠場邊。鞦韆一蹴如登仙。人生得意須年少。白髮龍鐘空自笑。君不見。灞亭耐事故將軍。醉尉怒訶如不聞。

局中春興

天知病眼困風沙。借與蓬山閱物華。微暝已迎新到燕。輕陰猶獲欲殘花。幽窗寂寂書圍座。倦枕時時夢過家。立馬庭前還小駐。不妨閒試半甌茶。

春日絕句

吏來屢敗哦詩興。雨作常妨載酒行。忽見家家插楊柳。始知今日是清明。故園蛺蝶最多種。百草長時花亂開。窮巷春風元不到。一雙誰遣過牆來。桃李吹成九陌塵。客中又過一年春。餘寒漠漠城南路。只見鞦韆不見人。便恐東皇促駕回。小軒無事且啣盃。不知何處桃花落。一片飛從屋角來。楊家園裏醉殘春。醉倩傍人拾墮巾。紅紫飄零不須歎。東君渠自是行人。

東軒花時將過感懷

小軒風月得婆娑。盡付流年與嘯歌。細數一春今過半。正令百歲亦無多。還家常恐難全璧。閱世深疑已爛柯。只欲閉門搗倦枕。晚風無奈落花何。

社雨晴時燕子飛。園林何許覓芳菲。江山良是人誰在。天地無私春又歸。殘史有期成汗簡。修門即日挂朝衣。人生念念皆堪悔。敢效淵明歎昨非。

與兒輩泛舟遊西湖一日間晴陰屢易

逢著園林卽款扉。酌泉嚮筍欲忘歸。楊花正與人爭路。鳩語還催雨點衣。古寺題名那復在。後生識面自應稀。傷心六十餘年事。雙塔依然在翠微。

得子聿到家山後書

日日春陰愁出戶。汝今恰遇十分晴。桑林紫椹纍纍熟。稻壟青秧漫漫平。夢好定知行路健。書來深慰倚門情。柯橋道上山如畫。早晚歸舟聽鷓聲。

春晚

新綠成陰小雨時。幅巾蕭散與閒宜。燕歸赴訴經年別。鶯晚分疏出谷遲。曉枕呼兒投宿酒。暮窗留客算殘碁。翛然此意風塵表。正恐羲皇未必知。

上章納祿恩畀外祠遂以五月初東歸

身似霜松老不枯。乞骸猶得侍清都。百錢濁酒渾家醉。六月飛蟲徹曉無。美睡不愁閒客攬。出遊自有小兒扶。買山尙恐巢由笑。敢問君王覓鏡湖。

羣玉峯頭孤夢斷。五雲溪上野舟回。旁人鷗鳥自然熟。到處藕花無數開。麥飯不饜常面槁。柴門閒掩自心灰。雨來正作盆山地。不怕冥冥半月梅。此身惟有一躬耕。乞得餘年樂太平。東觀並遊收昨夢。西湖重到付來生。一堤草露明晨照。半浦荷風颭晚晴。歷歷歸途皆勝事。江亭先聽櫂歌聲。

初歸雜詠

雪滿漁簑雨墊巾。超然無處不清真。胸中那可有一事。天下故應無兩人。騎馬每行秋棧路。喚船遠渡莫江津。酒樓僧壁留詩徧。八十年來自在身。小園五畝翦蓬蒿。便覺人間迹可逃。盡疏珍禽添爾雅。更書香草續離騷。藥苗可斲攜長鏡。黍酒新成壓小槽。老入鷓行方徹悟。一官何處不徒勞。乞得身歸且浩歌。蕭然生世寄漁簑。茶甘半日如新啜。墨妙移時不再磨。山寺蹋雲頻獨往。隣家穿竹自相過。棊枰勝負能多少。堪笑傍人說爛柯。

遊山

古寺不來久。入門空歎嗟。僧亡猶見塔。樹老已無花。世事雖難料。吾生固有涯。慇懃一梳月。十里伴還家。

美睡

老來胸次掃崢嶸。投枕神安氣亦平。漫道布衾如鐵冷。未妨鼻息自雷鳴。天高斗柄闌干繞。露下雞埒膈膊聲。俗念絕知無起處。夢爲孤鶴過青城。

連陰欲雪排悶

先生經旬甑生塵。藜羹不污白氎巾。魯連敢謂天下士。摩詰要是山中人。王維。自稱山中人。溪從灘瘦愈刻厲。山自木落增嶙峋。雲重惟愁雪欲作。梅花忽報一枝春。

晚歲幽興

殘年欲遂迫期頤。追數朋儔死已遲。卜塚治棺輸我快。染鬚種齒笑人癡。近聞有以補種墮齒爲業者。野梅墮地草生後。街柳拂鞍冰泮時。滿眼雲山不須買。剩傾新釀賦新詩。

對食戲作

霜餘蔬甲淡中甜。春近靈苗嫩不蘇。采掇歸來便堪煮。半銖鹽酪不須添。春前臘後物華催。時伴兒曹把酒盃。蒸餅猶能十字裂。餛飩那得五般來。

甲子立春前二日作

頭風初愈喜身輕。書卷時開覺眼明。養熟犬雞隨坐起。性靈烏鵲報陰晴。韭菘釘餛飩春盤好。芝朮蕕和臘藥成。自笑衰殘殺風景。燈時不擬入重城。

鄰曲

濁酒聚鄰曲。偶來非宿期。拭盤堆連展。淮人以名洗脯煮黎祁。蜀人以名烏犍將新犢。青桑長嫩枝。豐年多樂事。相勸且伸眉。

初春書懷

數掩蘆藩竝水居。一家全似業樵漁。春寒例謝常來客。老病猶貪未見書。馴雀正緣拋食慣。芳蘭肯為礙門鉏。藥苗滿鉢無人共。賴有溪僧為破除。甫及春初日已長。偶同鄰曲集山房。囊盛古墨靴紋皺。箬護新茶帶膀方。老境不嫌來冉冉。流年直恐去堂堂。清泉冷浸疎梅蕊。共領人間第一香。愚公不解幾安危。行盡人間惡路岐。難似車登蛇退嶺。險如舟過馬當祠。平生憂患常難測。送老安閒敢自期。一事不成應有命。惟將知止報明時。

送子虛吳門之行

相送何由插羽翰。淡煙微雨暗江干。孤懷最怯新春別。病骨難禁昨夜寒。尊酒汝寧嫌魯薄。釜羹翁自絮吳酸。此詩字字俱愁絕。忍淚成篇卻怕看。

幽居春晚

雲歸禹穴賞新晴。酒買蘭亭散宿醒。竹帶鞭移俄盛出。鶴全窠買已長鳴。故山雖媿收身晚。外物元如脫髮輕。只恐村鄰成間闊。杖藜隨處叩柴荆。  
老廢讐書病廢詩。晝閒惟與睡相宜。未尋內史流觴地。又近龐公上塚時。花發遊蜂喧院落。筍長馴鹿入藩籬。石蛇山下春如許。野老來招不用辭。

山行贈野叟

垂白衰翁住道邊。突間猶喜續炊煙。壁如龜筮難占卜。瓦似魚鱗不接連。幼學及時兒識字。官租先衆吏無權。與君俱長宣和日。握手相看一悵然。  
莫笑孤村生理微。茆茨煙火自相依。客來旋掃青苔榻。日在先關白版扉。婦女憂蚕租葉去。兒童耘麥荷鉏歸。散人世襲江湖號。剩欲溪頭借釣磯。

六言雜興

失馬詎知非福。亡羊不妨補牢。病裏正須周易。醉中卻要離騷。  
舉足加劉公腹。引手捋孫郎鬚。士氣日趨委靡。賴有二君掃除。  
廣平作梅花賦。少陵無海棠詩。正自一時偶爾。俗人平地生疑。

題旅舍壁

地廣風號木。天高日脫雲。村名步頭換。縣界驛前分。蒿艾春侵路。雞豚莫識羣。敲門就炊爨。一飯敢忘君。  
春晚雨中作

枕上

病叟少安枕。驚禽無穩棲。慵占賈誼鵬。空感祖生雞。野勢風號北。窗痕月過西。元非破賊手。只合架牛犁。  
山中惟梟鳴。終夜雞三鳴。後聞架犁則旦矣。

夏日

入戶桐陰漸覆牀。乍敷笛簟北窗涼。筠枝倚壁知身健。衣焙殘香覺日長。雨霽斷雲時聚散。風來織草久低昂。蝶衣粉溼猶飛嬾。小駐闌干就夕陽。

久雨

梅天一日幾陰晴。對酒無聊醉不成。巧曆莫能知雨點。孤桐那解寫溪聲。林深鳥爵來無數。草茂鉏耰去即生。明日雲開天萬里。御風吾欲過青城。

復雨

催喚兒童掃綠苔。長歌清嘯興悠哉。林間子墮知梅熟。水面痕生驗雨來。往事已成孤枕夢。故人誰共一尊開。自憐未負年華在。素扇團團月樣裁。

門屋納涼

機裂齊紈如素月。牀敷蕪篔起微瀾。行人遠不分眉目。過鳥高猶響羽翰。新長庭槐夾門綠。無窮陂稻際天寬。今年項里楊梅熟。火齊驪珠已滿盤。

午睡

梅黃雨足喜初晴。投枕華胥夢已成。帳底香雲凝未散。手中書卷墮無聲。簾紋似水飛蠅避。鼻息如雷稚子驚。癡腹便便竟何有。已將嘲弄付諸生。

游昭牛圖

游昭木石師李唐。畫牛乃自其所長。出欄切聽一聲笛。意氣已無千頃荒。客居京口老益困。衣不揜脛鬚眉蒼。時時弄筆眼力健。蹠角毛骨分毫芒。我無沙堤金絡馬。拂拭此幅喜欲狂。乞骸幸蒙優詔許。置身忽在煙林傍。日落飲牛水滿塘。夜半飯牛天雨霜。俚醫灌藥美水草。老巫訶禁故不祥。願我孫子勤農桑。願汝生犢筋脈強。確聲驚破五更夢。歲負玉粒輸官倉。

出近村歸偶作



朝騎小蹇出煙村。擁路爭看八十身。似我猶爲一好漢。問君曾見幾閒人。楊梅線紫開園晚。蓴菜絲長入市新。莫笑堅頑推不倒。天教日日享常珍。

### 書事

聞道輿圖次第還。黃河依舊抱潼關。會當小駐平戎帳。饒益南亭看華山。饒益寺南亭。得泰華之勝。關中父老望王師。想見壺漿滿路時。寂寞西溪衰草裏。斷碑猶有少陵詩。華州西溪。郡老杜所謂鄰縣亭子者。鳴綠桑乾盡漢天。傳烽自合過祁連。功名在子何殊我。惟恨無人快著鞭。九天清蹕響春雷。百萬貔貅扈駕回。不獨雨師先灑道。汗流滾滾人淮來。

### 新涼示子通時子通將有臨安之行

竹簟紗廚事已非。秋清初換熟縑衣。鵲驚山月栖還起。螢避溪風墮又飛。老眼漸昏書嬾讀。壯心雖在事多違。夜窗剩欲挑燈語。日倚柴門望汝歸。

### 八月四日夜夢中作

太華巉巖敷水長。白驢依舊繫斜陽。山深乳洞藥爐冷。花發雲房醅瓮香。隣叟一樽迎谷口。蠻童三髻拜溪傍。中原俯仰成今古。物外自閒人自忙。

### 明日復理夢中作意

白盡髭髯兩頰紅。頽然自以放名翁。客從謝事歸時散。詩到無人愛處工。高挂蒲帆上黃鶴。獨吹銅笛過垂虹。閒人浪跡由來事。那計猿驚蕙帳空。

又明日復作長句自規

大學淵源不易窮。古人立志自童蒙。醉猶溫克方成德。夢亦齋莊始見功。痛哭孰能悲陷溺。力行猶足變雕蟲。太空雲翳終當散。吾道常如日正中。

村居遣興

追數交朋略散亡。臂孱足蹇固其常。一年又見秋風至。孤夢潛隨夜漏長。不辨誦經如倚相。頗能噉飯勝張蒼。回看薄宦成何味。只借朝衫作戲場。萬里征途興已闌。三間破屋住猶寬。山薑著雨房重斂。南燭先霜實半丹。野市秋陰更蕭瑟。書生老瘦轉酸寒。掩關也有消愁處。一卷騷經醉後看。

甲子秋八月。偶思出遊。往往累日不能歸。或遠至旁縣。凡得絕句十有二首。雜錄入橐中。亦不復詮次也。錄三首。

早攜書劍三隨計。晚辱弓旌四造朝。心媿石帆山下叟。一生不識浙江潮。著囊藥笈每隨身。問病求占日日新。向道不能渠豈信。隨宜醉答免違人。

藥麤野老偏稱效。詩淺山僧妄謂工。懷炆裹茶來問訊。不妨一笑寂寥中。

遣舟迎子通因寄古風十四韻

今日坼汝書。一讀眼爲明。知汝卽日歸。明當遣舟迎。想汝片帆東。翩若飛鴻征。薄莫過梅市。咿謳雙櫓聲。到家亦尙早。城樓初發更。草草一尊酒。爲汝手自傾。夜分不能寐。頓忘衰病嬰。豈惟病良已。白頭黑絲生。暫別亦不惡。益重父子情。自今日相守。北窗同短檠。六經炤久伏。百氏方縱橫。世俗擯孤學。未易口舌爭。此責在學者。草萊勿自輕。汝壯父未死。相勉在力行。

飯後偶題

環堵蕭然百慮忘。天教得飯飫枯腸。長橋鮮美桃花嫩。北苑茶新帶勝方。漠漠寒花欹晚照。翩翩孤蝶弄秋光。解衣捫腹西窗下。賴有新詩破日長。

感昔

行年三十憶南遊。穩駕滄溟萬斛舟。常記早秋雷雨霽。柁師指點說琉球。馬瘦行遲自一奇。溪山佳處看無遺。酒壚強挽人同醉。散去何曾識是誰。負琴腰劍成三友。出蜀歸吳歷百城。最是客途愁絕處。巫山下廟聽猿聲。岳陽三伏正炎蒸。爽氣淒風見未曾。白浪蹴天樓欲動。當時恨不到黃陵。

送子坦赴鹽官縣市征

父子團欒笑語譁。豈知雲散各天涯。長亭結束秋將晚。別酒淒涼日易斜。我坐老年艱就養。汝非仰祿肯離家。游山尚有平生意。試爲閒尋一鹿車。  
巖中欲作一小肩輿輕馱結。實兩夫可舉者以備山行。

寄子坦

目斷西陵細靄中。津亭想汝繫孤篷。頗憂昨莫雲吞日。  
俗以黑雲接落日爲風雨之候。猶幸今朝雨壓風。就食亦知難戀戀。挂帆終恨太匆匆。塞沙不是無來雁。頻寄書歸問老翁。

書感

老荷寬恩許退耕。絲毫無報亦何情。民貧樂歲尙艱食。道喪異端方肆行。黨禍本從名輩出。弊端常向盛時生。古人骨冷青松下。誰起英魂與細評。

遣興

兔徑游觀足。蝸廬臥起寬。垂名千古易。無媿寸心難。燈火娛清夜。風霜變早寒。一經家世事。吾興未應闌。

農舍

三農雖隙亦匆忙。稼事何曾一夕忘。欲曬胡麻愁屢雨。未收蕎麥怯新霜。神農之學未爲非。日夜勤勞備歲飢。雨畏禾頭蒸耳出。潤憂麥粒化蛾飛。

萬錢近縣買黃犢。襪襖行當東作時。堪笑江東王謝輩。唾壺塵尾事兒嬉。  
杜門雖與世相違。未許人嘲作計非。長綆雲邊牽犢過。小舟月下載犁歸。

### 出遊

一樽隨處可開顏。此事深疑造物慳。地可登臨多恨遠。身常強健又須閒。山圍小市煙初斂。霜著橫林葉  
半殷。徙倚闌干君勿厭。日斜猶及棹舟還。

漁村酒市本無期。小蹇扁舟信所之。丹葉滿林霜落後。紫萍黏塊水枯時。山林閒寂歸雖早。齒髮衰殘病  
已遲。努力及時謀自適。錦囊多貯莫秋詩。

山有籃輿步有舟。放翁身健得閒遊。牛羊點點日將夕。蒲柳蕭蕭天正秋。細徑僧歸雲外寺。疎燈人語酒  
家樓。歸途更愛湖橋月。獨倚闌干爲小留。

### 風雨夜坐

寒風淒緊雨空濛。舍北新丹數葉楓。欹枕舊遊來眼底。掩書餘味在胸中。松明對影談玄客。篠火圍爐采  
藥翁。君看龜堂新境界。固應難與俗人同。

### 舟中曉賦

木落霜清水鳥呼。扁舟夜泊古城隅。吹殘畫角鐘初動。低盡寒空斗欲無。浪迹已同鷗境界。遠遊方羨雁

程途。高橋健席從今始。遍歷三湘與五湖。

漁家

江上漁家水蘸扉。閒雲片片傍苔磯。釣收鷺下虛舟立。橋斷僧尋別徑歸。海近岡巒多迤邐。天寒霧雨正霏微。羊裘老作桐江叟。點檢初心幸未違。

感昔

神女祠前猿夜鳴。相公溪上草初生。重遊惟有西窗夢。一點燈青夢不成。白帝城邊鶯亂啼。憶騎瘦馬踏春泥。老來感舊多悽愴。孤夢時時到灤西。小益晨裝雨作泥。南沮涉水馬長嘶。山腰細棧移新路。驛壁流塵闍舊題。曾從征西十萬師。白頭回顧只成悲。雲深駱谷傳烽處。雪密嶓山校獵時。少時失腳利名間。寸步何曾不險難。造物恐人渾忘卻。夢中憂患尙如山。

客懷

客懷病思兩悽悽。瘦馬長鞞濺雪泥。道左忽逢曾宿驛。壁間閒看舊留題。村醅酸薄陳山果。旅飯蕭條嚼凍蟄。何處人間非夢境。恍然重到劍關西。

雜書幽居事

抱瓮窮園叟。還山老布衣。死邊常得活。鬧處偶容歸。恐釣魚吞餌。棋憂客墮機。此心君會否。洗盡百年非。  
庭曠多延月。齋空半貯雲。松聲行路共。泉脈近鄰分。采藥九蒸曬。朝真三沐熏。林間有叢杞。繞屋夜鴉鴉。  
歲月相尋豈有窮。早梅喚醒醉眠翁。坐中酒量人人別。花底春風處處同。白帝城邊微雪過。青衣江上夕  
陽紅。錦囊空復殘詩在。分付悲歡一夢中。

探梅

社飲

東作初占嗣歲宜。蠶官又近乞靈時。傾家釀酒無遺力。倒社迎神盡及期。先醉後醒驚老億。路長足蹇歎  
歸遲。西村漸過新塘近。宿鳥歸飛已滿枝。

自近村歸

雪晴村路尚殘泥。茅屋清寒正要低。野渡船虛飛鳥集。煙村路近蹇驢嘶。堅頑那復愁空橐。老健猶能伴  
架犁。蹴榻不僵君會否。更須百瓮享黃齋。

除夜

野水楓林屋數椽。寒爐無火坐無氈。殘燈耿耿愁孤影。小雪霏霏送舊年。椒酒辟瘟傾潑灑。藍袍佻鬼舞  
跼躄。從今供養春薺美。莫羨愚公日萬錢。

自開歲陰雨連日未止

江雲漠漠雨昏昏。歸老山陰學灌園。十里羊腸僅通路。三家鐺腳自成村。應時膊飪聊從俗。耐久鍾馗儼

在門。近縣傳聞頗多盜。呼兒插棘補頽垣。俗有年膊飪之語。予貧甚。今歲真不能易鍾馗。

枯菊

翠羽金錢夢已闌。空餘殘蘂抱枝乾。紛紛輕薄隨流水。莫與桃花一樣看。

春雨

倚闌正是受斜陽。細雨霏霏渡野塘。本為柳枝留淺色。卻教梅蘂洗幽香。小露蝶粉初何惜。暫澀鶯聲亦未妨。造物無心寧徧物。憑誰閒與問東皇。

草堂

幸有湖邊舊草堂。敢煩地主築林塘。辛幼安每欲為築舍。予辭之遂止。漉殘醅。瓮葛巾溼。插遍野梅紗帽香。風緊病身那可敵。春閒晝漏不勝長。浩歌陌上君無怪。世譜推原自楚狂。陸氏舊譜云本出接輿後。

嘗花

湖上花光何處尋。朱朱白白自成林。衰年何預傷春事。閒客猶懷愛物心。欲墮每愁風驟起。正開卻要日微陰。蘭亭禹廟平生事。一榼芳醪莫厭深。



小雨

小雨明復闌，餘寒去又來。新苔緣砌上，殘杏過籬開。垂老身餘幾，逢春心尙孩。江天近寒食，林外過輕雷。

莫春

辛夷海棠俱作塵，紫魚蓴菜亦嘗新。一聲布穀便無說，紅藥雖開不屬春。

春晚小飲

病臥書齋一味慵，今年春事又成空。籊龍奮迅風雷際，木筆凋零霧雨中。平野草深黃犢健，斷溪水長畫船通。小兒偶得官樓酒，罌醢鱠乾一醉同。

初夏幽居雜賦

曲曲羊腸徑，疎疎麕眼籬。渴蜂窺硯水，狂蝶入書帷。一枕輕安夢，數聯蕭散詩。餘生已過足，不必到期頤。關地剪蓬蒿，何曾歎作勞。藥名尋本草，蘭族驗離騷。北澗穿籬過，南山出屋高。回頭看富貴，何啻一秋毫。

雨

家近蓬萊白玉京，草堂東望不勝清。初驚野色昏昏至，已見波紋細細生。殘醉頓消迎亂點，微吟漸苦入寒聲。只愁今夕虛簷滴，又對青燈夢不成。

龜堂初暑

淪漪一曲遶茆堂。葛帳紗巾喜日長。多事林鳩管晴雨。依人海燕度炎涼。深枝著子纍纍熟。幽草開花冉冉香。安得此時江海上。與君袖手看人忙。

初夏閒步村落間

薄雲韜日不成晴。野水通池漸欲平。綠葉忽低知鳥立。青萍微動覺魚行。醉遊放蕩初何適。睡起逍遙未易名。忽遇湖邊隱君子。相攜一笑慰餘生。

夜興

鬢毛飽受雪霜侵。一褐蕭條寄故林。林簷滴回羈枕夢。城笳喚起塞垣心。平生恥露囊中穎。垂老甘同爨下琴。燈燼欲殘看瘦影。不妨袖手坐愔愔。

秋近

石榴萱草併成空。又見墻陰莧葉紅。茶釀頗妨千里夢。簟涼初怯五更風。新瓜落刃冰盤裏。晚燕添巢畫閣中。身健流年供可樂。故人自欠一尊同。

秋懷

園丁傍架摘黃瓜。村女沿籬採碧花。城市尙餘三伏熱。秋光先到野人家。迢迢枕上望明河。帳薄簾疎奈冷何。不惜衣篝重換火。卻緣微潤得香多。

詩如水淡功差進。身似雲孤累轉輕。落葉擁籬門巷晚。一枝藤杖且閒行。

示子通

翁老兒窮不自支。此心幸與古人期。勞兼薪水奴初去。典到琴書事可知。藥杵無聲工忍病。米囤可掃恥言飢。餘年有幾須相守。萬里煙霄付異時。

小雨

赤日炎熇勢未回。川雲忽起亦佳哉。舟衝細雨橋陰出。蝶弄微風草際來。樺柳不禁朝暮久。芙蓉猶有二三開。一年光景煩君看。何怪昆池有劫灰。

貧甚戲作絕句

處窮上策更誰如。日晏猶眠爲腹虛。飢則臥不起。貧者之常也。尙闕鄰僧分供米。敢煩地主送園蔬。

貸米東村待不回。鉢盂過午未曾開。飢腸雷動尋常事。但誤生臺兩鵲來。  
北齋孤坐破三更。庭戶無人月有明。數種袴襦秋未贖。羨他鄰巷搗衣聲。  
糴米歸遲午未炊。家人竊閱乃翁飢。不知弄筆東窗下。正和淵明乞食詩。

秋夕

浴罷紗巾出草堂。一枝瘦杖倚桃榔。蟬吟古柳聲相續。月入幽扉影正方。頻約僧碁秋漸健。稍增書課夜

初長亦知桑落宜。鶉酒太息何時辦一觴。

病中戲詠

八十行加二。清秋住故山。新涼足眠睡。舊疾害躋攀。雪白紛殘髻。梔黃染病顏。疲牛臥斜日。羸馬噉枯菅。貧廢兒孫學。慈生僕妾頑。贖衣時已迫。貸米歲方艱。齋鉢僧嘲薄。盤殮客笑慳。從今謝還往。惟有掩柴關。

秋光

小圃秋光潑眼來。老人憑几興悠哉。翩翩蝴蝶成雙過。兩兩蜀葵相背開。雨足疎籬引荒蔓。人稀幽徑長新苔。貧家竈冷炊煙晚。待得鄰翁賣藥回。

秋夜思南鄭軍中

五丈原頭刁斗聲。秋風又到亞夫營。昔如埋劍常思出。今作閒雲不計程。盛事何由觀北伐。後人誰可繼西平。眼昏不禁陳編得。挑盡殘燈不肯明。

幽興

蘭渚前頭湖水清。了無俗事敗幽情。雨淋茅屋隨時補。日射油窗特地明。庭樹晚鶯窺戶語。鄰園秋筍過籬生。芥菘漸美鹽醯足。誰供貧家一釜羹。

法雲僧房

八十衰翁有底忙。水邊山際亦佺佺。清溪橋斷舟橫岸。小塢梅殘雨漬香。數點青燈經野市。一爐軟火宿僧房。自嫌尙有人間意。卻爲春寒怯夜長。

對酒

密篠持苦屋。寒蘆用織簾。斲肩柴熟罨。東坡煮豬肉訣云。淨洗鍋。蕁菜鼓初添。黃甲如盤大。紅丁似蜜甜。街頭桑葉落。相喚指青帘。

雨夜起行室中

老疾逢秋體自輕。披衣暫起繞牀行。隙風不斷燈將滅。簷雨如傾階欲平。鰥叟何嘗愁枕冷。病夫未免待窗明。拂書洗硯龜堂上。幽事誰知日有程。

閏月辛酉壬戌連日風雨癸亥早晴

殘雨在簷猶點滴。斷雲銜日正蒼涼。清愁偏向莫年覺。少睡不禁秋夜長。簾影漸生禽語樂。杵聲初動藥塵香。諸兒作吏俱安否。那得乘風至汝傍。予諸子伯叔季皆出仕。

偶與客話峽中舊遊

我昔旅遊秋雨細。建平城東門欲閉。主人迎勞語蟬聯。小婦春炊縞衣袂。長年三老半醉醒。蜀估峽商工算計。須臾燈闇人欲眠。泊船卸馱猶相繼。山深水峻近蠻獠。往往居民雜椎髻。卽今屈指四十年。懷抱淒

涼真隔世。

客中作

江天雨霽秋光老。野氣穿雲淨如掃。投空飛鳥雜落葉。極目斜陽襯衰草。平沙爭渡人鵠立。長亭下馬障泥溼。纍纍紅果絡青篾。未霜先摘猶酸澀。客中雖云貪路程。買薪糴米常留行。茆簷獨坐待童僕。不聞人聲聞磴聲。

遊近村

行歷茶岡到藥園。卻從釣瀨入樵村。半衰半健意蕭散。不雨不晴天晏溫。薯蕷傍籬寒引蔓。菖蒲絡石瘦生根。參差燈火茅簷晚。童稚相呼正候門。

客從城中來

客從城中來。相視慘不悅。引杯撫長劍。慨歎胡未滅。我亦爲悲憤。共論到明發。向來酣鬪時。人情願少歇。及今數十秋。復謂須歲月。諸將爾何心。安坐望旄節。

村興

結宇楓林下。久窮吾所安。村深事自簡。累少食差寬。雨閣牛眠屋。泥深鴨滿闌。呼兒擣粉餌。準擬賽鄱官。

秋晚書懷

頽然兀兀復騰騰。萬事惟除死未曾。無奈喜歡閒弄水。不勝頑健遠尋僧。喚船野岸橫斜渡。問路雲山曲折登。卻笑吾兒多自在。夜分未滅讀書燈。

夢中作

繫馬朱橋上酒樓。樓前敷水拍堤流。春風又作無情計。滿路楊花輓雪球。大慶橋頭春雨晴。行人馬上聽鶯聲。祥符西祀曾迎駕。惆悵無人說太平。

初冬絕句

鱸肥菰脆調羹美。麩熟油新作餅香。自古達人輕富貴。例緣鄉味憶還鄉。道途冬暖衣裳省。村落年豐鼓吹喧。下麥種麩無曠土。壓桑接果有新園。

卽事

雲起山容改。潮生浦面寬。寒鴉先雁到。烏桕後楓丹。年邁狐裝帽。時新豆搗糲。非關嗜溫飽。更事耐悲歡。遜居無外事。白日不勝長。詩爲窮差進。琴雖老未忘。映窗精試墨。閉閣苦留香。年少無相誚。功名事更狂。

題詹仲信所藏米元暉雲山小幅

俗韻凡情一點無。開元以上立規模。鏡湖老監空揮淚。想見楚江清曉圖。徽宗見元暉楚江清曉圖。大加賞歎。一棹朝南莫北風。奇峯倒影綠波中。定知漸近三山路。認得漁翁是放翁。

雜興

此身漂蕩等流槎。又向江村送歲華。急雨遇寒疑作雪。明燈無炮結成花。座懸鏡古森毛髮。甌聚茶香爽齒牙。況是貧家多樂事。阿開漸學手吒叉。

稽山行

稽山何巍巍。浙江水湯湯。千里亘大野。勾踐之所荒。春雨桑柘綠。秋風秔稻香。村村作蟹棹。處處起魚梁。陂放萬頭鴨。園覆千畦薑。舂碓聲如雷。私債逾官倉。禹廟爭奉牲。蘭亭共流觴。空巷看競渡。倒社觀戲場。項里楊梅熟。采摘日夜忙。翠藍滿山路。不數荔枝筐。星馳入侯家。那惜黃金償。湘湖蓴菜出。賣者環三鄉。何以共烹煮。鱸魚三尺長。芳鮮初上市。羊酪何足當。鏡湖瀦衆水。自漢無旱蝗。重樓與曲檻。瀲灩浮湖光。舟行以當車。小繖遮新粧。淺坊小陌間。深夜理絲簧。我老述此詩。妄繼古樂章。恨無季札聽。大國風泱泱。

病後作

骨相坐一寒。仕宦經百謫。晚入文昌省。又坐煩言噴。詔書復收召。付以大典冊。期年甫奏篇。皇恐亟自劾。歸來稽山下。三食新穫麥。草屨布裙襦。徒步老阡陌。今年疾屢作。恍若將歸客。道士言犯土。拜章安舍宅。巫言神去幹。剪紙招魂魄。把臂忽自悟。此豈屋漏脈。盡去囊中藥。默觀鼻端白。正氣徐自還。鬼子何足磔。

道院雜興



征途暗盡舊貂裘。歸臥林間喜自由。體倦尙憑書引睡。心安不假酒攻愁。丹爐弄火經年熟。竹院聽琴竟日留。今日理髯還一笑。白間時有黑絲抽。

早歲知聞久已空。歸然猶有灞城翁。東樓誰記傾春碧。敘州。蓋古戎州也。有東樓廚醞。北嶺空思擘。

晚紅。北嶺在福州。予少時與友人朱景參會。嶺下僧舍。時秋。荔子獨晚紅在。冉冉流年霜鬢外。纍纍荒塚綠蕪中。琳房何日金丹熟。老

鶴猶堪萬里風。

### 山村經行因施藥

閒行偶復到山村。父老遮留共一樽。曩日見公孫未晬。如今已解牧鷄豚。逆旅人家近野橋。偶因秣蹇暫逍遙。村翁不解讀本草。爭就先生辨藥苗。

### 歎老

身歷遭回事萬端。天教林下養衰殘。文編似是他人作。書卷如曾隔世觀。久已悠悠置恩怨。況能一一記悲歡。牀頭周易真良藥。不是書生強自寬。

### 戲遣老懷

平生碌碌本無奇。況是年垂九十時。阿囷略如郎罷老。穉孫能伴太翁嬉。花前騎竹強名馬。階下埋盆便作池。一笑不妨閒過日。歎衰憂死卻成癡。

舊襲家風號散人。晚承恩詔賜閒身。放狂泥酒都忘老。厚價收書不似貧。霜曉方驚羣木脫。春晴又喜一花新。先生偶出人難遇。陌上爭先看角巾。

新晴

夜雨空階滴到明。山雲忽斂作新晴。門前月淡有簷影。牆外泥乾無屐聲。與世日疎愁易遣。入春得曠疾差平。便當剩作滄洲趣。寄語沙鷗勿敗盟。

新歲

改歲鍾馗在。依然舊綠襦。老庖供餽飪。跣婢暖屠蘇。載糗送窮鬼。扶箕迎紫姑。兒童欺老曠。明燭聚呼盧。

新曆歎

新曆在手心怕開。日月連翩相續來。黃金散盡自一快。白髮不貸真可哀。無爲健羨廣成子。千二百歲終有死。膠不可黏西去日。刀何由翦東流水。酒無醇醑但痛飲。市醞上尊俱醉耳。堂堂七尺死卽休。不飽烏鳶飽螻螿。

東籬

漫道深居晝掩關。東籬栽接不曾閒。每因清夢遊敷水。自覺前身隱華山。花發時時攜綠酒。客來往往羨朱顏。藥爐安著猶無地。擬展茆茨一兩間。

東偏隙地作疎籬。遇興無非一笑時。陪客投壺新罰酒。與兒鬪草又輸詩。山桃溪杏栽俱活。藥鏡漁竿動自隨。家事猶令罷關白。固應黜陟不曾知。

村夜

入春雨雪無休日。雨止猶陰未快晴。萬竅怒號風不定。半輪斜照月微明。百年辛苦農桑業。五處睽離父子情。但得平安已爲幸。孤燈殘火過三更。時子虞調字行在。子龍阻風西陵。子修在閩。子坦在海昌。予與子布子通守舍。

夢中作

世事何由可控搏。故山歸臥有餘歡。澗泉見底藥根瘦。石室生雲丹竈寒。人遠忽聞清獻起。山閒頻得異書看。一朝出赴安期約。萬里煙霄駕紫鸞。

新晴

寂寂房櫺鳥雀聲。熏籠茶竈正施行。繁花滿樹春纔半。斜日穿雲雨乍晴。引睡書橫猶在架。圍棋客散但空枰。病懷莫道傷幽獨。小榼芳醪手自傾。挂冠湖上遂吾初。捫腹消搖適有餘。羹煮野蔬元足味。屋茨生草亦安居。市墟分熟通賒酒。鄰舍情深許借驢。更喜新晴滿窗日。籤題重整一牀書。

春日雜賦

羈懷病思正厭厭。詩卷漁竿信手拈。老境何嘗忘一笑。春風也解到窮閭。殘花滿地無餘萼。新筍掀泥已露尖。轉老轉窮君勿笑。熊蹯魚腹豈容兼。

鬢毛八九已成霜。此際逢春只自傷。苦雨不容花抵敵。餘寒猶賴酒禁當。退紅衣焙熏香冷。古錦詩囊覓

句忙。堪笑散人閒事業。西窗容易又斜陽。唐樂府云。牀上小熏籠。韶州新退紅。

江湖放浪水雲人。藥物枝梧夢幻身。移竹南窗初試筍。掃花北陌旋成塵。窮忙自笑常終日。老健猶能不負春。未遂初心惟一事。乞薪賒米惱吾鄰。

乞得身歸剡曲邊。衡門茆舍其蕭然。向來誤計守書冊。此日遺愁無酒錢。俗客妒閒來袞袞。流年欺老去翩翩。梨花楊柳清明過。且向江頭剩放顛。

梅市莫歸三山

白日蠻童佩一壺。壺乾時亦復村酤。橫林露墜遠猶見。莫靄籠山淡欲無。綠浦例憑菰作界。畫橈常遣鷺前驅。此身元是滄浪客。敢學高人乞鏡湖。

春晚

村巷泥深晝掩門。倚闌搔首一消魂。花經風雨人方惜。士在江湖道更尊。擘浪忽看魚對躍。入雲時見鶴孤鶩。向來莘渭今安在。歎息誰能起九原。

雜感

早仕讒銷骨。遲歸悔噬臍。短衣猶掩脛。窮巷固多泥。婢喜蠶三幼。鄉中謂蠶眠爲幼。奴貪雨一犁。衡茆明我眼。刮膜謝金篦。春晚晴還雨。杯深醉復醒。溪添半篙綠。山可一窗青。藥品隨長鑿。花名記小屏。閒身幸無事。吟嘯送餘齡。

雜題

半飽半飢窮境界。知晴知雨病形骸。軒昂似鶴那求料。枯槁如僧不赴齋。大兒都門久栖栖。小兒調官今復西。鄰家父子我所羨。泥水沒膝扶畊犁。

出遊歸鞍上口占

渺渺煙波飛槳去。迢迢野徑策驢還。寄懷楚水吳山外。得意唐詩晉帖間。每惜好春如我老。誰能長日伴人閒。世間自是無兼得。勛業元非造物慳。

雨

曉望橫斜映水亭。莫看飄灑溼簾旌。不嫌平野蒼茫色。實厭空階點滴聲。上策莫如常熟睡。少安毋躁會當晴。且將穡事傳童稚。未插秧時正好耕。

初夏閒居

雲液初芻小瓮香。風漪乍展北窗涼。巢乾燕乳蟲供哺。花過蜂閒蜜滿房。閉戶不知春已去。鈔書但覺日方長。所嗟詩思年來減。虛負奚奴古錦囊。

川雲漠漠雨冥冥。濁酒閒傾不滿瓶。蠶簇尙寒憂繭薄。稻陂初滿喜秧青。王師護塞方屯甲。親詔優民已放丁。病起自憐猶健在。不須求應少微星。

松棚黯黯接虛堂。掃地燒香旋置牀。密葉留花供淺酌。斷雲障日作微涼。高城薄莫聞吹角。小市豐年有戲場。白首史官閒盡歲。祇將搜句畱流光。

城上朱旗夏令初。溪頭綠水蘸菰蒲。花貪結子無遺萼。燕接飛蟲正哺雛。簫鼓賽蠶人盡醉。陂塘移稻客相呼。鄉中謂傭工者爲客。長安青蓋金羈馬。也有農家此樂無。

啜茗清風兩腋生。西參雅具愜幽情。熏衣過後篝爐冷。展卷終時嬾架橫。巢燕何曾擇貧富。鳴鳩元不爲陰晴。但能與物俱無著。小草新詩取次成。

野水楓林久寄家。慣將枯淡作生涯。小樓有月聽吹笛。深院無風看磴茶。靜岸葛巾穿蒼蔚。閒拖筇杖入谿筴。平居每與兒孫說。切勿人前一語誇。

水邊茆屋兩三間。野叟幽人日往還。兩卷硬黃書老子。數峯破墨畫廬山。功名會上元須福。生死津頭正要頑。試說龜堂得力處。向來何啻半生閒。

養酒青梅次第嘗。啼鸚乳燕占年光。蠶收戶戶繅絲白。麥熟村村搗麩香。民有袴襦知歲樂。亭無桴鼓喜時康。未嘗一事橫胸次。但曲吾肱夢自長。

子通調官得永平錢監待次甚遠寄詩寬其意蓋將與之偕行也

黃紙起家陞仕籍。青衫遡闕拜恩光。署銜汝勿憎銅臭。就養吾方喜飯香。世事極知多倚伏。人生正要小回翔。但令父子常相守。斂版扶犁味總長。

### 梅市

沙際人家半掩扉。借炊小住不相違。水生溪面大魚躍。風定草頭雙蝶飛。竹院遊僧聞鼓集。煙畦老圃荷鋤歸。浩然物外真堪樂。回首浮生萬事非。

### 初夏幽居

日長巷陌曬絲香。雨霽郊原割麥忙。小擔過門嘗冷粉。微風解籜看新篁。傍籬鄰婦收魚笱。叩戶村醫送藥方。欲到湖邊還嬾動。悠然扶杖立斜陽。

虛堂一幅接羅巾。竹樹森疎夏令新。瓶竭重招麴道士。牀空新聘竹夫人。寒龜不食猶能壽。弊帚何施亦自珍。枕簟北窗寧有厭。小山終日對嶙峋。

野草幽花無歇時。一窗終日對東籬。病猶獨醉雖堪笑。老未全衰亦自奇。古紙硬黃臨晉帖。矮牋勻碧錄

唐詩箇中疑是忘憂處。問著山翁卻不知。  
東園梅熟杏初丹。老子披襟每不冠。古硯坡陁麝煤綠。小山蔥蒨石盆寒。移牀剗欲眠松塢。鼓枻還思泊蓼灘。未用絲毫辨差等。黃塵終勝客長安。

泛舟至近村茅徐兩舍勞以尊酒

小舸悠颺亦樂哉。迢迢故取北村回。山從樹外參差出。水自城陰曲折來。樂歲共忘東作苦。殘租不待急符催。舊鄰父老睽離久。喚取開顏把一盃。

林間書意

三三兩兩市船回。水際柴門尙未開。垂綠筍梢風正惡。弄黃梅子雨初來。紅螺盃小傾花露。紫玉池深貯麝煤。領取林間閒富貴。向來誤計伴鄒枚。

地僻

地僻臨湍瀨。門幽長綠苔。客書疑誤達。僧刺媿虛來。清露蘋花坼。斜陽燕子回。自憐猶有恨。佳日對空壘。

夏末野興

半世天涯倦遠遊。還鄉不減旅人愁。數聲相應鳩呼雨。一片初飛葉報秋。山塢風煙僧院路。河梁燈火酒家樓。絕知雪鬢宜簔笠。分付貂蟬與黑頭。



漠漠川雲闔復開。天公試手挽秋回。參差小市林邊出。縹緲疎鐘雨外來。土墾飯香供晚餉。布帘字大賣新醅。歸舟自逐輕鷗去。不用城笳抵死催。

劇暑

六月暑方劇。喘汗不支持。逃之顧無術。惟望樹影移。或謂當讀書。或勸把酒卮。或誇作字好。蕭然卻炎曦。或欲溪上釣。或思竹間碁。亦有出下策。買簞傾家貲。赤脚踏層冰。此計又絕癡。我獨謂不然。願子少置思。方今詔書下。淮汴方出師。黃旗立轅門。羽檄晝夜馳。大將先擐甲。三軍隨指揮。行伍未盡食。大將不言飢。渴不先飲水。驟不先告疲。吾儕獨安居。茂林蔭茆茨。脫巾濯寒泉。臥起從其私。於此尙畏熱。鬼神其可欺。坐客皆謂然。索紙遂成詩。便覺窗几間。颯颯清風吹。

縱遊深山隨所遇記之

行穿犖确度谿。路跨清溪一木斜。歷盡艱危到平地。壞垣欹屋兩三家。山徑欹危細棧通。孤村小店夕陽紅。竹郎有廟臨江際。木客無家住菁中。道逢山客束荆薪。口眼睢盱略似人。試問村名瞠不語。割然長嘯上嶙峋。古寺蕭蕭不見僧。飛鼯滿屋老梟鳴。空房終夜無燈火。斷木支門睡到明。

池上

旋移吟榻竝池橫。欲出柴門復嬾行。樹罅忽明知月上。竹梢微動覺風生。貧無醉日惟堅忍。疾遇涼秋亦漸平。二尺燈檠元好在。便思相伴聽蛩聲。

秋後一日風雨

炎歊數日劇。蕩滌及秋初。病葉風吹盡。鳴蟬雨打疎。趁涼謀社酒。乘潤理園蔬。分喜寧無處。蒲中鱖鱸魚。

秋思

詩人本自易悲傷。何況身更憂患場。烏鵲成橋秋又到。梧桐滴雨夜初涼。江南江北堠雙隻。燈暗燈明更短長。安得平生會心侶。一尊相屬送年光。

小病兩日而愈

病骨羸然山澤臞。故應行路笑形模。記書身大似椰子。忍事瘦生如瓠壺。美酒得錢猶可致。高人折簡孰能呼。不如淨掃茅氍地。臥看微香起瓦爐。

龜堂一隅開窗設榻爲小憩之地

楸欄簷蔔障斜陽。旋置臨階八尺牀。小展窗扉無大費。略加苫蓋有餘涼。老來愈覺歲時速。夢裏不知途路長。試問神遊向何處。月明揮榜上瀟湘。

秋懷

客思殘荷外。農功晚稻前。祭多巫得職。稅足吏無權。浦溆家家釣。村墟點點煙。歸舟葛衣薄。始覺是秋天。  
曩得治中俸。湖山偶卜居。身嘗著禾譜。兒解讀農書。遇事絕欣厭。接人均戚疎。乾坤雖浩浩。等付一蘧廬。  
秋暑雖猶在。晨興氣已清。蠻童掃荒徑。獠婢滌空鐙。病樹有凋葉。殘蟬無壯聲。書生守故態。已復理燈檠。

病臥

老境偏饒臥。秋天不肯晴。愁憑書解散。病仗藥支撐。果熟烏烏樂。村深雞犬聲。邊頭定何似。頗說募新兵。

秋夜獨坐聞里中鼓吹聲

收盡浮雲見素娥。青天脈脈映明河。時平里巷吹彈鬧。歲熟人家嫁娶多。高會不知清夜永。散歸想見醉顏酡。小窗燈火晶熒處。也有人賡七月歌。

自述

早畏危機避巧丸。長安未到意先闌。心如老馬雖知路。身似鳴蛙不屬官。閒駕柴車無遠近。旋沽村酒半甜酸。羣兒何足勞情恕。胸次從初抵海寬。

秋興

困儲赤米枝梧飯。篋有青氈準擬寒。政使堆金無處用。不須常貯一錢看。  
白頭韭美醃齏熟。頰尾魚鮮斫鱠成。卻對盤殮三太息。老年一飽費經營。

懲羹吹齏豈其非。亡羊補牢理所宜。白頭始訪金丹術。莫笑龜堂見事遲。  
放翁老矣欲何之。采藥名山更不疑。但入剡中行百里。姓名顏狀有誰知。  
鼙鼓華鯨響寺廊。殘蕪落葉弄秋光。蹇驢繫著門前柳。閒覓題名拂敗牆。

小築

小築隨高下。園池皆自然。鋤山得靈藥。斲坎遇寒泉。幽檻花房斂。深林果蒂駢。鄰翁亦好事。相伴送流年。

寓興

窮巷無來客。秋風獨浩歌。壯年閒處老。佳日病中過。甚欲攜長鏡。仍思擁短蓑。逢山皆可隱。不必上三峽。

行飯至湖上

行飯消搖日有常。青鞋又到古祠傍。殘蕪滿路無多綠。落葉投空不待黃。只道詩書能發冢。豈知博籥亦  
亡羊。此身只合都無事。時向湖橋看戲場。

秋晚雨中作

新雁南來歲又殘。蕭蕭風雨暗江干。客疎似悉爾來病。酒薄不禁如許寒。草絡籬頭花尚碧。樹當浦口葉  
初丹。醉來且擁黃紬睡。莫問何時后土乾。

湖村

四十來居湖上村。翩翩七見改初元。風梢解籜竹齊母。露葉成陰桐有孫。渴鹿出林窺藥井。馴鷗掠水傍。棊軒老人不用誇頑健。時看孫曾浴畫盆。

曉寒

悠悠殘夢伴殘更。萬木風號曉氣清。雞唱欲闌聞井汲。月痕漸淺覺窗明。突煙騰碧炊初動。衣焙推紅火已生。小閣翻書裘褐暖。早朝霜滑媿公卿。

南門散策

結宇溪一曲。兩山左右之。橫木以爲門。斷竹作短籬。本無剝啄客。門牡固不施。甃路壞莫補。石罅生棘茨。野蔓不知名。丹實何纒纒。村童摘不訶。吾亦愛吾兒。

十月

紅樹平沙十月天。放翁今作水中仙。蓼蓼林外迎神鼓。隻隻溪頭下釣船。世事極知吾有命。俗人終與汝無緣。菊花枯盡香猶在。又付東籬一醉眠。

記夢

久住人間豈自期。斷砧殘角助淒悲。征行忽入夜來夢。意氣尙如年少時。絕塞但驚天似水。流年不記髩成絲。此身死去詩猶在。未必無人麤見知。

旅舍

寺鐘吹動四山昏。繫纜來投江上村。木落不妨生意足。水歸猶有漲痕存。爐紅手暖書差健。鼎沸湯深酒易溫。勿爲無年憂寇竊。狺狺小犬護籬門。

石堰村

木落山不蔽。水縮洲自獻。寒日晚更明。村巷曲折見。小婦鳴機杼。童子陳筆硯。農家雖苦貧。終勝異鄉縣。君看宦遊子。豈無墳墓戀。生死在故鄉。切勿慕藥傳。

幽居遣懷

習氣深知要掃除。時時褊忿獨何歟。呼童不應自生火。待飯未來還讀書。世態詎堪閒處看。俗人自與我曹疎。作詩未必能傳後。要是幽懷得小摠。

貧述

寒生肌粟苦衣單。瘦減頭圍覺帽寬。荒寂在家猶逆旅。窮空養老亦蔬餐。柴青竈突騰煙細。膏盡燈缸照字難。猶喜新醅三斗熟。半窗梅影助清歡。

自述

勃落爲衣隱薜蘿。掃空塵抱養天和。過期未死更強健。與世不諧猶嘯歌。野市蕭條殘葉滿。酒家零落廢

壚多石帆山下孤舟雨。借問君如此老何。

幽事

老大常愁節物摧。東皇又挽斗杓回。江天慘慘不成雪。山驛蕭蕭初見梅。隱士寄雲從地肺。遊僧問路上天台。戲書幽事無時闕。古錦詩囊莫莫開。

山房

擾擾人間歲月移。山房幾度換茅茨。身遊與世相忘地。詩到令人不愛時。老鶴初來未丹頂。穉松親種已虬枝。東塗西抹非無意。皺面朱鉛太不宜。

感舊

雕鞍送客雙流驛。銀燭看花萬里橋。三十三年真一夢。茆簷寒雨夜蕭蕭。

禹祠

祠宇嵯峨接寶坊。扁舟又繫畫橋傍。鼓添滿筴蕝絲紫。蜜漬堆盤粉餌香。團扇賣時春漸晚。夾衣換後日初長。故人零落今何在。空弔頽垣墨數行。

見事

流光莫恨去聯翩。見事還疑勝昔年。細改新詩須枕上。少留劇飲待花前。陰陰竹塢安茶竈。淺淺蘋汀著

釣船物外家風吾豈敢。散人名號亦充員。

初春幽居

滿榼芳醪手自攜。陂湖南北埭東西。茂林處處見松鼠。幽圃時時聞竹雞。零落斷雲斜日霏。微過雨未成泥。老民不預人間事。但喜農疇漸可犁。小築園林淺鑿池。身閒隨事得遊嬉。幽花折得露猶溼。嘉木移來根不知。小蝶弄晴飛不去。珍禽喜靜語多時。風光未忍輕拋擲。聊付詩囊與酒卮。

春遊

梅市移舟過古城。此行亦未闕逢迎。負薪野老無妻子。施藥山人隱姓名。風雨偏宜宿茅店。鹽醯不遣到藜羹。宣和版籍今誰在。似是天教樂太平。

羸臥

羸臥將如老景何。小園風月且婆娑。茶因春困論交密。酒爲家貧作態多。馬上元無聽雞句。原頭那有飯牛歌。自憐遠屏猶多事。賣藥歸來買釣簑。

幽事

跌宕人間歲月遷。賞心幽事故依然。潮通支浦漁舟活。露溼繁花醉帽偏。才盡賦詩愁壓倒。氣衰對奕怯



饒先。光陰風月空如昨。悵望蘭亭被禊年。

莫春新路至湖上示元敏

時雨作未成。蒸溽思出門。湖塘直東西。行人各歸村。翻翻鳥投林。杳杳鐘鳴昏。羊牛爭迳路。煙火出短垣。吾兒望未到。誰與共盤飧。幽獨多惻愴。且復攜斯孫。歸來蓬窗下。聊可與晤言。

春陰溪上小軒作

午醉初醒倚釣軒。悠然無與共清言。風微僅足吹花片。雨細纔能見水痕。杳杳暝鐘浮遠浦。離離煙樹識孤村。故人萬里嶮山下。安得書來慰斷魂。比遣書問張季長消息於都下。未報。

自九里平水至雲門陶山歷龍瑞禹祠而歸凡四日

細雨如絲映晚暉。店家小憩換征衣。春農耕罷負犁去。村社祭餘懷肉歸。黃犢自依殘照臥。白鷗爭傍小灘飛。道邊舊識凋零盡。誰記遼天老令威。

老子無心老尚狂。山程隨處寄悵悵。雲歸岫穴初收雨。水入陂塘正下秧。野客就林煨燕筍。蠶家負籠采雞桑。遠遊萬里知何樂。卻喜東歸住故鄉。

老子山行肯遽回。直穿犖确上崔嵬。未誇腳力如平昔。且喜眉頭得暫開。廟後故梁龍化去。山前遺箭鶴銜來。囊錢已盡君無笑。草草猶能把一杯。

輿似雞栖寄兩竿。山程三月尚春寒。麥苗吐穗初成實。梅子生仁已帶酸。買飯猶勝乞墦客。看耕僭學勸農官。還家莫道虛懷袖。筍蕨隨宜亦滿盤。

點點桃花糝綠苔。入門倚杖意悠哉。數聲茶飯齋初散。一片溪雲雨欲來。老宿龍鍾嗟獨在。高松磊砢憶新栽。世間萬事俱難料。未死重遊更幾回。

春晚卽事

桑麻夾道蔽行人。桃李隨風旋作塵。煜煜紅燈迎婦擔。皤皤畫鼓祭蠶神。龍骨車鳴水入塘。雨來猶可望豐穰。老農愛犢行泥緩。幼婦憂蠶采葉忙。

雜詠

鏡中顏狀年年改。海內交朋日日疎。一慟寢門生意盡。從今無復季長書。近聞張季長物故。

女郎花樹新移種。官長梅園亦探租。作盡人間兒戲事。誰知空橐一錢無。鄉人謂楊梅。止曰梅官長。其高品也。

一日日窮窮不醒。一年年老老如期。黃河卻有逢清日。白髮應無返黑時。

早至園中

湖上空濛雨熟梅。清晨岸幘一悠哉。幽花不恨草埋沒。密樹豈知禽去來。舊爲愛茶分水器。近緣炊爨得琴材。小丘僅見山如髻。尙媿韓公八尺臺。

南堂晨坐

鏡湖清絕似瀟湘。晨起焚香坐草堂。日暖遊絲垂百尺。花殘新蜜釀千房。綠桑糝箔開蠶食。白水翻車浸稻秧。莫道村翁殺風景。也能沽酒當年光。

雨晴

早曠常思雨。沉陰卻喜晴。放船蓮蕩遠。岸幘竹風清。淮浦戎初遜。興州盜甫平。爲邦要持重。恐復議消兵。

秋晚雜興

昔遇高皇起衆材。姓名曾得廁鄒枚。年踰八十猶賒死。卻伴鄰翁斲芋魁。老病侵凌不可當。時時攬鏡自悲傷。西風吹散朝來酒。依舊衰顏似葉黃。冷落秋風把酒杯。半酣直欲挽春回。今年菰菜嘗新晚。正與鱸魚一併來。

閒遊所至少留得長句

垣屋參差桑竹繁。意行漫漫不知村。眼明可數遠山疊。足健直窮流水源。鷺引釣船經荻浦。牛隨牧笛入柴門。試尋高處休行李。清絕應須入夢魂。太平人物自諧嬉。及我青鞋布襪時。丁壯趁晴收早粟。比鄰結伴絡新絲。圓聲坎坎迎神社。大字翩翩賣酒旗。晤語豈無黃叔度。欲尋幽徑過牛醫。

夏日雜詠

閒居自無客。况復暑如焚。百折赴溪水。數峯當戶雲。幽尋窮鹿徑。靜釣雜鷗羣。舊愛南華語。今方踐所聞。

南堂雜興

新涼一夜入郊墟。晨起衣巾爽有餘。燕欲委巢雛盡去。燕有三生雛者。及秋雛方去盡。扇猶在手意先疎。題詩又滿牛

腰束。采藥常攜鴉觜鋤。湖上從今風月好。不妨隨處命籃輿。

犇走當年一念差。歸休別覺是生涯。茆簷喚客家常飯。竹院隨僧自在茶。紹興初。僧喚客茶。各隨意多。少。謂之自在茶。今遂成俗。

禪欠徧參寧得髓。詩緣獨學不名家。如今百事無能解。只擬清秋上釣槎。

曉思

昏昏斷夢帶餘醒。散髮披衣坐待明。城角吹殘河漸隱。海氛消盡日初生。老農自得當年樂。癡子方爭後世名。莫怪閉門常嬾出。卽今車蓋爲誰傾。

秋雨書感

新春赤米摘青蔬。一飽從來不願餘。門外久無溫卷客。架中寧有熱官書。濁醪未廢時時飲。短髮猶須日日梳。自笑少年風味在。滿川煙雨正愁予。

晨起開門雪滿簷。束崗一徑得幽尋。斷雲殘雨歲華晚。丹實碧花秋意深。林下已悲身老病。人間猶與俗

浮沉牀頭小甕今朝熟。又喚鄰翁共淺斟。

秋思

桑竹成陰不見門。牛羊分路各歸村。前山雨過雲無迹。別浦潮回岸有痕。老子齋居罷擊鮮。木盤竹筍每隨緣。鄰僧不用分香鉢。蓮芡猶堪過半年。

秋日村舍

川雲慘慘欲成雨。宿麥蒼蒼初覆土。芋肥一本可專車。蟹壯兩螯能敵虎。村村婚嫁花簇檐。廟廟禱祠神降語。兒孫力稼供賦租。千年萬年報明主。

秋感

扶杖龍鍾迫耄期。江湖木落更堪悲。醉中光景似得志。夢裏朋儕如少時。落筆龍蛇仲蒙帖。芮國器字仲蒙。滿懷風月季長詩。前朝名勝凋零盡。百歲關心只自知。聖世優容許乞身。歸來猶幸齒齊民。漁家那有懸車地。蔬食何施祝鯁人。獠婢臨溪漂衣絮。蠻童掃葉續炊薪。生涯如此仍秋莫。賴是從來慣處貧。

紹興辛未至丙子六年間。予年方壯。每遇重九。多與一時名士登高於叢山宇泰閣。距開禧丁卯六十年。憂患契闊。何所不有。追數同遊諸公。乃無一人在者。而予猶強健。慘愴不能已。賦

詩識之。

故里登高接雋遊。卽今不計幾番秋。一樽尙與菊花醉。萬事不禁江水流。薄命雖多死閭巷。逢時亦有至公侯。若論耄歲朱顏在。窮達皆當輸一籌。

老健

年垂九十身猶健。竹屋荆扉不厭低。挈榼自沽深巷酒。擁衾遙聽別村雞。家添豚柵還堪賦。路認牛欄每不迷。惟恨窮秋開霽少。晚來小雨又成泥。

寓歎

交世非初志。謀生又絕疎。家貧思辟穀。人忌悔知書。門異回軒巷。棗無秃尾驢。老頑君勿怪。萬事有堯除。短髮不禁搔。紆悲賴濁醪。潦收溪瀨急。木落寺樓高。善飯餘何欠。看雲亦足豪。今朝有奇事。江浦得霜螯。

題僧菴

細路穿雲塢。危橋渡野塘。人稀土花碧。屋老瓦松長。憂患雙蓬鬢。裝資一布囊。燒薪藉餘暖。今夜有新霜。

秋冬之交雜賦

嶺下晨炊黍。津頭莫繫船。寒潮吞別浦。老木慘蒼煙。市徙新山步。耕侵古廟堧。閒人不蓄幘。散髮醉江天。霧雨林塘晚。風霜聚落寒。衣冠存簡朴。農圃備艱難。春筴麩供餌。蒸炊豆作團。此心如古井。無地起濤瀾。

梅市莫歸

老境惟閉門。不與事物接。時逢佳山水。尚復快登涉。山程策小蹇。水泛搖短楫。今茲稅駕地。佳事喜稠疊。雲生溼行滕。風細掠醉頰。旅羹芼玉糝。僧飯敷白氈。葑火煨芋魁。瓦甑炊豆莢。經行出幽圃。懷抱頗自愜。枯籬絡丹實。深澗堆黃葉。白雲橫谷口。綠篠穿山脅。還家寧迫莫。取路羞徑捷。何當倚蒲龕。一坐十小劫。

霜夜

月淡霜清夜漏遲。疎鐘杳杳度南陂。燈殘有恨欲誰語。雞老無聲如我衰。使入蜀川方在道。書傳淮浦定何時。若為可遣閒愁得。獨擁寒爐爇豆其。  
時方附蜀中便舟。寄書張季長家。又未得古壽書。每關懷。

醉歌

不癡不聾不作翁。平生與世馬牛風。無才無德癡頑老。爾來對客惟稱好。相風便帆第一籌。隨風倒柂更何憂。亦不求作佛。亦不願封侯。亦不須脫裘去換酒。亦不須賣劍來買牛。甲第從渠壓梁肉。貂裘本自出兜鍪。變理陰陽豈不好。纔得閒管晴雨如鶉鳩。辛苦築壘拂雲祠。不如吟歎風月登高樓。爾作楚舞吾齊謳。身安意適死即休。

雪意

風吼江郊雪意濃。雲如兩陣決雌雄。山寒酒過平時量。窗黑書虧半日功。閒話更端茶竈熟。清詩分韻地

爐紅不須遽覓華胥路。更俟天花落坐中。

晚晴出行近村閒詠景物

雪雲吹盡木陰移。正是先生曳杖時。老特行將新長犢。空桑臥出寄生枝。醫翁莫過囊探藥。筮叟晨占手布著。誰謂人間足憂患。未妨古俗自熙熙。

郊行

山色掃石黛。江流漲麴塵。春晴不終日。老病動經旬。竹密有啼鳥。村深多醉人。東阡與南陌。處處寄閒身。開歲屢作雨。不成正月二十六。日夜乃得雨。明日行家圃有賦。

東風吹雨破天慳。行圃歸來刺解顏。百草吹香蝴蝶鬧。一溪漲綠鷺鷥閒。老來每歎論心少。貧甚方知覓醉難。猶賴籃輿無恙在。呼兒結束入南山。

園中晚飯示兒子

一飽何心慕萬鍾。小園父子自相從。蚍蜉布陣雨將作。蛺蝶成團春已濃。澗底束薪供晚爨。街頭糴米續晨春。盤餐莫恨無兼味。自繞荒畦摘芥菘。

書況

自從請老鏡湖濱。萬事不關林下人。鴉去鴉歸還過日。花開花落又經春。官微也過千重浪。身在依然一



幅巾晨突有煙吾事了。濁醪不復惱比鄰。

魯墟舟中作

春浦南來元不到。畫橈偶復入鷗羣。人家遠火林間見。船底微波枕上聞。山口正銜初出月。渡頭未散欲歸雲。錦囊詩草新寥落。得句猶堪寄一欣。

恩封渭南伯唐詩趙嘏爲渭南尉當時謂之趙渭南後來將以予爲陸渭南乎戲作長句

老向人間久倦遊。君恩乞與渭川秋。虛名定作陳驚坐。好句真慙趙倚樓。棧豆十年霑病馬。煙波萬里著浮鷗。就封他日輕裘去。應過三峯處處留。

幽居

宿志在人外。清心遊物初。猶輕天上福。那習世間書。薺菜挑供麩。槐芽采作蔬。朝晡兩摩腹。未可笑幽居。

海棠歌

我初入蜀鬢未霜。南充樊亭看海棠。當時已謂日未覩。豈知更有碧雞坊。碧雞海棠天下絕。枝枝似染猩猩血。蜀姬豔粧肯讓人。花前頓覺無顏色。扁舟東下八千里。桃李真成僕奴爾。若使海棠根可移。揚州芍藥應羞死。風雨春殘杜鵑哭。夜夜寒衾夢還蜀。何從乞得不死方。更看千年未爲足。

湖上

綸巾羽扇影翩翩。湖上彷徨莫計年。桃李已忘疇昔分。禽魚猶結後來緣。山前虛市初多筍。江外人家不  
禁煙。莫恨幽情無與共。一雙白鷺導吾前。

夏初書感

春與人俱老。花隨夢已空。遊蜂黏落蕊。輕燕接飛蟲。桑悴知蠶起。牲肥賽麥豐。爲農當自力。相戒勿怱怱。

初夏喜事

箕穎元非爭奪場。瀟湘自古水雲鄉。采茶歌裏春光老。煮繭香中夏景長。歛版早知遊宦惡。署門晚悟世  
情常。茹芝卻粒雖無術。散髮猶當效楚狂。

閒遊

好事湖邊賣酒家。杖頭錢盡慣曾賒。壚邊爛醉眠經日。開過紅薇一架花。

初夏雜興

終日頽然蠹簡中。門前煙水浩無窮。百年等是一枯塚。四海應無兩放翁。栗玉長枝挑苦筍。胭脂小把翦  
防風。地偏日永閒無事。擬著珍蔬譜一通。

書興

占得溪山下數椽。飽經世故豈猶全。入門明月真堪友。滿榻清風不用錢。便死也勝千百輩。少留更過二

三年湖橋有酒能來醉。一棹何妨作水仙。

池亭夏晝

造物寧非念老生。池亭幽事悉施行。羣魚聚散忽無迹。孤蝶去來如有情。小磴落茶紛雪片。寒泉得火作松聲。曲肱假寐翛然寤。不爲敲門夢不成。

卽事

放翁老去未忘情。鏡裏森然白髮生。一片常愁見花落。三聲最怕聽猿鳴。年年雙隻路傍堠。夜夜短長城上更。晚悟一條差似可。孤舟漁火看潮平。

野性

野性從來與世疎。俗塵自不到吾廬。醉中往往得新句。夢裏時時見異書。穉子那偷服藥酒。家僮尙護放生魚。今朝更有欣然處。引得清泉灌晚蔬。

讀史

王侯到底是虛名。何物能爲我重輕。徒步出關胡不可。向來常笑棄繻生。自古功名亦偶諧。胸中要使浩無涯。可憐赫赫丹陽尹。數顆檳榔尙繫懷。

病戒

憂身如憂國。畏病如畏亂。此身雖幸健。敢作無事看。禍福在呼吸。恐懼兼寢飯。人所忽不省。我思嘗熟爛。夜臥不安席。晨起寧待旦。雖云親藥石。得失每參半。人情喜一快。往往觸剝悍。收功寧使遲。覆敗不可玩。

小築

小築竝湖隄。茅茨不厭低。引泉澆藥圃。斫竹樹雞棲。夕靄山常淡。秋蕪路欲迷。平生草玄手。老去學鉏犁。

欲雨

徙冗中庭蟻。爭巢後圃鳩。物情猶慮患。人事得忘憂。荷鍤決新渠。芟茹補舊廬。共知秋必雨。有備即安居。

出遊莫歸

東行西行日莫歸。川雲漠漠雨霏霏。蝗餘場上禾收薄。酒貴街頭客醉稀。買犢躬耕空自力。灼龜占歲又成非。穉孫索飯殊關抱。憐汝何時得瓠肥。

仲秋書事

秋風社散日平西。餘胙殘壺手自提。賜食敢思烹細項。家庖仍禁擘團臍。昔為儀曹郎。兼領膳部。食。每

中有羊細項。甚珍。予近以惡殺不食蟹。

書生習氣盡驅除。酒興詩情亦已無。底怪今朝親筆硯。村鄉來請辟蝗符。

農家

大布縫袍穩。乾薪起火紅。薄才施畝畝。朴學教兒童。羊要高爲棧。雞當細織籠。農家自堪樂。不是傲王公。  
盜息無排甲。兵消不取丁。頻過鬪雞舍。閒學相牛經。江浦漁歌遠。人家績火青。遨遊無定處。隨意宿丘亭。  
東舍女乘龍。西家婦夢熊。翁誇酒重碧。孫愛果初紅。栗烈三冬近。團欒一笑同。營生無繆巧。百事仰天公。  
租犢耕蕎地。呼船取荻薪。蒼頭供井臼。赤腳解縫紉。僧乞銘師塔。巫邀賽土神。心常厭多事。謝病又經旬。  
新作地爐成。蓬窗亦自明。油香麵餌脆。人靜布機鳴。縣吏催科簡。豪家督債輕。小康何敢望。生計且支撐。  
諸孫晚下學。髻脫繞園行。互笑藏鈎拙。爭言鬪草贏。爺嚴責程課。翁愛哺飴錫。富貴寧期汝。它年且力耕。

晚秋出門戲作

病叟倘徉古澤邊。橫林搖落莫秋天。鳴鳩雨後卻呼婦。飛雀霜前先著綿。抱被每投僧榻宿。卷書時當酒  
家錢。秋風想像芝房熟。北望商山一悵然。

示子遙

我初學詩日。但欲工藻繪。中年始少悟。漸若窺宏大。怪奇亦間出。如石漱湍瀨。數仞李杜牆。常恨欠領會。

元白纔倚門。溫李真市鄮。正令筆扛鼎。亦未造三昧。詩爲六藝一。豈用資狡獪。晉人謂戲爲狡獪。今閩語尙爾。汝果欲學詩。工夫在詩外。

聞新雁有感

才本無多老更疎。功名已負此心初。鏡湖夜半聞新雁。自起吹燈讀漢書。新雁南來片影孤。冷雲深處宿菰蘆。不知湘水巴陵路。曾記漁陽上谷無。

小園獨酌

橫林搖落弄微丹。深巷蕭條作小寒。秋氣已高殊可喜。老懷多感自無歡。鹿初離母斑猶淺。橘乍經霜味尙酸。小酌一卮幽興足。豈須落佩與頽冠。

覽鏡

鏡中老翁誰。非復少年我。誦書如布穀。拈出無一可。又非富貴逼。棄去自不果。無功博一飽。有學當萬坐。老境最堪笑。作計日益左。正似鳩拙巢。不及蠶自裹。霜寒衣未贖。瑟縮附殘火。作詩數十年。所得良鎖鎖。弱松困蔓纏。何日見磊砢。洞庭可遠遊。秋風思捩柂。

獨坐

博山香霧散。緋緋袖手何妨靜。掩扉六十年前故人盡。紹興中往還朋舊。今乃無一人在。八千里外寄書稀。自張季長下世。蜀

中書問  
幾絕。昨朝送客桐江去。今日逢僧剡縣歸。欲作小詩還復嬾。海鷗與我兩忘機。

初冬雜詠

重陽已過二十日。殘菊纔存三四枝。對酒插花君勿笑。從來不解入時宜。  
古壽書來言得堦。東陽人到報生孫。一家三處俱強健。且撥閒愁近酒尊。  
微風蹙水靴文浪。薄日烘雲卵色天。但恨世間閒客少。江湖底處欠漁船。  
老去胸中百事真。同遊無復白頭新。鵲從熟後頻分食。鹿漸馴來不避人。

小江

出郭四十里。孟冬天尙和。風生帆力健。木落月明多。小市人聲散。長橋炬火過。吾生幾來往。撫枕獨悲歌。

短歌行

富貴得意如登天。自計一跌理不全。晝食忘味夜費眠。渠過一日如一年。春蠶得衣畊得食。農功初成各  
休息。賣酒壚邊紛鼓笛。我過一年如一日。二者求兼勢安可。與我周旋寧作我。春城桃李豈不妍。雪澗未  
妨松磊砢。人生禍福難遽論。廟犧烏得爲孤豚。君不見獵徒父子牽黃犬。歲歲秋風上蔡門。

冬日排悶

地爐微火伴寒灰。垂野江雲暝不開。欲睡手中書自墮。半酣窗外雪初來。渡頭照影聞征雁。籬角吹香得

早梅佛粥春盤俱不遠。離離斗柄欲東回。

湖山尋梅

鏡湖渺渺煙波白。不與人間通地脈。騎龍古仙絕火食。慣住空山齧冰雪。東皇高之置度外。正似人中巢許輩。萬木僵死我獨存。本來長生非返魂。小雪湖上尋梅時。短帽亂插皆繁枝。路人看者竊相語。此老胸中常有詩。歸來青燈耿窗扉。心鏡忽入造化機。墨池水淺筆鋒燥。笑拂吳箋作飛草。

讀唐人愁詩戲作

少時喚愁作底物。老境方知世有愁。忘盡世間愁故在。和身忘卻始應休。清愁自是詩中料。向使無愁可得詩。不屬僧窗孤宿夜。卽還山驛旅遊時。

書歎

尺椽不改結茅初。薄粥猶贍卒歲儲。獨子解迎門外客。狸奴知護案間書。深林閒數新添筍。小沼時觀舊放魚。自笑從來徒步慣。歸休枉道是懸車。

晚步湖隄

絕裘桐帽野人裝。又上湖隄步夕陽。貧甚不爲明日計。興來猶作少年狂。殘樽倒酒無餘瀝。幽圃尋梅認



暗香時有行人歎頑健。黑絲點破頰。霜。

春日雜興

小甌有米可續炊。紙鳶竹馬看兒嬉。但得官清吏不橫。卽是村中歌舞時。  
由仕常騎秃尾驢。歸休自駕折轅車。今朝偶遇村夫子。借得齊民一卷書。  
更事多來見物情。世間常恨太忙生。花開款款寧爲晚。日出遲遲卻是晴。  
四十餘年學養生。誰知所得亦平平。體孱不犯寒時出。路溼常尋乾處行。  
攪睡禽聲曉傍簷。泥人花氣午穿簾。懽情老去年年薄。困思春來日日添。

暮春龜堂卽事

風日初和晝漏長。蕭然巾履集茆堂。雨餘千疊暮山綠。花落一溪春水香。  
斷簡橫中塵委積。故人墓上草荒涼。爾來幸有寬懷處。病退牀頭減藥囊。  
日月無根去若馳。故園又見落花時。盃中綠酒不肯飲。鏡裏蒼顏應自知。  
千丈新堤湖水滿。五更殘漏角聲悲。暮年父子難乖隔。淮浦書來苦覺遲。

殘年

殘年光景易駸駸。屏迹江村不厭深。新麥熟時蠶上簇。晚鷺啼處柳成陰。  
短檠已負觀書眼。孤劍空懷許

國心惟有雲山差可樂。杖藜誰與伴幽尋。

閒詠

蕭蕭華髮映烏巾。五十年前故史臣。正使老來無老伴。未妨閒處作閒人。按行池水知增耗。點檢庭花見故新。更有菴中策助事。投牀鼻息聒比鄰。事業無聞負聖時。滄波自照角巾欵。養成林下無窮嬾。占盡人間徹底癡。小麥繞村苗鬱鬱。柔桑滿陌椹纍纍。醫翁筴叟真堪友。搜索殘尊與共持。

初夏

新綠陰中燕子飛。數家煙火自相依。童誇犢健浮溪過。婦閔鶯飢負葉歸。地煖小畦花永長。泥融幽徑藥苗肥。郊居樂事何勝數。一醉旗亭又典衣。

山房

柴門不掩俗人稀。成就山房一段奇。木葉最宜新雨後。鳥聲更勝暮春時。家貧屢罄緣耽酒。宿習猶存爲愛詩。別有一條差自慰。木苗芎苗正離離。

窗下戲詠

飛來山鳥語惺惚。却是幽人半睡中。新竹成陰無彈射。不妨同向北窗風。

三尺清池鏡面平。剪刀葉底戲魚行。吾曹安得如渠樂。傍渚跳波過此生。  
何處輕黃雙小蝶。翩翩與我共徘徊。綠陰芳草佳風月。不是花時也解來。

埭西小聚

瓦盎盛蠶蛹。沙甌煮麥人。三家小聚落。兩姓世婚姻。父老衣冠古。閭閻風俗淳。不應陶靖節。獨號葛天民。  
山行過僧庵不入

垣屋參差竹塢深。舊題名處嬾重尋。茶壚煙起知高興。碁子聲疎識苦心。淡日暉暉孤市散。殘雲漠漠半川陰。長吟未斷清愁起。已見橫林宿暮禽。

山行

閒人日日得閒行。況值今朝小雨晴。水淺遊魚渾可數。山深藥草半無名。臨溪旋喚罾船渡。過寺初聞浴鼓聲。小醉未應風味減。滿盤青杏伴朱櫻。

小酌

偶向東園把一盃。不辭團坐埽蒼苔。野花經雨自開落。山鳥穿林時去來。皂白正非天欲辨。青黃要與木爲災。今年秋後猶能健。賸乞梅栽與李栽。

夏日

暑雨初晴晝漏遲。江鄉樂事有誰知。村村壠麥登場後。戶戶吳蠶拆簇時。齒髮凋零奈爾何。年光暗裏易消磨。街槐正喜清陰密。巷柳還驚蠹葉多。竹根斷作眠雲枕。木瘦剝成貯酒尊。怪怪奇奇非着意。自無俗物到山村。黃葛蚊廚睡欲成。高槐陰轉暑風清。倚牀奴子垂頭坐。搖手兒孫小步行。斲取溪藤便作香。煉成崖蜜旋煎湯。蕭然巾履茅堂上。不畏人間夏日長。

舟中有賦

一枝柔艣聽啞啞。炊稻來依野老家。山寺日中齋鼓動。江樓風急酒旗斜。綠梢嫋嫋搖新竹。翠蔓離離熟早瓜。閒客去留隨所遇。不知何處送棲鴉。

蒸溽作雨排悶

柱礎生微潤。簾櫳轉薄陰。蟻遷都邑改。鳩逐怨恩深。菡萏新離水。芭蕉半展心。掩屏惟熟睡。誰與續愁吟。

卽事

煙雨淒迷晚不收。疎簾曲几寄悠悠。一雙蛺蝶來何許。點盡青青百草頭。小閣憑欄望遠空。天河橫貫斗牛中。他年鼓角榆關路。馬上遙看與此同。

露坐小隱

寂寂柴門閉嫩苔。門前有路走天台。近秋河漢西南落。欲雨風雲東北來。旋摘甘瓜青帶蔓。新篘玉醴冷傳盃。亦知野外無供給。且復相逢笑口開。

晚興

竝簷幽鳥語瓊瓏。一榻蕭然四面風。客散茶甘留舌本。睡餘書味在胸中。浮雲變態吾何與。腐骨成塵論自公。剩欲與君談此事。少須明月出溪東。

疾小愈縱筆作短章

治疾如治盜。要使復其常。藉曰用戈矛。全之寧欲傷。彼盜皆吾民。初非若胡羌。奈何一朝忿。直欲事歐攘。歐攘雖快心。少忍理則長。華陀古神醫。煎浣到肺腸。取効雖卓犖。去死真毫芒。君審欲除盜。惟當法龔黃。撫摩尙有道。四境皆耕桑。我亦以治疾。不減玉函方。

病少愈偶作

蕭條白髮臥蓬廬。虛讀人間萬卷書。遇事始知聞道晚。抱疴方悔養生疎。高門赫赫何關我。薄俗紛紛莫問渠。羸疾少蘇思一出。夕陽門巷駕柴車。病入秋來不可當。便從此逝亦何傷。百錢布被斂首足。三寸桐棺埋澗岡。但恨著書終草草。不嫌徂歲去堂堂。今朝生意纔絲髮。便擬街頭醉放狂。

湖上晚望

閒人無處破除閒。待得漁舟一一還。峯頂夕陽煙際水。分明六幅巨然山。

九月十一日疾小間夜賦

清夜房櫳燈火微。此心病起更依依。空驚牀下莎蟲語。不見梁間巢燕歸。蒼硯有池殘墨在。白頭不櫛亂書圍。可憐未遽忘風月。猶夢華觴插羽飛。病後衣巾盡覺寬。挈提裘領喟然歎。孤燈不焰熒熒碧。小雨無聲慘慘寒。只道清心災自退。豈知非意病相干。平生最愛秋搖落。惆悵今年怯倚欄。

遠遊

壯年不作故山歸。老去方知浪走非。挂日片帆吳赤壁。嘶風正馬蜀青衣。交遊雖廣知心少。香火徒勤願力微。堪笑只今成底事。青燈無恙且相依。

九月二十五日雞鳴前起待旦

堪笑枯腸漸畏茶。夜闌坐起聽城笳。爐溫自撥深培火。燈暗猶垂半結花。斷夢不妨尋枕上。孤愁還似客天涯。埽塵拾得殘詩藁。滿紙風鶉字半斜。

舟中晨起

天宇清寒病體輕。煙波聊復事宵征。艣橫舟尾霜如抹。犬走籬根葉有聲。蕭尹威名空赫赫。班侯智略本平平。不如歸結迎神社。長笛圓鼙送此生。

殘菊

殘菊一枝香未殘。夜窗拈起百回看。過時只恐難相笑。我是三朝舊史官。

山墅

煙水煙林老結廬。人間用短更誰如。輦蒲穩背供危坐。小幟障燈便細書。莫欺衰病歸山墅。曾領諸儒上石渠。貞觀開元嗟已遠。爲君試說紹興初。

秋晚幽居

吳中秋晚氣猶和。疾豎其如此老何。鳥語漸稀人睡美。木陰初薄夕陽多。埽園日日成幽趣。撫枕時時亦浩歌。車轍久空君勿歎。文殊自解問維摩。

遊山

一生萬里著行滕。抖擻塵埃尙未能。不怕語音時帶刻。敢辭生計略如僧。疎梅漸動清溪曲。霽雪遙看古塔層。喚起故年清絕夢。數聲柔艣下巴陵。

病中雜詠

身是人間一老樵。城南煙水寄迢迢。尋人偶到金家陵。取米時經杜浦橋。小市孤村雞喔喔。斷山幽谷雨蕭蕭。吾曹自養無能爾。楚客應無隱可招。身似頭陀不出家。杜陵歸老有桑麻。茶煎小鼎初翻浪。燈應寒窗自結花。殘藥漸離愁境界。亂書重理淡生涯。等閒一事還超俗。斷紙題詩字亂斜。

示兒

死去元知萬事空。但悲不見九州同。王師北定中原日。家祭無忘告乃翁。



# 止齋詩鈔

陳傅良字君舉居温州瑞安縣之帆遊鄉學於永嘉薛氏得伊洛之旨又從南軒東萊聞爲學大要其名益高爲太學錄累遷至嘉王府贊讀龍樓閣問寢不時獨切諫每以天性感悟孝宗父子後知上意弗回遂乞歸寧宗初除中書與朱子同朝疏留朱子爲韓侂胄所忌詆學術不正遂罷去杜門居一室曰止齋嘉泰二年復提舉江州起至泉州力辭授寶謨閣待制尋卒於家初從薛氏自井田王制司馬法八陣圖之屬該通委曲皆可施之實用復研精經史貫穿百氏以斯文爲己任故其詩格亦蒼勁得少陵一體云

## 讀范文正公神道碑有感佚事

武侯不可致元德造其廬公在衰經中乃上時政書維時君臣定事與草昧殊出處千載同豈必名迹如行伍拔大將寒饑得名儒推轂天下士百年用其餘生平慕河汾未許王魏俱慤勤入司馬意獨何區區自古朋黨論消復莽無期誰令羣疑亡韓富及有爲惜哉公不見功名止西陲

## 送宋國博參議江東分韻得夜字前年上幸學一時同舍今去略盡爲之悵然

南門供帳江上亭北門觴酒湖邊榭兩年出餞略可數往往行人半同舍憶昔翠華臨璧海儒先一日爭

聲價。蘇君舌掉巫峽水。楊君氣奪幽并夜。黃君石矼不可轉。夫子居然古彝罍。艾軒風流天下少。獨奏咸韶無濩夏。黃梁未熟事如許。白髮不生心亦怕。古來賢俊多坎軻。道與世違胡足詫。武皇好少臣已老。孟子尊王君尙霸。嗟乎夫子幸遭時。諸公滾滾皆流亞。德尊不過五品薄。歲晚曾無一飯暇。君恩豈必間湖海。家事姑惟問桑稼。此行端可振頽俗。令我短轅今欲駕。

遊鼓山

鼓山聞天下。一見名不空。自從周職方。閩在王會中。登山亦幾人。興寄隨所逢。騎君常惕日。遷客多悲風。劍川發甌西。萬阻與海通。忽焉得平壤。北山矗其東。我行未及巔。已見國勢雄。三韓到吳會。不可道里窮。俯瞰南來帆。沄沄自朝宗。曩時諸降王。各撫千里封。相招神銜圖。旅獻東都宮。東都今何如。胡馬鳴蒿蓬。一春長雨霧。明日歸樊籠。恣探泉石幽。篝燈導歸筇。

和林懿仲喜雪韻

常陽厥咎何。君相疚朝夕。愧莫慰羣黎。淒其望三白。是心與天通。昨夜平地尺。簑笠在東阡。耰耨在西陌。忍待明年飽。欣及吾事隙。海宇正無塵。草木亦煥赫。遙知紫宸朝。千官手加額。溫綸粲龍光。賀牘交馬迹。銜枚懸瓠城。仗節居延澤。獨擁藍關馬。共飭滹沱麥。更願吾君相對此。念忠赤。當令挾纊溫。恩意到疆場。有士如有年。要豈旦日積。袁安自甘寢。掃軌無過客。

再和前韻

冬夜苦難曉。短景復易夕。安得戶牖光。不待東方白。恍如游化城。瓊臺若干尺。英華發林藪。餘彩散阡陌。平鋪浩無垠。巽入微有隙。忍寒貪縱觀。未願朝曦赫。柳綿著歌茵。梅片墮粧額。皜然羣汗中。有意欲比迹。自識玉皇家。癯仙陋山澤。新來學爲農。遭歲屢無麥。穉子色恆饑。老婢腳盡赤。一飮今有待。喜更問瓜場。歸來看床頭。瓶粟幸餘積。且以炊春醪。號召已散客。

除夜用前韻

又添犬馬齒。常恐牛羊夕。牙無數株牢。髻已大半白。六朝貴人家。珊瑚高數尺。復有陵邑豪。沃壤動連陌。居然燕巢幙。忽矣駒過隙。伊傅亦中壽。至今名赫赫。蒼苔臥風雨。曾乏斷碑額。中原五十載。胡騎亂禹迹。誰當懶折腰。去學陶彭澤。憂端壓不下。中夜歌秀麥。昭代豈無人。腰黃臥前赤。鴻儒籌禁省。壯士守邊場。歌罷且杯酒。澆此懷抱積。柴門剝剝響。已有賀年客。

再用喜雪除夕二韻寄宗簡

百年彈指頃。羣動不遑夕。變彼惰游者。長夜浮大白。豪俠旁無人。臥我樓百尺。衲子縛禪靜。不敢踐桑陌。武夫髀肉滿。睥睨候邊隙。道家求不死。真火養陰赫。躁人千速化。自點雷門額。書生苦穿鑿。奇字窮鳥迹。何如吾老農。一雨犁春澤。相忘與雞豚。所辨纔菽麥。不聞有孔子。安識由與赤。紛紛舉世士。肝膽自疆場。

老翁捧腹笑。空洞無一積。有來問時事。請以臆對客。

送楊似之提舉湖南

昨日有客去分符。今朝有客來攬轡。蕨芽掇盡筍可刷。送客焉知老將去。儒雅風流能有幾。南宮先生無乃是。十年不復夢蓬山。萬里何為隔湘水。葉公歸然地官貳。顏公領袖天下士。星聯郎署尤與何。次第諸公亦連茹。一時臺省舊名德。十見班行已三四。可令僕馬病崔嵬。獨抱蘭蓀吊憔悴。漁樵混迹山窮處。故肯臨人不記。酒半停盃問鬢髮。夜闌秉燭徵文字。多時渴見痛折節。萬事要看方得意。先生行矣扈甘泉。請自此心扶大議。薛士昭侍丞。赴衡陽守之翌日。而似之吏部至。初似之與葉侍郎叔羽。顏祭酒幾聖。尚書郎尤延之。何一之。同在館學。今皆還朝。故併及之。

器呂伯恭郎中舟行寄諸友

去年上溪船。落日建安旄。今年上溪船。濡露金華草。當代能幾人。胡不白髮早。念昔會合時。心事得傾倒。倚廬魚鼓夜。聯轡雞人曉。遐搜接混茫。細剖入幽眇。挹注隘溟渤。扶攜薄穹昊。斯文何契闊。之子復凋槁。百年在無窮。寥廓一過鳥。家人徵舊聞。學者拾餘藁。區區存萬一。散逸誰可保。君看魯論上。彭壽顏回天。于今懸日月。豈必言語好。儻無後來者。泯沒秋毫小。南浮吳蜀會。北顧關河杳。懷哉各努力。人物古來少。

和張孟阜尋梅韻

平生拙狀物。出語輒自哈。久欲頌梅花。恆恐累紙寫不該。羨子年少氣豪敏。詩筒往往歲一來。語不驚人

意不止。筆力待盡千松煤。我以病驥追霜隼。著鞭不上嗔人催。置詩太息梅困我。恨不縱斧尋條枚。嗟乎孤山無人老坡死。水邊竹外誰低徊。我嘗欲擬禁字體。不道雪月冰瓊瑰。退藏物後獨笑傲。奄有歲晚多驚猜。紛紛自謂好顏色。萬彙禿立皆堪哀。模將此意入詩句。十年未就梅空開。君詩卻怪梅不早。令我內熱紅生腮。強隨嶮韻終不滿。今年又恐坐看落片飛莓苔。

送劉茂實宰奉新

遠別欲無寐。細論誰有酒。今當作劇縣。君意亦樂不。江湖吏道僻。歲月民勞久。救之敝精神。自愛終袖手。要中名甚美。用意物所咎。君觀蘭桂林。餘茂及樵樵。移根託客土。顏色非故有。贈言幾滿車。一字堪皓首。於焉但裁擇。對越二三友。諸賢在當路。公論在衆口。

送謝希孟歸黃巖四首

紛紛竹帛傳。浩浩金石刻。淪亡已無限。存亦誰愛惜。如何伏羲氏。文字二三畫。姬孔豈不聖。用以演周易。法令如牛毛。斯鞅信手成。簿書積丘山。趙張眼愈明。萬人立下風。國勢尊且榮。未省三代前。誰獨有此名。圭璧襲緇藉。山龍飾衣裳。不聞燧古初。而興自虞唐。毀車崇騎射。隸作篆籀藏。至今人便之。秦亦忽以亡。累觴以爲歡。班荆以爲儀。交際貴如此。勿使至意虧。頗常怪小雅。鹿鳴至魚麗。賓主禮百拜。六經似支離。

寄題陳同甫抱膝亭

稻粱不難謀。軒冕亦易得。胡爲抱膝翁。惻惻復惻惻。秋風墮碧梧。鳳鳥去無迹。愁吟草際蛩。兒女淚盈臆。忽然一長嘯。孤響起空寂。令人識雅頌。一唱三歎息。室廬在路傍。耕鑿在民籍。行人聽笑語。稚子共眠食。讀書果何罪。鬚髮又半白。此意太勞勞。此身長抑抑。抱膝且不可。出門更何適。但勿問門外。蓬蒿若干尺。

送鮑清卿教授莆中

閩中豈不好。莆中況多儒。其山有丹荔。其水有子魚。艾軒諸老生。典則故所餘。堂堂退傅門。海內欲曳裾。宦游得此樂。餞者酒滿車。我亦勸君酒。我意獨未舒。嘗聞入林獵。不可背水漁。背水漁尙可。背時更崎嶇。方今朝廷尊。紳笏日走趨。官多豈勝記。勢遠復易疎。媒身衆所同。藉口誰不如。奈何但溫飽。去向天一隅。平生拙自謀。蓬巷歲月除。更事亦旣熟。晝此未必愚。豈有服苴蘭。佩之以瓊琚。令人愛不見。搔首空踟蹰。

送謝倅景英赴閩

言詩必南雅。自鄒吾無譏。嗟余生已晚。觀人似觀詩。人情日變化。往事十九非。相從飾邊幅。欲語懷銜羈。久不見官寺。下與家人夷。渡江六十年。得此心目疑。早從諸公遊。晚佐一郡治。居嘗陳誼高。動與作吏違。大白浮朋簪。單車款民扉。多文雖素履。用拙真良規。二年意綢繆。一別事渺瀰。有酒公不飲。贈言我何裨。穆穆清朝班。僉曰尙德宜。何妨着此翁。衣冠皓鬚眉。

懷同舍石天民編修

山陰不得見。見期在東陽。東陽忽歲華。欲往又阻長。貽書輒無報。有便復寄將。以君懶於書。我豈望得當。永懷十年別。動止曾莫詳。君貌今何如。孰與我老蒼。就使白髮同。腳力誰弱強。日飮米多少。飲酒可幾觴。尙能甘寢耶。比之昔對床。嫂氏又晚景。吾婦伯姊行。爲君過客頻。膏沐當不常有兒若干人。已未勝冠裳。但要能應門。勿問鄙與臧。一紙細說似。慰此遙相望。未乃及田舍。何有還何亡。丞郡祿已厚。豈不可小康。憶昔夜夢君。託交少年場。竦身而掀髯。眸子炯炯光。依然論時事。悲壯淚以滂。我方閉門嬉。謁至卽暫忙。婆婆松竹下。細數秋葉黃。舊志益凋零。羣書半遺忘。請君勿他及。卻使我意傷。

夷門歌送修德還闕

萬古江入海。吳蜀有不通。不通誰使然。人自爲異同。昔在李孟錢。士各懷士封。靜言彼何尤。亦各狗所忠。恭惟宋受命。三姓皆朝宗。斯文已百年。名世纔數公。眉山與金陵。奈何不相容。大雅如關洛。亦復互詆攻。朋分文字間。禍起師友中。四郊忽戎馬。塵滿夷門宮。往事已覆轍。後事如飄蓬。一飯忘苦饑。一褐忘苦冬。身謀每不長。王事靡有終。有客獨惻惻。萬里興深衷。相過話離合。歷歷繇熙豐。我久世慮薄。念之涕無從。貧賤將安歸。功名在其逢。有能用斯人。可使百阻空。西人不爲西。東人不爲東。

述懷

有客盈門飯不足。有書千卷兒懶讀。王公勞問煬爭竈。樵牧相忘盜騎屋。古來堪笑如我少。生無一事能

恰好。獨有居閑可引年。我又不然華髮蚤。

送王南強赴紹興簽幕四首

詞章行天下。嘉賴二百年。甲科至公卿。誰敢謂不然。有人妄媒孽。一世所棄捐。我亦欲護短。諱不言幽燕。汗簡在吾後。覆車在吾前。人人尊孔孟。家家誦詩書。未省有宇宙。孰與今多儒。儒者道如砥。豈其自崎嶇。申以黃老廢。賈以絳灌疎。漢家嘗紛紛。政爾門戶殊。歷官如歷階。越等多所傷。奈何均堂水。持綆萬丈長。誰無斯世方。乃此袖手旁。永夜淚不禁。仲尼故皇皇。又聞雖小魯。乘田問牛羊。聞之浙河東。見之湘水南。未歸卻相送。既喜復不堪。行矣乞自便。帥幕或可參。君方乘日長。勉爲停朝驂。我池有螃蟹。我園有黃柑。

題明皇醉歸圖

騎者兩人扶不正。夾道誰知爲萬乘。一人前馳一顧後。懷欲並驅無號令。狩人亦忘記鷹犬。仰視只愁天欲暝。有司刺候上起居。杳莫得詳宮鑰靜。嗚呼開元自英主。前鑒竟遺盈幅紙。君不見漢宮圖。妲己未必當年甚如是。



送范憲東叔帥潼川四首

離逾十年合。合復十月離。往日苦無及。來日忽未知。江源與海通。吳會與蜀違。通固天道常。違亦物理宜。勿作兒女感。是中有精微。相從意氣豪。相知鬢毛斑。細說竟昨非。淺斟始今歡。每懷吾黨多。未救此世難。一則琢冰雪。再則糾芝蘭。騷人絕芳潔。孰與風人寬。有書但遮眼。有位亦養疴。養疴猶近名。遮眼已患多。聊復歲晏爾。奈此人遠何。聲光正橫空。議論如懸河。宜君見別輕。款曲理則那。逢人九頓首。遇事三折肱。雖知少爲狂。正復老可憎。吾今有儲粟。吾昔有短檠。魯論訓何如。周易讀未曾。言歸又言歸。兒女喚不應。

聞葉正則閱藏經次其送客韻以問之

順水去吳會。逆水來夔門。萬古逆順舟。以斗占旦昏。曩余好百家。信不及魯論。初亦半喜愕。久之乍亡存。白髮一無成。頗識委與源。風停波自平。卻視消長痕。六經夫如何。夫子手所翻。恆言但桑稼。怪志無鵬鷗。規圓而矩方。往往萬巧攢。諸儒各有得。長短賢若干。玉帛相會盟。兵車相并吞。一語苟暗合。羣生皆晏溫。經成今幾年。嘗試以是觀。此道未軻死。此書未秦燔。猶之斗經天。於以生蓋渾。西方亦人豪。國自爲乾坤。

書來入中州。坐使學者奔。君豈捨從之。或但遊其藩。吾聞欲乘槎。鑿空訪河根。孰與瞻斗車。把柁行江湍。  
岷峨山下筇竹杖。危者使安衰可壯。秦皇漢武窮兵不可得。我獨得之今丞相。前年有旨還故園。其冬急  
召朝日邊。半歲驅馳數千里。賴有此杖常扶顛。倉皇又別脩門去。私室無人謹呵護。夜半雷霆下取將。兒  
叫妻啼留不住。我聞丞相下峽時。一物無有杖自隨。屬當晏朝立仗久。憐我弱脛疲坳螭。如今步履隨衰  
草。十步趨起九步倒。假如杖在欲用之。山精海怪震怒亦不保。君不見杜陵桃竹歌。常恐失之君山湖上  
之風波。梓潼使君之贈尙爾耳。況自丞相還如何。

水仙花

江梅丈人行。歲寒固天姿。蠟梅微着色。標致亦背時。胡然此桑嘉。支本僅自持。迺以平地尺。氣與松篁夷。  
粹然金玉相。承以翠羽儀。獨立萬槁中。冰膠雪垂垂。水仙誰強名。相宜未相知。刻畫近脂粉。而況山谷詩。  
吾聞抱太和。未易形似窺。當其自英華。造物且霽威。平生恨剛褊。未老齒髮衰。掇花寘膽瓶。吾今得吾師。

止齋曲廊初成

但酒勝如水。但花勝如草。小廊曲通幽。竹椽亦良好。止齋十數間。足以便衰老。簷低遠風露。地窄易汛掃。  
淺溪浮薄觴。短屏糊舊藁。著書僅玄易。過客多韋縞。於中榜退思。誰其諒深抱。吾思亦已晚。吾退盍更早。

懷哉彭澤令。仰止商山皓。維淵有潛龍。維岳有藏寶。煌煌暮春堂。三字落穹昊。昭回際南極。鎮撫及東島。胡然迺在斯。夙夜懼不保。鬼神無世情。呵護必有道。

次沈儉夫求花木韻

我意何不樂。我顏復何愧。止齋有新畚。耕犢角已繭。止齋有溪水。釣席隨所便。兩山夾精舍。佳處迫廬峴。朋來盡名流。燕坐皆勝踐。頽然止齋翁。心故不可轉。厭書或窺園。乘興時陟巘。日月之蔽虧。木陰自幽顯。雨露之密疎。草色自深淺。翁乎一觴詠。初不着姝變。易老探醇駁。風騷較寬褊。眠食雖甚佳。病患盍加勉。謗篋況所招。訟銛那能辨。於焉更悟入。豈但苟排遣。寄言子沈子。所欲果何件。葭豕來春田。冥鴻脫秋瀾。谷蘭猶見紉。月桂不可攀。慕遠失之近。求多得常鮮。請以壯縣才。從茲益懷卷。深居勿近市。隘巷莫容輦。有花門擁篲。無花地生蘚。嘗試玩喧寂。何者是真舛。舊學枉初心。新功費重研。何如過止齋。我亦精文選。

送鄭少卿景望知建寧

屏廢誠愚分。牢愁更索居。若逢知己問。猶解課兒書。地僻門長閉。年饑菜自鉏。相望無一字。不是古情疎。

庚子除夜有懷

老盆自酌共誰歌。嘆息其如此夜何。已覺二毛嗔婦問。可堪一飲患兒多。關河滿眼風塵在。天地藏身歲月過。事業文章吾所畏。東陽人亦臥巖阿。

送德遠弟赴省

科名雖細事。文字要新功。方拙存家學。豐腴與衆同。江湖多我友。臺省半諸公。爲道貧非病。連簷有芥菘。聞沈元誠歸自臨漳喜而奉寄

荔圃班班熟。蠔房箇箇肥。我雖緣此誤。公亦爲何歸。吏事生衣垢。家山減帶圍。不無華袞字。卿月更光輝。和張孟阜歲旦韻

白髮朝看鏡。青燈夜數更。文章輸善宦。名字誤浮生。廢學兒鼾睡。安貧婦饁耕。從今定逢吉。吾已卜先庚。天台王子木解官長樂見訪

夜深擘荔真愁絕。春淺傳柑更惘然。世事愛來欺兩鬢。人生堪得別多年。琢冰積雪江湖阻。樹羽崇牙日月懸。此理倉茫君勿問。明朝且莫刺歸船。

月夜書懷二首

送客門初掩。收書室更虛。新篁高過瓦。涼月下臨除。婦病纔扶杖。兒饑或饋魚。今朝吾已過。莫問夜何如。道德吾何敢。功名代有人。倉黃恆畏咎。班白總憂貧。細字書全廢。深杯酒勿親。靜言空自愛。萬古亦泯泯。

題仙巖梅雨潭

袞袞羣山俱入海。堂堂背水若重關。怒號懸瀑從天下。傑立蒼崖夾道陳。晉宋至今堪屈指。東南如此豈

無人結廬作對吾何敢。聊向樵漁寄此身。

游金罍趙園

脈脈循簷水。林林夾岸山。令兒從竹下。領客入雲間。稠木容人過。懸崖着手攀。從今名字出。不到徑苔班。

用前韻招蕃叟弟

細看物理愁如海。遙想朋從眼欲花。逆水魚兒衝斷岸。貪泥燕子墮危沙。百年喬木參天上。一昔平蕪着處佳。行樂不妨隨邂逅。我無官守似蚺蛙。蛙通作

落花風雨奈愁何。愁亦不應緣落花。尚可流觴追曲水。底須占鵬似長沙。孟夏事無人晤語鳥烏樂。爲我食貧萋筍佳。休說關河無限恨。腹非空怒道旁蛙。

乙巳歲首寄彭子復徐子直

又過一年空草草。尋思萬事太勞勞。歲煩士友愁薪米。日見兒童嘆髣毛。亂卉各隨分寸長。新禽已變兩三號。及時君亦圖良集。莫待春深水一篙。

和丁少詹韻

盡日支頤聽雨聲。閑中惟得自知明。朋來何敢煩公等。老去方慚負此名。待欲短檠看少作。敢將尺牘論交情。區區卻望從容意。要莫令人一座傾。

明月隋珠忽墮前。坐令衰颯意飄然。無端太史頭搶地。安得楊雄賦上天。前輩門牆餘幾在。他時竹帛竟誰傳。落花流水君愁不。南渡于今六十年。

和沈守持要觀潮閣留題

平生欲賦觀潮閣。立盡斜陽倦復還。一日江山蒙筆力。百年名字滿人寰。郡從晉宋風流後。詩到蘇黃伯仲間。向去摩挲看石刻。誰知功在十年閑。公閑居十年。

奉陪王德修登觀海閣兼呈邑宰劉伯協

觀潮閣在東溟上。有客來登自華陽。不道雪山通老柏。卻看朝日上扶桑。勝游氣合南三荆。荆楊益也。劉江西南人。妙畫家傳晉二王。後會不知誰與繼。爾江吾海永相望。

桂陽勸農

雨耨風耕病汝多。誰將一一手摩挲。幸因奉令來循壟。恨不分勞去荷蓑。涼德未知年熟不。微官其奈月樁何。殷勤父老曾無補。待放腰鎌與醉歌。

題范秀才萬卷堂

雅尚相時背。幽棲我數過。兒應看客慣。田孰與書多。自析唐郴縣。誰聯漢甲科。儒門今有此。天意定如何。楊伯子以其尊人誠齋南海集爲贈以詩奉酬。

得與門牆最不遲。白頭方誦嶺南詩。文從嘉祐今三變。人在廬陵此一時。細數儒先能幾見。獨憐歲晚欲何之。瀟湘直下長江去。得望蓬萊卻更疑。

潭帥潘德卿生辰

落南添得黑髭歸。歸與相忘草木知。嶽麓沈沈秋柝靜。湘波穆穆夜帆遲。人間公論今何在。柱下家聲此不疑。德卿乃子賤舍人之姪。但欲公年如衛武。爲留淇澳變風詩。

寄陳同甫

古來材大難爲用。納納乾坤着幾人。但把雞豚燕同社。莫將鵝鴨惱比隣。世非文字將安托。身與兒孫竟孰親。一語解紛吾豈敢。祇應行道亦酸辛。

送辛卿幼安帥閩

長才自昔恨平時。三入脩門兩鬢絲。甕下可能長夜飲。花間卻學晚唐詞。潛然北顧關河水。簡在西清日月遲。乘鴈雙鳧滄海上。與君從此恐差池。

送盧郎中國華赴閩憲

相望千里馬牛風。聯事湖湘各已翁。造次使呼兒女見。綢繆略與弟兄同。百年又是梅花發。萬事何如荔子紅。欲附使軺嗟不及。卻憐身在俊躔中。

送范大著文叔知彭州

中書世祿今無幾。唐鑑家聲世不多。安得有人賢若此。忽聞去國意如何。同朝最是頭先白。知己還愁語太苛。盡欲讀書三萬卷。蓬萊未必似岷峨。

同游張園酒中各嘆明年未知誰與此會余最衰病宜去因作詩識之

春過新煙能有幾。愁生飛絮轉難禁。可憐衰白隨年少。愛看殘紅到夜深。一輩衣冠方事事。故園松竹已陰陰。明年此會知誰共。雁蕩山前寄好音。

送曾繼先赴山陰路鈴

鬚髯白盡猶強飯。髀肉添多未跨鞍。不向胡沙親矢石。卻來橋塚護衣冠。歸舟自此長相背。薦墨于今尙未乾。只恐燕然他日事。獨無名字可同刊。

泊釣臺灘下

今歲僅餘今夜月。此舟三泊此江沂。遭逢明主還遺恨。慙愧先生獨見幾。泗水列侯多不免。商山四皓竟安歸。漢家故舊嘗枚數。孰與東南一釣磯。

除夕宿處州天寧寺

人言老去不如初。我愛初心老轉無。懶向門前題鬱壘。喜從人後飲屠蘇。杯盤甚簡眠須早。禮數多寬拜



要扶。況復齟齬僧紙帳。雞人不聽禁庭呼。

再寄蔣仲可用前韻

幸無骨相可封侯。歸理先人舊釣遊。山下剩栽諸本竹。水邊須着數間樓。羣書可讀自隨喜。一客不來誰與愁。時把釣絲銷永日。魚兒亦得兩三頭。

重陽日寄瑞安劉宰劉宰以是日晏新第人併見招不及赴

落帽沾衣總失真。追隨黃菊亦勞神。酒無肴核依然好。家有溪山豈是貧。沆瀣從空來夜氣。青冥隨處際秋旻。不知此是登高否。爲問慈恩塔上人。

和林宗易菊花韻

一歲所餘秋有幾。重陽偏與老相催。每憐白髮能長健。雖愛黃花亦懶栽。好景游從須好友。新詩風味似新醅。人生適意無過此。恣聽東籬早晏開。

春日和林宗易韻

白與紅兼盡落梅。小園獨步日千迴。浮空曉色臨無際。排闥春光撥不開。學語新禽更後轉。鋪茸細草雨邊來。卻憐追逐今無力。放下簾鉤就麝煤。

和徐叔子用林宗易韻見示

相過風雨獨何歟。校酒論文已不如。方信深交相戀繆。卻因衰退更躊躇。吟生池草書成束。飲落簷花醉墮車。明日待隨公等去。我頭應始自今梳。

游雲頂院和徐叔子韻

老大生憎兒女態。更無春怨與秋悲。略將盃酌隨宜具。剩有溪山取次嬉。愛客不妨兼汎汎。論文何苦太奇奇。況曾窺得尊生術。通昔蒲團日一炊。

村居二首

業已將身落耦耕。時於觀物悟浮生。擇栖未定鳥離立。避礙已通魚並行。野老窺巢占太歲。牧兒敲角報殘更。絕勝倚市看郵置。客至還無菜甲羹。

野衣農圃雜華髮。弟兄同佚老便居僻。貪閑喜命窮。習成杯酌少。脫落語言工。危坐看流景。新萌又落紅。

沈仲一送菊自言封殖之勞欲得詩爲報爲賦三絕

東籬何在菊年年。菊視陶詩竟孰賢。未必緣詩花更好。花將詩與萬人傳。

霜螯風味小槽春。新樣宮衣試麴塵。見周禮麴衣注。一段秋光誰領此。芙蓉凡子桂陳人。

愁乾手自搭連筒。苦雨丁丁棧小蓬。乞得花開急催客。明朝恐已着霜紅。

立春

千官勒馬謝幡勝。萬國鞭牛占雨晴。誰據槁梧相近午。頰車徐轉鼻無聲。

和張端士初夏

屈原賈誼陶淵明文辭皆喜道孟夏。而悲樂不同。雖所遭之時異。要亦懷抱使然耳。端士寄夏日一首。若無聊然。因和其韻。頌初夏之美以解之。

綠陰四合水迷津。春去雖愁卻可人。無數飛螢窺案帙。有時乳燕落梁塵。滿塘荷蔭將還舊。試火包香又斬新。短夜得眠常不足。僧鐘遮莫報昏晨。

止齋卽事二首

恆已耐岑寂。老應忘隱憂。齊年雙白髮。盡日一蒼頭。竹閉緘門鑰。蒲團數漏籌。未知庭廡下。還有雀羅不。教子時開卷。逢人強整襟。再貧看晚節。多病得初心。地僻菱蓮好。山低竹樹深。寄聲同燕社。明月又秋砧。

己未上巳清明

霖霖故作落花天。佳節重重倍悵然。雖有庭除臨曲水。更無尊俎試新煙。醪醖雅欲延春賞。杜宇還能破晝眠。賴得一昆同一客。蕨芽蒲筍短檠邊。

和林宗易上巳韻

寥寥曙鼓五更初。枚數何門可曳裾。孰與課兒翻故紙。幾曾緣客掃精廬。常饑未免時中酒。多病安能強

著書自笑無才供視草。徒勞身後問相如。

答朱翔遠見別之作

總角相看五十年。行藏殊轍各蹒然。豈無子美書成束。欲送相如賦上天。俗眼不寬多小謹。交情何限復長篇。乘壺偶自兵廚至。聊助征帆一醉眠。

晚移舟塘次值風而回莘叟兄有詩次韻

經春屏跡與誰同。苦雨衣篝亦自烘。方此欲爲官況事。依然不值世情風。蒙茸水國蒲荷蕩。馥郁田家橘柚叢。最是一年行樂處。翻成咄咄坐書空。

廷楠姪得男朱文昭寄詩於湯餅集卽席和韻

喜說徐卿得二雛。吾家波及亦君餘。青衫手板宜從此。斷簡家藏莫付渠。但欲健如黃犢走。不妨錯寫弄麀書。更看湯餅頻頻供。笑索梅花到歲除。

挽尤延之尙書

自爲師說竟誰宗。每事持平屬此翁。有志政須名節是。斯文非獨語言工。要令舉世人材出。合在前朝行輩中。安得長年留把柁。後來各與一帆風。

宿留江湖長子孫。行藏節節耐人看。及爲侍從身垂老。欲試平生事轉難。書就僅題前太史。功成方記舊

甘盤令人長恨經綸意。歷事三朝見一班。  
向來諸老獨歸然。羸不勝衣萬事便。燈下細書批勅字。雪邊先着趁朝鞭。豈應無故令身健。卻止功名與世傳。遺奏定留封禪藁。憑誰吹送九重天。  
壯歲從游兩鬢霜。重來函丈各堪傷。那知卒業今無及。極悔論心昨未嘗。相約歸期須次第。獨存病骨更淒涼。他年賴有門生記。託在碑陰永不忘。

挽東陽郭德誼

簪紱何能貴。聲名幸自脩。凡今爲我友。幾處與君遊。翰墨千年托。松梧一夜秋。令人懷昔日。炯炯夢丹丘。

悼楊林甫

袖手旁觀一世餘。元非親物亦非疎。酒邊每事如人意。燈下通宵讀我書。學到莊騷才止此。生逢周漢定何如。西州相識無遺恨。獨恨無從搯子祛。



# 誠齋詩鈔

楊萬里字廷秀。吉州吉水人。中紹興進士。爲零陵丞。張浚勉以正心誠意之學。遂自名其室曰誠齋。光宗親書二字賜之。歷官國學太常。知漳州。常州。提舉廣東常平茶鹽。帝親擢東宮侍讀。以議配饗忤孝宗。出知筠州。光宗召爲祕書監。尋出江東轉運。總領淮西江東朝議行鐵錢。萬里不奉詔。改贛州乞祠。自是不復出。韓侂胄築南園。屬爲記。許以掖垣。曰官可棄。記不可得。侂胄權日盛。遂憂憤成疾。家人不敢進邸報。適族子自外至。言侂胄近狀。萬里慟哭。呼紙書曰。姦臣專權。謀危社稷。吾頭顱如許。報國無路。惟有孤憤別妻子。筆落而逝。年八十三。諡文節。其詩自序。始學江西。旣學後山五字律。旣又學半山七字絕句。晚乃學唐人絕句。後官荆溪。忽若有悟。遂謝去前學。而後渙然自得。時目爲誠齋體。嘗自焚其少作千餘。中有如露窠蛛。卹緯風語燕懷春。立岸風大壯。還舟燈小明。疎星煜煜沙貫月。綠雲擾擾水舞苔。坐忘日月三杯酒。臥護江湖一釣船之句。舉似尤延之。歎惋曰。詩何必一體。焚之可惜也。後村謂放翁學力也。似杜甫。誠齋天分也。似李白。蓋落盡皮毛。自出機杼。古人之所謂似李白者。入今之俗目。則皆俚嘯也。初得黃春坊選本。又得樵李高氏所錄。爲訂正。手抄之。見者無不大笑。嗚呼。不笑不足以爲誠齋之詩。

木樨

只道秋花豔未強。此花儘更有商量。東風染得千紅紫。曾有西風半點香。

考試湖南漕司南歸值雨

我亦知吾生有涯。長將病骨抵風沙。天寒短日仍爲酒。日暮長亭未是家。又苦征夫催去去。更甘飛雨故斜斜。舊聞行路令人老。便恐霜花一半加。

題湘中館二首

清境故應好。新寒殊不勝。征衣愁著盡。凭檻喜猶能。亂眼船離岸。關心山見稜。箇中有句在。下語更誰曾。江欲浮秋去。山能渡水來。媿隅蠻語雜。欵乃楚聲哀。寒早當緣閨。詩成未費才。愁邊正無奈。歡伯一相開。

野菊

未與騷人當糗糧。况隨流俗作重陽。政緣在野有幽色。肯爲無人減妙香。已晚相逢半山碧。便忙也折一枝黃。花應冷笑東籬族。猶向陶翁覓寵光。

明發石山

明發愁仍集。寒雲又作屯。懸知今定雨。正坐夜來暄。便恐禾生耳。寧論客斷魂。山深更須入。聞有早梅村。

普明寺見梅



城中忙失探梅期。初見僧窗一兩枝。猶喜相看那恨晚。故應更好半開時。今冬不雪何關事。作伴孤芳卻欠伊。月落山空正幽獨。慰存無酒且新詩。

東寺詩僧照上人訪予於普明寺贈以詩

故人深處白雲隈。欲到何因只寄梅。歲晚觀山吾獨立。泥中騎馬子能來。轉頭不覺三年別。病眼相看一笑開。說似少陵真句法。未應言下更空回。

臘夜普明寺睡覺

作臘聊春酒。依人只短檠。略無更可數。聽到雨無聲。犬吠知何苦。鷄寒肯更鳴。生來眠不足。老去夢難成。除夕前一日歸舟夜泊曲渦市宿治平寺

江寬風緊折綿寒。灘多岸少上水船。市何曾遠船不近。意已先到燈明邊。夜投古寺衝泥入。濕薪燒作蟲聲泣。冷窗凍筆更成眠。也勝疎蓬仰見天。市人歌呼作時節。詩人兩膝高于頰。還家兒女問何如。明日此懷猶忍說。

癸未上元後永州夜飲趙敦禮竹亭聞蛙醉吟

茆亭夜集俯萬竹。初月未光讓高燭。主人酒令來無窮。恍然墮我醉鄉中。草間蛙聲忽三兩。似笑吾人慳酒量。只作蛙聽故自佳。何須更作鼓吹想。尙憶同登萬石亭。倚欄垂手望寒青。只今真到寒青裏。吾人不

飲竹不喜。

過百家渡四絕句

出得城來事事幽。涉湘乍濟值漁舟。也知漁父趁魚急。翻着春衫不裹頭。  
園花落盡路花開。白白紅紅各自媒。莫問早行奇絕處。四方八面野香來。  
柳子祠前春已殘。新晴特地卻春寒。疎籬不與花爲護。只爲蛛絲作網竿。  
一晴一雨路乾溼。半淡半濃山疊重。遠草平中見牛背。新秧疎處有人踪。

武岡李簿回多問蕭判官東夫

客有來從天一隅。相逢喜問子何如。橘洲各自分馬首。湘水更曾烹鯉魚。心近人遐長作惡。離多合少可無書。得知安穩猶差慰。敢道韋郎迹也疎。

迂新守值雨

春雨不大又不晴。只與行人禁送迎。小溪綠漲竟何曾。官路黃泥滑不勝。今年送迎乃爾苦。去年送迎正如許。風巖火滅未五更。暗行十里鷄三鳴。行路最難仍最惡。平生歷盡今更覺。前人失腳後人笑。後人失腳那可料。

負丞零陵更盡而代者未至家君攜老幼先歸追送出城正值泥雨萬感驟集

吾父先歸吾未可。吾母已行猶顧我。兒女喜歸不解悲。我愁安得如兒癡。墻頭人看不須羨。居者那知行  
者歎。昨日幸晴今又雨。天公管得行人苦。吾母病肺生怯寒。晚風鳴屋正無端。人家養子要作官。吾親此  
行誰使然。

和仲良催看黃才叔秀才南園牡丹

愁雨留花花已爛。作晴猶喜兩朝寒。山城春事無多了。可緩黃園看牡丹。

別教授吳景衡名煬輔。處州人。

道合從人笑。情親覺別難。得朋何恨晚。到老幾相看。世路今逾窄。吾徒卻自寬。此心各相勉。不似道加餐。

龔令國英約小集感冷暴下歸臥感而賦焉

客裏何煩病。春餘不謂寒。併來無計奈。那得有懷寬。憎藥猶須強。耽書更暇看。兩親問消息。敢道不平安。  
吏卒稀仍散。僮奴野自親。問吾適無恙。遽病此何因。初覺身爲客。還疑老逼人。焚香發深省。一笑對殘春。

仲良見和再和謝焉

未惜詩脾苦。端令鬼膽寒。吾才三鼓竭。君思九江寬。作者今猶古。燈前捲又看。不辭鬚撚斷。只苦句難安。  
誰謂陳三遠。髯張下筆親。夫何此意合。恐有宿生因。我豈慵開眼。年來寡見人。更煩題好句。割取楚江春。

陳三·後山  
先生也。

和仲良春晚卽事

欲與東風說。休吹墮絮飛。吾行正無定。魂夢豈忘歸。花暖能醺眼。山濃欲染衣。只嫌春已老。此景也應稀。貧難聘歡伯。病敢跨連錢。夢豈花邊到。春俄雨裏遷。一犁關五秉。百箔候三眠。只有書生拙。窮年墾紙田。笋改齋前路。蔬眠雨後畦。晴江明處動。遠樹看來齊。我語真彫朽。君詩妙斲泥。殷勤報春去。恰恰一鶯啼。

題黃才叔看山亭

春山葉潤秋山瘦。雨山黯黯晴山秀。湖湘山色天下稀。零陵仍復白其眉。作亭不爲俗人好。箇竹把茅吾事了。朝來看山佳有餘。爲渠更盡一編書。

題唐德明建一齋

城南前江後山址。竹齋正對寒江啓。不嫌漁火亂書燈。只苦櫓聲驚睡美。平生刺頭鑽故紙。晚知此事無多子。從渠散漫汗牛書。笑倚江楓弄江水。

夜離零陵以避同寮追送之勞留簡諸友

思歸日日只空言。一棹今真水月間。半夜猶聞郡樓鼓。明朝應失永州山。

泊冷水浦

前夕放船湘口步。約到衡州來日午。五程一減作三程。謝渠江漲半篙清。今日雨來三四五。又閉疎篷聽

暮雨長年商量泊舟所。雨外青山更青處。

讀罪己詔時有符離之潰。

莫讀輪臺詔。令人淚點垂。天乎容此虜。帝者謁非熊。何罪良家子。知他大將誰。願懲危度口。儻復雁門踰。

危度口。見光武紀二年注。

亂起吾降音日。吾將強仕年。中原仍夢裏。南紀且愁邊。陛下非常主。羣公莫自賢。金臺尙未築。乃至羨強燕。

只道六朝窄。渠猶數百春。國家祖宗澤。天地發生仁。歷服端傳遠。君王但側身。楚人要能懼。周命正維新。

明發新塗晴快風。順約泊樟鎮。

雨到中宵歇。心知逗曉晴。排雲數峯出。漏日半江明。風借輕帆便。天催嬾客行。不應樟鎮酒。無意待人傾。

泊樟頭

此地三接浙。從來四肅霜。日斜秋樹轉。市散暮船忙。波捲青中白。霞翻紫外黃。汀沙渾換卻。不記舊圓方。

蔣蓮店有書柳子厚寄吳武陵琴詩三讀敬哦五言

秋晴得涼行。壁閱遇佳讀。已咽猶餘滋。將燼忽贖馥。語妙古來多。聽難今良獨。追誦惜去眼。信步遑擬足。驚心一鳥鳴。隔溪兩峯綠。

道逢王元龜閣學

秋日纔升卻霧中。先生更去恐羣空。古雖云遠今猶古。公亦安知世重公。軒冕何緣關此老。江山所過總西風。我行安用相逢得。不得趨隅又北東。

過下梅

不特山盤水亦回。溪山信美暇徘徊。行人自趁斜陽急。關得歸鴉更苦催。

到龍山頭

影靜長安道。涼風響轡銜。海天低到水。江日晚明帆。潮遣先驅壯。聲吞絕島巉。黃塵征袖滿。卻愧着朝衫。

見澹菴胡先生舍人

澹翁家近醉翁家。二老風流莫等差。黃帽朱耶飽煙雨。白頭紫禁判鶯花。補天老手何須石。行地新堤早着沙。三歲別公千里見。端能解榻淪春芽。

跋馬公弼省幹出示山谷草聖院花醉圖名彥輔·西人·

涪翁浣花醉圖歌。歌詞自作復自寫。少陵無人張顛死。以翁奄有二子者。不論釵股與錐沙。更數旱蛟及驚蛇。詩仙不合兼草聖。鬼妒天嗔教薄命。人言愛書緣愛賢。紫眉未必勝青編。舊時鬼門關外客。如今一字抵尺璧。何須千載空相憶。

送王監簿民瞻南歸庭珪

潮頭打雲雲不留。月波潑窗窗欲流。夜寒報晴豈待曉。天公端爲盧溪老。盧溪在山不知年。盧溪出山卽日還。黃紙苦催得高臥。青霞成癖誰能那。詔謂先生式國人。掉頭已復煙林深。路傍莫作兩疏看。老儒不用橐中金。

澹庵坐上觀顯上人分茶

分茶何似煎茶好。煎茶不似分茶巧。蒸水老禪弄泉手。龍興元春新玉爪。二者相遭兔甌面。怪怪奇奇真善幻。紛如擘絮行太空。影落寒江能萬變。銀瓶首下仍尻高。注湯作字勢嫵姚。不須更師屋漏去。只問此瓶當響會。紫微仙人烏角巾。喚我起看清風生。京塵滿袖思一洗。病眼生花得再明。漢鼎難調要公理。策勳茗椀非公事。不如回施與寒儒。歸續茶經傳衲子。

和馬公弼夜雨

一雨未辭泥至腰。新寒癘氣喜全消。都人得此正稀闊。遠客翻然成寂寥。聲在疎簷與黃葉。夢回禁漏近丹霄。愁心卻被詩勾引。始覺君家我里遙。

和湯叔度雪名灝·池陽人。

道得閑來儘未閒。頗緣幽事攪心間。臥聽雪作披衣起。不待天明帶月看。更覺梅枝殊摘索。只驚蓬鬢卻

羈單飛花豈解知人意。風裏時時戲作團。

和馬公弼雪

灑竹穿梅湖更山。客間得此未嫌寒。髯疎也被輕輕點。齒冷猶禁細細餐。晴了還成三日凍。消餘留得半庭看。憑誰說似王郎婦。鹽絮吟來總未安。

和符君俞卜鄰名昌言。朱崖人。

朱崖柳色欲春風。庾嶺梅花尙雪容。念子南歸騎瘦馬。只今誰解好真龍。吾州端是山水窟。何日來同丘壑曾。白鷺青原不妨揀。誅茅結屋看何從。

甲申上元前聞家君不快西歸見梅有感二首

官路桐江西復西。野梅千樹壓疎籬。昨來都下筠籃底。三百青錢買一枝。千里來爲五斗謀。老親望望且歸休。春光儘好關農事。細雨梅花只做愁。

晚春行田南原

西疇前日塵作霧。南村今日波生路。雲子從來疎廣文。衝雨學稼當辭勤。農言秧好殊勝麥。其如綠針未堪喫。吾生十指不拈泥。毛錐便得傲簞衣。只願邊頭長無事。把耒耕雲且吾志。不愁官馬送還官。借牛騎歸不用鞍。



聞鶯

過雨溪山淨。新晴花柳明。來穿兩好樹。別作一家聲。故欲撩詩興。仍添懷友情。驚飛苦難見。那更綠陰成。

初夏日出且雨

笑憶唐人句。無晴還有晴。斜陽白鷗影。疎雨子規聲。臺閣非吾事。溪山且此生。詩成何用好。詩好卻難成。

清早出城別王宣子舍人

月細惟愁落。陽昇未要忙。出門鷄未覺。夾路稻初香。涉世寧容懶。侵星幸稍涼。病來詩久廢。覓句費商量。

理蔬

小摘吾猶惜。頻來逕自成。青蟲捕仍有。病葉蠹還生。貧裏猶存竈。霜餘正可羹。窺園未妨學。抱甕更須營。

憫農

稻雲不雨不多黃。蕎麥空花早着霜。已分忍飢度殘歲。不堪歲裏閏添長。

和周仲覺三首

書懶聊遮眼。詩窮只掉頭。寒醒非不睡。薄醉奈何愁。火細霜還重。風停葉自投。半生災疾裏。誰遣未休休。

月淡猶明樹。霜嚴不剩雲。天寒一鴈叫。夜半幾人聞。詩只令吾瘦。清聊與子分。頻來仍恨少。此去更離羣。

春在梅邊動。寒從月外來。貧如螢不煖。心與燭俱灰。此意悠悠着。從誰細細開。病來更憂患。淚盡但餘哀。

乙酉社日偶題

愁邊節裏兩相關。茶罷呼兒檢曆看。社日雨多晴較少。春風晚暖曉猶寒。也知散策郊行去。其奈緣溪路未乾。綠暗紅明非我事。且尋野蕨作蔬盤。

和昌英主簿叔社雨

愁已春相背。詩仍債未還。雨聲宜小睡。竹戶且深關。夢釣鷗邊雪。衰忘鏡裏顏。起來聊覓句。句在眼中山。

寒食上塚

逕直夫何細。橋危可免扶。遠山楓外淡。破屋麥邊孤。宿草春風又。新阡去歲無。梨花自寒食。時節只愁予。

和蕭伯振見贈

愁裏真成日似年。嬾邊覓句此何緣。雨荒山谷江西社。苔臥曹瞞臺底甄。頓有珠璣開病眼。旋生羽翼欲俱仙。車斜韻嶮難爲繼。聊復酬公莫浪傳。

三江小渡

溪水將橋不復回。小舟猶倚短篙開。交情得似山溪渡。不管風波去又來。

薄晚絕句

春氣吹人不作醒。病身感物底心情。斜陽也不藏人老。偏照霜髭一兩莖。

彥通叔祖約遊雲水寺

竹深草長綠冥冥。有路如無久斷行。風亦恐吾愁寺遠。殷勤隔雨送鐘聲。

和昌英叔久雨

積雨今晨也解休。殷勤日脚傍花流。半明衣桁收梅潤。全爲農家放麥秋。更着好風墮清句。不知何地頓閑愁。新晴佳處無人會。隔柳一聲黃栗留。

憫旱

鳴鳩喚雨如喚晴。水車夜啼聲徹明。乖龍懶睡未渠醒。阿香推熱呼不應。下田半濕高全坼。幼秧欲焦老差碧。書生所向便四壁。賣漿逢寒步逢棘。還家浪作飽飯謀。買田三歲兩無秋。一門手指百二十萬斛。量不盡窮愁。小兒察我慘不樂。旋沽村酒聊相酌。更哦子美醉時歌。焉知餓死捐溝壑。水車啞啞止復作。

旱後柳寇大作

自憐秋蝶生不早。只與夜蛩聲共悲。眼邊未覺天地寬。身後更用文章爲。去秋今夏旱相繼。淮江未淨柳江沸。餓夫相語死不愁。今年官免和糴不。

夢卞及黃世永夢中尤喜談佛既覺感愴不已因和夢李白韻記焉二首

子在人每憎。子亡憎者側。自吾失此友。但覺生意息。猶解夢中來。豈子餘此憶。死生知有無。賢聖或未測。

渾作白日看。不記夜許黑。尙憐紫鸞姿。未舉先折翼。只驚玉雪容。冷面帶古色。夢淚覺猶溼。悲罷喜有得。去年客京都。子去我未至。得書不得面。安用殷勤意。猶矜各未老。相見當亦易。不知此蹉跎。交道遽云墜。一坏胡不仁。埋此經世志。絃絕諒何益。蕙歎庸不悴。吾聞佛者流。正以生作累。夢中尙微言。子豈悲世事。

晚望

月是小春春未生。節名大雪雪何曾。夕陽不管西山暗。只照東山八九稜。

次乞米韻

魯公尙有粥爲食。盧老今無僧作鄰。文字借令真可煮。吾曹從古不應貧。詩腸幸自無煙火。句眼何愁着點塵。俗子豈知貧亦好。未須容易向渠陳。

次主簿雪韻

尙來一雪亦草草。天知詩人眼未飽。相傳南風爲雪骨。此言未試吾不曉。昨日忽驚冬作春。暖氣吹人軟欲倒。惟餘桃李未着花。便恐蟄蟲偷出窖。南風未了卻北風。一夜吹翻青玉昊。今晨冷傍筆管生。似妒吟邊事。幽討司寒作意欲再雪。凍雀求哀不容禱。令人還憶柳柳州。解道千山絕飛鳥。誰教愛雪卻嫌寒。歡喜十分九煩惱。詩人凍死不足憐。凍死猶應談雪好。寄聲滕六何似休。淨盡將雲爲儂掃。

和王才臣

新詩不但不饒儂。便恐陰何立下風。每與勝談千古事。不知撥盡一爐紅。生兒底巧翁何恨。得子消愁我未窮。剩欲同留老三徑。念渠何罪亦山中。

和蕭伯和韻

桃李何忙開又零。老懷易感掃還生。略無花片經人眼。誰道春風不世情。睡去恐遭詩作祟。愁來當遣酒行成。子能覓句庸非樂。未必胸中有不平。

又和絕句

翦翦輕風未是輕。猶吹花片作紅聲。一生情重嫌春淺。老去與春無點情。

三月三日雨作遣悶絕句

遲日何緣似箇長。睡鄉未苦怯茶槍。春風解惱詩人鼻。非葉非花只是香。村落尋花特地無。有花亦自只愁予。不如臥聽春山雨。一陣繁聲一陣疎。卻是春殘景更佳。詩人須記許生涯。平田漲綠村村麥。嫩水浮紅岸岸花。

賀澹庵先生胡侍郎新居落成二首

清廟欹斜一笑扶。歸來四壁亦元無。可憐拙計輸餘子。住破僧房始結廬。三徑非遙人自遠。萬間不惡我何須。冥搜善頌終難好。賀厦真成燕不如。

眼高不肯住清都。夢繞江南水竹居。卻入青原更青處。飽看黃本硬黃書。翦裁風月聊堪醉。拆洗乾坤正要渠。賜宅不應公得免。未知此第似林廬。

和主簿叔求潘墨

頗怯冥搜惱藏神。卻思瘞硯學元賓。墨家何以得公重。詩債又來欺我貧。鏡面松身紛楚楚。金華笏樣本陳陳。嬾邊此寶端無用。送似草玄楊子雲。

之永和小憩資壽寺

石子密鋪徑。竹莖疎作行。不緣憩騶僕。幾失此山房。佛像看都好。林花靜自香。來須清興盡。歸更借僧牀。

和濟翁見寄之韻

只有高爲累。元無俗可離。正緣隔少面。添得許多詩。杜老吟邊樹。山公醉處池。猶須謀一笑。人許又何時。

相王才臣再病

詩瘦如春瘦。時乖抑命乖。病過三日雨。門掩半扉柴。不面何曾久。于心便有懷。端能暮出否。溪水減南崖。

分宜逆旅逢同郡客子

在家兒女亦心輕。行路逢人總弟兄。未問後來相憶否。其如臨別不勝情。

將至醴陵

行盡崎嶇峽。初逢熨帖波。寒從平野有。雨傍遠山多。也自長沙近。其如此路何。披文渾不惡。凍手奈頻呵。

見張欽夫

克己今顏子。承家小呂申。只愁無好手。不道欠斯人。一別時非幾。重來事總新。祥琴聲尙苦。可更話酸辛。不見所知久。有懷何許開。有書終作惡。千里爲渠來。鄒魯期程遠。風霜髮髮催。不應師友地。只廢遣空回。除夕絕句

紫陌相逢誰不客。青燈作伴未爲孤。何須家裏作時節。只問旗亭有酒無。

過安仁岸

野水上穿石。疎林不掩巢。雨蒲拳病葉。風篠禿危梢。短脰知難續。長腰強自抄。茲游良不惡。物色困談嘲。

白沙買船晚至嚴州

重霧凝朝雨。斜陽竟晚晴。萬山江外盡。一塔嶺尖明。身小寧嫌窄。途長已倦行。子陵臺下水。未酌意先清。

都下無憂館小樓春盡旅懷二首

病眼逢書不敢開。春泥謝客亦無來。更無短計消長日。且遶欄干一百回。

不關老去願春遲。只恨春歸我未歸。最是楊花欺客子。向人一一作西飛。

桐廬道中

肩輿坐睡茶力短。野堠無人山路長。鴉雀聲懽人不會。枇杷一樹十分黃。

金溪道中

野花垂路止人行。田水偏尋缺處鳴。近浦人家隨曲折。插秧天氣半陰晴。

見王宣子侍郎二首

不作佞文客。投閑可得辭。高多真自累。了事竟成癡。到底須良匠。非渠更阿誰。莫嫌風雪惡。要試歲寒枝。老去渾多難。愁來敢怨天。生遭文字誤。更結簿書緣。苦憶懸間榻。誰回雪後船。三年纔一見。百歲幾三年。

都下和同舍客李元老承信贈詩之韻

論交何必星霜久。白頭得似傾蓋友。長安市上李將軍。挽弓舊不論石斗。只今有子似渠長。清夜讀書雪邊牖。雲端烽煙半點無。怪來將軍不好武。遺我驪珠三百顆。字字鏘鏗未曾苟。得得且看錢塘潮。草草言攀渭城柳。朝家金印斗樣大。情知不上書生肘。儒冠多誤儂飽諳。毛錐焉用君知否。便應早請終軍纓。徑須繫取單于首。居延蒲類水如天。吹作春風一杯酒。歸來冠劍上凌煙。剩作功名落人口。如何收斂許光芒。也趁槐花黃裏走。獻璞雖真不救脛。絕絃何如只停手。人生匹似風中花。榮瘁昇沉豈非偶。與君早賦歸去來。名垂萬古知何有。不如耳熱歌嗚嗚。醉帽欹傾衣不紐。詩流倡和秋蟲鳴。僧房問答獅子吼。儘令俗客不妨來。白眼相看勿分割。



和李天麟秋懷二絕句

雙井無人後山死。只今誰子定傳燈。老夫言語渾無味。不但秋來面可憎。  
小立南溪暮未還。略容老子照衰顏。頗驚暝色來天外。未必秋聲在樹間。

秋曉出郊二絕句

初日新寒正曉霞。殘山賸水稍人家。霜紅半臉金嬰子。雪白一川蕎麥花。  
野菊相依露下叢。冷香自送水邊風。豐年氣象無多子。只在雞鳴犬吠中。

胡英彥得歐陽公二帖。蓋訓其子仲純叔弼之語。其一公自書之。其一東坡書之。英彥刻石。以遺朋友。吾叔父春卿得一本。有詩謝英彥和焉。萬里用其韻以簡英彥。

聖處眇安在。談者一何易。注瓦務細巧。峯鼎喪良貴。羣兒有新舌。六學無故意。向來孟韓息。不有歐蘇繼。  
庸知死後者。未渠去聲鄉原棄。同時鴟鷂噪。並起爪嘴利。兩公察膏肓。與世作薑桂。挾山初作難。破竹忽乘勢。  
雙明日配月。再立仁與義。我有香一瓣。恨不生並世。厥今聖城裏。澹叟真守器。惟來蘭玉秀。渠以清白遺。  
當家有學林。英彥道號曰學林。滿腹惟典記。人間市井言。眼界寇讐視。獨於兩公帖。費此平生喜。麝煤叩山骨。臥聽丁丁美。令我竹林老。亦復拜嘉惠。敢云賡絕唱。頗欲與茲事。朝來窗几爽。盡室問何瑞。寶帖更新詩。小子汝其志。

四印室長句效劉信夫作呈信夫

廣文眼力自超然。作室題詩字字妍。憤世疾邪聊爾耳。未必崔君真鶴言。涪州別駕亦浪語。渠家四印何曾鑄。漫向世人言養生。涪州卻向沂州去。廣文平生不解愁。只將新句敵新秋。白浪如山風打頭。江南江北一虛舟。坐上無氈惟有客。青燈枉草強邊策。萬言萬當不如默。誤人又指庭前柏。

人日詰朝從昌英叔出謁

四序各自佳。要不如春時。何必花與柳。始愛春物熙。今晨駕言出。從公南山西。泥軟屨自愜。風嫩面不知。寒草動暖芽。晴山餘雨姿。水日亦相媚。蹙紋生碎暉。鳥聲豈爲我。我聽偶自怡。出門初憚煩。載塗乃忘歸。但令我意適。豈校出處爲。路人見我揖。屬我有所思。我不見其面。信口聊應之。徐語恐忤物。欲謝已莫追。我率或似傲。彼愠獨得辭。

題王季安主簿佚老堂

布襪青鞋已懶行。不如晏坐聽啼鶯。只言此老渾無事。種竹移花作麼生。

送客既歸晚登清心閣

誰不知儂懶。其如送客何。葉聲和雨細。山色上樓多。出處俱爲累。昇沉儘聽他。疎鐘暮相答。也解說愁麼。題嚴州新堂。郡圃舊亭面東。了無所見。太守曹仲本。撤材易地爲堂。買地以廣之。正對南山。

經始小築。覺江山輻湊。因得長句。

新堂略有次第否。忙裏從公一來覷。是時新秋收舊雨。小風吹花掠巾履。江山只道不解語。云何惠然堂上聚。北山故挽南山住。東溪不遣西溪去。向來天藏。在何處。遭公拈出。天不拒。舊亭不爲作山主。背山起樓。何以故。更煩好手。鏟東阜。放出釣臺。寸來許。

秋日書懷

老去還多感。歸來政倦遊。數峯愁外月。一葉靜邊秋。偶憶平生事。眞供獨笑休。燈花吾會得。村酒恰當芻。

送彭元忠司戶

活石高仍瘦。愚溪紺且寒。憑君聊杖屨。道我問平安。句好今逾進。書來剩寄看。只言官舍小。簷下過湘灘。

飯罷登山

樹遠通鷺響。花晴帶雨痕。登山偶回首。隔水見前村。澹往孤無伴。清歸笑不言。還家更遲著。松菊未應存。

涉水溪宿淡山

徑仄愁斜步。溪深怯正看。破船能不渡。晴色敢辭寒。白退山雲細。青還玉宇寬。險難明已濟。魂夢未渠安。

題龍歸寺壁

題字纔前歲。衝寒又此行。竹能知雨至。窗不隔江清。走檝還曾了。禁人未肯晴。息肩更須喜。問路可憐生。

自聲音巖泛小舟下高溪

晚日黃猶煖。寒江白更清。遠山衝岸出。釣艇背人行。舟穩何妨小。波恬爾許平。大魚不相報。撥刺得吾驚。

臘後

雲暗虛疑暮。江空分外寒。如何山雨過。便爾岸沙乾。奈此詩愁得。懷哉歲事闌。梅殘吾更忍。不折一枝看。

夜坐

欲雪天還惜。不風寒自生。燈搖無定影。火作始然聲。又遣庭闈訊。懸知骨肉情。履端猶幾日。有夢未歸程。

題照上人迎翠軒

參寥癩可去無還。誰踏詩僧最上關。欲具江西句中眼。猶須作禮問雲山。

得親老家問

節裏難爲客。家中數有書。慈親問歸否。意緒各何如。強酒那能盡。添愁不更除。舊來貧未仕。父子豈相疎。

立春前一夕二首

春忽明朝是。冬將半夜非。年華只不住。客子未能歸。微霰疎還密。寒簷滴又稀。撚鬚真浪苦。呵筆更成揮。臘盡春還好。朝暄暮復寒。雨晴終日異。衣著一冬難。生菜知無分。殘梅不用看。本憑書遣睡。轉更睡相干。

霰

雪花遺霰作前鋒。勢頗張皇欲暗空。篩瓦巧尋疎處漏。跳堦誤到暖邊融。寒聲帶雨山難白。冷氣侵人火  
失紅。方訝一冬暄較甚。今宵敢歎臥如弓。

和司法張仲良醉中論詩名材。山東人。

相過寧嫌數。未行先畏辭。要寬千里別。猶費數篇詩。意得翻難售。聲希只自奇。此生詩社裏。三折或知醫。  
題唐德明秀才玉立齋名人鑑。

坡云無竹令人俗。我云俗人正累竹。玉立齋前萬竿。能與主人相對寒。看竹哦詩筆生力。山童怪予遽  
忘食。不但不可一日無。斯須無此看何如。詩成欲寫且復歇。恐竹嫌詩未清絕。丁寧一竿不可除。竹亦何  
曾減風月。

謝唐德明惠笋

高人愛笋如愛玉。忍口不餐要添竹。云何又遣十輩來。昏花兩眼爲渠開。販夫束縛向市賣。外強中乾美  
安在。錦紋猶帶落花泥。不論燒煮兩皆奇。猪肝累人真可作。以笋累公端不惡。

再病書懷呈仲良

病身誰伴亦誰憐。贏得昏昏幾覺眠。睡起不知身是病。踞牀看盡水沉煙。  
病中嫌雨又嫌晴。自是情懷未苦平。兩日雨多端不惡。市聲洗盡只簷聲。

功名銷盡向來心。詩酒從今也不禁。  
夜雨遣人歸思動。不知湘水幾篙深。  
方外詩豪張仲良。義風今日更誰雙。  
絕憐病客無半眼。粥飯隨宜到小窗。

又和見喜病間

初病楊花猶亂飛。卽今梅子已黃稀。  
臥驚節物遽如許。起得沉緜更解肥。  
雲寺耶溪招布襪。斜風細雨欠簑衣。  
半生不結修門夢。只夢家山喚早歸。

題所寓唐德明書齋

鳧鷖行中脫病身。竹林深處得幽人。  
只言官滿渾無事。也被詩愁攪一春。

題代度寺

一別重來十五年。殘僧半在寺依然。  
黃楊當日絕低小。已過危簷也可憐。

又題寺後竹亭

行盡空房忽畫闌。竹光和月入亭寒。  
壁間題字知誰句。醉把殘燈子細看。

中秋前兩日別劉彥純彭仲壯於白馬山下

忽忽離合夢非夢。續續談諧眠不眠。  
莫道對牀容易著。試思分手幾何年。  
長亭更放金荷淺。後夜誰同璧月圓。  
要得長隨二三友。不知由我定由天。

午憩東塘近白干江西地盡於此

日以秋還短。塗緣熱故長。也知茅店小。奈此竹風涼。更遠終然到。而吾有底忙。欲行猶小駐。咫尺便它鄉。

### 曉泊舟瀨山

平水長先曉。無風也自濤。煙昏山易遠。岸闊樹難高。去雁鳴相報。游魚冷總逃。輕寒客可忍。清眺得辭勞。

### 爲王監薄先生求近詩

林下詩中第一仙。西風吹到日輪邊。杜陵野客還驚市。國子先生小著鞭。拈出老謀開宇宙。本來清尚只雲泉。新篇未許兒童誦。但得真傳敢浪傳。

### 宿徐元達小樓

樓迥眠曾著。秋寒夜更加。市聲先曉動。牕月傍人斜。役役名和利。憧憧馬又車。如何泉石耳。禁得許誼譁。

### 同君俞季永步至普濟寺晚泛西湖以歸得絕句

關日微陰不礙晴。杖藜小倦且須行。湖山有意留儂款。約束疎鐘未要聲。煙艇橫斜柳港灣。雲山出沒柳行間。登山得似游湖好。卻是湖心看盡山。

### 同岳大用甫撫幹雪後游西湖早飯顯明寺步至四聖觀訪林和靖故歸觀鶴聽琴得二絕句

時去除夕二日

紫陌微乾未放塵。青鞋不惜泥痕。春風已入寒蒲節。殘雪猶依古柳根。  
道堂高絕俯空明。上下躋攀取意行。淨閣虛廊人寂寂。鶴聲斷處忽琴聲。  
雪後晚晴四山皆青。惟東山全白。賦最愛東山晴後雪。絕句  
只知逐勝忽忘寒。小立春風夕照間。最愛東山晴後雪。軟紅光裏湧銀山。

永和遇風

未嫌春晚不多花。只愛青原綠似瓜。剩欲開懷納巖壑。可堪病眼著風沙。  
待船小立看鷗沒。倚杖微吟儘帽斜。客裏更無詩遣悶。不愁兩鬢不成華。

彥通叔祖約游雲水寺二首

出門天色陰晴半。著雨途間進退難。知得招提在何許。只憑田父指林間。  
竹深草長綠冥冥。有路如無又斷行。風亦恐吾愁路遠。殷勤隔雨送鐘聲。

題吉水余端蒙明府縣門飛鳧閣

塵外塵中儘靜喧。閣前閣後且山川。秋生疎雨微雲處。月仄青原白鷺邊。  
眼冷庾樓聊復此。人如葉令更差賢。從公欲往其如嬾。著句無佳莫浪傳。



次昌英主簿叔晴望韻

秋水冬全落。寒梅暖向榮。煙林明又滅。風雁仄還平。老豈愁能避。貧非懶不營。猶須鏟千嶂。剩與放雙明。

次霜月韻

銀浦寒無浪。金星澹不芒。初看霜是月。併愛月和霜。萬里除纖翳。雙清作一光。詩窮只欠許。窮我未渠央。

同主簿叔暮立

旋旋前山沒。駸駸半臂寒。鷗歸勢何嬾。林近意先安。待月遲雲壓。煩公小立看。未知立玉笋。何似立江干。  
夜雨不寂

雨急點不疎。瓦乾聲可數。滴破江湖夢。合眼無復補。更長酒力短。睡甜詩思苦。已自不成眠。如何更遭許。

丙戌上元後和昌英叔李花

春暖何緣雪。壓山香來初。認李花繁露。酣月蕊蒼茫。外梅與山礬。伯仲間。剩雨殘風底。無賴明朝後。日不堪看。泥深小忍春遊脚。猶遣青童去一攀。

和周仲容春日

今晨晴頗嬾。昨夜雨猶聲。欲社燕先覺。半春鶯未鳴。詩非一字苦。句豈十分清。參透江西社。無燈眼亦明。  
見周子充舍人敘懷

三年再謁一番逢。兩舍相望幾訊通。便有好懷安得盡。不知造物底相窮。公今貧賤庸非福。我更清愁惡似公。誤辱相期千載事。雲泥政自未應同。

過神助橋亭

下轎渾將野店看。只驚脚底水聲寒。不知竹外長江近。忽有高桅出寸竿。

過大臯渡

隔岸橫州十里青。黃牛無數放春晴。船行非與牛相背。何事黃牛卻倒行。

至永和

出城卽便見青原。正在長江出處天。卻到青原望城裏。樓臺些子水雲邊。

和文明主簿叔見寄之韻二首

古聲彈九寡。妙學足三多。千載纔重見。百年當幾何。入州非不肯。出伏卽相過。安得看雲語。金盆仄白河。黃九陳三外。諸人總解詩。甘心休作許。苦語竟何爲。所向公同我。何緣樣入時。從來大小阮。一笑更誰知。

閒居初夏午睡起二絕句

梅子留酸軟齒牙。芭蕉分綠與窗紗。日長睡起無情思。閒看兒童捉柳花。松陰一架半弓苔。偶欲觀書又懶開。戲掬清泉洒蕉葉。兒童誤認雨聲來。

攜酒夜餞羅季周

夜深未見掩柴門。且放清風入綠尊。淡月輕雲相映著。淺黃杷子裹金盆。

雨後獨登舍北山頂

山下生愁熱不除。山頭小立氣全蘇。自緣著脚高低別。萬壑清風豈是無。

晚望

病身似怯暮來風。老眼還驚霽後虹。落日偏明松表裏。好山分占水西東。

秋夜

挑落寒燈一點青。方知斜月半窗明。無端一陣秋聲起。喚作銅餅蟹眼鳴。

夜聞蕭伯和與子上弟讀書

少日耽書病得臞。何曾燈火稍相疎。如今老嬾那能許。臥聽鄰齋夜讀書。

中秋雨過月出

欲遣清風掃亂雲。先將一雨淨游塵。今年大作中秋事。月色何孤我輩人。照卻八方還剩在。看來千古許清新。不眠不惜明朝補。報答孤光醉是真。

寄題劉元明環翠閣

一家老子宿醒無解處。半杯羹後半甌茶。

謝福建茶使吳德華送東坡新集

黃金白玉明月珠。清歌妙舞傾城姝。他家都有儂家無。卻有四壁環相如。此外更有一牀書。不甚自飽飽。蠹魚故人遠送東坡集。舊書避席皆讓渠。兒時作劇百不懶。說着讀書偏起晚。乃翁作惡噴兒癡。強遣飢腸饑蠹簡。老來萬事落人後。浪取故書遮病眼。眼病逢書輒着花。筆下蠅頭成老鴉。病眼將奈故書何。故書一開一長嗟。東坡文集儂亦有。未及終篇已停手。印墨模糊紙不佳。亦非魚網非科斗。富沙棗木新雕文。傳刻疎瘦不失真。紙如雪繭出玉盆。字如霜雁點秋雲。老來兩眼如隔霧。逢柳逢花曾不覩。只逢書冊佳且新。把翫崇朝那肯去。東坡癡絕過於儂。不將一褐易三公。只將筆頭挂月脅。萬古凡馬不足空。故人憐我老愈拙。不寄金丹扶病骨。卻寄此書來惱我。挑落青燈搔白髮。

連天觀望春憶毗陵翟園

中和節候社前時。春到園林最晚枝。弄水不冰攜扇手。登臺猶粟向風肌。烏烏聲裏山光濕。花柳陰中日脚遲。北望翟園春正鬧。海棠錦繞雪茶蘼。

二月十三日謁兩廟早起

起來洗面更焚香。粥罷東窓未肯光。古語舊傳春夜短。漏聲新覺五更長。近來事事都無味。老去波波有

夜把新詩讀。燈前闔且開。一行私獨喜。兩腳不虛來。天似嫌梅晚。冬初遣雪催。與君問花信。能繞兩千回。

紀聞

人道真虛席。心知必數公。賓王欺釣築。君實誤兒童。天在昇平外。春歸小雪中。何曾忘諸老。渠自愛松風。

丁亥正月新晴晚步二首

嫩水春來別樣光。草芽綠甚卻成黃。東風似與行人便。吹盡寒雲放夕陽。急下柴車踏晚晴。青鞋步步有沙聲。忽逢野沼無人處。兩鴨浮沉最眼明。

早行鳴山

淡淡清霜薄薄冰。曉寒端爲作新晴。殷勤喚醒梅花睡。枝上春禽一兩聲。

霧中見靈山依約不真

東來兩眼不曾寒。四顧千峯掠曉鬢。天欲惱人消幾許。只教和霧看靈山。

題小沙溪鄭氏店江亭

隔水千山又萬山。大江仍合小溪灣。岸巾獨立東風裏。眼趁烏雛下急灘。

和周子中韻

清愁正爾喜逢春。一笑那知客帝城。海氣不昏晴色好。梨花半落嫩寒生。刑書夜誦端何苦。詩句春來想

不平我亦有懷無處說對牀只欲爲渠傾。

出城途中小憩

未到江城已日斜山煙白處是人家。秋風畢竟無多巧。只把燕支滴蓼花。

夜宿王才臣齋中睡覺聞風雪大作

雨外風非細。風中雪更飛。夜聲吹不盡。寒客臥相依。一醉醒醒了。平生事事非。終年纔小款。明日又言歸。

和羅巨濟山居十詠

世方事速化。渠獨請真祠。意在昇沉外。官無冷熱宜。山如輞川畫。地似習家池。若道閒居嬾。如何有十詩。  
老子朝慵起。春風苦喚行。晴邊猶著雪。寒後未聞鶯。偶見千峯翠。偏令兩眼明。倦來渾欲睡。無處避溪聲。  
只擁書千卷。何須屋萬間。新堂傍溪水。大字署蓬山。恰有乘風客。來分半日閒。自煎蝦蟹眼。同淪鷓鴣斑。  
漫浪真堪老。丁寧勿語人。屐痕渾似齒。巾角小於綸。從事故不惡。賢人也似醇。空餅未應臥。只恐惱比鄰。  
園花皆手植。梅蕊獨禁寒。色與香無價。飛和雪作團。數枝橫翠竹。一夜遶朱闌。不惜吟邊苦。收將句裏看。  
花柳春全盛。池塘鶯學飛。晚晴還小立。暮色不能歸。草遠天無壁。苔深水有衣。山居自清絕。不必扣禪扉。  
酒客來中散。詩僧約惠勤。共聽茅屋雨。添炷博山雲。萬事休多問。三杯且一醺。君看醉中語。不琢自成文。  
乃溪何處好。臘尾與春初。山色梅邊淨。人家竹裏居。先生來得得。一笑意舒舒。歸路無燈火。冰輪掛嶺隅。

且愛燈檠短。寧論劍鋏長。芝蘭照春紫。編簡著人香。賀監聊吳語。昌黎豈楚狂。豹文元炳蔚。未信霧能藏。眼底無羣子。毫端有百川。修名如揭月。餘事亦凌煙。剩欲攜藤去。相從聽雨眠。恐渠卽霄漢。泉石罷潺湲。

題蕭端虛和樂堂

玉筥風回峽山雨。兩公對牀方軟語。少公一生吟樣癯。長公半醉少公扶。白頭兄弟不多有。面如橘紅不關酒。紫荊花開連理枝。孝友未要時人知。

昌英知縣叔作歲坐上賦瓶裏梅花時坐上九人

銷冰作水旋成家。猶似江頭竹外斜。試問坐中還幾客。九人而已更梅花。膽樣銀瓶玉樣梅。北枝折得未全開。爲憐落寞空山裏。喚入詩人几案來。雪凍霜封稍欲殘。殷勤折向坐中看。綺窗深閉珠簾密。不遣花愁半點寒。

戊子正月六日雷雨感歎示壽仁子

今晨忽雷雨。天地又發春。草木闕紅綠。生意密已欣。蟄蟲且徐動。餘寒未全仁。先生起裏頭。三歎一再顰。春風吹萬物。不吹先生貧。靖怨一束書。只博雨袴塵。自倚文字工。意取造物真。小兒在傍笑。笑我浪苦辛。去年作客子。椒柏羨主人。在家不差勝。更用愁此身。先生亦一笑。我不如兒真。爲我滿眼醜。不問醜與醇。杖頭日百錢。無錢借諸鄰。不然衣可典。及此花柳新。

暮宿半塗

朝日在我東。夕日在我西。我行日亦行。日歸我未歸。勢須就人宿。遠近或難期。平生太疎放。似黠亦似癡。如今何日行。不以衾枕隨。幸逢春小暄。倒睡莫解衣。借令今夕寒。我醉亦不知。

次日醉歸

日晚頗欲歸。主人苦見留。我非不能飲。老病怯觥籌。人意不可違。欲去且復休。我醉彼自止。醉亦何足愁。歸路意昏昏。落日在嶺陬。竹裏有人家。欲憩聊一投。有叟喜我至。呼我爲君侯。告以我非是。俛笑仍掉頭。機心久已盡。猶有不下鷗。田父亦外我。我老誰與遊。

上元夜里俗粉米爲繭絲書吉語置其中以占一歲之福禍謂之繭卜因戲作長句

去年上元客三衢。衝雨看燈強作娛。今年上元家裏住。村落無燈惟有雨。隔溪叢祠稍簫鼓。不知還有遊人否。兒女炊玉作繭絲。中藏吉語默有祈。小兒祝身取官早。小女只求蠶事好。先生平生笑兒癡。逢場亦復作兒嬉。不願著腳金華殿。不願增巢上林苑。只哦少陵七字詩。但得長年飽喫飯。心知繭卜未必然。醉中得卜喜欲顛。

送蕭仲和往長沙見張欽夫

蕭家伯氏難爲兄。蕭家仲氏難爲弟。御史子孫今有誰。眼中乃見此二士。阿兄采蘭壽梅堂。阿堂東書參



蜀張聖明九鑰天爲守。玉匙密付蜀張手。子到長沙渠問儂。爲言真成一老翁。功名妄念雪銷了。只愛吟詩惱魚鳥。子歸好在中秋前。看子新年勝舊年。

送鄒元升歸安福

我昔見子廬溪南。煙如玉雪照晴嵐。子今訪我南溪北。凜如駮驥成骨骼。袖中文字細作行。讀來病眼生寒光。尖新句子入時樣。故應破陣翰墨場。春風春雨春山路。喜子能來愁子去。故人一別二十年。且對青燈夜深語。

和昌英叔雪中春酌

南溪春寒強似冬。南溪春水走玉虹。雷公戲手行春雪。詩人嘲詞便飛屑。只嫌春雪趁春雷。春容正要渠栽培。凍作土花銷作雨。多般點綴春庭戶。酒杯如海醉卽休。醉中看雪忘卻愁。如何呼酒不痛飲。可令詩肩受淒凜。少時狂殺老更狂。長恐此意墮渺茫。醉鄉有地分一席。且與先生十分梨花注大白。

送劉生談命

學兵先學策。談命先談格。君看前輩富貴人。豈與寒士校日辰。星家者流有劉子。進人退人若翻水。談何容易驗他年。卻是直言差可喜。

和曾克俊惠詩

眼底春光正入年。社前驚子已言旋。雨多厭聽鳩夫婦。病起全疎酒聖賢。舊喜作詩今已嬾。君能得句我先傳。略無好語償嘉惠。只麼從權只麼權。

和胡侍郎見簡

花邊雪裏撚霜髭。怪底詩來妙一時。聊復小吟開後悟。便應大用到前疑。先生此曲難先和。著句如碁且著持。每望南雲尺有咫。其人甚遠只嗟咨。

和賀升卿雲庵升卿嘗上書此開既歸去歲寄此詩今乃和以報之

賀子胸中自有山。結庵山底更雲間。遺才只道今無許。此士如何尙着閑。未應萬言直杯水。向來九虎守天關。莫嫌久不還詩債。詩債從來隔歲還。

送昌英叔知縣之官麻陽

政坐詩無半點塵。天令着句錦江春。遠民蒙惠卽真學。漫仕緣親非爲身。許日相從今恨少。先生此別我誰鄰。不應更作徒勞歎。廊廟方尋密縣人。

和周子中病中代書之韻兼督胡季文季永游山之約

吟外今何病。愁邊我索居。昔無今樣嬾。新欠故人書。只說遊山去。誰令作計疎。衡廬負我輩。我輩負衡廬。

除夕前一日絕句

雪留遠嶺半尖白。雲漏斜陽一線黃。天肯放晴差易得。殷勤剩覓幾朝霜。

己丑上元後晚望

雪裏晴偏好。寒餘暖尙輕。山煙春自起。野燒暮方明。又是元宵過。端令病骨驚。遣愁聊覓句。得句卻愁生。

送周仲覺訪來又別

酒邊詩裏久塵埃。見子令人病眼開。無夕不談談不睡。看薪成火火成灰。小留差勝匆匆別。欲去何如莫莫來。渠故功名我巖壑。老身隨子共歸哉。

寒食前三日行腳遇雨

信腳那知遠。雖勞亦快哉。如何寒食近。無數野花開。碧草望中去。黑雲頭上來。吾行吾自返。雨子不須催。

和濟翁惠詩

語妙渾忘夜。杯行未厭頻。平生憎俗子。勝處要吾人。已結詩中社。仍居族裏親。酒邊不着句。何許見天真。

雨中送客有感

不知春向雨中回。只道春光未苦來。老子今晨偶然出。李花全落鄭花開。

題謝昌國金牛煙雨圖

金牛煙雨最相關。老子方將老是間。不分良齋來貌取。更於句裏占江山。

春日六絕句

遠日隨天去。斜陽着樹明。犬知何處吠。人在半山行。  
春醉非關酒。郊行不問塗。青天何處了。白鳥入空無。  
霧氣因山見。波痕到岸消。詩人元自懶。物色故相撩。  
江水夜韶樂。海棠春貴妃。殷勤向春道。莫遣一花飛。  
日落碧簷外。人行紅雨中。幽人詩酒裏。又是一春風。  
春色有情意。桃花生暮寒。只應催客子。不遣立江干。

夏夜追涼

夜熱依然午熱同。開門小立月明中。竹深樹密蟲鳴處。時有微涼不是風。

初秋暮雨

禾穉輕黃尚淺青。村舂已報隔林聲。忽驚暮色翻成曉。仰見雙虹雨外明。

秋日晚望

村落豐登裏。人家笑語聲。溪霞晚紅濕。松日暮黃輕。只麼秋殊淺。如何氣許清。不應又閑散。便去羨功名。

秋夜讀書

穉子慵都睡。先生喚不應。蟲聲窗外月。書冊夜深燈。半醉聊今古。千年幾廢興。有懷人未會。不樂我何曾。  
睡起理髮

老態隨年覺。新涼與睡謀。鵲驚茅屋曉。臂冷葛衣秋。遠嶺元無約。開門便見投。閑中多事在。一日一梳頭。

暮歸

山色偏宜暮。桐聲小作秋。人行溪側畔。天在樹梢頭。學嬾真成嬾。知休卻得休。遣愁愁不去。愁盡自無愁。

曉望

暑退誰當憶。秋生喜此逢。荒林失輕霧。寒日上危峯。忽有吟邊興。忘看鏡裏容。不須兼鮑謝。始得擅詩宗。

午睡起

過雨餘秋暑。移牀揀午涼。小風吹醉面。凜氣忽如霜。日腳何曾動。桐陰有底忙。倦來聊作睡。睡起更蒼茫。

秋晚過泉口

日色全無熱。秋涼不似初。行人驚翡翠。掠水度芙蕖。平野一回顧。遠山千有餘。誰令貪眺望。卻過廢看書。

豐中小憩

歸路元無遠。行人倦自遲。野香寒蝶聚。秋色老楓知。得得逢清蔭。休休憩片時。江山豈無意。邀我覓新詩。

過劉村江

波走痕痕日。江呈岸岸秋。清流堪數石。淺涉不須舟。野菊知何喜。迎風舞未休。歸途愁欲暮。未暮我何愁。

題劉朝英進齋

燈火三更雨。詩書一古琴。惟愁腳力軟。未必聖門深。莫笑雲端樹。初如澗底針。不應將一第。用破半生心。

題丘成之司理明遠閣

決曹據按塵似海。高閣退食心如冰。夜將官本校家本。萬山圍裏短檠燈。能文未得傲能吏。好官不應博丁字。何時著腳最高層。目送歸鴻揮綠綺。

歲晚出城

溫飽能消底。奔忙自作癡。平生腳已繭。今日髻將絲。山刻霜餘骨。梅橫水底枝。只嫌長落莫。不道許幽奇。

至鷓鴣洞

岸凍樹逾瘦。日高林始明。瑤草密如積。玉泉中暗鳴。初至心爲動。欲歸腳還停。江湖千萬峯。穿儂兩鞋青。如何鷓鴣嶺。咫尺來未曾。

寄張欽夫二首

佳郡纔佳政。留中卽好音。還將著書手。拈出正君心。嶽麓風霜飽。修門雨露深。登庸何恨晚。廊廟要山林。工瑟曾緣利。鳴琴豈負予。髮於貧裏白。詩亦病來疎。知己俱霄漢。孤蹤且簿書。三年知免矣。一飽會歸歟。

和謝昌國送管相士韻

半世緣癡自作勞。萬人爭處我方逃。憐渠識盡公卿得。一馬歸來骨轉高。

庚戌正月送羅季同遊學未川

眼邊相識蠶樣密。如子歲寒萬纜一。我往西山子義山。老衰一別堪三年。外舅陰功不知數。諸孫太半廊廟具。學文先要學忍饑。明年看子刺天飛。

過秀溪長句

去年來此上巳日。今年重來未寒食。臨溪照影老自羞。慙愧春光尙相識。秀溪何許好春容。最是溪深樹密中。海棠開盡卻成白。桃花欲落翻深紅。

題薦福寺

千山底裏着樓臺。半夜松風萬壑哀。曉起巡簷看題壁。雨聲一片隔林來。

晚過黃州鋪二絕

數峰殘日紫將銷。一片新秧綠未交。道是今年春水小。漲痕也到岸花梢。僕夫已倦路猶賒。腳底殘勞眼底佳。綠錦堆中半團雪。千楓擁出一桐花。

過白沙渡得長句呈澹庵先生

收紅拾紫消幾許。也費一春強半雨。不辭長江萬波阻。來聽先生夜深語。尙憶向來侍樽俎。微雪斜飛小梅吐。先生半酣染霜兔。金章玉句空萬古。今年寒食還相聚。明年寒食知何處。只道先生押班去。不道門生折腰苦。

長句寄周舍人子充

省齋先生太高寒。肯將好語博好官。又告君王覓閒散。要讀短檠三萬卷。州家新畫瑞霧圖。渠莫錯認倚關渠。青原兩公復雙起。山川出雲不在此。自憐無地寄病身。四海知己非無人。老窮只是詩困我。春色撩人又成句。

淺夏獨行奉新縣圃

我來官下未多時。梅已黃深李綠肥。只怪南風吹紫雪。不知屋角棟花飛。

登清心閣

苦遭好月喚登樓。腳力雖慵不自由。上得金梯一回首。冰輪已過樹梢頭。

立秋後一日雨天欲暮小立問月亭

雨後林中別樣涼。意行幽徑不知長。風蟬幸自無星事。強爲閒人報夕陽。

七月十二日夜登清心閣



小樓秋夜月明底。仰不見天。惟見水。岸巾獨立四無人。白月青天伴楊子。誰知橫玉作秋聲。一聲吹盡九陌塵。月輪半仄吾未睡。樓角風生涼殺人。

中秋後一夕登清心閣二首

昨夜雲爲祟。今宵月始妍。如何一日隔。更減半分圓。影裏偏宜竹。光中不剩天。客來休遣去。我醉正無眠。秋夜真成晝。西山卻在東。吹高半輪月。正賴一襟風。清景今年過。何人此興同。青天忽成紙。似欲借詩翁。

豫章江臯二絕句

幸自輕陰好片秋。如何餘熱未全休。大江欲近風先冷。平野無邊草亦愁。只今秋稼滿江郊。猶記春船掠屋茆。可是北風寒入骨。荻花爭作向南梢。

歸自豫章復過西山

一眼茗花十里明。忽疑九月雪中行。我行莫笑無騶從。自有西山管送迎。

詔追供職學省曉發鳴山驛

數店疎仍密。千峯整復斜。冰痕猶帶浪。霜草自成花。錄錄堪朝列。星星已鬢華。帝城萬事好。得似早還家。

登烏石寺

回首身忽在樹杪。一覽千山萬山小。怪崖不落欲欲摧。令人仰看怯眼開。小亭解事知儂倦。翼然飛出青

山半上頭最上卻鏡平。百畝金碧千衲僧。高峯高寺更高閣。進步早頭若爲腳。茲遊勝絕庸非天。山下虛行二十年。

夜宿楊溪曉起見雪

茆簷無聲風不起。誤喜夜衰雨應止。開門送眼忽心驚。失卻前山萬堆翠。江南只說浙西山。更令著雪與人看。諸峯盡處一峯出。凜然玉立最高寒。溪聲細伴吟聲苦。客心冷趁波心去。掉頭得句恐人嗔。且喚征夫問前路。

辛卯五月送丘宗卿太博出守秀州二首

馮翊端誰可。丘遲肯去麼。繭絲臣敢後。饑饉帝云何。身達當難免。能稱未要多。但無田里歎。不必袴襦歌。老矣渠憐我。超然我愛渠。論詩春雨夜。解手藕花初。夢只江湖去。情知伎倆疎。未應五馬貴。不寄一行書。

題呂子明國諭退菴

筆硯工爲祟。湖山苦約盟。坐忘非聖處。行樂且吾生。一笑誰當會。孤樹句恰成。何時卻乘興。雪外叩柴荆。

送蜀士張之源二子維燾中童子科西歸

岷山玉樣清。岷水眼樣明。風流文彩故應爾。又見張家雙驥子。小兒八歲骨未成。誦書新作鸞鶴聲。大兒十二氣已老。覓句談經人絕倒。豫章七年人得知。駃騠三日世使奇。天生異材能幾許。更飽風霜也未遲。

送黃仲秉少卿知瀘州二首

滄瀨方如象。餘艚底似飛。相將刺天去。收拾大名歸。西掖桐陰靜。瀘南荔子肥。來應經世具。便欲閉山扉。補外公何幸。求歸我尙留。還爲萬里別。又費半生愁。安得欵黃帽。相從卻白頭。醉中有話在。欲說忘來休。

寄馬會叔

影轉郎官宿。春隨刺史天。相從忽相別。同舍況同年。我愛吳兒說。兄如邵父然。賜金真浪費。喚取從甘泉。送傅安道郎中將漕七閩二首

一代風騷將。當年忠義家。出關稱使者。踏雪度梅花。夢破南宮被。春生北斗槎。懸知入奏日。不待貢新茶。把酒春如許。論詩夜未央。相逢便金石。何必試冰霜。離合知難免。愁思自不忘。它年一茆屋。公肯訪荒涼。

答章漢直

詩人今代謝宣城。舉子新年章子平。雨剩風殘忽春暮。花催草喚又詩成。五湖煙水三冬臥。萬里雲霄一日程。老裏睡多吟裏少。舊家句熟近來生。

西湖晚歸

際晚遊人也合歸。畫舫猶自弄斜暉。西湖兩岸千株柳。絮不因風暖自飛。

癸巳省宿詠南宮小桃

孤坐南宮悄。桃花故故紅。晴垂半臉日。寒慘數鬚風。昔歲山村裏。春光痛飲中。不煩渠伴宿。今我已衰翁。

送林謙之司業出爲桂路提刑

兩眼起霄坐。搔首偶不欣。孤念元無感。懷我同社人。昨日林先生。抱經出成均。初聞爲渠喜。忽悟誰我親。緬然記宿昔。夜款水際門。微月耿耿寂。幽蛩慨涼新。論詩煮豆粥。粥熟天已晨。先生補天手。萬象焉能春。若非千載仰。卻要今世珍。望門舊傳業。不在先生身。雪前何有松。燬中諒非磻。論思尺有咫。法去曾遠巡。誰言我無耳。老矣未有聞。先生又舍我。離別尙足云。桂山玉笏立。桂水羅帶紋。得句能寄似。不須持嶺雲。

送丁子章將漕湖南三首

嶽麓猿聲裏。湖流雁影邊。自天持一節。到日是新年。身退名逾重。今稀古則然。黃花非不好。只是插離筵。

湖外遊曾漫。荒餘好在麼。山應依樣瘦。民豈似田多。不是無風物。其如費拊摩。人言補外樂。且道定如何。

半世行天下。同心寡友生。故人今又去。此意向誰傾。白髮三更語。青燈一點明。看渠還玉署。老我正歸耕。

送葉叔羽寺丞持節淮東二首

呼酒東西玉。探梅南北枝。相逢長不款。此別有餘思。古道寒如水。吾儕鬢已絲。一生商略此。更待贈臨歧。

養海誰爲祟。沿淮困不勝。民思賢使者。帝遣大農丞。玉節寒侵斗。牙檣凍作冰。來歸聞早著。紫禁要渠登。

送陳行之寺丞出守南劍甲午

甫爾丞農扈。翩然牧劍津。諸公誰不相。有子幾何人。氣節霜餘凜。辭章玉樣新。飛騰可輕料。渠亦正青春。我召公先到。公歸我亦行。三年如夢爾。一笑可憐生。野店緣山去。春風並轡輕。先愁饒水上。話別若爲情。

別蕭挺之泉州二首

郎署春同宿。州麾曉卜鄰。出山成底事。藉手得斯人。名實今無對。雲霄平致身。再逢應互笑。誰髮不如銀。八葉今成九。一枝誰敢雙。野人應補外。賢者亦爲邦。夾岸梅臨水。孤帆雪湧江。別愁纔半掬。不遣我心降。

甲午出知漳州晚發船龍山暮宿桐廬二首

一席清風萬壑雲。送將華髮得歸身。海潮也怯桐江淨。不遣濤頭過富春。道塗奔走不曾安。卻羨山家住得閑。記取還山安住日。更忘奔走道塗間。

攜家小歇嚴州建德縣簿廳曉起

不堪久客只思歸。曉起巡簷強撚髭。偶聽梅梢啼一鳥。舉頭立看獨多時。

積雨小霽暮立捲書亭前二首

報晴底用暮寒爲。薄薄春衫橫見欺。似有如無風細甚。柳絲無賴恰先知。淡紫斜陽嫩碧天。一春今夕始開顏。看山偶忘歸來卻。月到西廊第二間。

虞丞相挽詞三首

負荷偏宜重。經綸別有源。雪山真將相。赤壁再乾坤。奄忽人千古。淒涼月一痕。世無生仲達。好手未須論。保爽方爲左。希文自請西。不勞三尺劍。已辦一丸泥。已矣歸黃壤。傷哉夢白雞。清風誰作誦。何石不天齊。一老堂堂日。諸賢得得來。但令元氣壯。不慮塞塵開。名大天難着。人亡首忍回。東風好西去。吹淚到泉臺。

南溪山居秋日睡起

客至從噴不着冠。起來信手攬書看。小蜂得計欺儂睡。偷飲晴窗硯滴乾。

秋書二首

一年強半走塵埃。觸熱還山亦快哉。幸自西風歸較早。卻教秋暑伴將來。追涼能到竹溪無。隔水斜陽未肯晡。剩暑不蒙蕉扇扇。細雲聊倩月梳梳。

感秋

舊不愁秋只愛秋。風中吹笛月中樓。如今秋色渾如舊。欲不悲秋不自由。

乙未和楊謹仲教授春興

歸歟還復換年芳。不分寒梅惱石腸。黃帽政堪供短棹。白頭可更獻長楊。忽逢社裏催搜句。安得花邊對舉觴。天上含香有知己。彈冠端復爲王陽。

寄廣東提刑林謙之司業

玉節星槎下九天。祝融海若讓雲煙。故人一別還三歲。新句如今更幾篇。憶昨侍班南內否。論詩看雪未央前。夢中若箇韶州路。庾嶺梅花正可憐。

送客夜歸呈蕭岳英縣丞

並舍頻過亦幾曾。卻因送客得同行。風船逆水四十里。雪屋吹燈三二更。老去病身禁底苦。向來危宦若爲情。天台香火儂當覓。且伴先生學養生。

二月望日

海棠着意喚詩愁。桃李纔開又落休。小雨輕風春一半。去年今日在嚴州。

初夏三絕句

麥黃秧碧百家衣。已熱猶寒四月時。雨後覓春無一寸。薔薇花發蘸燕脂。  
手種琅玕劣十年。今年新筍不勝繁。不知明早添多少。日暮閒來數一番。  
竹間露重午方乾。松裏雲深夏亦寒。只道一溪無十里。爲誰百屈更千盤。

行圃

薤本新痕割復齊。豆苗初葉合仍離。鷺聲政好還飛去。不爲詩人更許時。

看筍六言

筍如滕薛爭長。竹似夷齊獨清。只愛錦綉滿地。暗林忽兩三莖。

農家六言

插秧已蓋田面。疎苗猶逗水光。白鷗飛處極浦。黃犢歸時夕陽。

山居

髻禿猶云少。書多卻道窮。柴門疎竹處。茅屋萬山中。幽夢時能憶。閒題底要工。不知蟬報夏。爲復自吟風。

有歎

老來無面見毛錐。猶把閒愁付小詩。君道愁多頭易白。鷺鷥從小髻成絲。

梅熟小雨

風從獨樹忽然來。雨去前山遠卻迴。留許枝間慰愁眼。兒童抵死打黃梅。

書王右丞詩後

晚因子厚識淵明。早學蘇州得右丞。忽夢少陵談句法。勸參庾信謁陰鏗。

待次臨漳諸公薦之。易地毗陵。自愧無濟劇才。上章丐祠。

亦豈真辭祿。誰令自不才。更須三釜戀。未放兩眉開。道我今貧卻。何朝不飲來。商量若爲可。杜宇一聲催。

梔子花



樹恰人來短。花將雪樣看。孤姿妍外淨。幽馥暑中寒。有朶簷瓶子。無風忽鼻端。如何山谷老。只爲賦山礬。

秋興

宿有青霞願。惟應白鷺知。風煙聊晚望。山水入秋宜。老裏還多病。貧中卻賴詩。浪愁餘熱在。會自有涼時。

中秋與諸子果飲

幾年今夕一番逢。千古何人此興同。酒入銀河波底月。笛吹玉桂樹梢風。莫言秋色無多巧。淨洗清光也費工。老子病來渾不飲。如何頻報綠尊空。

釣雪舟倦睡

予作一小齋。狀似舟。名以釣雪舟。予讀書其間。倦睡。忽一風入戶。撩瓶底梅花極香。驚覺得絕句。

小閣明窗半掩門。看書作睡政昏昏。無端卻被梅花惱。特地吹香破夢魂。

霜夜望月

人靜蛩喧天欲霜。不眠獨自步風廊。閒看月走仍雲走。知是雲忙復月忙。

瓶中梅花長句

幽人蚤作月滿塔。月隨幽人登船齋。推門欲開猶未開。猛香排門撲我懷。徑從鼻孔上濯頂。拂拂吹盡髮

底埃恍然墮我衆香國。欲問何祥無處覓。冥搜一室一物無。瓶裏一枝梅的皜。平生爲梅到斷腸。何曾知渠有許香。夜來偶忘挂南窗。貯此幽馥萬斛強。卻憶去年西湖上。錦屏下瞰千青嶂。谷深梅盛一萬株。千頃雪波浮欲漲。是時雨後初開前。日光烘花香作煙。政如新火炷博山。蒸出沉水和龍涎。醉登絕頂撼疎影。掇葉餐花照冰井。蜀人老張同舍郎。喚作謫仙儂笑領。如今茅屋臥山村。更無載酒來叩門。一尊孤斟懶論文。猶有梅花是故人。去年今月。予既得摩臨漳。朝士錢予。高會于西湖上。剡寺。滿谷皆梅花。一望無際。絕頂有亭。勝曰錦屏。予獨倚一株老梅。摘花嚼之。

同舍張監簿。蜀人。名珙。字君玉。笑謂予曰。韻勝如許。謂非謫仙可乎。

### 釣雪舟中霜夜望月

溪邊小立苦待月。月知人意偏遲出。歸來閉戶悶不看。忽然飛上千峯端。卻登釣雪聊一望。冰輪正挂松柯上。詩人愛月愛中秋。有人問儂儂掉頭。一年月色只臘裏。雪汁揩磨霜水洗。八荒萬里一青天。碧潭浮出白玉盤。更約梅花作渠伴。中秋不是欠此段。

### 梅花下小飲

今年春在臘前回。怪底空山早見梅。數點有情吹面過。一花無賴背人開。爲攜竹葉洗瓊樹。捉折冰葩浸玉盃。近節雨晴誰料得。明朝無興也重來。

### 幽居三詠

釣雪舟

青鞋黃帽綠簔衣。釣雪舟中雪政飛。歸自嚴州無一物。扁舟載得釣臺歸。

雲臥菴

十年兩袖軟紅塵。歸濯滄浪且幅巾。不是白雲留我住。我留雲住臥閒身。

誠齋

浯溪見了紫巖回。獨笑春風儘放懷。謾向世人談昨夢。便來喚我作誠齋。

郡中送春盤

餅如繭紙不可風。菜如縹茸劣可縫。韭芽捲黃苣舒紫。蘆蕒削冰寒脫齒。臥沙壓玉割紅香。部署五珍訪詩腸。野人未見新曆日。忽得春盤還太息。新年六十奈老何。霜鬚看鏡幾許多。麴生噴人不解事。且爲春盤作春醉。

臘裏立春蜂蝶輩出

嫩日催青出凍菱。小風吹白落疎梅。殘冬未放春交割。早有黃蜂紫蝶來。

丙申歲朝

椒盤又頌一年初。多拜猶欣未要扶。山色長供青籜笠。春光不爲白髭鬚。仙家風土閒中是。歲後鶯花報

早無人事馳驅不須歎。倦來添得睡工夫。

贈劉景明來訪

研席相從昔少年。白頭誰信兩蒼然。來從八桂三湘外。憶折雙松十載前。告我明朝還又別。對牀終夕不成眠。交游存沒休休說。且爲梅花釀玉船。

和彭仲莊對牡丹上酒

病身無伴臥空山。石友相從慰眼寒。呼酒撚花談舊事。牡丹匹似夢中看。

暮春小雨

宿酒微醒尙小醺。似癡如病不多欣。深深池沼輕輕雨。獨倚闌干看水紋。

夏日絕句

不但春妍夏亦佳。隨緣花草是生涯。鹿葱解插纖長柄。金鳳仍開最小花。

小池

泉眼無聲惜細流。樹陰照水愛晴柔。小荷纔露尖尖角。早有蜻蜓立上頭。

題劉伯山蕃殖圖二首畫禾·黍·桂·菽·麥·

老子平生只荷鋤。誤攜破硯到清都。歸來荒盡西疇卻。媿見劉家蕃殖圖。

黃雲翠莢雜玄珠。上熱今年不負渠。說似田家早收拾。一番風雨一番疎。  
極暑登釣雪

暑中北閣望南窗。將謂南窗分外涼。到得南窗還更熱。芙蓉和蕊落幽香。

聽雨

歸舟昔歲宿嚴陵。雨打疎篷聽到明。昨夜茅簷疎雨作。夢中喚作打篷聲。

中秋前二夕釣雪舟中靜坐

月到南窗小半扉。無生始覺室生輝。人間何處冰壺是。身在冰壺卻道非。  
去歲中秋政病餘。愛它月色強支吾。今年老矣差無病。後夜中秋有月無。

晚興

雙井茶芽醒骨甜。蓬萊香燼倦人添。蜘蛛政苦空庭闊。風爲將絲度別簷。

約劉彥純會建安寺

解后何時可。平章後月涼。前朝來一夕。古寺作重陽。白酒多多載。黃花急急香。遣詩愁已遣。何況更連牀。

送客山行

嶺雲烏作小涼天。山店重來憶去年。獨樹丹楓誰不見。何須更立萬松前。

秋月

夜氣涼於水。高齋可當樓。古來除卻月。此外更無秋。寒入蘭心勁。光隨菊腳流。惟愁清不極。清極卻成愁。

雨夜

歲晚能無感。詩成只獨哦。螢光寒欲淡。秋雨暮偏多。伴老貧無恙。留愁酒貴麼。吟蟲將落葉。爲我相還歌。

秋雨歎十解

雨入秋宵滴到明。不知有意復無情。若言不攪愁人夢。爲許千千萬萬聲。  
霖霖滴滴未休休。不解教儂不白頭。卻把窮愁比秋雨。猶應秋雨少於愁。  
濕侵團扇不能輕。冷逼孤燈分外明。蕉葉半黃荷葉碧。兩家秋雨一家聲。  
厭聽點滴井邊桐。起看空濛一望中。橫着東山三十里。眞珠簾外翠屏風。  
籬下黃花最恨它。金鈿香少淚痕多。仙人解補銀河漏。天上無泥奈許何。  
老子愁來只苦吟。一吟一歎爲秋霖。居人只道秋霖苦。不道行人泥更深。  
晝落無聲夜有聲。只堪醉聽不堪醒。簷牙半點能多少。滴入苔堦一寸青。  
曉起窮忙作麼生。雨中安否問秋英。枯荷倒盡饒渠着。滴損蘭花太薄情。  
似霧如塵有卻無。須臾密密復疎疎。忽忘九月清霜曉。喚作濛濛二月初。

不是簷聲不放眼。只將愁思壓衰年。道他滴瀝渾無賴。不到侯門舞袖邊。

寄題王國華環秀樓

平地看山山絕低。上樓山色逐層奇。不知山與樓爭長。爲復樓隨山腳移。

晚步

半疋輕煙束翠山。一梳寒月印青天。坐憎野燒無端甚。直上高林杳靄邊。

燈下讀山谷詩

天下無雙雙井黃。遺編猶作舊時香。百年人物今安在。千載功名紙半張。使我詩篇如許好。關人身事亦何嘗。地爐火煖燈花喜。且只移家住醉鄉。

探梅

山間幽步不勝奇。政是深寒淺暮時。一樹梅花開一朵。惱人偏在最高枝。

劉村渡二首

隔岸輕舟不可呼。小橋獨木有如無。落松滿地金釵瘦。遠樹黏天菌子孤。曠野風從腳底生。遠峯頂與額般平。何人知道誠齋叟。獨著駝裘破雨行。

曾達臣挽詞

議論千千古胸懷一一奇。非關時棄我。不肯我干時。老鶴雲間意。長松雪外姿。平生獨知命。冷眼看人癡。

晚春卽事二絕

尺許新條長杏栽。丈餘斑笋出墻隈。浪愁草草醱醱過。不道婷婷芍藥來。樹頭吹得葉冥冥。三日顛風不小停。只是向來枯樹子。知他那得許多青。

入城

杜鵑有底怨春啼。燕子無端貼水飛。不種自紅仍自白。野醱醱壓野薔薇。

故少師張魏公挽詞

出畫民猶望。回軍敵尙疑。時非不吾以。天未勝人爲。自別知何恙。從誰話許悲。一生長得忌。千載卻空思。

題釣臺

斷崖初未有人蹤。只合先生著此中。漢室已無一坏土。釣臺今是幾春風。同學書生已冕旒。未將換與一羊裘。子雲到老不曉事。不信人間有許由。



# 荆溪集鈔

丁酉四月一日之官毘陵舟行阻風宿柵陂江口

蟲聲兩岸不堪聞。把燭銷愁且一尊。誰宿此船愁似我。船篷猶帶燭煙痕。千里江山一日程。出山似被北風噴。東窗水影西窗月。併照船中不睡人。餘干泝流至安仁

半篙新漲滿帆風。兩岸千山一抹中。慙愧擢郎能袖手。若非袖手更無功。

宿小沙溪

樹補山煙補缺雲。風搖花雨作香塵。綠楊儘道無情著。何苦垂條拂路人。諸峯知我厭泥行。捲盡癡雲放嬾晴。不分竹梢含宿雨。時將殘點滴寒聲。

玉山道中

村北村南水響齊。巷頭巷尾樹陰低。青山自負無塵色。盡日殷勤照碧溪。

過招賢渡

余昔歲歸舟經此。水涸舟膠。旅情甚惡。

歸舟曾被此灘留。說著招賢夢亦愁。五月雪飛人不信。一來灘下看濤頭。  
一江故作兩江分。立殺呼船隔岸人。柳上青蟲寧許劣。垂絲到此卻回身。  
倦游客子自無聊。不是江山景不饒。危岸崩沙新改路。斷渠橫石自成橋。  
岸上行人莫歎勞。長年三老正呼號。也知灘惡船難上。仰踏桅竿臥看篙。

舟過德清

人家兩岸柳陰邊。出得門來便入船。不是全無最佳處。何窗何戶不清妍。

舟泊吳江

江湖便是老生涯。佳處何妨且泊家。自汲松江橋下水。垂虹亭上試新茶。  
東是吳江西太湖。長橋橫截萬尋餘。江妃舞倦凌波襪。玉帶圍腰攬鏡初。

暮立荷橋

欲問紅蕖幾蒼開。忽驚浴罷夕陽催。也知今夕來差晚。猶勝窮忙不到來。

秋熱追涼池上

圃迥人全寂。池清慮自消。萍根微著水。荷葉欲穿橋。今歲知何故。秋陽爾許驕。追涼猶有處。此老未無聊。

蠟梅

天向梅梢別出奇。國香未許世人知。殷勤滴蠟緘封卻。偷被霜風折一枝。

登淨遠亭

池冰愛日未全開。旋旋波痕百皺來。野鴨被人驚得慣。作羣飛去卻飛回。

戊戌正月二日雪作

雪與新春作伴回。擣霜爲片雹爲埃。只愁雪虐梅無奈。不道梅花領雪來。夢回紙帳怪生寒。童子傳呼雪作團。已被曉風融作水。頭巾不裹起來看。

戲贈子仁姪

小阮新來覓句忙。自攜破硯汲寒江。天公念子抄詩苦。借與朝陽小半窗。

雪夜尋梅

去年看梅南溪北。月作主人梅作客。今年看梅荆溪西。玉爲風骨雪爲衣。臘前欲雪竟未雪。梅花不慣人間熱。橫枝憔悴浣晴埃。端令羞面不肯開。縞裙夜訴玉皇殿。乞得天花來作伴。三更滕六駕海神。先遣東風吹玉塵。梅仙曉沐銀浦水。冰膚別放瑤林春。詩人莫作雪前看。雪後精神添一半。

雪霽出城

梅於雪後較多花。草亦晴初忽幾芽。河凍落痕餘一寸。殘冰閣在柳根沙。

正月十九日五更詣天慶觀謝雪開都下尺雪旬日而毘陵三四微雪而已  
元宵風物又闌殘。閉閣何曾出一看。尚覺燭光欺病眼。旋添衣著試春寒。中都尺雪逾旬許。此地飛花逐  
片乾。不待珠宮香火了。海風吹上紫金盤。

寒夜不寐

雪入迎春鬢。茶醒學古胸。夢回霜滿屋。吟到月斜鐘。

小飲俎豆頗備江西淮浙之品戲題

滿盤山海眩芳珍。未借前籌已噉津。蠶醬子魚總佳客。玉狸黃雀是鄉人。  
味含霜氣洞庭柑。鮮帶桃花楚水鱖。春暖著人君會否。不教淮白過江南。

雨霽

雨爲梅花遣盡塵。柳勾日影自傳神。不須苦問春多少。暖幕晴簾總是春。

春暖郡圃散策

已覺朝來退袂衣。日光風力軟如癡。倩誰留許春寒著。更放梅花住少時。  
萱草行間過履絢。杏花影裏散文書。秋風遣我疎團扇。又被春風遣喚渠。  
春禽處處講新聲。細草欣欣賀嫩晴。曲折遍穿花底路。莫令一步作虛行。

燒香七言

琢盜作鼎碧於水。削銀爲葉輕如紙。不文不武火力勻。閉閣下簾風不起。詩人自炷古龍涎。但令有香不見煙。素馨忽開抹利拆。低處龍麝和沉檀。平生飽識山林味。不奈此香殊斌媚。呼兒急取烹木犀。卻作書生真富貴。

書齋夜坐

棐几吹燈丈室虛。隔窗雨點響塔墀。胡牀枕手昏昏著。臥聽兒童讀漢書。酒力欺人正作眠。夢中得句正醒然。寒生更點當當裏。雨在梅花蔌蔌邊。

二月十四日梅花

雨打知無那。春暄絕不禁。小風千點雪。落日一鬚金。樹勁春猶瘦。花寒暮更明。平生豈無句。此外不須清。

水仙花

額間拂殺御袍黃。衣上偷將月姊香。待倩春風作媒卻。西湖嫁與水仙王。開處誰爲伴。蕭然不可親。雪宮孤弄影。水殿四無人。

夜坐

背壁青燈觀讀書。窺窗素月喚看渠。向來諸老端何似。未必千年便不如。春後春前雙雪髻。江南江北一

茅廬只愁夜飲無供給。小雨新肥半園蔬。

新柳

柳條百尺拂銀塘。且莫深青只淺黃。未必柳條能蘸水。水中柳影引他長。

禱雨報恩因到翟園

霧氣初迎日腳開。春光偏傍柳邊回。寒暄消息何人會。十指今朝出袖來。

垂絲海棠

無波可照底須窺。與柳爭嬌也學垂。破曉驟晴天有意。生紅新曬一絢絲。

送羅永年西歸

梅苔香邊踏雪來。杏花雨裏帶春回。明朝解纜還千里。今日看花更一杯。誰遣文章太驚俗。何緣場屋不遺才。南溪鷗鷺如相問。爲報春吟費麝煤。

讀唐人及半山詩

不分唐人與半山。無端橫亂對詩壇。半山便遣能參透。猶有唐人是一關。

春興

著盡工夫是化工。不關春雨更春風。已拚膩粉塗雙蝶。更費雌黃滴一蜂。

春曉

風光明淑奈渠何。非暖非寒直是和。春到千花俱有分。海棠獨自得春多。

米囊花

鳥語蜂喧蝶亦忙。爭傳天詔詔花王。東皇羽衛無供給。探借春風十日糧。

曉寒

黯黯輕寒淡淡陰。遊人便覺減行春。春風也解嫌蕭索。自送鞦韆不要人。春光喚入百花叢。寒力平欺兩鬢蓬。吹亂衆紅還復整。海棠卻不怕春風。

上巳

上巳春陰政未開。寒窗愁坐冷如灰。凍蠅觸紙飛還落。仰面翻身起不來。雨冷風酸數日強。老懷不可更禁當。春寒幸自將歸去。喚取重來是海棠。正是春光最盛時。桃花枝映李花枝。鞦韆日暮人歸盡。只有春風弄彩旗。

寒食雨作

雙燕衝簾報禁煙。喚驚晝夢聳詩肩。晚寒政與花爲地。曉雨能令水作天。桃李海棠聊病眼。清明寒食又來年。老來不辦瑣新句。報答風光且一篇。

寒食相將諸子遊翟園

鹿蔥舊種菊新栽。幽徑深行忘卻回。忽有野香尋不得。蘭於石背一花開。  
柳條老去尙青鮮。下有清渠遶野田。波面落花相趁走。避風爭泊岸傍邊。  
兒曹健走儘從渠。老腳微酸半要扶。未委前頭花好否。且令蜂蝶作前驅。  
三月風光一歲無。杏花欲過李花初。柳絲自爲春風舞。竹尾如何也學渠。  
荆溪老守底風流。哦就千詩一笑休。天欲做春無去處。只堆濃綠柳梢頭。  
三月十日  
纔看桃李錦成圍。忽便園林綠作堆。遠草將人雙眼去。飛花引蝶過牆來。簿書節裏無多著。懷抱朝來得好開。已是七分春去了。何須鳥語苦相催。

清明雨寒

整冠忽見鏡中霜。挽樹渾無蒂上香。已貯春愁過萬斛。更令細細著升量。  
桃李一空春已歸。不須更待絮飛時。閉門獨琢春寒句。只有輕風細雨知。  
莫嫌細雨苦飄蕭。政要寒聲伴寂寥。杏葉猶疎不成響。且將紙瓦當芭蕉。  
風欲衆柳自成妍。雨泣殘花不忍看。急喚麴生當杏子。及渠小苦未生酸。



題山莊草蟲扇

風生蚱蜢怒鬚頭。紈扇圍圓璧月流。三蝶商量探花去。不知若個是莊周。

清明果飲二首

南溪清酒碧於江。北地鵝梨白似霜。頽卻老人山作玉。更加食邑醉爲鄉。春光如許天何負。雨點殊疎燕不妨。絕愛杞萌如紫蕨。爲烹茗椀洗詩腸。

深著爐香淺著杯。杯行儘緩莫教催。可憐花樹渾無賴。下卻簾鉤也入來。雪藕新將削冰水。蔗霜只好點青梅。明年寒食還家去。卻憶荆溪花正開。

次李侔子壽郡集詩韻

蒼碧新煎第二泉。博山深炷古龍涎。草玄顧我非楊子。能賦如公是仲宣。詩社自甘編下戶。醉鄉何苦不開邊。窮州地主慙司業。不解時時與酒錢。

櫻桃

櫻桃一雨半彫零。更與黃鸝翠羽爭。計會小風留紫脆。殷勤落日弄紅明。摘來珠顆光如濕。走下金盤不待傾。天上薦新舊分賜。兒童猶解憶寅清。

予舊在奉常。孟夏太廟薦櫻桃。禮官各分賜四籃。奉常有寅清堂。

多稼亭前兩檻芍藥紅。白對開二百朵。

紅紅白白定誰先。嬋嬋娉娉各自妍。最是倚欄嬌分外。卻緣經雨意醒然。晚春早夏渾無伴。暖豔晴香正可憐。好爲花王作花相。不應只遣侍甘泉。論花者牡丹芍藥近侍。

六月六日小集

新蟬聲澁亦無多。強與嬌鶯和好歌。盡日舞風渾不倦。無人奈得柳條何。

登多稼亭曉望

風不能銷曉霧痕。天猶未放宿雲根。城腰摺處纔三徑。山背前頭別一村。

午熱登多稼亭

矮屋炎天不可居。高亭爽氣亦元無。小風不被蟬餐卻。合有些涼到老夫。御風不必問雌雄。只有炎風最不中。卻是竹君殊解事。炎風篩過作清風。

臥治齋晚坐

閉戶坐不得。開窗竚微涼。樹林蔭白日。几研生筆光。信手取詩卷。細哦三數章。初披頗欣愜。再覽忽感傷。廢卷不能讀。起行遶胡牀。古人恨如山。吾心澄於江。本不與彼謀。云何斷我腸。感罷翻自笑。一蟬催夕陽。

憩懷古堂

新葺懷古堂。舊臨郭璞池。去歲夏徂秋。無日不此嬉。茨菇無暑性。芙蓉有涼姿。今年池水乾。老子來遂稀。

豈惟來不留。亦復去靡思。朝來偶一到。又覺景物奇。水含霽後光。荷於風處欹。便有白鷗下。驚起翠羽飛。方池灩澦東。長池橫簷西。紅綠向背看。觴詠朝夕宜。此堂初無情。此池諒何知。如何涉斯世。乖逢亦有時。

### 望雨

雲興畫山頂。雨放太湖腳。初愁望中遠。忽在頭上落。白羽障烏巾。衣袖已沾渥。歸來看簷溜。如瀉萬仞壑。霆裂大瑤甕。電縈濕銀索。須臾水平塔。花塢濕半角。定知秧疇滿。想見田父樂。向來春夏交。旱氣亦太虐。山川已徧走。雲物竟索莫。雙鬢愁得白。兩膝拜將剝。早知今有雨。老懷枉作惡。

### 聞一二故人相繼而逝感歎書懷

故人昔同朝。與遊每甚歡。豈緣勢利合。相得文字間。有頃各補外。不見今六年。我來荆溪上。敲榜索租錢。故人復雙入。飛上青雲端。我雖世味澹。羨心能忽然。忽傳故人去。得書墨未乾。又傳故人亡。驚悼摧肺肝。鼎貴良獨佳。安貧未遽賢。向以我易彼。安知不作難。今以彼易我。試問誰當慳。如何捐此軀。必要博好官。顧謂妻與子。官滿當歸田。我賤汝勿羞。我貧汝勿歎。從汝丐我身。百年庶團爨。妻子笑答我。脩短未易言。富貴必速殞。郭令當天殘。貧賤果永算。顏子壽必延。我復答渠道。薄命我自憐。我福肯如郭。我德敢望顏。造物本嗇與。我乃多取旃。借令彼不怒。退者我獨安。汝言自有理。我意不可還。

### 晚步追涼

老眼偏明遠岫孤。夕陽故遣樹陰疎。蟬鳴葉底無尋處。隨意閑行偶見渠。  
風不須多只是涼。穿花度柳到人傍。細吹病耳颼颼響。徐弄輕衫拂拂長。

曉坐荷橋

四葉青蘋照綠池。千重翠蓋護紅衣。蜻蜓空裏元無見。只見波間仰面飛。  
碧玉山邊白鳥鳴。綠楊風裏翠荷聲。草花踏碎教人惜。爲勒芒鞋款款行。  
簾影窺池到藕根。水光爲我弄朝暉。魚兒解作晴天雨。波面吹成落點痕。

池亭

小沼纔塔下。孤亭恰水邊。揩磨一玉鏡。上下兩青天。可惜無多水。難堪著釣船。今年非不暑。每到每醒然。  
凝露堂前紫薇花。兩株每自五月盛開。九月乃衰。  
似癡如醉弱還佳。露壓風欺分外斜。誰道花無紅百日。紫薇長放半年花。

暮雨旣霽將兒輩登多稼亭

一霎滂沱一霎晴。簷間點滴尙殘聲。水將樹影亂揉碎。月與日光相對明。試數六宵還五雨。坐令夏熱作  
秋清。兒曹小住休歸去。更聽風蟬子細鳴。

苦熱登多稼亭

日腳斜紅欲暮天。倚欄垂手弄雲煙。兩行相對樹如許。一葉不搖風寂然。剩欲啜茶還罷去。卻愁通夕不成眠。黑絲半把垂天外。白雨初生遠嶺邊。吏散庭空便倘然。不須休日始偷閑。鷗邊野水水邊屋。城外平林林外山。偶見行人回首卻。亦看老子立庭間。暮蟬何苦催歸急。只待涼生月半環。

暮熱遊荷池上

細草搖頭忽報儂。披襟攔得一西風。荷花入暮猶愁熱。低面深藏碧傘中。

月下果飲

恰則天方暮。如何月正中。一年無此熱。今夕絕無風。早藕凝鬆雪。新菱剝醞紅。醉鄉堪避暑。只合著衰翁。

梳頭有感

身在荷香水影中。曉涼不與夜來同。且拋書冊梳蓬鬢。移轉胡牀受小風。同郡同年摠八人。七人零落一人存。如何獨立薰風裏。猶恐霜華點鬢根。

晚涼散策

飯餘浴罷趁涼行。偶憩池頭最小亭。醉倚胡牀便成睡。夢聞荷氣忽然醒。

閏六月立秋後暮熱追涼郡圃

夏欲盡頭秋欲初。小涼未若爽肌膚。夕陽幸自西山外。一抹斜紅不肯無。  
靜坐池亭

胡牀倦坐起凭欄。人正忙時我正閑。卻是閑中有忙處。看書纔了又看山。

秋暑

半柳斜陽半柳陰。一蟬飛去一蟬吟。岸巾亭子鉤欄角。送眼江村松樹林。  
讀白元長慶二集詩

讀過元詩與白詩。一生少傅重微之。再三不曉渠何意。半是交情半是私。

瓶中紅白二蓮

紅白蓮花共玉瓶。紅蓮韻絕白蓮清。空齋不是無秋暑。暑被花銷斷不生。  
揀得新開便折將。忽然到晚斂花房。只愁花斂香還減。來早重開別是香。  
白蓮半蒼未開時。看作紅蓮更不疑。到得欲開渾別了。玉膚洗退淡胭脂。

早起

不分老鈴下。苦來驚我眠。要知甘寢處。最是欲明天。未了公家事。難消月俸錢。坐曹臨訟罷。殘燭正熒然。

感秋

今歲五十二。豈爲年少人。荷涼欣暑退。蟬苦怨秋新。澹慮翻成感。彫詩不著塵。小兒知得句。欲掉小烏巾。  
南國初涼日。東吳欲盡頭。露荷幽馥曉。雲日淡光秋。也愛西風爽。其如半老休。蟬聲與蛩響。計會兩催愁。

雨後清曉梳頭讀書懷古堂

宿雨猶涼在。晨陰欲霽初。移牀近秋水。正面對芙蕖。團扇淒無彩。生衣凜覺疎。欲歸仍小住。更讀數行書。

檜徑曉步

雨歇林間涼自生。風穿徑裏曉逾清。意行偶到無人處。驚起山禽我亦驚。

謝尤延之提舉郎中自山間惠訪長句

淮南使者郎官星。瑞光夜燭荆溪清。平生龐公不入城。令我折卻屐齒迎。交遊雲散別如雨。同舍諸郎半爲士。二老還將兩鬢霜。三更重對孤燈語。向來南宮綾錦堆。南窗北窗桃李開。先生誦詩舌起雷。一字不似人間來。剡藤染出梅花賦。句似梅花花似句。幾年金鑰祕銀鈎。玉篴不施恐飛去。秋風呼酒荷邊亭。主人自醉客自醒。儂能痛飲渠不飲。飲與不飲俱忘形。鬢今如霜心如水。功名一念扶不起。儂歸螺山渠惠山。來歲相思二千里。

秋懷

隨分哦詩足散愁。老懷何用更冥搜。聿來胥宇蟻移穴。無以爲家燕入秋。蓋世功名吹劍首。平生憂患漸

矛頭。從今歸去便歸去。未到無顏見白鷗。

新涼感興

初退生衣進熟衣。新涼只與睡相宜。草爭人迹微疎處。荷怯秋風欲動時。又是一年將過眼。如何兩鬢不成絲。中元節後新來懶。草冊纔抄第二詩。

中秋前一夕攜酒與子仁姪登多稼亭

月忽飛來墮我傍。我還飛入月中央。如何桂樹許多影。不隔冰輪些子光。自古中秋多苦事。非風卽雨斷人腸。醉來不信寒欺酒。露濕杯盤凍作霜。

重九前五日再遊翟園

翟園不到纔幾日。寒梢冷葉秋蕭瑟。只有黃花數點明。上照青松下蒼石。記得春頭來此嬉。梅花太瘦杏花肥。巷南巷北皆春色。恰似吾人年少時。忽怪翟園許多老。園應笑我衰容早。來歲春光更一來。我衰依舊園還少。

速子仁姪南歸

酒爲吾人綠。花知九日黃。風燈秋焰冷。霜雁夜聲忙。愛子文無對。嗟予老更狂。相分卽相見。不待半年強。再歲來相款。三杯忽語離。忍將衰老淚。滴作送行詩。子去儂猶住。身留夢亦隨。南溪舊風月。千萬寄相思。



食老菱有感

幸自江湖可避人。懷珠韞玉冷無塵。何須抵死露頭角。荇葉荷花老此身。

醉吟

古人亡。古人在。古人不在天應改。不留三句五句詩。安得千人萬人愛。今人只笑古人癡。古人笑君君不知。朝來暮去能幾許。葉落花開無盡時。人生須要印如斗。不道金槌控渠口。身前只解皺兩眉。身後還能更杯酒。李太白。阮嗣宗。當年誰不笑兩翁。萬古賢愚俱白骨。兩翁天地一清風。

懷山莊子仁姪

危亭獨上忽徬徨。欠箇山莊墮我傍。卻是向來相聚日。老懷未解憶山莊。吾家小阮未西歸。日日相從郡圃嬉。黃菊拒霜今笑我。先生也有獨來時。

晚登淨遠亭

簿書纔了晚衙催。且上高亭眼暫開。野鴨成羣忽驚起。定知城背有船來。

黃菊

鷺樣衣裳錢樣裁。冷霜涼露濺秋埃。比他紅紫開差晚。時節來時畢竟開。

晚登子城

鞋響秋霜後。襟喧野日初。寒溪半灣落。遠樹一行疎。老矣端何苦。歸哉不願餘。終更猶半歲。作麼度居諸。

迓使客夜歸

去時岸樹日猶明。歸到州橋月已昇。水與天爭一輪玉。市聲人語兩街燈。迎來送往鬚成雪。索筆題詩研欲冰。淨洗紅塵煩碧酒。倦來不覺捶騰騰。病後霜威不見饒。吟邊月色苦相撩。重簾垂地寒猶入。畫燭無風影自搖。誰遣塵埃空老去。何曾鷗鷺不吾招。坐來已是愁無奈。草露蟲聲政寂寥。起視青天分外青。滿天一點更無星。忽驚平地化成水。乃是月華光滿庭。筆下何知有前輩。醉來未肯赦空瓶。兒曹夜誦何書冊。也遣先生細細聽。病身已怯九秋涼。也復移尊下砌傍。只愛杯中都是月。不知身上幾多霜。清愁舊覺天來遠。寒夜新添歲樣長。不是傍人俱欲睡。老人無睡亦何妨。

城頭秋望

秋光好處頓胡牀。旋喚茶甌淺著湯。隔樹漏天青破碎。驚風度竹碧匆忙。未得霜晴未是晴。霜晴無復點雲生。鷺鷥不遣魚鷺散。移腳惟愁水作聲。

生酒歌

生酒清如雪。煮酒赤如血。煮酒不如生酒烈。煮酒只帶煙花氣。生酒不離泉石味。石根泉眼新汲將。麴米釀出春風香。坐上豬紅間熊白。甕頭鴨綠變鵝黃。先生一醉萬事已。那知身在塵埃裏。

夜雨

幽人睡正熟。不知江雨來。驚風颯然起。聲若山嶽摧。起坐不成寐。萬感集老懷。憶年十四五。讀書松下齋。寒夜耿難曉。孤吟悄無儕。蟲語一燈寂。鬼啼萬山哀。雨聲正如此。壯心滴不灰。卽今踰知命。已先十年衰。不知後此者。壯心肯更回。舊學日荒蕪。書冊久塵埃。聖處與天似。而我老相催。坐念慨未已。東窗晨光開。

芭蕉雨

芭蕉得雨便欣然。終夜作聲清更妍。細聲巧學蠅觸紙。大聲鏘若山落泉。三點五點俱可聽。萬籟不生秋夕靜。芭蕉自喜人自愁。不如西風收卻雨卽休。

苦吟

蟻無秋衣雁有裘。霜天謀食各自愁。雁聲寒死叫不歇。蟻膝凍僵行復休。先生苦吟日色晚。老鈴來催喫朝飯。小兒誦書呼不來。案頭冷卻黃虀麪。

毘陵郡齋追憶鄉味

坐無黃雀牛尾狸。荆溪日日思江西。若無鵝梨與海錯。江西卻恐思荆溪。舊居江西不自惜。到得荆溪卻

追憶明年官滿歸江西。卻憶荆溪再難得。江珍海錯各自奇。冬裘何曾羨夏絺。鵝梨黃雀無不可。荆溪江西不關我。

和張漢直

宛水吹波解舫齋。南徐弔古上高臺。岸巾過我燈前語。贈句清於月底梅。對著酒船手持蟹。管渠秋井骨生苔。壁間挂古難能許。一斗百篇真快哉。

齋房戲題

長瓶舉我充自代。短檠留人爲莫逆。醉鄉無日不瓜時。書圃何朝無菜色。欲從舉者便彈冠。回顧石交難對席。子墨客卿善運籌。更問渠儂決去留。墨卿轉問子虛子。欲說還忘一笑休。

太平寺水 郡人徐友畫清濟黃河。

太平古寺劫灰餘。夕陽雅照一墟孤。得得來看還不樂。竹莖荒處破殿虛。偶逢老僧聽僧話。道是壁間留古畫。徐生絕筆今百年。祖師相傳妙天下。壁如雪色一丈許。徐生畫水纔盈堵。橫看側看只麼是。分明是畫不是水。中有清濟一線波。橫貫萬里濁浪之黃河。雷奔電卷儘渠猛。獨清元自不隨他。波痕盡處忽掀怒。攪動一河秋色暮。分明是水纔是畫。老眼向來元自誤。佛廬化作金樨樓。銀山雪堆風打頭。是身飄然在中流。奪得太一蓮葉舟。僧言此畫難再覓。官歸江西卻相憶。并州剪刀剪不得。鵝溪正絹官莫惜。貌取

秋濤懸坐側。

晚風寒林

已是霜林葉爛紅。那禁動地晚來風。寒鴉可是矜渠黠。踏折枯梢不墮風。  
樹無一葉萬梢枯。活底秋江水墨圖。幸自寒林俱淡筆。卻將濃墨點棲烏。

不寐聽雨

雨到中宵寂不鳴。只聞風拂樹梢輕。瓦溝收拾殘零水。併作簷間一滴聲。

夜雨獨覺

枕上還鄉枕上回。更更點點把人催。雨將苔砌滴到曉。風揀荻簾疎處來。每到凋年每多感。不教睡眼不曾開。來宵我識華胥路。莫近茶甌近酒杯。

夜聞風聲

作寒作暑無處避。花落花開儘他意。只有夜聲殊可憎。偏攪愁人五更睡。幸自無形那有聲。無端樹子替渠鳴。斫盡老槐與枯柳。更看渠儂作麼生。

鬻醬

忽有瓶罌至。捲將江海來。玄霜凍龜殼。紅霧染珠胎。魚鮓兼蝦鮓。奴才更婢才。平章堪一飯。斷送更三杯。

節日新晴歸自天慶

初日明雁腹，酸風迎馬頭。如何一雨過，添卻滿城秋。樓觀色俱喜，槐榆影獨愁。節中公事少，吏散得吾休。

城上野步用轆轤體

初勁無遺暖，晴行失老懷。葉飛楓骨立，萍盡沼奩開。路好仍回首，泥殘敢放鞋。登臨不須盡，留眼要重來。

晚興

老來懷抱向誰開，歲晚無花薦一杯。處分新霜且留菊，辟差寒日早開梅。只教詩句清如雪，看得榮名細似埃。管葛諸人端解事，也曾遭我笑渠來。

池亭雙樹梅花

開盡梅花半欲殘，兩株晴雪作雙寒。團欒遶樹元無見，只合池亭隔水看。

多稼亭前小步

櫻桃開過隔墻蒼，芍藥叢抽刺土芽。最是蜜蜂無意思，忍將塵腳涴梅花。

以糟蟹洞庭甘送丁端叔端叔有詩因和其韻

斗州只解寄鵝毛，鼎肉何曾饋百牢。驅使木奴供露顆，催科郭索獻霜螯。鄉封萬戶只名醉，天作一丘都是糟。卻被新詩太清絕，喚將雪虐更風饕。

凍蠅

隔窗偶見負暄蠅。雙腳按掌弄曉晴。日影欲移先會得。忽然飛落別窗聲。

壕上書事

十里長壕展碧漪。波痕只去不曾歸。鷺鷥已飽渾無幹。獨立朝陽理雪衣。

冬至前三日

故山千里幾時回。又見初陽動琯灰。酒不逢人還易醉。詩如得句偶然來。

朝飯罷登淨遠亭

近水孤亭迥。縈城一逕斜。霜林烏鵲國。冰岸鷺鷥家。殊覺冬曦暖。還拈小扇遮。傳呼惠山水。來淪建溪茶。

近節

節裏非無事。忙中自有閒。因風煩白鳥。折簡喚青山。詩卷一兩冊。齋房三四間。興來長得句。卻道在塵寰。

蠟梅

栗玉圓彫蓄。金鐘細著行。來從真蠟國。自號小黃香。夕吹撩寒馥。晨曦透暖光。南枝本同姓。喚我作他楊。

江梅珍重雪衣裳。薄相紅梅學杏裝。渠獨小參黃面老。額間豔豔發金光。

霜寒輓轡體

滴地酒成凍。暄天鴉訴寒。窗風經怒響。簾日漏溫痕。偶爾尋梅去。其如駐屐難。沙鷗腳不襪。故故踏冰翻。

晚晴獨酌

霜熟寒輕際晚時。簾間過影一鴉歸。夕陽端與誰爲地。只照游塵絮樣飛。

城頭晚步

古城秋後不勝荒。人跡新行一逕長。竹影已搖將午日。草根猶有夜來霜。

懷古堂前小梅漸開

梅邊春意未全回。淡日微風暗裏催。近水數枝殊小在。一梢雙朶忽齊開。生愁落去輕輕折。不怕春寒得  
得來。腸斷故園千樹雪。大江西處亂雲堆。

隨意行穿翠篠林。暗香撩我獨關心。遙看小朶不勝好。走近寒梢無處尋。未吐誰知膚底雪。半開猶護蕊  
頭金。老來嬾去渾無緒。奈此南枝索苦吟。

絕豔元非著粉團。真香亦不在鬚端。何曾天上冰玉質。卻怕人間霜雪寒。枝似去年仍轉瘦。花於來歲定  
誰看。老夫官滿梅應熟。齒軟猶禁半點酸。

揀得疎花折得回。銀瓶冰水養教開。忽然燈下數枝影。喚作窗間一樹梅。歲律又殘還見在。我頭自白不  
須催。相看姑置人間事。嚼玉餐香嚙一杯。



觀雪

坐有深來尺許強。偏於薄暮發寒光。半空舞倦居然懶。一點風來特地忙。落盡瓊花天不惜。封他梅蕊玉無香。倩誰細撚成湯餅。換卻人間煙火腸。

雪晴

銀色三千界。瑤林一萬重。新晴天嫩綠。落照雪輕紅。兒劣敲冰柱。身清墮蕊官。何須師鮑謝。詩在玉虛中。

晴後雪凍

負暄尙覺日無功。炙手仍愁火失紅。本是雪前風作雪。卻緣雪後雪生風。四郊凍合如相約。七日晴來不肯融。舊說醉鄉堪避暑。避寒也合此鄉中。

雪凍未解散策郡圃

積雪偏工霽後凝。不妨冷極不妨清。靜聞簷滴元無雨。倒挂冰牙未怕晴。獨往獨來銀粟地。一行一步玉沙聲。圃中散策饒君強。敢犯霜風上古城。

雪後十日日暖雪猶未融

地凍雪起立。簷生冰倒垂。日穿銀筍透。風作玉山欹。今曉還差暖。清寒退尙遲。生愁便消去。將底伴銀髭。

寒雀

百千寒雀下空庭。小集梅梢語晚晴。特地作團喧殺我。忽然驚散寂無聲。

雪夜候迎使客

六花不放一塵生。晴後猶餘十日凝。新月未光輸與雪。夜風儘冷只留冰。候迎銀漢槎頭客。挑盡玉蟲窗下燈。紙帳蒲團地爐暖。自憐不及草菴僧。

寄題石湖先生范至能參政石湖精舍

萬頃平湖石琢成。尙存越壘對吳城。如何豪傑干戈地。卻入先生杖屨聲。古往今來真一夢。湖光月色自雙清。東風不解談興廢。只有年年春草生。

郡圃殘雪

南風融雪北風凝。晚日城頭已可登。莫道雪融便無跡。雪融成水水成冰。城外城中雪半開。遠峯依舊玉崔嵬。池冰綻處纔如線。便有鴛鴦浮過來。

梅露堂燕客夜歸

藥王船中酒似空。水沉煙上雪都融。梅堂客散人初靜。椽燭燒殘一尺紅。

十二月廿一日迎春

星淡孤螢月一梳。迎春早起正愁予。土牛只解催人老。春氣自來何事渠。官柳野梅殘雪後。金幡玉勝曉

光初。卻思歸跨春山犢。繭栗仍將挂漢書。

正月三日驟暖多稼亭前梅花盛開

春被梅花抵死催。今年春向去年回。春回十日梅初覺。一夜商量一併開。  
卻緣臘雪勒孤苦。等待晴光灑麝囊。小立樹西人不會。東風供我打頭香。

歲之二日欲遊翟園因寒風而止

歲前問尋翟園梅。不知作麼不肯開。歲後遣人訪消息。春風一夜花初折。老夫聞此喜欲顛。小兒終夕不曾眠。南烹北果手自飭。漆榼銀瓶色相映。千騎朝來填戟門。雙旌已復指梅園。東風無端動地起。橫作清寒止。游子老夫孤悶搔白頭。小兒勸翁翁勿愁。人言好事莫作意。雨妒風憎鬼神忌。欲游不必言阻游。不必計。從今只揀天色佳。走就梅花求一醉。

戲題所見

田家不遣兒牧豬。老烏替作牧豬奴。不差卑冗頗得志。草根更與豬爲戲。一烏驅豬作殼鯨。一烏騎豬作騏驥。騎之不穩驅不前。坐看頑鈍手無鞭。人與馬牛雖各樣。一生同住烏衣巷。叱聲啞啞喙欲乾。豬竟不曉烏之言。騎者不從驅者鬪。爭牛訟馬傍無救。豬亦自食仍自行。一任兩烏雙鬪爭。不緣一童逐烏起。兩烏頃刻鬪至死。

梅花下遇小雨

偶來花下聊散策。落英滿地珠爲席。繞花百匝不忍歸。生怕幽芳怨孤寂。仰頭欲折一枝斜。自插白髻明烏紗。傍人勸我不用許。道我滿頭都是花。初來也覺香破鼻。頃之無香亦無味。虛疑黃昏花欲睡。不知被花薰得醉。忽然細雨濕我頭。雨落未落花先愁。三點兩點也不惡。未要打空花片休。

落梅有歎

纔看臘後得春饒。愁見風前作雪飄。脫蕊收將熬粥吃。落英仍好當香燒。

郡泊燕堂庭中梅花

林中梅花如隱士。只多野氣無塵氣。庭中梅花如貴人。也無野氣也無塵。不疎不密隨宜了。旋落旋開無不好。珠簾遣風細爲吹。畫簷護霜寒更微。詩翁繞塔未得句。先送詩材與翁語。有酒如澠誰伴翁。玉雪對飲惟渠儂。翁欲還家卽明發。更爲梅兄留一月。

雨後曉起問訊梅花

前日看梅風吹倒。昨日看梅雨霑帽。近梅一日或再來。遠梅隔年纔一到。夜來爲梅愁雨聲。挑燈起坐至天明。不知消息平安否。早來問訊還疾走。橫枝雨後轉清妍。玉容洗妝晨更鮮。絕似孤山半峯雪。不羨玉井十丈蓮。十事八九不如意。人生巧墮天公計。簿書海底白人頭。孤負江南風月秋。憶昔少年命同社。月

裏傳觴梅影下。一片花飛落酒中。十分便罰璫璃鍾。如今老病不飲酒。梅花也合憐衰翁。

壕上感春

長壕無事不耐靜。若非織綃便磨鏡。竹君不作五斗謀。風前折腰也如磬。先生節裏城上嬉。朝遊暮遊不肯歸。晴空大聲斗作惡。萬鴉退飛一鴉落。乃是黑風江北來。更將黑雲頭上堆。翻手爲晴覆手雨。自晴自雨何須怒。先生不妨且覓句。挽之不來推不去。坐看梅花一萬枝。化成粉蝶作團飛。紛紛掠面收不得。稍稍積砌吹還稀。落盡梅花天不管。晚來許寒朝許暖。一年待春春不回。一年探梅梅不開。春回今纔幾許日。梅間如何頓蕭瑟。少壯幾時奈老何。落花未抵春愁多。

觀小兒戲打春牛

小兒著鞭鞭土牛。學翁打春先打頭。黃牛黃蹄白雙角。牧童絲篋笠青筠。今年土脈應雨膏。去年不似今年樂。兒聞年登喜不飢。牛聞年登愁不肥。麥穗卽看雲作帚。稻米亦復珠盈斗。大田耕盡卻耕山。黃牛從此何時閑。

謝親戚寄黃雀

萬金家書寄中庭。牘背仍題雙掩并。不知千里寄底物。白泥紅印三十瓶。甕瓶淺染茱萸紫。心知親賓寄鄉味。印泥未開出饑水。印泥一開香撲鼻。江西山間黃羽衣。純綿被體白如脂。偶然一念墮世網。身插兩

翼那能飛。誤蒙諸公相俎豆。月裏花邊一杯酒。先生與渠元不疎。兩年眼底不見渠。端能訪我荆溪曲。願借前籌酌酈淥。

得小兒壽俊家書

父子初別雙淚垂。別我既久忘卻思。忽得一書喜且悲。恰似向來初別時。汝翁在官緣索米。吾兒在家勉經史。舉頭三千四百里。亘山啼鳥偏入耳。詩成自哦只自知。便風不敢寄吾兒。汝望白雲穿卻眼。若得此詩恐腸斷。徑須父子早歸田。粗茶淡飯終殘年。

書莫讀

書莫讀。詩莫吟。讀書兩眼枯。見骨吟詩個字嘔。出心人言讀書樂。人言吟詩好。口吻長作秋蟲聲。只令君瘦令君老。君瘦君老且勿論。傍人聽之亦煩惱。何如閉目坐齋房。下簾掃地自焚香。聽風聽雨都有味。健來卽行倦來睡。

春草

天欲遊人不踏塵。一年一換翠茸茵。東風猶自嫌蕭索。更遣飛花繡好春。年年春色屬垂楊。金撚千絲翠萬行。今歲草芽先得計。攙它濃翠奪它黃。

小瓶梅花

梅萼纔開已亂飛。不堪雨打更風吹。蕭蕭只隔窗間紙。瓶裏梅花摠不知。  
夜坐

繡簾無力護東風。燭影何曾正當紅。獸炭貂裘猶道冷。梅花不易立霜中。  
寒宵老眼只長醒。蝴蝶頻催夢不成。不是三更三四點。如何一睡到天明。

鳩啣枝營巢樹間經月不成而去

鳩婦那知自不材。樹陰疎處起樓臺。可憐積木如山樣。一桷何曾架得來。

鵲營巢既成爲鳩所據

乾鵲平生浪苦心。一年卜築一番新。如何月下空三匝。宅子還將住別人。

上元前大雪卽晴

臘前三白已奇絕。年後六花仍作團。纔定忽斜偏有思。欲消還凍不勝寒。且留大地萬銀屋。要伴青天孤玉盤。今歲上元君記取。紅燈白月雪中看。

郡中上元減舊例三之二而又迎送使客

紅錦芙蓉碧牡丹。今番燈火減前番。雪泥沒膝霜風緊。也有遊人看上元。  
北使纔歸南使來。前船未送後船催。元宵行樂年年事。兒女嗔人夜不回。

憶昔三衢看上元。玉虹橫貫水精簾。窮州今日酸寒殺。老眼看來自不歡。  
兒時行樂幾時愁。老去情懷懶出游。市上人家重時節。典釵賣劍買燈毬。  
不是東風巧剪裁。如何春夜碧蓮開。江城寂寞無歌舞。喚得梅花勸一杯。  
雪後樓臺欲暮時。遊人只道上燈遲。月輪貼至梅花背。錯認梅枝作桂枝。  
村裏風回市裏聲。月中人看雪中燈。滿城只道歡猶少。不道譙門冷似冰。

郡圃杏花

小樹嫣然一兩枝。晴薰雨醉摠相宜。纔憐欲白仍紅處。政是微開半吐時。  
得幸東風無忌對。主張春色更還誰。海棠穠麗梅花淡。匹似渠儂別樣奇。  
迥出千花合受降。不然受拜亦何妨。行穿小樹尋晴朶。自挽芳條嗅暖香。  
卻恨來時差已晚。不如清曉看新妝。朗吟清露溫風句。惱殺詩翁只斷腸。

華堂秀才著六經解以長句書其後

河圖三畫已剩著。堯典萬言猶欠卻。向來潛聖天何言。六經非渠一手作。  
杏花壇下撥不開。天公更遣麒麟催。乾坤造化登青竹。洙泗光芒付綠苔。  
堂上書生真苦相。蠹簡嚼穿渾不放。屋上架屋更屋上。後千萬  
年作何樣。華元夜登子反牀。華堂晨趨孔子堂。當時浪說析骸骨。  
今日覃思雕肺腸。華君將身博凍餒。毛



穎可憐彼何罪。君不見老農驅牛耕壟頭。稻雲割盡牛亦休。毛穎爲君禿盡髮。問君何時放渠歇。短檠青  
燈明復滅。

春夜孤坐

梅花雪後杏花風。老面逢春只強紅。詩句行來行去裏。情懷不醉不醒中。

休日城上

望中遠樹各依行。春後新晴未斷霜。池面得風呈縹碧。梅鬚經雨褪危黃。

東窗梅影上有寒雀往來

梅花寒雀不須摹。日影描窗作畫圖。寒雀解飛花解舞。君看此畫古今無。

燒香

小閣疎櫺春晝長。沉煙半穗弄輕黃。老鈴略不知人意。故故褰簾放出香。

探春

五日纔能一日來。眼生方覺有春回。向來日日頻來探。只道園花不肯開。

晚晴

風吹點滴曉簷聲。雲散朦朧晚日明。楊柳染絲纔喜雨。梅花泣玉卻祈晴。

先生老態似枯禪。解近東風也欲顛。纔雨更晴寒便暖。四時佳處是春天。

理髮

髮脫心知不再生。新年底急頓星星。城邊老柳也欺我。春裏滿頭依舊青。

晚照

閒對斜陽數隙塵。何曾萬事一關身。湯瓶得火自相語。酒盞爲人先作春。

新除廣東常平之節感恩書懷

已愧雙旌古晉陵。更堪一節古羊城。偶逢舊治年頻熟。忽署新銜手尙生。山與君恩誰是重。身如秋葉不勝輕。向來百鍊今繞指。一寸丹心白日明。

芥薺

苳薑馨辣最佳蔬。蓀芥芳心不讓渠。蟹眼嫩湯微熟了。鵝兒新酒未醒初。根香醋醃作三友。露葉霜芽知幾鋤。自笑枯腸成破甕。一生只解貯寒蕪。

辭滿代者未至

一麾來此恰三年。到得終更分外難。老眼看燈渾作暈。愁心得酒不成歡。

行圃

摘杞搜枯梗。攀花脫脆包。蝶成新樣粉。柳送隔城梢。  
淡天薄日倦春游。蒼檜叢篁引徑幽。忽有小風人未覺。薺花無數總搖頭。

春半問歸雁

春光深淺沒人知。我正南歸雁北歸。雁上一聲如話別。一生長是背人飛。

毗陵辭滿出舍添倅廳

小住丞廳更一句。客魂先入故鄉春。未離鼓角聲中夢。已是譙門外面人。

寓倅廳寒夜不寐

不堪斜雨打虛窗。只願晴陽送曉光。自是老人眠不著。近來春夜幾曾長。樓頭吹動梅花曲。夢裏猶疑燕  
寢香。道是官居如客舍。等閑一宿兩年強。

游翟園

花枝劣相絰人衣。蜂子顛狂觸面皮。一巷海棠千架錦。兩堤楊柳萬窩絲。



# 西歸集

初離常州。夜宿小井。清曉放船。

攔街父老不教行。出得東門已一更。一事新來偏可意。夢中聞打放船鉦。  
晨炊只煮野蔬湯。更揀鮮魚買一雙。病眼未能禁曉日。西窗莫閉閉東窗。  
春旱愁人是去年。如今說著尙心酸。篙師莫遣船遲著。見說蘇州好牡丹。

雨中遠望惠山

准擬歸時到未遲。歸時不到悔來時。惠山不識空歸去。枉與常州作住持。

舟中雨望

船窗深閉懶看書。獨倚船門撚白鬚。雨共長河織青錦。金錢暈上滴真珠。

曉經潘葑

油窗著雨光不濕。東風忽轉西風急。蓬聲蕭蕭河水澁。牽船不行人卻立。雨中篙師風墮笠。潘葑未到眼  
先入。岸柳垂頭向人揖。一時喚入誠齊集。

惠山雲開復合

二年常州不識山。惠山一見開心顏。只嫌雨裏不子細。髣髴隔簾青玉鬟。天風忽吹白雲坼。翡翠屏開倚南極。政緣一雨染山色。未必雨前如此碧。看山未了雲復還。雲與詩人偏作難。我船自向蘇州去。白雲穩向山頭住。

泊舟無錫雨止遂遊惠山

天教老子不空回。船泊山根雨頓開。歸去江西人問我。也曾一到惠山來。

出惠山遙望橫山

三日橫山反覆看。殷勤送我惠山前。常州更在橫山外。只望橫山已杳然。

舟過望亭

常州盡處是望亭。已離常州第四程。柳線絆船知不住。卻教飛絮送儂行。此去蘇州半日期。歸心長是覺船遲。一村樹暗知何處。兩岸草青無了時。

將近許墅望見虎丘

許墅人家遠樹前。虎丘山色夕陽邊。石橋分水入別港。茆屋垂楊仍釣船。

泊船百花洲登姑蘇臺

二月盡頭三月初。繫船陽柳拂菰蒲。姑蘇臺上斜陽裏。眼度靈巖到太湖。

舟中小雨

漠漠輕寒粟脫膚。醪醕半落牡丹初。顛風無賴難拘管。小雨多情爲破除。半世光陰行路裏。一年春事客愁餘。浙西尙遠江西在。何日漳濱買白魚。

從范至能參政遊石湖精舍坐間走筆

孤墪鷗邊迥。千巖鏡裏看。折花倩人插。摘果護窗寒。不是無相識。相從卻是難。歸舟望精舍。已在白雲端。震澤分波入。垂虹隔水看。何須小風起。生怕牡丹寒。政坐諸峯好。端令落筆難。催人理歸棹。落日許無端。

再登垂虹亭

長年三老不須催。且據胡牀未擬回。白晝驚人星滿地。日光碎處萬波來。

夜泊平望終夕不寐

船中新熱睡難成。聽盡漁舟掠水聲。不分兩窗窗外月。如何不爲別人明。櫻桃湖裏月如霜。偏照征人寸斷腸。醉裏不知家尙遠。夢回忽覺路初長。一生行路便多愁。落得星星兩鬢秋。數盡歸程到家了。此身猶未出蘇州。

小泊梅堰登明孝寺

泊船梅堰日微昇。一逕深深喚我登。隨分垂楊兼老檜。備員野寺更殘僧。

宿湖甫山

夜泊湖甫山。綠楊護危堤。迅雷將殘雨。似猛竟復微。曉月解風纜。熟睡初不知。起來問宿處。千山翠相圍。霽峯有剩靄。旭溪無倚輝。遠樹蘆外出。若與船爭馳。多情更林壑。寸步不相離。後送欣已遠。前迎復在茲。不知增意厚。爲復船行遲。誰能仆此壘。庶不淹吾歸。獨感夜來雨。政作朝涼資。

過霽川大溪

菰蒲際天青無邊。只堪蓮蕩不堪田。中有一溪元不遠。摺作三百六十灣。政如綠錦地衣上。玉龍盤屈於其間。前船未轉後船隔。前灣望得到不得。及至前灣到得時。只與後灣纔咫尺。朝來已度數百縈。問知德清猶半程。老夫乍喜權夫悶。營有到時君莫問。

霽溪

道場山背是吳興。只不教人到德清。霽水相留無別計。卻將溪曲暗添程。

晨炊白昇山 俗傳葛仙翁於此白日昇天。故名。

千峯爲我旋生妍。我爲千峯一灑然。雲掠石崖啼鳥樹。雨添山澗落花泉。心知童僕多飢色。目斷茅簷半穗煙。只道晨炊食無肉。竹根斤筍兩三錢。

小舟晚興



菡蓬舊屋雨聲乾。蘆葦新簷暖日眠。枕底席邊俱綠水。腳根頭上兩青天。  
人在非晴非雨天。船行不浪不風間。坐來堪喜還堪恨。看得南山失北山。  
潮痕初落水猶肥。雨點纔來已復微。半濕岸沙危欲落。牽船稚子去如飛。  
一船在後忽攙前。前後篙師各粲然。山入春來肥更秀。向人依舊聳寒肩。

過橫山塢下

六年三度過蘭溪。總是殘春首夏時。最感橫山山上塢。迎人東去送人西。

宿潭石步

三更無月天正黑。電光一掣隨霹靂。雨穿天心落蓬脊。急風橫吹斜更直。疎蓬穿漏濕牀席。波聲打枕一  
紙隔。夢中驚起眠不得。攬衣危坐三歎息。行路艱難非不歷。平生不曾似今夕。天公嚇客惡作劇。不相關  
白出不測。收風拾雨猝無策。如何乞得東方白。垂頭縮腳正偈仄。忽然頭上復一滴。

過安仁市得風挂帆

西望柯山正蔚藍。衢州只在此山南。卻愁路盡風猶剩。回納清風與破帆。

舟中戲題

花處青山柳處溪。新來宿處舊曾炊。到家失卻行程曆。只檢西歸小集詩。

上章戴灘

脫巾枕手仰哦詩。醉上諸灘總不知。回看他船上灘苦。方知他看我船時。

三月二十七日送春絕句

只餘三日便清和。儘放春歸莫恨他。落盡千花飛盡絮。留春肯住欲如何。

春盡感興

春事忽忽掠眼過。落花寂寂奈愁何。故人南北音書少。野渡東西芳草多。筍借一風爭作竹。鷺分數子別成窠。青燈白酒長亭夜。不勝孤舟兀綠波。

明發三衢

拔盡新秧插盡田。出城一眼翠無邊。不關雨水愁行客。政是年年雨水天。衝風破雨正愁人。愁得心情沒半分。何處吹來好消息。諸峯放散夜來雲。雲欲開時又不開。問天覓陣好風催。雨無多落泥偏滑。溪不勝深岸故頽。

插秧歌

田夫拋秧田婦接。小兒拔秧大兒插。笠是兜鍪篲是甲。雨從頭上濕到胛。喚渠朝餐歇半霎。低頭折腰只不答。秧根未牢蒔未匝。照管鵝兒與雛鴨。

明發平坦市

花飛滋曉寒。乘哢新夜聽。萬象宿雨餘。潔齋無欠淨。霽曦輒欲吐。遠峯忽復暝。林廬居者誰。戶與碧山映。薔薇上木末。不架得初性。彼臥晏未興。我征漂靡定。惛然懷吾廬。花竹幽更盛。茲焉獨足羨。自視不差勝。顧瞻江之西。心速路逾負。似聞前溪水。盡還舊沙徑。

江山道中蠶麥大熟

黃雲割路幾肩歸。紫玉炊香一飯肥。卻破麥田秧晚稻。未教水牯臥斜暉。新晴戶戶有歡顏。曬繭攤絲立地乾。卻遣繰車聲獨怨。今年不及去年閒。

午憩

嫩綠桐陰夾道遮。爛紅野果壓枝斜。日烘細草香無價。況有三枝兩朶花。

過髦塘渡

雪浪無堅岸。金沙有退痕。斷橋猶半板。漱樹欲枯根。爲問新來漲。今年第幾番。昨來愁此渡。已濟不堪論。

度小橋

危橋度中半。深溪動人心。欲返業至此。將進眩下臨。已涉尙回顧。溪水知幾深。誰能大此橋。以安往來人。小憩二龍爭珠。蓋兩長嶺夾一圓峯。故名。自此出官路入山路云。

田路直復縈。肩輿斜還正。如何晴三日。猶自滑一徑。缺岸有危棧。方軫無穩興。不跌先獨驚。稍坦深自慶。肯信坐者安。不及行者病。昨來九軌塗。可思不可更。忽逢兩蒼虬。爭此一照乘。頗欲問故老。雙爭誰孤勝。水聲亂人語。一辭無真聽。輕風從秧疇。衆綠久未定。崎嶇從此始。辛苦何時竟。

早炊楊家塘

枯樹藤爲葉。遙峯石作鬢。如何每行客。不勸自加餐。浙界殘零處。江東咫尺間。炊煙戀茅店。飛出卻飛還。

四月四日午初出浙東界入信州永豐界

外面千峯合。中間一徑通。日光自搖水。天靜本無風。村酒渟春綠。林花倦午紅。莫欺山堠子。知我入江東。

松陰小憩

不但先生倦不蘇。僕夫也自要人扶。青松數了還重數。只是從前八九株。

宿靈鷲禪寺

暑中帶汗入山中。霜滿風篁雪滿松。只是山寒清到骨。也無霜雪也無風。初疑夜雨忽朝晴。乃是山泉終夜鳴。流到前溪無半語。在山做得許多聲。

道傍小憩觀物化

蝴蝶新生未解飛。鬚拳粉濕睡花枝。後來借得風光力。不記如癡似醉時。

晨炊玉田聞鷺觀鷺

曉寒顧影惜金衣。著意聽時不肯啼。飛入柳陰多處去。數聲只許落花知。  
清溪欲下影先翻。隻鷺還將雙鷺看。綠玉脰長聊試淺。素瓊裳冷不禁寒。

永豐驛逢故人趙伯庭過叔

同官贛水摠青春。消息中間兩不聞。道我未衰君莫戲。不須看我只看君。

出永豐縣西石橋上聞子規

花愁月恨只長啼。雨夕風晨不住飛。自出錦江歸未得。至今猶勸別人歸。  
怨笛哀箏摠不如。一聲聲徹九天虛。若逢雨後如何聽。幸得花時莫管渠。

詩情

只要凋詩不要名。老來也復減詩情。虛名滿世真何用。更把虛名賺後生。

四月十三日渡鄱陽湖湖心一山。曰康郎山。其狀如蜃浮水上。

泊舟番君湖。風雨至夜半。求濟敢自必。苟安固所願。孤愁知無益。暫忍復永歎。夜久忽自睡。倦極不知旦。  
舟人呼我起。順風不容緩。半篙已湖心。一葉恰鏡面。仰見雲衣開。側視帆腹滿。天如璫璃鐘。下覆水晶椀。  
波光金汁瀉。日影銀柱貫。康山杯中蛭。廬阜帆前幔。豁然地無蒂。渺若海不岸。是身若虛空。御風游汗漫。

初憂觸危濤。不意拾奇觀。近歲六暄涼。此水三往返。未涉每不寧。既濟輒復玩。游倦當自歸。非爲猿鶴怨。  
已至湖尾望見西山

好風穩送五湖船。萬頃銀濤半霎間。已入江西猶未覺。忽然對面是西山。  
蘆荻中間一港深。萋蒿如柱不成簪。正愁半日無村落。遠有人家在樹林。  
千里都無半點山。如何敢望有人煙。不教遠樹遮攔卻。蘆荻生來直到天。

送鄉人余文明勸之以歸

一別高人又十年。霜筋雪骨健依然。席門未害車多轍。斗酒尙能詩百篇。蒼狗白衣俱昨夢。長庚孤月自青天。故山松菊平安在。何日歸歟解釣船。

送王季山主簿省親樞府

六館名流王季山。十年風雨短檠寒。不曾文字饒羣子。勉爲庭闈就一官。伯也騰身紫極上。叔兮著眼白雲端。會當再奏河東賦。姓字從頭揭榜看。

秋蟲

蟬哀落日恰纔收。蛩怨黃昏正未休。催得世人頭揔白。不知替得二蟲愁。

病中感秋時初喪壽侖子

臨曉睡偏重。不知窗已明。高梧下清露。宿鳥有寒聲。愁豈關鬚事。秋來添雪莖。病身仍哭子。併作老來情。

秋熱

多難幽懷慘不舒。秋風殘暑埽難除。一生最怕西窗日。長是醅醱架子疎。年年極暑與秋期。日日秋陽在暮時。我自愁吟無意思。蟬聲移近入簷枝。

夜坐

夜永留清坐。詩臞稱病容。溪鳴風處竹。月濕露中松。喜事何曾夢。燈花誑殺儂。欲歸歸已得。歸得卻無悰。

中秋病中不飲二首後一首用轆轤體

去年兩浙浙西州。今夕南溪溪上頭。滿著玻璃一盆水。洗開玉鏡十分秋。病來不飲非無酒。老去追懽總是愁。自笑獨醒仍苦詠。枯腸雷轉不禁搜。

無風無雨併無雲。今歲中秋儘十分。畢竟冰輪誰爲轉。碾穿玉宇不生痕。坐看兒輩紛然飲。也遣先生半欲醺。自是清尊負明月。不關明月負清尊。

中秋月長句

西山走下丹砂丸。東山飛上黃金盤。徑從碧海升青天。半濕尙帶波濤痕。初輝淡淡寒不動。月華猶輕桂華重。黃羅團扇暗花紋。蹙金突起雙龍鳳。須臾正面天中央。銀鉦退盡向來黃。乾坤鎔入冰壺裏。萬象都

無只有光。平生愛月愛今夕。古人與我同此癖。去年中秋天漆黑。今年中秋月雪白。先生舊不論升斗。近來畏病不飲酒。月中醒眼搔白首。明年月似今宵否。

秋雨初霽

松竹陰寒分外蒼。芭蕉花濕夢中香。抽身朱墨塵埃裏。入眼山林氣味長。今日更無秋熱去。曉晴猶帶雨餘涼。卻將白髮三千丈。纜作霜絲補錦囊。

病後覺衰

病著初無惱。安來始覺衰。人誰長健底。老有頓來時。山意淒寒日。秋光染瘦詩。小松能許劣。學我弄吟髭。昨日訪子上不遇。裴回庭砌觀木犀而歸。再以七言乞數枝。

昨攜兒輩叩雲關。繞遍巖花恣意看。苔砌落深金布地。水沉蒸透粟堆盤。寄詩北院賒秋色。供我西窓當晚餐。小朶出叢須折卻。莫教折破碧團欒。

拒霜花

木渠何似水芙蓉。同箇聲名各自都。風露商量借膏沐。臙脂深淺入肌膚。換回春色秋光裏。饒得紅妝翠蓋無。字曰拒霜渾不惡。卻愁霜重要人扶。

不寐



老來只願酒難醒。酒力纔醒夢便驚。露滴新寒欺病骨。宦遊如夢記平生。深山五鼓雞吹角。落月一窗鵝打更。等待曉光瑠好句。曉光未白句先成。非關枕上愛哦詩。聊復銷愁片子時。老眼強眠終不夢。空腸暗響訴長飢。翻來覆去體都痛。乍暗忽明燈爲誰。只道晝長無那著。夜長難禁不曾知。暗蟲夜啼不肯停。直從黃昏啼到明。不知討論底事著。爲復怨嗟誰子生。至竟通宵千萬語。眞實只是兩三聲。唧唧唧復唧唧。此外何言君試聽。初聞一天雨大聲。次第遠近雞都鳴。今日明朝何日了。南村北巷幾人行。忽思春雨宿茅店。最苦僕夫催去程。是時懶起惜殘睡。如今不眠愁獨醒。

戲題常州草蟲枕屏

黃蜂作歌紫蝶舞。蜻蜓蚱蜢如風雨。先生晝眠紙帳溫。無那此輩喧夢魂。眼中了了華胥國。蜂催蝶喚到不得。覺來忽見四摺屏。野花紅白野草青。勾引飛蟲作許聲。何緣先生睡不驚。

和李與賢投贈之韻

山似剡溪溪似油。人如詩句句如秋。無邊春裏花饒笑。有底忙時草喚愁。

寄題李與賢似剡菴

四明狂客一茅屋。勅賜剡川纔一曲。安福詩人李與賢。大書似剡山扉前。我曾著腳勾踐國。奉詔昭陵省松柏。是時八月欲半頭。鏡湖不是人間秋。嵇山影落水精闕。荷花露滴波中月。季真茅屋荒蒼苔。古木哀猿啼禹穴。今君結屋阿那邊。正似剡川若箇言。我到剡川君未到。似和不似然不然。君不見興公舊草天台賦。元不曾識天台路。一俛仰間已再升。何用瘦藤與芒屨。

蕙花初開五言

幽人非愛山。出山將何之。山居種蘭蕙。歲寒久當知。初菽止百畝。餘地惜奚爲。先生無廣居。千巖一茅茨。四面秣菘蕙。中間纔置錐。銳綠分宿叢。修紫擢幼枝。孤幹八九花。一花破初蕤。西風淡無味。微度成香吹。燈夢得幽馥。月寫傳靜姿。我欲掇芳英。和露充晨炊。春然惻不忍。環玩息忘飢。豈無衆花草。不願秋不遲。種時亂不擇。歲晚悔可追。

木犀落盡有感

一歲秋香又一空。落英顛顛怨西風。開時占斷西風曉。豈念荷花脫病紅。

戲筆

野菊荒苔各鑄錢。金黃銅綠兩爭妍。天公支與窮詩客。只買清愁不買田。我詩只道更無題。物物秋來總是詩。著意染鬚玄尙白。梳頭得蝨素成緇。

飯罷散策遇細雨

秋暄團扇尙堪攜。病腳朝來健似飛。偶到溪頭晴喚出。未窮山頂雨催歸。

重九日雨仍菊花未開用轆轤體

良辰巧與賞心違。四者能并自古稀。恰則今年重九日。也無黃菊兩三枝。閉門幸免吹烏帽。有酒何須望白衣。正坐滿城風雨句。平生不喜老潘詩。

西齋睡起

小睡西齋聽雨涼。竹雞聲裏夢難長。開門山色都爭入。只放青蒼一冊方。

讀陳蕃傳

仲舉高談亦壯哉。白頭狼狽只堪哀。枉教一室塵如積。天下何曾掃得來。

夜寒獨覺

兒啼驚覺夢中身。恰則華胥正問津。腳到五更偏作冷。老來萬事不如人。若無窗月誰相伴。聽盡雞聲不肯晨。尙有布衾寒似鐵。無衾似鐵始言貧。

雨晴得毗陵故舊書

雀聲只喜晚晴新。不管畦蔬雨未勻。日與山光弄秋色。風將竹影掃窗塵。多時浙右無消息。忽有書來問

老人知我近來頭白盡。寒暄語外更情親。

憂患感歎

老去情懷已不勝。愁邊災患更相仍。胸中莫著傷心事。東處銷時西處生。

霜曉

荒荒瘦日作秋暉。稍稍微暄破曉霏。只有江楓偏得意。夜按霜水染紅衣。  
慶長叔招飲一杯未醕雪聲璀璨即席走筆賦十詩

晚飲西鄰大阮家。天風吹雪入簷牙。呼童淨掃青苔地。莫遣纖塵浣玉花。  
長廊盡處繞梅行。過盡風聲得雪聲。醉裏不愁飄濕面。自舒翠袖點瓊英。  
老手那知鬢腳凋。忍寒拚命看珠跳。卻嫌地暖無冰凍。恰則飛來恰則銷。  
梅花得雪更清妍。折入燈前細撚看。下卻珠簾教到地。橫枝太瘦不禁寒。  
雪正飛時梅正開。情人和雪折庭梅。莫教顫脫梢頭雪。千萬輕輕折取來。  
急雪穿簾繞蠟燈。梅花微笑古銅餅。朔風惡極驚人殺。吹倒琉璃六曲屏。  
南烹北果聚君家。象箸冰盤物物佳。只有蔗霜分不得。老夫自要嚼梅花。  
不是今朝雪不清。只愁清殺老書生。不知落得幾多雪。做盡北風無限聲。

酒香端的似梅無。小摘梅花浸酒壺。莫遣南枝獨醒著。一杯聊勸雪肌膚。  
燕寧軒裏集羣仙。薄宦歸來又兩年。梅影舞風風舞雪。勸人何苦怯金船。

克信弟坐上賦梅花二首

對酒初驚髮半華。折梅還覺興殊佳。如何屋角西南月。只照梢頭一兩花。自是向來香寂寞。不須更道影橫斜。北枝別有春無價。和靖何曾覓得些。  
月波成露露成霜。借與南枝作淡妝。寒入玉衣燈下薄。春撩雪骨酒邊香。卻於老樹半枯處。忽走一梢如許長。道是疎花不解語。伴人醒醉替人狂。

送談命曾南翔

今年見說也無錐。政坐談天泄密機。舉世近來憎直語。貴人剩許未爲癡。

寄題萬安縣劉元襲橫秀閣

玉簪成陣雪成堆。秀氣橫空撥不開。楚岫蒼寒五雲外。贛江白寫九天來。煙銷日出皆詩句。月色波聲喚夢回。早晚攜家過高閣。寄詩聊當一枝梅。

十二月二十七日大雪中過言水小盤渡西歸

風卷寒江浪濕天。斜吹亂雪忽平船。碧琉璃上瓊花裏。獨載詩人孟浩然。

山居雪後

春近能餘幾許寒。雪花纔落便消殘。青松根上蘭根下。猶得三朝兩日看。  
一點紅塵未敢生。松間雪後政堪行。日光半破風微度。時作高林落果聲。



# 南海集鈔

庚子正月五日曉過大皋渡

霧外江山看不真。只憑雞犬認前村。  
渡船滿板霜如雪。印我青鞋第一痕。  
危沙崩岸欲侵墻。直下清江百尺強。  
過了筍輿元未覺。忽然回首冷思量。  
之官五羊過太和縣登快閣觀山谷石刻

廬陵山水說西昌。天遣金華印此邦。  
詩本道他將取去。如何遺下一澄江。

萬安道中書事

玉峯雲剝逗斜明。花徑泥乾得晚行。  
細細一風寒裏暖。時時數點雨中晴。  
攜家滿路踏春華。兒女欣欣不憶家。  
騎吏也忘行役苦。一人人插一枝花。

過皂口

贛石三百里。春流十八灘。  
路從青壁絕。船到半江寒。  
不是春光好。誰供客子看。  
猶須一樽綠。併遣百憂寬。

曉過皂口嶺

夜渡驚灘有底忙。曉攀絕磴更禁當。  
周遭碧嶂無人迹。圍入青天小冊方。  
半世功名一雞肋。平生道路九

羊腸何時上到梅花嶺。北望螺峯半點蒼。

步過分水嶺

路險勞人役。儂須下轎行。石從何代落。巖傍舊根生。古樹無今態。幽泉有暗聲。只言章貢近。猶自兩三程。

憩分水嶺望鄉

嶺頭泉眼一涓流。南入虔州北吉州。只隔中間些子地。水聲滴作兩鄉愁。嶺北泉流分外忙。一聲一滴斷人腸。浪愁出卻廬陵界。未入梅山總故鄉。

社日南康道中

東風試暖卻成寒。春恰平分又欲殘。淡着煙雲輕着雨。近遮草樹遠遮山。人行柳色花光裏。天接江西嶺北間。管領社公須竹葉。在家外匹如閑。

小溪至新曲

人煙懨懨不成村。溪水微茫劣半分。流到前灘忙似箭。不容雨點稍成紋。只愛孤峯惹寸雲。忽驚頭上雨傾盆。北來南去緣何事。路上君看屐子痕。晚雲解事忽離披。放出千峯特地奇。欲揀一峯誰子是。總如筆未退尖時。懊惱春光欲斷腸。來時長緩去時忙。落紅滿路無人惜。踏作花泥透腳香。



六月十九度大庾嶺題雲封寺

梅山未到未教休。到得梅山始欲愁。知道望鄉看不見。也須一步一回頭。

題南雄駙外計堂

攜家度嶺夜乘槎。小泊淩江水北涯。二月山城無菜把。一年春事又楊花。舉頭海國星辰近。回顧梅山草樹遮。客子相逢聞好語。看山只欠到南華。

二月二十三日南雄解舟

昨夜新雷幾地鳴。今朝春漲一篙清。順流更借江風便。此去韶州只兩程。水沒蒲芽尙有稍。風吹屋角半無茅。急灘未到先聞浪。枯樹遙看只見巢。

舟過黃田謁龍母護應廟

遠山相別忽相尋。水到黃田漸欲深。見說前頭山更好。且留好句未須吟。

舟過謝潭

夾江百里沒人家。最苦江流曲更斜。嶺草已青今歲葉。岸蘆猶白去年花。碧酒時傾一兩杯。船門纔閉又還開。好山萬皺無人見。都被斜陽拈出來。

三月一日過摩舍那灘阻雨泊清溪鎮

一聲霹靂霽光收。急泊荒茆野渡頭。摩舍那灘衝石過。曼陀羅影漾江流。山纔入眼雲遮斷。船去追程雨見留。夜宿清溪望清遠。舉頭不見隔英州。過盡危灘百不堪。忽驚絕壁翠巉巖。倒垂不死千年樹。下拂奔流萬丈潭。隔岸數峯如筆格。倚天一色染青藍。真陽此去無多子。到日應逢三月三。

小泊英州

人人藤葉嚼檳榔。戶戶茅簷覆土牀。只有春風不寒乞。隔溪吹度柚花香。數家草草劣無多。跼水飛鳶也不過。道是荒城斗來大。向來此地着東坡。

過真陽峽

莫道無人徑亦窮。尙餘碧篠伴青楓。白雲不是從天降。坐看生從翠崦中。仰見青天尺許青。無波江水不勝平。只驚白晝山竹裂。杜宇初聞第一聲。榕樹陰中一葦橫。鷓鴣聲裏數峯青。南人到此亦腸斷。不是南人作麼生。

晨炊光口砦

泊船光口薦晨炊。野飯匆匆不整齊。新摘柚花薰熟水。旋撈蒿苣浥生薑。儘教坡老食無肉。未害山公醉似泥。過了真陽到清遠。好山自足樂人飢。

過沙頭

過了沙頭漸有村。地平江闊氣清溫。暗潮已到無人會。只有篙師識水痕。

船中蔬飯

食蕨食臂莫食拳。食筍食稍莫食根。何曾萬錢方下箸。先生把菜亦飽去。嶺南風物似江南。筍如束薪蕨作籃。先生食藉幾萬卷。千巖萬壑皆廚傳。

清明日欲宿石門未到而風雨大作泊靈星小海

風雨從來海外天。靈星海裏泊樓船。坐吟苦句斟愁酒。也是清明過一年。峽山前夕石間行。泊得船時破膽驚。驚到今宵已無膽。聽風聽浪到天明。一生行路竟如何。樂事還稀苦事多。知是風波欺客子。不知客子犯風波。

西園晚步

龍眼初如菘豆肥。荔枝已似佛螺兒。南荒北客難將息。最是殘春首夏時。

得壽仁壽俊二子中塗書二首

二子別我歸。兼旬無消息。客有饋荔枝。盈籃風露色。絳羅蹙寶髻。冰彈濺黏液。老夫非不饑。忍饑不忍喫。急呼兩健步。爲我致渠側。默數川陸程。幾日當還役。惟愁香味壞。色變那敢惜。十日兩騎還。千里一紙墨。

把書五行下。廢書雙淚滴。不如未到時。當喜翻不懌。  
子壯祇覺幼。子學祇覺遲。二子忽頎然。語離又作悲。今年來官下。二子暫我隨。懸知住不久。且復相從嬉。  
鶴書自天降。槐花呼汝歸。伯也恐我愁。願留不忍辭。仲也慘不釋。飛鳴忍及時。豈有鳳將雛。雛長禁其飛。  
決焉遣還家。一笑更不疑。傍人怪無淚。淚入肝與脾。我昔如汝長。壯志在四方。集賢給筆札。秉燭促夜裝。  
平明出門戶。振衣不徬徨。先君泫然泣。感我令我傷。先君顧我語。汝行勿斷腸。他日汝養子。此悲會身當。  
老懷追陳迹。心折涕泗滂。

宴客夜歸六言

月在荔枝梢上。人行茉莉花間。但覺胸吞碧海。不知身落南蠻。

雨霽登連天觀

高臺十日不曾登。雨後檣藤拄晚晴。城外諸峯迎落照。松根細草總斜明。眼穿嶺北書不到。初入海南愁頓生。只有荷花舊相識。風前翠蓋爲人傾。

得壽仁壽俊二子書皆以病不及就試且報來期

二子何時到。三秋欲盡頭。收渠半張紙。洗我一年愁。不得毛錐力。元非子墨羞。海山寒更碧。整駕可同遊。  
送蔡定夫赴湖南提刑

菊後霜前換繡衣。湘南嶺北看梅枝。還將方策汗青路。拈出圓扉草綠時。四海幾人憐我老。三年兩作送君詩。借令貴殺衡陽紙。半幅無妨慰夢思。

遣騎問訊范明州。參政報章寄絕句。和韻謝之。

南海人從東海歸。新詩到日恰梅時。撚梅細比新詩看。未必梅花瘦似詩。

至日薄寒

舊傳冬不到南中。今歲南中稍稍冬。曦幕暖吹紅皺起。霜橋冷步縞聲鬆。裁縫苦思詩千首。排遣清愁酒一鍾。不是梅花開獨早。似憐北客老相逢。

病中夜坐

月留銀漢小徘徊。似戀空庭獨樹梅。玉漏聽來更二點。燭花剪了暈重開。病身不飲看人醉。乾雪無端上鬢來。後日老衰知健否。只今六九已推隕。

辛丑正月二十五日遊蒲澗晚歸

桃李深酣日。池塘淺試春。霽暉搖遠水。新煖軟遊人。生酒清無色。青梅脆有仁。烟鐘能底急。催我入城闔。

食車螯

珠宮新沐淨瓊沙。石鼎初燃淪井花。紫殼旋開微滴酒。玉膚莫熟要鳴牙。根拖金線成雙美。薑擘糟丘總

一家老子宿醒無解處。半杯羹後半甌茶。

謝福建茶使吳德華送東坡新集

黃金白玉明月珠。清歌妙舞傾城姝。他家都有儂家無。卻有四壁環相如。此外更有一牀書。不甚自飽飽。蠹魚故人遠送東坡集。舊書避席皆讓渠。兒時作劇百不懶。說着讀書偏起晚。乃翁作惡噴兒癡。強遣飢腸饒蠹簡。老來萬事落人後。浪取故書遮病眼。眼病逢書輒着花。筆下蠅頭成老鴉。病眼將奈故書何。故書一開一長嗟。東坡文集儂亦有。未及終篇已停手。印墨模糊紙不佳。亦非魚網非科斗。富沙棗木新雕文。傳刻疎瘦不失真。紙如雪繭出玉盆。字如霜雁點秋雲。老來兩眼如隔霧。逢柳逢花曾不覩。只逢書冊佳且新。把翫崇朝那肯去。東坡癡絕過於儂。不將一褐易三公。只將筆頭挂月脅。萬古凡馬不足空。故人憐我老愈拙。不寄金丹扶病骨。卻寄此書來惱我。挑落青燈搔白髮。

連天觀望春憶毗陵翟園

中和節候社前時。春到園林最晚枝。弄水不冰攜扇手。登臺猶粟向風肌。烏烏聲裏山光濕。花柳陰中日腳遲。北望翟園春正鬧。海棠錦繞雪茶蘼。

二月十三日謁兩廟早起

起來洗面更焚香。粥罷東窓未肯光。古語舊傳春夜短。漏聲新覺五更長。近來事事都無味。老去波波有

底忙。還憶山居桃李晚。醅醖爲枕睡爲鄉。

寄題蕭國賢佚我堂

軟紅塵裏幾時休。重碧杯中且拍浮。坐看癡兒誇絕足。可憐到老不回頭。幅巾藜杖聊三徑。明月清風自一丘。我亦年來厭奔走。夢騎野鶴訪沙鷗。

題桃榔樹

化工到得巧窮時。東補西移也大奇。君看桃榔一窠子。竹身杏葉海棠枝。

春晴懷故園海棠

故園今日海棠開。夢入江西錦繡堆。萬物皆春人獨老。一年過社燕方回。似青如白天濃淡。欲墮還飛絮往來。無奈春光餐不得。遣詩招入翠瓊杯。

竹邊臺榭水邊亭。不要人隨只獨行。乍暖柳條無氣力。淡晴花影不分明。一番過雨來幽徑。無數新禽有喜聲。只欠翠紗紅映肉。兩年寒食負先生。予去年正月離家之官。蓋兩年不見海棠矣。

初食筍蕨

魚鳳烹龍世浪傳。猩脣熊掌我無緣。只逢筍蕨杯盤日。便是山林富貴天。穉子玉膚新脫錦。小兒紫臂未開拳。只嫌嶺外無珍饌。一味春蔬不直錢。

寒食對酒

荔枝園園花。寒食日日雨。先生老多病。頗已疎綠醕。兒童喜時節。笑語治罇俎。南烹旣前陳。北果亦草具。蟪蛄方纔甘。筍蕨未作苦。先生欲獨醒。兒女難多拒。初心且一盃。三盃亦漫許。醒時本強飲。醉後忽快舉。一盃至三盃。一二三四五。偶然問兒輩。卒爵是何處。兒言翁但醉。已忘酒巡數。

明發青塘蘆包

青塘無店亦無人。只有青蛙紫蚓聲。蘆荻葉深蒲葉淺。荔枝花暗楝花明。船行兩岸山都動。水入諸村海旋成。回望月臺煙雨外。萬峯盡處五羊城。

過胥口江水大漲舟楫不進

北江西水兩相逢。胥口波濤特地雄。萬事向儂冰與炭。一生行役雨和風。急流欲上人聲鬧。近岸還移牽去聲。路窮。河伯喜歡儂苦惱。併將恩怨惱天公。

入峽歌

峽山未到日日愁。峽山已到愁卻休。不是朝來愁便散。愁殺人來天不管。昨宵遠望最高尖。今朝近看雲隔簾。樓船衝雨過山下。兩扇屏風生色畫。江神不遣客心驚。雲去雲來遮巖扃。忽然褰雲露山腳。仰見千丈翠玉削。篙師相賀漲痕落。今日可到鷓磯泊。



峽山寺竹枝詞

峽裏撐船更不行。擢郎相語改行程。卻從西岸拋東岸。依舊船頭不可撐。  
一水雙崖千萬縈。有天無地只心驚。無人打殺杜鵑子。雨外飛來頭上聲。  
龜魚到此總回頭。不但龜魚蟹亦愁。底事詩人輕老命。犯灘衝石去韶州。  
一灘過了一灘奔。一石橫來一石蹲。若怨古來天設險。峽山不過也由君。  
天齊浪自說浯溪。峽與天齊真箇齊。未必峽山高爾許。看來只恐似天低。

夜泊英州

旅病情先惡。愁眠夢更驚。犬須終夜吠。月到五更明。未解波頭意。偏來枕底聲。平時厭行路。投老正追程。  
阻風泊鍾家村離英州已三日纔行二十里

南遊端爲看山來。過眼匆匆首屢回。不是阻風船不進。何緣看盡萬崔嵬。  
滿船兒女厭江行。我愛江行怕入城。慚愧風師教款曲。爲分一舍作三程。

明發陳公徑過摩舍那灘石峯下

遙松煙未消。近竹露猶滴。石峯矜孤銳。喜以江自隔。清潭涵曦紫。碧岫過雲白。回瞻宿處隄。路轉不可覓。  
地迥人絕影。山僻虎留跡。下有無底潭。上有欲落石。是間一徑橫。夾以萬松直。樹從何時有。陳公所手植。

陳公今焉在。徑松自寒碧。

昨宵望石峯。相去無一尺。今日行終朝。祇繞石峯側。石峯何曾遠。江路自不直。仰瞻碧屏巖。清峽如立壁。反覆得細看。何必更登陟。後顧江已遠。前顧江若塞。棹進岸自回。天水未有極。簾欣入絕巘。舟愕觸潛石。東瞰淡未熹。北吹寒更寂。岸草不知愁。向人弄晴碧。

澄潭湧晴暈。不風自成花。回流如倦客。出門復還家。江晴已數日。新漲沒舊沙。知是前溪雨。濕雲尙橫斜。山轉江亦轉。江行山亦行。風鬢照玉鏡。素鍊縈青屏。我本山水客。澹無軒冕情。塵中悔一來。事外懷孤征。忽乘滄浪舟。仰高俯深情。餐翠腹可飽。飲淥身須輕。鷓鴣不相識。還作故園聲。危峯瑩無土。平地岌孤石。如何半巖間。亦有小樹碧。走空根苦辛。倚險榦寒瘠。芳蘭間叢生。紫蕤濯幽色。近香許世聞。遠秀絕人摘。而我雲外身。方茲喟行役。

城中安得山。無山安得詩。我入五羊城。遠與山水辭。有鏡不敢覽。塵面我自知。解組來歸亭。山水奔相隨。水光動我巾。山色染我衣。舟行將一月。恨速不恨遲。山雲來未已。江月皎無滓。平聲開懷放之入。出語頗似之。

我從靈洲來。惟見芳草渡。蒹葭隨水遠。曠野無立樹。挂席上真陽。好山忽無數。好山如隱士。避世不自露。不應官道傍。乃有見山處。借識衛叔玠。未覩樂彥輔。石峯再難得。舟過更回顧。

南中山絕佳。所恨人煙稀。略無好事人。結茅臨深溪。峯頂可月亭。岸石卽釣磯。空令煙中猿。挂崖弄漣漪。山多人自少。人遠山益奇。我舟行不留。過眼山如馳。過眼意已足。久留亦何爲。

明發白沙灘聞布谷有感

提壺勸我飲。杜鵑勸我歸。不如布谷子。勸我勤耘耔。我少貧且賤。不但無置錐。筆未墾紙田。黑水導墨池。借令字堪煮。識字亦幾希。啼饑如不聞。饑慣自不啼。駿奔三十年。辛勤竟何爲。髮從道塗白。面爲風霜皴。夜來白沙灘。老命輕如絲。洪濤舞一葉。呼天叫神祇。生全乃偶然。人力初何施。曉聞布谷聲。如在故山時。坐令萬感集。初悟半世非。一險靡不悔。數悔容何追。有田不歸耕。布谷真吾師。

荔枝堂晝憩

荔枝陰中風絕涼。菖蒲節後日偏長。落殘數柄荷花蕊。浸得一瓶泉水香。多病早衰非破硯。欲行復倦且胡牀。曲江近北差遲着。不道江山勝五羊。

風雨

殘風剩雨故欺人。垂箔關窓護病身。自拾荷花揩面汗。新將筍籜製頭巾。梅天筆墨都生醜。棐几文書懶拂塵。帽子一峯青可掇。隔牆不敢略開門。

送彭元忠縣丞北歸

君從循州來。卻回饒州去。拍天海浪拂日峯。瓊尺裁成錦機句。學詩初學陳後山。霜皮脫盡山骨寒。近來別具一隻眼。要踏唐人最上關。三春弱柳三秋月。半溪清水半峯雪。只今六月無此物。君能喚渠來入筆。恰恰新鶯百轉聲。忽有寒蛩終夜鳴。瀟湘故人汝漢客。爲君一夜頭盡白。我欠天公詩債多。霜髭撚盡未償他。君懷玉盤金叵羅。合騎天駟超天河。如何也鑄一大錯。自古詩人多命薄。黃茅起煙如黃沙。瘴毋照水曼陀花。廣東之遊樂復樂。勸君不如早還家。

題望韶亭

新隆寺後看韶石。三三兩兩各依稀。金坑津頭看韶石。十五五五不整齊。一來望韶亭上看。九韶八音堆一案。金鐘大鏞浮水涯。玉瑟瑤琴倚天半。堯時文物也麓疎。禮樂猶帶鴻荒餘。茅茨殿上搥土鼓。葦籥聲外無笙竽。黃能郎君走川嶽。領取后夔搜禮樂。嶧山桐樹半夜鳴。泗水石頭清晝躍。山祇川后爭獻珍。姚家制作初一新。帝思南嶽來時巡。宮琛廟寶皆駿奔。曲江清徹碧瓊軟。海山孤尖翠屏展。天顏有喜后夔知。一奏雲韶供亞飯。帝登九嶷忘卻歸。不知斑盡湘笛枝。后夔一脛跛莫隨。坐委衆樂江之湄。儀鳳舞獸掃無迹。獨留一狻守其側。至今喚作獅子石。雨淋日炙爛不得。洞庭張樂已莓苔。犍爲獲磬亦塵埃。不如九韶故無恙。憂擊尙可冬起雷。何時九秋霜月裏。來聽湘妃瑟聲美。曲終道是不見人。江上數峯是誰子。

三月一十雨寒

姚黃魏紫向誰賒。郁李櫻桃也沒些。卻是南中春色別。滿城都是木綿花。

謝木韞之舍人分送講筵賜茶

吳綾縫囊染菊水。蠻砂塗印題進字。淳熙錫貢新水芽。天珍誤落黃茅地。故人鸞渚紫薇郎。金華講徹花  
草香。宣賜龍焙第一綱。殿上走趨明月璫。御前啜罷三危露。滿袖香煙懷璧去。歸來拈出兩蜿蜒。雷鳴晦  
冥驚破柱。北苑龍芽內樣新。銅圍銀範鑄瓊塵。九天寶月霏五雲。玉龍雙舞黃金鱗。老夫平生愛煮茗。十  
年燒穿折腳鼎。下山汲井得甘冷。上山摘芽得苦梗。何曾夢到龍遊窠。何曾夢吃龍芽茶。故人分送玉川  
子。春風來自玉皇家。鍛圭椎壁調冰水。烹龍炁鳳搜肝髓。石花紫筍可衙官。赤印白泥牛走爾。故人氣味  
茶樣清。故人丰骨茶樣明。開緘不但似見面。叩之咳唾金石聲。麴生勸人墮巾幘。睡魔勸我拋書冊。老夫  
七碗病未能。一啜猶堪坐秋夕。

荔枝堂夕眺

病骨秋臞怯暮清。涼風偷帶北風輕。迎寒窓隔重糊遍。只放書邊數眼明。

九日郡中送白菊

未應白菊減於黃。金作鈿心玉作裳。一夜西風開瘦蕾。兩年南海伴重陽。若言佳節如常日。爲底寒花分  
外香。按蕊浮杯莫多着。一枝留插鬢邊霜。

至節宿翁源縣與葉景伯小酌

此縣誰言是強名。古來千室亦琴鳴。只嫌六七茅竹舍。也有二三雞犬聲。村酒分冬勝虛度。霜風一夜辦新晴。半生客路逢佳節。佳節何曾負半生。

過烏沙望大唐石峯

城中長恨不見山。出城見山如等閒。曹溪過了過岑嶺。不惟山粗石仍獷。山如可師癩滿頂。石如陳三瘦。聯頸一路令人眼不開。開眼令人悶不醒。烏沙未到一溪橫。水清見底心已清。大唐六峯爭出迎。水精筆架琉璃屏。兩峯玉筍纒出土。三峯冰盤釘角黍。一峯新琢金博山。霧作沈煙雲作縷。忽然前岡平截斷。萬丈青尖餘寸許。山神解憐客子愁。平地跳出蒼琳瑯。更借天公修月斧。神工一夜忙凋鏤。近看定何者。遠看真可畫。山神自賀應自詫。古來此地無車馬。

蕈子

空山一雨山溜急。漂流桂子松花汁。土膏鬆暖都滲入。蒸出蕈花團戢戢。戴穿落葉忽起立。撥開落葉百數十。蠟面黃紫光欲濕。酥莖嬌脆手輕拾。色如鷺掌味如蜜。滑如蓴絲無點澁。傘不如笠釘勝笠。香留齒牙麝莫及。菘羔楮雞避席揖。餐玉茹芝當卻粒。作羹不可疏一日。作臘仍堪貯盈笈。

過陂子逕五十餘里喬木蔽天遣悶七絕

林中亭午始微明。楓倒山傾滿路橫。黃葉青苔深一尺。先生卻愛此中行。  
草光葉潤亦清佳。翠裏生香不是花。一事說來人不信。蕨長如樹蚓如蛇。  
蘆深石路旋芟開。籐挂肩輿卻倒回。蘭蕙連山爲誰好。芭蕉滿谷不緣栽。  
爲憐上轎齧人肩。下轎行來腳底穿。客子心心愁欲暮。碧雲偏作半陰天。  
晚風寂寂樹陰陰。松不悲鳴竹不吟。只有清泉逢白石。向人刺口說山林。  
澗泉勸我出山遲。曲曲遮留步步隨。泉自多情儂自悶。今宵會有出山時。  
山窮喜見一平川。不似林中不識天。只此出山灾便散。何須更問小行年。

過長峯逕遇雨遣悶

南中謂深山長谷寂無人煙。中通一路者謂之逕。自翁源至河源。其逕有三。猿藤陂子各五十里。惟長  
峯餘百。過者往往露宿。鑽火以炊。予以半夜一晝疾行出逕。宿秀溪云。  
野炊未到也饑噴。到得炊邊卻可人。傘作旅亭泥處土。水漂地竈雨中薪。  
河清人跡到來曾。點污松風潤水聲。不是先生愛山水。是間卻遣阿誰行。  
猿藤陂子枉驚訝。未抵長峯小半途。今夕前頭何計宿。不知出得逕來無。  
下到危陂斗處泥。旁臨崩岸仄邊溪。不須杜句能驅瘴。只誦長峯遣悶詩。

出得山來未見村。已知村近稍多田。坐看雲腳都垂地。回望峯頭已入天。

明發曲坑

雲橫平野近人低。似絮如紗只隔溪。行到溪東元不見。回頭卻復在溪西。

明發龍川

山有濃嵐水有氛。非烟非霧亦非雲。北人不識南中瘴。只到龍川指似君。

發通衢驛見梅有感

忙中撩眼雪枝斜。落片紛紛點玉沙。虛過一冬妨底事。不曾款曲是梅花。

過五里逕

野水奔來不小停。知渠何事大忙生。也無一個人催促。自愛爭先落澗聲。

晨炊浦村

水出何村尾。橋橫亂篠叢。隔溪三四屋。對面一雙峯。過午非常暖。疑他不是冬。疎梅照清淺。作意爲誰容。

入程鄉縣界

長樂昏嵐著地凝。程鄉毒霧喫人腥。吾詩不是南征集。只合標題作瘴經。

明發房溪



山路婷婷小樹梅。爲誰零落爲誰開。多情也恨無人賞。故遣低枝拂面來。  
青天白日十分晴。轎上蕭蕭忽雨聲。卻是松梢霜水落。雨聲那得此聲清。

過單竹洋逕

兩山何許來。此焉忽相尋。摩肩不少讓。爭道各載駸。喬木與修竹。相招爲茂林。無風生翠寒。未夕起素陰。  
天垂木末近。日到谷底深。空山時一響。已動客子心。行至幽絕處。更聞啼怪禽。

自彭田舖至湯田道旁梅花十餘里

一行誰栽十里梅。下臨溪水恰齊開。此行便是無官事。只爲梅花也合來。

過瘦牛嶺

行盡天涯未遣休。梅州到了又潮州。平生豈願乘肥馬。臨老須教過瘦牛。夢裏長驚炊劍首。春前應許賦刀頭。夜來尙有餘樽在。急喚渠儂破客愁。

題尾牛嶺

牛頭定何向。瘦牛定何指。我不炙汝心。我不穿汝鼻。如何不許見全牛。霧隱雲藏若相避。行行上牛背。上下三十里。一雨生新泥。寸步不自致。胡不去作牽牛星。渴飲銀河天上水。胡不去作帝籍牛。天田春風牽犁耜。卻來蠻村天盡頭。塞路長遣行人愁。夕陽芳草只依舊。瘦牛何苦年年瘦。

道旁草木

古樹何年澗底生。只今已與嶺般平。千梢萬葉無重數。一一分明報雨聲。

過金沙洋望小海

海霧初開明海日。近樹遠山青歷歷。忽然咫尺黑如漆。白晝如何成暝色。不知一風何許來。霧開還合合還開。晦明百變一彈指。特地遣人驚復喜。海神無處逞神通。放出一頭誇客子。須臾滿眼賈胡船。萬頃一碧波黏天。恰似錢塘江上望。只無兩點海門山。我行但作遊山看。減卻客愁九分半。

題韓庭韓木

笑爲先生一問天。身前身後兩般看。亭前樹子關何事。也得天公賜姓韓。

潮陽海岸望海

動地驚風起海陬。爲人吹散兩眉愁。身行島北新春後。眼到天南最盡頭。衆水更來何處著。千峯赴此卻回休。客間供給能消底。萬頃煙波一白鷗。

除夜宿石塔寺

醉後先眠客莫嗔。誰能守歲費精神。幸無爆竹驚寒夢。休羨椒花頌好春。今歲明年纔隔夕。人情物態頓趨新。遙憐兒女團欒處。政欠屠酥第十人。

壬寅歲朝發石塔

曉鐘夢裏苦相呼。強理烏紗照白鬚。只有銅爐燒柏子。更無玉盞瀉屠蘇。佛桑解吐四時豔。鐵樹還如九節蒲。省得一朝疲造請。卻教終日走長途。  
寺法堂前。有紅佛桑。四時有花。又有小木名鐵樹。葉似蕩而紫。幹如密節菖蒲。

海岸沙行

海濱半程沙上路。海風吹起成煙霧。行人合眼不敢覷。一行一步愁一步。步步沙痕沒芒屨。不是不行行不去。若爲行到無沙處。寧逢石頭齧足拇。寧踏黃泥濺袍袴。海濱沙路莫再度。

食蛤蜊米脯羹

傾來百顆恰盈奩。剝作杯羹未屬厭。莫遣下鹽傷正味。不曾著蜜若爲甜。雪揩玉質全身瑩。金緣冰鈿半縷纖。更浙香杭輕糝卻。發揮風韻十分添。

正月三日宿范氏莊

山歷愁寡天。沙征恨多地。兩日行海濱。雖近彌不至。遐瞻道旁堠。我進渠祇退。大風來無隔。午燠皎安避。今夕范氏莊。初覲三峯翠。愈遠故絕遐。不多始足貴。巉然半几出。蹙若一拳細。輕霏淡晚秀。隕照燁春媚。玩久有餘佳。繪苦未必似。今夕勿掩扉。月中對山睡。

人日宿味田驛

破驛荒源晚解鞍。急呼重碧敵輕寒。南中氣候從頭錯。人日青梅已醞酸。

正月十二日遊東坡白鶴峰故居其北思無邪齋真蹟猶存

詩人自古例遷謫。蘇李夜郎并惠州。人言造物因嘲弄。故遣各捉一處囚。不知天公愛佳句。曲與詩人爲地頭。詩人眼底高四海。萬象不足供詩愁。帝將湖海賜湯沐。僅僅可以當冥搜。卻令玉堂揮翰手。爲提椽筆判羅浮。羅浮山色濃潑黛。豐湖水光先得秋。東坡日與羣仙遊。朝發崑閬夕不周。雲冠霞佩照宇宙。金章玉句鳴天球。但登詩壇將騷雅。底用蟻穴封王侯。元符諸賢下石者。祇於千載掩鼻羞。我來剝啄王粲宅。鶴峯無恙江空流。安知先生百歲後。不來弄月白蘋州。無人挽住乞一句。猶道雪乳冰湍不。當年醉裏題壁處。六丁已遣雷電收。獨遺無邪四箇字。鸞飄鳳泊蟠銀鈎。如今亦無合江樓。嘉祐破寺風颼颼。

放船

岸岸人家住。門門水面開。老翁扶杖立。稚子看船來。一夜鳴春雨。諸灘漲綠醅。順流行自快。更著北風催。

南海東廟浴日亭

南海端爲四海魁。扶桑絕境信奇哉。日從若木梢頭轉。潮到占城國裏回。最愛五更紅浪沸。忽吹萬里紫霞開。天公管領詩人眼。銀漢星槎借一來。

題南海東廟

羅浮山如萬石鍾。一股南走如渴龍。雷奔電激遮不住。直抵海濱無去處。低頭飲海吐絳霞。舉頭對着祝融家。珠宮玉室水晶殿。萬水一日朝再衙。青山四圍作城郭。海濤半浸青山腳。客來莫上浴日亭。亭上見海君始驚。青山缺處如玉玦。潮頭飛來打雙闕。晴天無雲濺碎雪。天下都無此奇絕。大海更在小海東。西廟不如東廟雄。南來若不到東廟。西京未覩建章宮。海神喜我著綺語。爲我改容收霧雨。乾坤軒豁未能許。小試日光穿漏句。

船過靈州

卻緣野闊覺天低。政值潮平苦槳遲。洲背兩船歸別港。岸頭茆屋出疎籬。江山慘淡真如畫。煙雨空濛自一奇。病酒春眠不知曉。開門拾得一篇詩。

清遠峽

清遠望峽山。山腳無半里。小舟行其間。五日翠未已。並馳兩蒼龍。中夾一玉水。送我到英州。渠當自回轡。誰開峽山寺。政要避世喧。深潭無來路。斷崖有清天。撩飢摘山果。擊磬煩嶺猿。人跡今擾擾。祇緣一魚船。

光口夜雨

峽江清空來雨急。寒聲夜半蕭蕭發。玻璃盆面跳萬珠。一顆一聲清入骨。夢中搔首起來聽。聽來聽去到天明。一生聽雨今頭白。不識春江夜雨聲。

出真陽峽

春光濃裏更江行。畫舫分明是水亭。出了真陽恰惆悵。數峯如筍雨中青。  
山落峽。石峯。即見碧落洞數石峯。

未必陽山天下窮。英州窮到骨中空。郡官見怨無供給。支與真陽數石峯。

碧落洞前灘水

石峯背後即英州。只不教人到岸頭。羅帶春風吹不直。故將數摺惱行舟。  
碧落峯前上一灘。篙師叫得口多乾。開門將謂船行遠。只在峯頭蘆荻灣。

碧落洞

夢中曾泊洞前船。落絮飛花是去年。今日來尋泊船處。一江風雨草連天。

神堂舖前桃花

北江二月正春寒。初見桃花喜未殘。臘月潮州見桃李。元來不作好春看。

題太和主簿趙昌父思隱堂

西昌主簿如禪僧。日餐秋菊嚼春冰。西昌府舍如佛屋。一物也無唯有竹。俸錢三月不曾支。竹陰過午未  
晨炊。大兒叫怒小兒啼。乃翁對竹方哦詩。詩人與竹一樣瘦。詩句與竹一樣秀。故山蒼玉垂綠雲。月稍風  
葉最關身。勸渠未要思舊隱。且與西窗作好春。

南華道中

清曉新晴物物熙。小風淡日暖歸旗。不堪回首南華路。去歲梅華細雨時。騎吏歡呼不要噴。三千里外北歸人。慇懃自掬曹溪水。淨洗先生面上塵。

曉霧

不知香霧濕人鬢。日照鬚端細有珠。政是春山眉樣翠。被渠淡粉作糊塗。

送胡端明赴召

紫泥夜下日星暉。赤舄朝看袞綉歸。中國如今相司馬。四夷見說問非衣。金魚玉帶明霜鬢。斗極台符拱太微。衛武年齡子儀考。一身雙羨古來稀。

曉出郡城往值夏謁胡端明泛舟夜歸

郡城至值夏。兩日非寬程。奔走豈吾願。詔書促南征。出郭星未已。歸棹月已生。問人水深淺。舟子喧未應。水石代之對。淙然落灘聲。危峯起夕蒼。暗潭生夜清。江轉風颯至。病肩難隱稜。添衣初嬾尋。忍寒良不能。近城一二里。遠岸三四燈。望關恐早閉。驅舟祇遲行。多情半環月。久矣將西傾。欲落且小留。知我要入城。月細光未多。火星助之明。至舍心未穩。麗譙纔一更。

二月一日曉渡太和江

綠楊接葉杏交花。嫩水新生尙露沙。過了春江偶回首。隔江一岸好人家。  
曉翠妨人看遠山。小風偏入客衣單。桃花愛做春寒信。只恐桃花也自寒。  
二月初頭春向中。花稍薄日柳稍風。折花客子渾無賴。狼藉須教滿路紅。

晨炊黃宙舖飯後山行

山行行得軟如綿。急上籃輿睡霎間。夢裏只聞人喝道。不知過盡數重山。

萬安出郭早行

玉花小朵是山礬。香殺行人只欲顛。風掠水衣無處去。柳塘着在角頭邊。

晨炊阜徑

問路無多子。驅車半日間。行穿崖石古。踏破蘚花斑。綠語鶯邊柳。青眠水底山。人家豈無地。爭住小溪灣。

明發韶州過赤水渴尾灘石山七峯皆尖秀而一峯最高

船下驚灘浪正喧。花汀水退走沙痕。一峯忽自雲端出。只見孤尖不見根。

出峽

朝來入峽悶船遲。也有欣然出峽時。山色亦如人送客。送行倦了自應歸。  
船行儘緩底須忙。詩卷聊堪度日長。瓶裏柚花偷觸鼻。忽然將謂是燒香。



過沙頭

非煙非雨淡濛濛。深閉窗扉護晚風。船外山光簾裏翠。岸頭花影鏡中紅。

三月晦日遊越王臺

榕樹梢頭訪古臺。下看碧海一瓊杯。越王歌舞春風處。今日春風獨自來。  
越王臺上落花春。一掬山光兩袖塵。隨分杯盤隨處醉。自憐不及踏青人。

四月八日嘗新荔枝

一點胭脂染蒂旁。忽然紅遍綠衣裳。紫瓊骨酪丁香瘦。白雪肌膚午暑涼。掌上冰丸那忍觸。樽前風味獨難忘。老饕要啖三百顆。卻怕甘泉凍斷腸。

夏日書事

一字看成兩。霜鬚摘轉多。既無書冊分。奈此日長何。荔子紅初皺。春醅碧欲波。醉來愁自去。不去亦從他。

遊蒲澗呈周帥蔡漕張舶

勝日從公蒲澗遊。萬壑聲滿千崖秋。一逕如蛇三百曲。繞盡山腹到山頭。穹巖千仞敲欲裂。仰看飛泉瀉雲窟。鏘成環珮奏成琴。濺作珠璣霏作雪。步穿危磴攀蒼藤。忽上穹巖頂上行。人在半天泉在井。不敢下瞰惟聞聲。只怪前驅深不見。須臾卻向前山轉。海風吹袖萬丈長。海水去人一弓遠。老僧高臥晏未興。先

遣長松夾道迎。小參古殿黃面老。不見舊日安期生。景泰上方半堵壁。城中望之雪山白。卻從景泰望城中。曉日樓臺煥金碧。君不見中流千金博一壺。不如遊山飢時粥一盂。金印繫肘大如斗。不如遊山倦時一杯酒。安期飛昇今幾年。祖龍不是不求仙。至今年年七月二十五。傾城遊人來訪古。

二月一日雨寒

南方氣候北方殊。春裏清寒臘裏無。雨入竹林渾不見。只來葉尾作眞珠。補盡空櫺閉盡門。茶甌火閣對爐熏。中庭淺水休教埽。正要留看雨點紋。梳頭正美睡相催。理盡霜絲夢恰回。窗隙小風能幾許。也吹蛛網去還來。姚黃魏紫向誰賒。郁李櫻桃也淺些。卻是南中春色別。滿城都是木綿花。只見春晴道是晴。不知半夜嫩寒生。疾風吹落林間雨。細雨還成大雨聲。

新晴西園散步

久雨令人不出門。新晴喚我到西園。要知春事深和淺。試看青梅大幾分。池水初生蓋玉沙。雨餘碧草臥堤斜。日搖波影纏橋柱。綉出欒枝遍地花。紅雨斑斑竹外蹊。黃金嫋嫋水邊絲。舉頭揀遍低陰處。帶葉青梅摘一枝。厭見山居要出來。出來厭了卻思回。人生畢竟如何是。且看桃花晚蒼開。

上巳前一日欲雨復晴

去年上巳正南來。明日初三忽又催。雨壓雲頭渾欲落。風翻日腳急吹開。莫因嶺外無花卉。便對春光廢酒杯。只揀茂林修竹處。蘭亭禊事足追回。

岸沙

水嫌岸窄要衝開。細蕩沙痕似剪裁。蕩去蕩來元不覺。忽然一片岸沙摧。

遣悶

江樹深春色。村雞薄晚聲。雨添青笠重。人減畫船輕。遣悶惟須睡。哦詩只強成。獨判連日雨。卻惜半朝晴。回望黃巢磯之險。心悸久之。

夜雲到曉不教收。初日微明又卻休。雨爲岸花新洗面。水撩江草只搖頭。千篙百棹力都竭。十里九磯船正愁。若到峽中應更險。卻思峽外是安流。

峽中得風掛帆

樓船上水不寸步。兩山慘慘愁將暮。一聲霹靂天欲雨。隔江草樹忽起舞。風從海南天外來。怒吹峽山山倒開。百夫絕叫椎大鼓。一夫飛上千尺桅。布帆掛了卻袖手。坐看水上鵝毛走。

夜泊鷓鴣磯

峽中盡日沒人煙。船泊鷓磯也有村。已被子規酸骨死。今宵第一莫啼猿。

真陽峽

清遠雖佳未足觀。真陽佳絕冠南蠻。一泉嶺背懸崖出。亂灑江邊怪石間。夾岸對排雙玉筍。此峯外面萬青山。險艱去處多奇觀。自古何人愛險艱。

阻風鍾家村觀岸傍物化

殼如蟬蛻濕仍新。那復浮嬉浪底春。卻把今身飛照水。不知石上是前身。

題鍾家村石崖

水與高崖有底冤。相逢不得鎮相喧。若教漁父頭無笠。只着蓑衣便是猿。

檄風伯

峭壁呀呀虎擘口。惡灘洶洶雷出吼。沂流更着打頭風。如撐鐵船上牛斗。風伯勸爾一杯酒。何須惡劇驚詩叟。端能爲我霽威否。岸柳掉頭荻搖手。

嶺雲

好山幸自綠嶄嶄。須把輕雲護淺嵐。天女似憐山骨瘦。爲縫霧縠作春衫。

憩楹塘驛

夾路黃茅與樹齊。人行茅裏似山雞。長松不與遮西日。卻送清陰過隔溪。

過建封寺下連魚灘

江收衆水赴單槽。石壁當流鬪雪濤。將取危舟飛過去。黃頭郎只兩三篙。夢裏篙師忽叫灘。老夫驚殺起來看。前船過盡知無慮。末後孤舟膽自寒。

羅仲憲送葦菜謝以長句

學琴自有譜。相鶴自有經。蔬經我繙盡。不見葦菜名。金華詩裏初相識。玉友尊前每相憶。坐令芥孫薑子芽。一見風流俱避席。取士取名多失真。向來許靖亦誤人。君不見鄭花不得半山句。卻參魯直稱門生。

曲江重陽

煙描水寫老秋容。嶺外秋容也自濃。如見大賓新露菊。若歌商頌晚風松。插花醉照濂溪井。吹髮慵登帽。子峯莫問明年衰與健。茱萸何處不相逢。

曉炊黃竹莊

染練江山宿雨餘。枝枝葉葉潤如酥。絲窠瓔珞消多少。破盡天公百斛珠。瑄灰簌簌欲飛聲。日到牽牛第幾星。地底陽生人不覺。燒痕未冷已青青。城中殊未有梅看。莫是冬暄欠淺寒。行到深山最寒處。兩株香雪照冰灘。

曉晴過猿藤逕

厭雨欣初霽。貪程敢晏眠。排天雙壁起。受日一峯先。入逕惟逢樹。無人況有煙。藤深猿不見。聲到客愁邊。

野炊猿藤逕樹下

逕仄旁無地。林間忽有天。丹楓明遠樹。黃葉暗鳴泉。苔錦銀槍竈。蘆茸玉帳氈。從軍古云樂。乞與箇山川。

明發瀧頭

黑甜偏至五更濃。強起侵星敢小慵。輸與山雲能樣嬾。日高猶宿夜來峯。

題興寧縣東文嶺瀑泉在夜明場驛之東

筓輿路轉崖欹傾。只聞滿山泉水鳴。卷書急開已半失。眼不停注耳細聽。石如鐵色黑。壁立鏡面平。水從鏡面一飛下。斬笛織簾風漪生。石知水力倦。半壁鍾作玉一泓。水行到此欲小憩。後水忽至前水驚。分清裂白兩派出。跳珠躍雪雙龍爭。不知落處深幾許。但聞井底碎玉聲。安得好事者。泉上作小亭。釀泉爲酒不用麴。春風吹作蒲萄綠。醉寫泉聲入枯木。何處更尋響泉曲。

夜宿房溪。飲野人張珣家。桂葉鹿蹄酒。其法以桂葉爲餅。以鹿蹄煮酒。釀以八月。過是期味減

云。

桂葉揉青作麴投。鹿蹄煮醪趁涼葛。落杯瑩滑冰中水。過口森嚴菊底秋。玉友黃封猶退舍。齏湯蜜汁更

輸籌野人未許傳醅法。剩買隻餅過別州。

揭陽道中

地平如掌樹成行。野有郵亭浦有梁。舊日潮州底處所。如今風物冠南方。

宿南嶺驛

蕨手猶拳已箸長。菊苗初甲可羹嘗。山村富貴無人享。一路春風野菜香。

感興

行役忘衰暮。逢春感物華。一來梅嶺外。三見木綿花。山鹿寧遊市。江鷗本臥沙。紅塵無了日。白髮未還家。

夜泊曲灣

順流一日快舟行。薄暮風濤特地生。不是江神驚客子。勸人早泊莫追程。

荔枝歌

粵犬吠雪非差事。粵人語冰夏蟲似。北人冰雪作生涯。冰雪一窖活一家。帝城六月日亭午。市人如炊汗如雨。賣冰一聲隔水來。行人未喫心眼開。甘霜甜雪如壓蔗。年年審子南山下。去年藏冰減工夫。山鬼失守嬉西湖。北風一夜動地惡。盡吹北冰作南雹。飛來嶺外荔枝梢。絳衣朱裳紅錦包。三危露珠凍寒泚。火傘燒林下成水。北人藏冰天奪之。卻與南人銷暑氣。





# 朝天集鈔

仲冬詔追造朝。供尙書郎職。舟行阻風清泥。

江神風伯戰方酣。北浪吹翻總向南。未放人扶下江柁。卻教眼看上江帆。

暮泊鼠山。聞明朝有石塘之險。

下水船逢上水船。夕陽仍更澁沙灘。雁來野鴨卻驚起。我與舟人俱仰看。回望雪邊山已遠。如何篷底暮猶寒。今朝莫說明朝路。萬石堆心一急湍。

二月望日。遞宿南宮。和尤延之左司郎署疎竹之韻。

此君見我眼猶青。笑我銀髭雪點成。憶昔與君同舍日。感渠將雨作秋聲。夜來遞宿三更悄。葉底春寒一倍生。夢入故園數新笋。籬邊破蘚幾莖橫。

七字謝紹興帥丘宗卿惠楊梅。

越絕諸楊盛一時。與儂瓜葛不曾知。老夫自笑吾衰矣。此客何從夢見之。也解過江尋德祖。政緣作尹是丘遲。渠伊不是南村派。未分先驅事荔枝。

謝胡子遠郎中惠蒲大韶墨。報以龍涎心字香。

墨家者流老蒲仙。碧梧採花和麝煙。華陽黑水煎膠漆。大陰玄霜作肌骨。龍尾磨飢飲鼠鬚。落點髹几几。不如夷甫清瞳光。敵日一見墨卿驚。自失後來夔州有梁杲。爾來黟川有吳老。亦追時好得時名。竟爲蒲生豎降旌。吳墨往往玄尙白。梁墨溼溼藕黏壁。南宮先生來自西。惠然贈我四玄圭。我無鵠返鸞回字。我無金章玉句子。得君此贈端何似。兀者得鞞僧得髻。安得玉案雙鳴璫。金刀繡段底物價。送以龍涎心字香。爲君興雲繞明窗。

李聖俞郎中求吾家江西黃雀醪法戲作醪經遺之

江夏無雙小道士。一丘一壑長避世。裁雲縫霧作羽衣。蘆花柳綿當裘袂。身騎鴻鵠太液池。腳踏金墓攀桂枝。渴飲南陽菊潭水。飢啄藍田粟玉芝。今年天田秋大熟。紫皇遣刈神倉穀。一雙鳧雁墮雲羅。夜隨弋人臥茅屋。賣身不直程將軍。卻與彭越俱策勳。解衣戲入玉壺底。壺中別是一乾坤。水精鹽山兩岐麥。身在椒蘭衆香國。玉條脫下澡凝脂。金叵羅中酌瓊液。平生學仙不學禪。刳心洗髓糟牀邊。諸公俎豆驚四筵。猶得留侯借箸前。昔爲飛仙今酒仙。更入太史滑稽篇。

德壽宮慶壽口號

淳熙丙午元日。聖上詣東朝。慶壽八秩。積陰頓晴。飛雪弄日。聖孝昭格。萬姓呼舞。擬作口號。

長樂宮前望翠華。玉皇來賀太皇家。青天白日仍飛雪。錯認東風轉柳花。

春色何須羯鼓催。君王元日領春回。牡丹芍藥薔薇朵。都向千官帽上開。  
雙金獅子四金龍。噴出香雲繞殿中。太上垂衣今上拜。百王曾有箇家風。  
天父晨興未出房。君王忍冷立風廊。忽然鳴蹕珠簾捲。萬歲聲傳震八荒。  
甲戌王春試集英。小臣曾是老門生。蒼顏華髮班行裏。也聽鈞天九奏聲。

題曹仲本出示譙國公迎請太后圖自肅天仗以下皆紀畫也

德壽宮前春晝長。宮內花開宮外香。太皇頤神玉霄上。都人久不瞻清光。  
今晨忽見肅天仗。翠華黃屋從天降。一聲清蹕萬人看。天街冰銷樓雪殘。  
北來又有一紅繖。八鸞三駢金轂端。輦中似是瑤池母。鳳鳥霞裳翦雲霧。  
太皇望見天開顏。萬國春風百花舞。乃是慈寧太母回鸞圖。母子如初千古無。  
朔雲邊雪旗腳溼。御柳宮梅寒影疎。向來慈寧隔沙漠。倩雁傳書雁難託。  
迎還駟馭彼何人。魏武子孫曹將軍。將軍元是一縫掖。忽攘兩臂挽五石。  
長揖單于如小兒。奉歸慈輦如折枝。功蓋天下只戲劇。笑隨赤松蠟雙屐。  
飄然南山之南北。山之北君不見岳飛功成不抽身。卻遣秦家丞相噴。

正月二十四日夜朱師古少卿招飲小樓看燈

光射琉璃貫水精。玉虹垂地照天明。風流誰似朱夫子。解放元宵過後燈。  
南北高峯醒醉眸。市喧都寂似巖幽。君言去歲西湖雨。城外荷聲到此樓。

和章德茂少卿拉館學之士四人訪王德修提幹之作

西玉南金價則同。帝城相對落花風。人如天上珠星聚。談到尊中竹葉空。白紵烏紗青寶玦。紫鸞黃鵠碧梧桐。千齡此遇還孤往。恨殺燈前欠老翁。

送何一之右司出守平江

十年一別再重遊。又見魚書拜徵侯。人物只今何水部。風流不減韋蘇州。白蘋洲上春傳語。烏鵲橋邊草喚愁。報政不應遲五月。鶯花紫禁竚歸舟。

招陳益之李兼濟二主管小酌。益之指蠶豆云未有賦者。戲作七言。蓋豌豆也。吳人謂之蠶豆云。

翠莢中排淺碧珠。甘欺崖蜜軟欺酥。沙瓶新熟西湖水。漆搗分嘗曉露腴。味與櫻梅三益友。名因蠶繭一絲絢。老夫稼圃方雙學。譜入詩中當稼書。

初夏清曉赴東宮講堂。行經和寧門外賞花市。

剩雨殘風一向顛。花枝酒琖兩無緣。忽逢野老從湖上。擔取名園到內前。芍藥截留春去路。鹿葱齊上夏初天。衆紅半霎聊經眼。不枉皇州第二年。

蚤謁景竊靈宮聞子規

帝里都無箇裏寬。苑深地禁到應難。蔚然綠樹去天近。上有子規啼月殘。便覺恍如還故里。不知聞處是長安。野薺薇發桐花落。孤負南溪老釣竿。

以六一泉煮雙井茶

鷹爪新茶蟹眼湯。松風鳴雪兔毫霜。細參六一泉中味。故有涪翁句子香。日鑄建溪當退舍。落霞秋水夢還鄉。何時歸上滕王閣。自看風爐自煮嘗。

西府直舍盆池種蓮

飛空天鏡墮莓苔。玉井移蓮旋旋栽。坐看一花隨手長。挨開半葉出頭來。稍添菱荇相縈帶。便有龜魚數往回。剩欲遶池三兩匝。數聲排馬苦相催。

西府寒泉汲十尋。深澆淺灑碧森森。高花已照紅粧鏡。小荅新抽紫玉簪。鈿破尙餘新雨恨。繖疎纔作半池陰。西湖瘦得如盆大。更伴詩人恐不禁。大音情。

陳蹇叔郎中出閩漕別送新茶李聖俞郎中出手分似

頭綱別樣建溪春。小璧蒼龍浪得名。細瀉谷簾珠顆露。打成寒食杏花餠。鷓斑碗面雲縈字。兔褐甌心雪作泓。不待清風生兩腋。清風先向舌端生。

跋尤延之左司所藏光堯御書歌

光堯太上皇帝御書西漢書列傳目。上有璽文曰帝錄。臣表得之以示臣萬里。謹拜手稽首作歌。敬書于後。

鸞臺長史老野僧。月前病鶴霜後蠅。文書海裏衰不了。黑花亂發雙眼睛。故人同舍尤太史。敲門未揖心先喜。袖中傾下十斛珠。五色光芒射牕几。自言天風來帝旁。拾得復古殿中雲一張。向來太上坐朝罷。勝日光風花柳暇。浣花叢裏冰雪容。宣城雞距針芒鋒。天顏有喜聊小試。西京書目供遊戲。韓彭衛霍欣挂名。舒向卿雲感書字。漢廷多少失意人。九京寸恨不作塵。一朝翻入聖筆底。昭回之光喚渠起。小臣濫巾縫掖行。手抄孝經不徹章。何曾下筆寫史漢。再拜恭覽汗透裳。太史結廬伴鷗鷺。錫山山下荆溪渡。紅光紫炁燭天衢。箇是深藏寶書處。

送張定叟

紫巖衣鉢付南軒。介弟曾同半夜傳。師友別來真夢耳。江湖相對各潛然。但令門戶無遺恨。何必功名在早年。君向瀟湘我閩粵。寄書只在寄茶前。時予方上章乞閩漕。

行路難

君不見。河陽花。今如泥土昔如霞。君不見。武昌柳。春作金絲秋作帚。人生馬耳射東風。柳色桃花卻長久。秦時東陵千戶侯。華蟲被體腰蒼瑋。漢初沛邑刀筆吏。折腰如磬頭槍地。蕭相厥初謁邵平。中庭百拜百

不磨。邵平後來謁蕭相。故侯一拜一惆悵。萬事反覆何所無。二子豈是大丈夫。窮通流坎皆偶爾。搏扶未必賢。槍榆華胥別是一天地。醉鄉何曾有生死。儂欲與君歸去來。千愁萬恨付一杯。

冬至節後賀皇太子及平陽郡主

長樂鐘聲遶夢驚。建章星影照人行。千官燈語聽殘點。一夜霜寒在五更。金鑰玉笈開北闕。銀鞍絲控謁東明。青宮朱邸環天極。五色祥雲覆帝城。

跋張功父通判直閣所惠約齋詩乙藁

句裏勤分似燈前得細嘗。孤芳後山種。一瓣放翁香。苦處霜爭澀。臞來鶴較強。不應窮活計。公子也忙忙。

送趙氏則少監提舉

塵主門生四十年。江湖契闊幾風煙。同朝再接鴛行裏。握手相看鶴髮前。誤喜論詩追舊事。不知呼酒是離筵。老懷只作還山夢。輸與先生早着鞭。

上巳同沈虞卿尤延之王順伯林景思游春湖上隨和韻得絕句呈之同社

鵝袍林裏過芳辰。聞道春來不識春。及至識春春已老。于中更老是詩人。搃宜亭子小如拳。着得西湖不見痕。湖上軒窗無不好。何須抵死揀名園。天色鬢鬆未肯收。吾儕自樂不曾愁。隨宜旋旋商量着。晴卽行行雨卽休。

藍輿休上馬休騎。溼卻青鞋也不辭。揀取雨絲疎處去。攜筇且謁水仙祠。  
雨催杖履卻須回。捲上疎簾眼頓開。十里湖光平似鏡。柳梢梢上一船來。  
岸上湖中各自奇。山觴水酌兩皆宜。只言游舫渾如畫。身在畫中元不知。

景靈宮聞子規

今年未有子規聲。忽向宮中樹上鳴。告訴落花春不管。裴回曉月恨難平。  
斜風細雨又三日。柳絮浮雲空一生。豈不懷歸歸未得。倩渠傳語故園鶯。

趙達明太社回于四月一日招游西湖

畫舫侵晨繫柳枝。主人生怕客來遲。嬌雲嫩日無風色。幸是湖船好放時。  
御池水滿苑門開。泥帶飛花路帶苔。到得孤山翻作惡。海棠鬧日不曾來。

走筆送濟翁胞弟特往浙東謁拜丘宗卿

若見丘遲問老夫。爲言臞似向來臞。更將雙眼寄吾弟。帶去稽山看鑑湖。

題水月寺寒秀軒

古寺深門一徑斜。繞身縈面總煙霞。低低簷入低低樹。小小盆成小小花。  
經藏中間看佛畫。竹林外面是人家。山僧笑道知儂渴。其實迎賓例瀹茶。



題劉寺僧房

會醉山間金叵羅。山應識我我懷它。頓添花竹明松檜。依舊菰蒲暗芰荷。試問錦屏無恙否。向來梅樹已無多。未須看遍新亭榭。勝日重來一一過。

送林子方直閣祕書將漕閩部

梅花園裏荔枝村。頗記張燈作上元。一別頻蒙訪生死。七年再見敍寒溫。屬當閔雨祈羣望。不得臨風共一尊。誰爲君王留國士。吾衰猶擬叫天閨。亦聞小泊贊公房。清曉扶藜叩上方。君與一僧游別嶂。我行百匝造長廊。風巾霧屨來雲外。雪檜霜松滿袖香。政是炎官張火傘。不應多取海山涼。

木樨初發呈張功甫

塵世何曾識桂林。花仙夜入廣寒深。移將天上衆香國。寄在梢頭一束金。露下風高月當戶。夢回酒醒客聞砧。詩情惱得渾無賴。不爲龍涎與水沉。

又和

老子江西有故林。萬松園裏桂花深。憶曾風露飄寒粟。自領兒童拾落金。割蜜旋將揉作餅。擣香須記不經砧。一枝未覺秋光減。燈影相看萬籟沉。

題徐衡仲西窗詩編

江東詩老有徐郎。語帶江西句子香。秋月春花入牙頰。松風澗水出肝腸。居仁衣鉢新分似。吉甫波瀾并取將。嶺表舊遊君記否。荔枝林裏折桃榔。

題吳夢與古樂府

金麥褰帷銀蒜鈎。水光殿後月華樓。鶯歌花笑柳起舞。何處人間更有愁。吳郎那得吳宮語。夢裏苧蘿人道許。低紅揜翠曲未終。小兒索飯啼門東。

買菊

老夫山居花繞屋。南齋杏花北齋菊。青春二月杏花開。抱瓶醉臥錦繡堆。涼秋九月菊花發。自折寒枝插華髮。湘纍落英曾幾何。陶令東鄰未是多。吾家滿山種秋色。黃金爲地香爲國。就中更有一丈黃。霜葩月蕊耿出牆。飲徒無酒尋不得。尋得一身花露香。如今小寓咸陽寺。有口何曾問花事。百錢擔上買一株。聊伴詩人發幽意。

再和謝朱叔正機宜投贈獎及南海集之句

重陽風雨不全篇。春草池塘豈滿編。好句誰言較多少。古人信手斲方圓。自慚下下中中語。祇合休休莫莫傳。珍重銀鈎揮玉唾。竟無瑤報只空然。

和張功甫夢歸南湖

一生兩事苦相關。從仕居貧併作難。願我雪穿行腳襪。羨君身作在家官。曉分京兆月半壁。夕問南湖水幾竿。桃李能言春滿座。向人猶自訴霜寒。

張功父請祠甚力簡以長句

老夫不及朱師古。納卻太常少卿得潼府。老夫不及張約齋。乞得華州仙觀名雲臺。金印如斗牀滿笏。富貴何曾膏白骨。一世窮忙爲阿誰。終日逢人皺兩眉。賣身長鬚仍赤腳。忍向墦間乞東郭。添丁德曜喜欲顛。孤竹一簞真箇錯。張君有宅復有田。朱君歸去無一錢。老夫老矣不歸去。五柳先生應笑汝。

利州路提刑祕書張李長送洮研發視乃一段柏木也作詩謝之

繡衣使者凜霜威。方丈仙人舊羽儀。別去十年真一夢。涵來萬里寄相思。如何綠石涵風面。化作青銅溜雨枝。卻送新詩報嘉惠。偷兒當不要新詩。

送德輪行者

瀝血抄經奈若何。十年依舊一頭陀。袈裟未着愁多事。着了袈裟事更多。

題畢少董繙經圖

畢敷文少董。名良史。紹興初。陷虜境。居汴。閉戶著春秋正辭。論語探古書。有宋哲夫。李願良輩執經師。

之好事者寫爲繙經圖。宋執一卷背立且讀且指。李執一卷向其師。若有問者。而少董坐一榻上。後有二女奴各有所執。而阿冬者坐其間。少董之季子也。女奴之鬢者曰孫壽。冠者曰馬惠真。哲夫名成。願良名師魏云。

宋生把卷讀且指。李生把卷問奇字。榻上坐着一老子。右手秉筆袒左臂。春秋論語訓傳成。胸中有話頗欲告兩生。欲呼小白拉重耳。同討犬戎尊帝京。婢妾不解事。兩生未可語。冬郎政兒癡。誰能復憐許。繙經未了報歸期。攜書歸來獻玉墀。胡沙滿面無人識。回首兩生斗南北。

戊申元日立春題道山堂前梅花

今年元日不孤來。帶領新春一併回。夜雨初添石渠水。東風先入道山梅。不妨數朵且微破。未要十分都放開。江路野香原自好。阿誰攜取種蓬萊。

龍山送客

念念還鄉未得還。偶因送客到龍山。分明認得西歸路。只是回車卻入關。

跋王順伯所藏歐公集古錄序真蹟

遂初欣遇兩詩伯。臨川先生一禪客。三人情好元不疎。祇是相逢逢不得。渠有正觀碑。儂有永和詞。真贋爭到底。未說妍與媸。珊瑚擊得如粉碎。趙璧博城翻手悔。不似三家鬪斷碑。夜戰半酣莫先退。皇朝愛碑

首歐陽集古萬卷六一堂。玄圭漆玉堆墨寶。黟霜黑水塗緇裳。臨川無端汲古手。席卷歐家都奄有。岫山科斗不要論。嶧山野火不經焚。尤家沈家喙如鐵。未放臨川第一勳。不知臨川何許得尤物。集古序篇出真筆。遂初心妒口不言。君看跋尾猶悵然。遂初欣遇。尤延之沈虞卿自號也。公與順伯皆喜牧碑刻。各自誇尙。二

和張功父梅詩

今歲柴車總未巾。孤山龍井不曾行。老無半點看花意。遮莫明朝雨及晴。約齋句子已清圓。更賦梅花分外妍。不飲銷金傳玉手。卻來嚙雪聳詩肩。要與梅花巧鬪新。恨無詩句敵黃陳。約齋詩好人仍好。不怕梅花賽卻人。

夢種菜

予三月一日之夜。夢遊故園。課僕夫種菜。若秋冬之交者。尙有菊也。夢中得菜子菊花一聯。覺而足之。背秋新理小園荒。過雨畦丁破塊忙。菜子已抽蝴蝶翅。菊花猶著鬱金裳。從教蘆葍專車大。早覺蔓青撲鼻香。宿酒未消羹糝熟。析醒不用柘爲漿。

春雨呈袁起巖

昨日晴暄盡十分。無端寒溼復今晨。蒼顏華髮差排老。急雨顛風屏當春。只有觀書堪遣日。從來病眼不如人。詩名滿世真何用。更賺先生願卜鄰。

謝張功父送牡丹

病眼看詩痛不勝。落花千朵喚雙明。淺紅醲紫各新樣。雪白鵝黃非舊名。擡舉精神微雨過。留連消息嫩寒生。蠟封水養松窗底。未似瑯欄倚半醒。

三衢登舟午睡

午思昏昏不肯醒。倦投竹枕睡難成。曉然有夢疑非夢。聽得人聲及水聲。

曉泊蘭溪

金華山高九天半。夜雪裝成珠玉案。蘭溪水清千頃強。朔風凍作琉璃缸。日光雪光兩相射。病眼看來忘南北。恨身不如波上鷗。腳指爲楫身爲舟。恨身不如沙上雁。蘆花作家梅作伴。折綿冰酒未是寒。曉寒真欲冰我肝。急閉筠蓬擁爐去。竹葉梨花十分注。

蘭溪解舟

只愁灘淺閣行舟。到得江深又不流。水鳥避人飛不徹。看他沒去看他浮。

和陳憲叔郎中乙巳上元晴和

御柳梢頭晚不風。官梅面上雪都融。如何闐闐新春夜。頓有芙蓉滿眼紅。十里沙河人最鬧。三千世界月方中。買燈莫費東坡紙。今歲鼇山不入宮。

十四日晚。有旨。徹禁中山棚。

春寒早朝

十載江湖今又歸。朝雞不許夙興遲。每聞撲鹿初鳴處。只是鬆鬢好睡時。病眼生憎紅蠟燭。曉光來到碧桃枝。誰能馬上追前夢。坐待金門放玉笏。

沈虞卿祕監招遊西湖

蘇公堤遠柳生煙。和靖園深竹映關。船入芰荷香處去。人從雲水國中還。似寒如暖清和在。欲雨翻晴頃刻間。能爲蓬萊老仙伯。一杯痛快吸湖山。

送鄉僧德璘監寺緣化結夏歸天童山

七百支郎夜忍飢。木魚閉口等君歸。還山大衆空歡喜。只有誠齋兩首詩。

答提點綱馬驛丞劉修武翰

解道征鴻數字秋。清於雪碗映冰甌。老來筆底心無毒。交割風光與子休。

賀皇太子九月四日生辰

繼照姿天縱。分陰學日勤。橘中招綺夏。瓜處屏侂文。老別魚竿月。來依鶴禁雲。還將古爲鑑。聊當野人芹。

和同年李子西通判

走馬看花拂綠楊。曲江同賞牡丹香。向來年少今俱老。君拜監州我作郎。北闕小遲蒼玉佩。南征聊製芰

荷裳病身只作家山夢。徑菊詩葩兩就荒。

九日卽事呈尤延之

作日茱萸未苦香。今朝籬菊頓然黃。浮英泛蕊多多著。舊酒新醅細細嘗。節裏且追千載事。髩邊管得幾莖霜。正冠落帽都兒態。自笑狂夫老不狂。

和周元吉左司夢歸之韻

半似清狂半白癡。不須人笑我心知。煙霞平日真成癖。山水中年卻語離。錯計浪隨雲出岫。感君能遣雨催詩。居然喚起還家夢。橘刺藤梢隔槿籬。

送劉孔章縣尉得官西歸

早宴黃花詣粉闈。晚按春草染朝衣。卻提猛士弓彎月。去埽封狐雪打圍。綠髩朱顏君勝我。青春白日我思歸。何時共淪青原著。下看江鷗來去飛。

雲龍歌調陸務觀

墨池楊子雲。雲間陸士龍。天憎二子巧言語。只遣相別無相逢。長安市上忽再值。向來一別三千歲。王母桃花落幾番。北斗柄爛銀河乾。雙髩成絲絲似雪。兩翁對面面如丹。借問別來各何向。渭水東流我西上。金印斗大直幾錢。錦囊山齊今幾篇。詩家不愁吟不徹。只愁天地無風月。君不見漢家平津侯。東閣冠蓋



如雲浮。又不見當時大將軍。公卿推拜如星奔。抵今雲散星亦散。也無鹿登臺。樹羊登墳。何時與君上廬阜。都將硯水供瀑布。磨鎌更斫扶桑樹。擣皮作紙裁煙霧。雲錦天機織詩句。孤山海棠今已開。上巳未有游人來。與君火急到一回。一杯一杯復一杯。管他玉山頽不頽。詩名於我何有哉。

再和雲龍歌留陸務觀西湖小集且督戰云

我願身爲雲。東野化爲龍。龍會入淵雲。入岫韓子卻要長相逢。作意相尋偏不值。不知今年是何歲。刻藤土板贈一番。廷珪烏丸曬未乾。乃是故人陸浚儀。詩骨點化黃金丹。謂宜天祿貯劉向。不然亦合雲臺上。卻令去索催租錢。枉卻清風明月三千篇。夜裝明發走不徹。半篙刺碎嚴灘月。老夫不願萬戶侯。但願與君酒船萬斛同拍浮。老夫不怯故將軍。但怯與君筆陣千里相追奔。少陵浣花舊時屋。太白青山何處墳。二仙死可埋丘阜。二仙生可着韋布。名挂廣寒宮裏樹。非煙非雲亦非霧。長使玉皇掉頭誦渠句。詩府誰得玉笈開。詩壇誰授黃鉞來。留君不住君急回。不道西出陽關無此杯。西山金盆儘渠頽。斯游明日方懷哉。

寒食雨中同舍人約遊天竺得十六絕句呈陸務觀

遊山不合作前期。便被山靈聖得知。只等五更傾一雨。三更猶是月明時。笋輿衝雨復衝泥。一徑深深只覺遲。孤塔忽從雲外出。寺門漸近報儂知。

住山何敢望他僧。只是遊山也不會。可惜一條杉檜路。都將溼了不教行。  
破雨遊山也莫嫌。卻緣山色雨中添。人家屋裏生松樹。穿出茅簷卻覆簷。  
小溪曲曲亂山中。嫩水濺濺一線通。兩岸花桃總無力。斜紅相倚臥春風。  
老檜如幢翠接連。山茶作塔綠縈纏。山僧相識渾相忘。不到山中十五年。  
三峯小石一方池。下有機泉仰面飛。坐看跳珠復拋玉。忽然一噴與簷齊。  
清遠溪中小閘頭。遮攔溪水不教流。山僧爲我放一板。濺雪奔雷怒未休。  
城裏哦詩枉斷髭。山中物物是詩題。欲將數句了天竺。天竺前頭更有詩。  
忽撚金絲嫋綺疏。又驚寒食到來初。不知折盡西湖柳。插遍長安萬戶無。  
禪房寂寂水潺潺。澗草巖花點綴間。忽有仙禽發奇響。頻伽來自補陀山。  
雨裏匆匆怨出郊。晴時不出卻誰教。西湖北畔名園裏。無數桃花只見梢。  
戶戶游春不放春。只愁春去不愁貧。今朝道是游人少。處處園亭處處人。  
若道尋春被雨催。如何隨處兩三杯。晚晴曉雨如翻手。有底虧儂不好來。  
萬頃湖光一片春。何須割破損天真。卻將葑草分疆界。葑外垂楊屬別人。  
轎頂花枝儘鬧裝。游人未暮已心忙。無端更被千株柳。展取蘇堤分外長。

跋陸務觀劍南詩藁二首

今代詩人後陸雲。天將詩本借詩人。重尋子美行程舊。盡拾靈均怨句新。鬼嘯狻啼巴峽雨。花紅玉白劍南春。錦囊緝罷清風起。吹仄西窗月半輪。劍外歸來使者車。瀾東新得左魚符。可憐霜鬢何人問。焉用詩名絕世無。彫得心肝百雜碎。依前途轍九盤紆。少陵生在窮如蝨。千載詩人拜蹇驢。

新晴讀樊川詩

江妃瑟裏芰荷風。淨埽癡雲展碧穹。嫩熱便噴疎小扇。斜陽酷愛弄飛蟲。九千刻裏春長雨。萬點紅邊花又空。不是樊川珠玉句。日長淡殺箇衰翁。

駕幸聚景晚歸有旨次日歇泊

身在長安夢故山。故山未去且長安。落紅滿地莫教掃。新綠隔牆聊借看。竹葉勸人行樂事。榴花爲我遣春寒。賜休又得明朝睡。不問三竿與兩竿。

都下食筍自十一月至四月戲題

竹祖龍孫渭上居。供儂樽俎半年餘。斑衣戲綵春無價。玉版談禪佛不如。若怨平生食無肉。何如陋巷飯斯蔬。不須庾韭元修菜。喫到憎時始憶渠。

醪醑

以酒爲名卻謗他。冰爲肌骨月爲家。借令落盡仍香雪。且道開時是底花。白玉梢頭千點韻。綠雲堆裏一枝斜。休休莫斷西莊柳。放上松梢分外佳。

南海陶令曾送水沈報以雙井茶二首

嶺外書來謝故人。梅花不寄寄爐熏。瓣香急試博山火。兩袖忽生南海雲。苒惹鬚眉清入骨。縈盈窗几巧成文。瓊琚作報那能辦。雙井春風輟一斤。

沈水占城第一良。占城上岸更差強。黑藏骨節龍筋瘠。班出文章鷓翼張。滾盡殘膏添猛火。熬成熟水趁新湯。素馨熏染真何益。畢竟輸他本分香。

幼圃

蒲橋寓居庭有列方石而實以土者小孫子藝花窠菜本其中戲名幼圃

寓舍中庭劣半弓。驚泥爲圃石爲塘。瑞香萱草一兩本。葱葉葶苗三四叢。穉子落成小金谷。蝸牛卜築別珠宮。也思日涉隨兒戲。一逕惟看蟻得通。

送周元吉顯謨左司將漕湖北

君詩日日說歸休。忽解西風一葉舟。黃鶴樓前作重九。水精宮裏過中秋。職親六閣仍金馬。喜入千屯看

木牛繡斧光華誰不羨。一賢去國欠人留。  
又見周郎攜小喬。武昌赤壁醉嬌饒。蜀江雪水來三峽。吳苑風煙訪六朝。秋月春花出肝肺。新詞麗曲入  
笙簫。歸來卻待金鑾殿。好看霜毫映珥貂。  
彼此江湖漫浪翁。相逢遞宿省西東。兩窮握手論詩後。一笑投膠入漆中。臨水登山公別我。青鞋布襪我  
從公。貂裘已博江西艇。只待黃花半席風。

送王季德提刑寶文少卿

寶儲依舊接吳游。盪節何曾遠藻旒。卿月使星銀漢曉。繡衣綵服太湖秋。豺當道上狐何問。鷹擊霜前兔  
已愁。火急平反供一笑。紫荷玉笋待君侯。

贈都下寫真葉德明

我昔山林人不識。或疑謫仙或狂客。仰看青天不看人。醉裏那知眼青白。一攜破硯入長安。素衣成緇綠  
鬢斑。上林麒麟着野馬。滄洲鷗鷺綴孔鸞。漢宮威儀既不入貴人樣。灞橋風雪又不見詩人相。不須覽鏡  
照清溪。我亦自憎塵俗狀。葉君着眼秋月明。葉君下筆秋風生。市人請畫卽唾罵。只寫龍章鳳姿公與卿。  
肯來爲予寫衰貌。擲筆掉頭欣入妙。相逢可惜遲十年。不見詩翁昔年少。

送孫檢正德操龍圖出知鎮江

看花走馬紹興間。彼此春風各少年。黃甲諸儒今幾許。白頭同舍省東偏。昨宵歸夢月千里。餘債欠君詩兩篇。已乞閩山一窠闕。老身只要早歸田。

食雞頭子

三危瑞露凍成珠。九轉丹砂鍊久如。鼻觀溫芳炊桂歇。齒根熟軟剝胎餘。半甌鷹爪中秋近。一炷龍涎丈室虛。卻憶吾廬野塘味。滿山柿葉正堪書。

新寒戲簡尤延之檢正

逗晚添衣併數重。隔晡剩熱尙斜紅。秋生露竹風荷外。寒到雲窻霧閣中。半點暄涼能幾許。古來豪傑總成空。木犀香殺張園了。雪臭金梭欠兩翁。

跋姜春坊梅山詩集

松風澗水打窻聲。玉珮瓊琚觸眼明。當畫如何挂秋月。未春特地轉新鶯。只銷一卷梅山集。幻出多般景物情。老子平生有詩癖。爲君焚卻老陶泓。

秋雨蚤作有歎

細雨簷無質。安得更有聲。如何卻作泥。亦能妨晨征。宿昔忽過暄。心知非堅晴。何須暄晴極。然後寒雨生。寒生使人覺。妙物亦何曾。翦翦自神妙。無乃與物矜。造物本非作。觀者或強名。老夫近稍聾。此事無暇聽。

平生感秋至。此意今已平。獨念老病身。頗不耐夙興。何時歸故園。晏眠閉柴荆。鳴雞亦不留。好夢無吾驚。他年憶此時。惘如宿酒醒。思歸已可喜。而況真歸耕。

寄題曾子與競秀亭

老夫上下蓼花灘。每過君家輒繫船。尊酒燈前山入座。孤鴻月底水連天。暄涼書問二千里。場屋聲名三十年。競秀主人文似豹。不應霧隱萬峯邊。

赴文德殿聽麻仍拜表

蒼龍觀闕啓槐宸。白玉塔除振鷺羣。仗外諸峯獻松雪。霜前一雁度宮雲。舍人就日宣麻制。丞相瞻天進表文。夙退自欣還自笑。素餐便當策殊勳。

紫宸殿拜表賀雪

稍緩鳴靴不住催。一聲再拜忽如雷。封章進了儀曹退。文武班齊上相來。白髮兩年陪賀雪。紫衣數輩小傳杯。賜休退食端何限。未到西湖探早梅。

立春後一日和張功父園梅未花之韻

前夕三更月落時。東風已動萬花知。江梅端合先交割。春色如何未探支。只欠梁溪冰柱句。追還和靖暗香詩。張家剩有蔥根指。不把瓊酥滴一枝。

人日出遊湖上

去時數點雨。歸時數片雪。雨雪兩不多。山路雙清絕。  
城中雪一尺。山中雪一丈。地上都已消。卻在松梢上。  
去歲遊春屐。苔痕故可尋。人家隨岸遠。塔影落湖深。

寄題劉成功錦里

嘉林市中虛一丈。嘉林寺後竹千竿。先君授徒竹窻底。我初識君俱少年。同師同舍同筆硯。火冷燈青飛雪片。春風一夜吹林花。南北飄零各星散。我今頭白苦思歸。羨君山園芋栗肥。爲君題作小錦里。君應一笑巾墮几。

讀淵明詩

少年喜讀書。晚悔昔草草。迨今得書味。又恨身已老。淵明非生面。穉歲昔已早。極知人更賢。未契詩獨好。塵中談久睽。暇處目偶到。故交了無改。乃似未見寶。貌同覺神異。舊翫出新妙。瑤空那有痕。滅跡不須掃。腹腴八珍初。天巧萬象表。向來心獨苦。膚見欲幽討。寄謝穎濱翁。何謂淡且稿。

送姜夔堯章謁石湖先生

釣璜英氣橫白蜺。欬唾珠玉皆新詩。江山愁訴鶯爲泣。鬼神露索天洩機。彭蠡波心弄明月。詩星入腸肺



肝裂吐作春風百種花。吹散瀕湖數峯雪。青鞋布襪軟紅塵。千詩只博一字貧。吾友夷陵蕭太守。逢人說項不離口。袖詩束來謁老夫。慙無高價當璠璣。翻然卻買松江艇。徑去蘇州參石湖。

林景思寄贈五言以長句謝之

華亭沈虞卿。惠山尤延之。每見無雜語。只說林景思。試問景思有何好。佳句驚人絕倒。句句飛從月外來。可羞王公薦穹昊。若人乘雲駕天風。秋衣剪菊裁芙蓉。暮宿銀漢朝蓬宮。我欲從之東海東。西湖柳色二三月。相逢一笑冠纓絕。醉招和靖叫東坡。一吸西湖湖水竭。我醉自眠君自顛。路人往往指作仙。此輩何曾識此樂。識與不識俱可憐。別時花開今已落。思君令人瘦如鶴。夢裏隨君攜酒瓢。同登天台度石橋。瀑布界天瀉雲窟。長松拔地攙煙霄。與君聯句章未了。帝城鐘動西峯曉。海風吹墮珊瑚枝。乃是先生寄我詩。火雲燒江江水沸。君詩清涼過於水。定知來自雪巢底。恍然坐我天台寺。

寄題劉凝之墳山壯節亭用轆轤體

見了廬山想此賢。此賢見了失廬山。胸中書卷雲凌亂。身外功名夢等閒。一點目光牛背上。五絃心在雁行間。欲吟壯節題崖石。筆挾風霜齒頰寒。

賀皇太子九月四日生辰

典學光陰璧不如。簡編燈火卷還舒。極知儲后勤稽古。卻是儒生懶讀書。心到帝王圖籍外。手追雅頌國

風初。人間未見瑤山集。十倍曹丕尙有餘。

和袁起巖郎中投贈七字

故人一別兩相思。不但平王痛飲師。胸次五三真事業。筆端四六更歌詩。閉門覓句今無已。刻意傷春古  
牧之。臥雪高人家譜在。春風政着紫蘭枝。



# 江西道院集鈔

戊申四月九日。得請補外。初出國門。宿釋迦寺。

出卻金宮入梵宮。翠微綠霧染衣濃。三年不識西湖月。一夜初聞南澗鐘。藏室蓬山真昨戲。園翁溪友得今從。若非朝士相追送。何處冥鴻更有踪。

## 明發南屏

新晴在在野花香。過雨迢迢沙路長。兩度立朝今結局。一生行客老還鄉。猶嫌數騎傳書札。剩喜千山入肺腸。到得前頭上船處。莫將白髮照滄浪。

## 過南蕩

秧纔束髮幼相依。麥已掀髯喜可知。笑殺槿籬能耐事。東扶西倒野醪醅。近岫遙峯翠作圍。平田小港碧行遲。垂楊一徑深深去。阿那人家住得奇。

## 過楊村

石橋兩畔好人煙。匹似諸村別一川。楊柳陰中新酒店。葡萄架底小漁船。紅紅白白花臨水。碧碧黃黃麥際天。政爾清和還在道。爲誰辛苦不歸田。

側溪解纜

夢裏喧聲定不凡。順風解纜破晴嵐。起來職事惟洗面。此外功名是挂帆。莫笑一蔬兼半菽。飽飡萬壑與千巖。蓬萊雲氣君休望。且向嚴灘濯布衫。

舟過桐廬

瀟灑桐廬縣。寒江繚一灣。朱樓隔綠柳。白塔映青山。稚子排牕出。舟人買菜還。峯頭好亭子。不得一躋攀。近縣人人喜。來船岸岸移。偶因小泊處。恰是早飡時。喚僕答相亂。看山寒不知。橫洲猶半在。今歲水生遲。後面山無數。南頭柳更多。人家逼江岸。屋柱入滄波。老去頻經此。重來更幾何。牛山動悲感。曾侍板輿過。

溜港灘

此去嚴州只半程。一江分作兩江橫。忽驚洲背青山下。卻有桅檣地上行。

蘭溪女兒浦曉寒

前年寒早熱亦早。去年寒遲熱亦遲。何曾寒暑有遲速。通融三年那兌支。人生何必早得意。芍藥榮時牡丹瘁。榮枯遲速一笑休。順風今日好行舟。

嘲穉子

雨裏船中不自由。無愁穉子亦成愁。看渠坐睡何曾醒。及至教眠卻掉頭。

柴步灘

江闊水不聚。分爲三五灘。遂令客子舟。上灘一一難。小沙已成洲。大沙已成山。山有樹百尺。樹圍屋數間。水底復生洲。沙溼猶未乾。從此洲愈多。安得水更寬。憶從嚴陵歸。水落不能湍。拖以數童僕。折卻十竹竿。今茲過吾舟。念昔猶膽寒。

東噴灘

江船初上灘。灘水政勃怒。船工與水鬪。水力攔船住。琉璃忽破碎。冰雪併吞吐。竟令水柔伏。低頭船底去。朝來發盈川。已過灘十許。但聞浪喧闐。未覩水態度。卻緣看後船。偶爾見奇處。從此至三衢。猶有灘四五。將至地黃灘。

未到地黃灘。十里先聞聲。檣竿已震掉。未敢與渠爭。舟人各整篙。有如大敵臨。舉蓬試一望。濺雪紛淙瑩。乃是水磴港。爲灘作先鳴。真灘定若何。老夫虛作驚。

蘇木灘

灘雪清濺眸。灘雷怒醒耳。落洪翠壁立。跳波碧山起。船進若戰勝。船退亦遊戲。若非篙師苦。進退皆可喜。忽逢下灘舟。掀舞快雲駛。何曾費一棹。纔瞬已數里。會有上灘時。得意君勿恃。

遼車灘

東岸上不得。西岸上更難。五船往復來。經緯灘兩間。一船初徑進。當流爲衆先。濤頭打澎湃。退縮不敢干。一船作後殿。忽焉突而前。瞬息越湍險。回顧有矜顏。老夫與寓目。亦爲一粲然。

過查灘

眼底常山一武中。上灘更得半船風。青天以水爲銅鏡。白鷺前身是釣翁。舊日岸頭渾改盡。數尖山背忽攙空。老夫只費五六日。行盡浙山西復東。

過鉛山江口

下卻諸灘水漸平。舟行已遠上饒城。酒家便有江鄉景。綠柳梢頭挂玉瓶。

初二日苦熱

人言長江無六月。我言六月無長江。只今五月已如許。六月更來何可當。船倉周圍各五尺。且道此中底寬窄。上下東西與南北。一面是水五面日。日光煮水復成湯。此外何處能清涼。掀蓬更無風半點。揮扇只有汗如漿。吾曹避暑自無處。飛蠅投吾求避暑。吾不解飛且此住。飛蠅解飛不飛去。

感秋

昨扇猶午攜。今裳覺晨單。起來且復臥。未敢窺柴關。不覺病至此。爲復老使然。平生性剛燥。畏熱長喜寒。念昔忝鄉賦。踐雪詣春官。布褐皆不續。芒鞋繭且穿。長亭夜濯足。吹燈呻故編。買酒破孤悶。浩歌殷屋椽。

何曾悲廩秋。山稜聳臙肩。秋風吹我髓。秋露滴我肝。我欲與秋敵。秋先令我酸。歎息復歎息。誰是長少年。  
盟漱已云畢。危坐正冠衣。覽鏡忽見我。不識我爲誰。自倚身尙強。不悟年已衰。舉頭視嘉木。向人慘無姿。  
我欲訴渠老。渠乃懷秋悲。木悲不解飲。瑟瑟聲怨咨。我且呼麴生。細細斟酌之。我醉不知我。更知春秋爲。  
隕照趣夕黯。孤燈啓宵明。老夫倦欲睡。似醉復如醒。寸心無寸恨。但如江海清。秋蛩何爲者。四面作怨聲。  
淒惻竟未已。抑揚殊不平。切切百千語。遞遞三四更。繞砌尋不得。靜坐復爭鳴。有口汝自苦。我醉不汝聽。  
秋曉寒何忍。秋夕永難度。青燈照書冊。兩眼如隔霧。揜卷卻孤坐。塊然與誰語。倒臥臥不得。起行行無處。  
屋角忽生明。山月到庭戶。似憐幽獨人。深夜約清晤。我吟月解聽。月轉我亦步。何必更讀書。且與月聯句。  
平生畏長夏。一念願清秋。如何遇秋至。不喜卻成愁。書冊秋可讀。詩句秋可搜。永夜宜痛飲。曠野宜遠遊。  
江南萬山川。一夕入寸眸。請辦雙行纏。何處無一丘。

明發五峯寺

歸時路何近。去時路何遠。山路無短長。人心有往返。每因赴官期。一出謁鄉縣。若非人事牽。無奈老身懶。  
初心作此行。夜雨醒醉眼。孤愁念羣騶。尺泥滑雙趺。首塗天全溼。回轍雲半捲。投寺借松牀。呼僧同野飯。  
頽然挂眠足。得此行役倦。暫勞新不堪。遐征舊所歎。松菊豈不懷。樊籠何時免。瘦藤要覓閒。到了古道院。  
初入筠州界高岡鋪

千尺霜松夾道周。國初涼繖至今留。筠州舊是朝天路。路人號夾道松。為涼繖樹。

和尤延之見戲觸藩之韻以寄

儂愛山行君水遊。尊前風味獨宜秋。文戈卻日玉無價。器寶羅胸金欲流。歛唾清圓談者拙。詩章精悍古人羞。子房莫笑身三尺。會看功成自擇留。延之戲誠齋為羊。誠齋戲延之為蚌螭。詩所云云。謂蚌螭也。

讀退之李花詩

桃李歲歲同時並開。而退之有花不見桃。惟見李之句。殊不可解。因晚登碧落堂。望隔江桃皆暗。而李獨明。乃悟其妙。蓋炫晝縞夜云。

近紅暮看失燕脂。遠白宵明雪色奇。花不見桃惟見李。一生不曉退之詩。

郡圃曉步因登披仙閣

昨來風日較暄些。破曉來遊特地佳。也自低頭花下過。依前撞落一頭花。李花半落雪成堆。末後桃花陸續開。白錦地衣紅錦帳。侵晨供張等儂來。

初夏玉井亭晚立

冶蕊倡花一雨空。鮮晴新漲未虧儂。竹兼樹影眠天底。人凭欄干立鏡中。看盡水衣投北岸。方知今日是南風。黃鸝對語無尋處。忽見雙飛入別叢。



筠庵

故老談李仙。昔日上寥廓。隨身無長物。止跨一隻鶴。鶴本非胎生。古卵尙遺壳。千年石似堅。覆在鳳山腳。寒宵晦風雨。神光照岩壑。犬噪雞夜鳴。龍泣人寢愕。祇今筠菴是。因物非繩削。當時拖破處。作門不關鑰。蓋以一把茅。聊以護霜雹。遐瞻如釣翁。簑衣逐層着。我來驗幽討。尙疑俗諺謔。霧中披羽衣。砌下脫芒屨。八戶環仰觀。中空生響諾。不見朱頂雛。猶存雪色膜。松梢雙老鶴。戛然下簷角。老夫忽心驚。不敢小盤礴。

新暑追涼

去歲衝炎橫大江。今年度暑臥筠陽。滿園無數好亭子。一夏不知何許涼。待得老夫親勘當。更招幽鳥細商量。朝慵午倦誰相伴。貓枕桃笙苦竹牀。

碧落堂暮景輓轡體

碧落堂中夕眺餘。一聲角裏裂晴虛。滿城煙靄忽然合。隔水人家恰似無。坐看荷山沉半脊。急歸道院了殘書。意行花底尋燈處。失腳偏噴小吏扶。

雨過郡圃行散

劍池一日百週遭。雨後閑來照鬢毛。主管園林鶯稱意。巡行荷芰鷺宣勞。不須見我還飛去。便與移文告汝曹。一事惱人無問處。南山高是北山高。

碧落堂晚望荷山

荷山非不高。城裏自不見。一登碧落堂。山色正對面。如人臥平地。躍起立天半。指揮出伏兵。萬騎橫隔岸。後乘來未已。前驅瞻已遠。晨光到岩壑。人物俱舊綯。綠屏紛開閣。翠旗閃舒卷。安得垂天虹。橋虛度雲巘。老鈴偶報事。郡庭集賓贊。贊政化行也。忽忽換山巾。默默下林坂。

午憩筠菴

筠菴偶坐處。適當樹闕間。遠山不見我。而我見遠山。清風隔江來。宛轉入松關。翠蕉自搖扇。白羽得暫閑。可憐三竹狀。睡徧復循環。秋暑自秋暑。山寒自小寒。小吟聊適意。好惡不必刪。

答陸務觀道院佛祖之戲

老禪分得破叢林。薄供微齋也不會。道院勅差權院事。筠菴身是住菴僧。人間赤日方如火。松下清風獨似冰。別有莫春沂水在。爲君一滴灑千燈。

延之寄詩覓道院集遣騎送呈和韻謝之

與君髣髴總星星。詩句輸君老更成。別去多時頻夢見。夜來一雨又秋生。故人金石情猶在。贈我瓊瑤雪似清。誰把尤楊語同日。不教李杜獨齊名。

祇召還京題江西道院

病身祇要早投閒。乞得高安政小安。山水秋來渾是畫。樓臺高處日生寒。登臨未足還辭去。老大重來畢  
竟難。碧落翠微好將息。清風明月夢中看。郡圃鳳山佳處。有碧落堂。翠微臺。

問途有日戲題郡圃

今朝郡圃放遊人。懊惱遊人作撻春。到得老夫來散策。亂吹花片總成塵。商量歲後牢關鎖。拘管風光屬  
病身。造物嗔儂先遣去。遣儂儂去不須嗔。

留題筠菴以菴室用茅蓋層出如簔衣然

茂林修竹翠光中。那得披簔一老翁。白石砌成珠子徑。黃茅裹卻水晶宮。夏涼冬暖非人境。雪打霜封卽  
釣蓬。老子明朝便東去。更攜瓦枕享松風。

明發道經生米市隨喜西林寺留題進退格

貪睡能無起。挑燈強未殘。春聲忙野店。月色淡柴門。又踏黃塵路。前追紅葉村。秋衣那敢薄。病骨自難溫。

羲娥謠

中秋夜宿辟邪市。詰朝早起曉星已上。日欲出而月未落。光景萬變。蓋天下奇觀也。作羲娥謠以記之。  
羲和夢破欲起行。紫金畢逋啼一聲。聲從天上落人世。千村萬落雞爭鳴。素娥西征未歸去。簸弄銀盤浣  
風露。一丸玉彈東飛來。打落桂枝雪毛兔。誰將紅錦幕半天。赤光絳氣貫山川。須臾卻駕丹砂轂。推上寒

空輓蒼玉。一本此下有雲漢昭詩翁已行十里強。羲和早起道無雙。

小憩上坊鎮新店進退格

下轎行新店。排門得小軒。中間一棗几。相對兩蒲團。椽竹青留節。簷茅白帶根。明窗有遺恨。接處紙痕斑。

題十里塘夜景

物色當秋半。登臨更夜闌。山光倒眠水。水影上搖山。宿鷺都飛去。漁人獨未還。老夫與明月。分割一清灣。

過土笮岡

木落初宜菜。亭荒不復茅。牛分叉路口。鶴立禿松梢。秋熱方昇日。朝涼更迴郊。衰年走塵鞅。何計返雲巢。

入玉山七里頭

諸村不雨數旬餘。此地瀕江萬寶蘇。晚紫豆花初總角。早黃稻穗已長須。回頭金步野蹊遠。當面玉山秋

塔孤。偶見年時解船處。客愁依舊挂菰蒲。筠洪小路至餘干。步市初出官給路。金

宿查瀨

寒流一帶檻前橫。落日諸峯霞外明。水斷新洲添五里。客尋舊路卻重行。江車自轉非人踏。沙碓長春徹

夜鳴。疇昔穉桑今禿樹。如何白髮不教生。

晨炊泊楊村

沙步未多遠。里名還異原。對江穿野店。各路入深村。秋水乘新汲。春芽煮不渾。舟中爭上岸。竹裏有清樽。  
九月一日夜宿盈川市

下灘一日抵三程。到得盈川也發更。兩岸漁樵稍燈火。滿江風露更波聲。病身只合山間老。半世長懷客裏情。西畔天星如玉李。伴人不睡向人明。

### 下橫山灘望金華山

篙師只管信船流。不作前灘水石謀。卻被驚湍旋三轉。倒將船尾作船頭。山思江情不負伊。雨姿晴態摠成奇。閉門覓句非詩法。只是征行自有詩。

### 出橫山江口

白壁當江岸。青旗定酒家。斷崖侵屋窄。細路入門斜。縣近瞻雙塔。洲橫隔一沙。何須後來客。始信此詩嘉。

### 過橫山塔下

隔岸山迎我。沿江柳拜人。日搖秋水面。波閃白龍鱗。不遣船迷路。俱從塔問津。一生將玉鏡。千古照金身。

### 過烏石大小二浪灘俗呼爲郎因戲作竹枝歌二首

灘聲十里響千聲。躍雪跳霜入眼奇。記得年時上灘苦。如今也有下灘時。  
小郎灘下大郎灘。伯仲分司水府關。誰爲行媒教作贅。小姑山與大姑山。

晚過側溪山下

看山妙處幾曾知。落照斜明始覺奇。皺盡衣裳紋欲裂。爭先頭角遠相追。松梢別放六峯出。江底倒將千嶂垂。一路詩篇渾漫興。側溪端的不相虧。

夜宿東渚放歌

看山須看山表裏。不然看山還誤事。平時只愛萬峯青。落日惟存數尖紫。浙江船上多少人。往來看山誰識真。丁寧舟人莫浪語。卻恐兒輩不肯去。

跋徐公仲省翰近詩

傳派傳宗我替羞。作家各自一風流。黃陳籬下休安腳。陶謝行前更出頭。

自跋江西道院集戲答客問

問我來朝南內南。便從花底趁朝參。新詩猶作江西集。爲帶筠州刺史銜。時召命筠州守臣奏事。

舟中新暑止酒

新暑酒不宜。作熱妨夜睡。不如看人飲。亦自有醉意。彼飲吾爲嘸。所美過於味。同舟笑吾癡。吾不羨渠醉。安知醉與醒。誰似誰不似。一作是。

過弋陽觀競渡

急鼓繁鉦動地呼。碧琉璃上兩龍趨。一聲翻倒馮夷國。千載淒涼楚大夫。銀碗錦標夸勝捷。畫橈繡臂照江湖。三年端午真虛過。奇觀初逢慰道塗。

五月一日過貴溪舟中苦熱

半月陰涼天氣佳。今朝新暑不饒些。一生怕熱長逢熱。千里還家未到家。入卻船來那得出。恰方日午幾時斜。勸君莫愛高官職。行路難時卻怨嗟。

端午前一日阻風鄱陽湖觀競渡

惡風夜半阻歸船。端欲留人作勝緣。千里攜家觀競渡。五湖新漲政黏天。掉翻波浪山如雪。醉殺兒郎喜欲顛。得去更佳留亦好。吾曹何處不忻然。

送吉州太守朱子淵造朝

公在鄉邦我在京。有書終不慰生平。西歸一見還傾蓋。夜坐相話看短檠。老去可堪頻送客。古來作惡是離情。雲涯隔斷從今始。肯倩征鴻訪死生。

郡圃上巳

尋春不見只思還。卻在萊仙小崦間。映出一川桃李好。只消外面矮青山。

披仙閣上觀醮醮

仰架遙看時見些。登樓下瞰脫然佳。醲醲蝴蝶渾無辨。飛去方知不是花。  
醲醲約我早來看。及至來看花已殘。動地寒風君莫怯。亂吹香雪灑闌干。

塹荷池水

雨中來看塹池塘。自與畦丁細校量。更放水痕高幾許。浮荷猶剩若干長。

筠菴午憩

筠菴稍不至。一至一回好。風從林梢落。吹亂竹根草。巾屨上下涼。鶯鶯左右噪。市聲元不近。靜聽遠亦到。石磴坐來溫。蘚徑淨如埽。書空作愁字。已忘偏旁了。猶自忘了愁。而況記得老。客來談世事。欲笑還嬾笑。

玉井亭觀荷

藻仙初出波。照日穉猶怯。密排碧羅蓋。低護紅玉頰。館之水精宮。環以琉璃堞。珠明浮盤戲。酒漾流杯暎。青筆尖欲試。綠牋皺還摺。老龜大於錢。辛勤上團葉。忽聞人履聲。入水一何捷。

後圃散策

花徑雨後涼。樹聲風外戰。杖屨頓輕鬆。兒女同行散。少者前已失。老者後仍倦。隔林吹笑語。相聞如對面。明明去人近。眇眇彌步遠。松杉滿地影。一瞬忽不見。仰觀紫日輪。偶度白雲片。佳處留再來。前山未須徧。觀迎神小兒社。



花帽銖來重。綃裳水樣秋。強行終較嬾。妍唱卻成羞。鸚鵡栖葱指。芙蓉載錦舟。休看小兒社。只益老人愁。

新秋晚酌

胡床東鄉坐。秋風忽淒其。老夫衰病骨。急令閉東扉。西扉亦半掩。壓風作東吹。何必風及我。風入涼自馳。晚蟬是誰說。我飲渠便知。飛從何方來。徑集庭樹枝。三嘆復九詠。話盡新秋悲。我老悲已忘。汝語復爲誰。老烏啼一聲。不知蟬所之。

題碧落堂

仙人白日上青冥。千載如聞月下笙。南北萬山俱在下。中間一水獨穿城。江西箇是絕奇處。天下幾多虛得名。滕閣孤臺非不好。祇緣猶帶市朝聲。

羅溪望夫嶺

小憩村店問嶺名。云望夫七娘。歲旱禱雨必應。

藁砧不寄大刀頭。化作峯頭石也愁。豈有心情管風雨。向人彈淚繞天流。

羅溪道中

每歲秋猶熱。今年閏故涼。松稀青有數。山遠碧無常。陣陣金風細。家家玉粒香。祇言官路短。堠子暗添長。

秋山

烏白平生老染工。錯將鐵卓作猩紅。小楓一夜偷天酒。卻倩孤松揜醉容。

觀水歎二首

我方臥舟中。仰讀淵明詩。忽聞灘聲急。起視惟恐遲。八月濺飛雪。清覽良獨奇。好風從天來。翛然吹我衣。涼生固足樂。氣變亦可悲。眷然慨此水。念我年少時。迄今四十年。往來幾東西。此日順流下。何日泝流歸。出處未可必。一笑姑置之。

亂石厄江水。要使水無路。不知石愈密。激得水彌怒。回鋒打別港。勇往遮不住。我舟歷諸灘。閱盡水態度。一聞一喜觀。屢過屢驚顧。不是見不多。觀覽不足故。舟人笑我癡。癡黠未易語。

舟過柴步寺

野寺隔疎樾。遠舟見深殿。獨逕通絕崖。長縈度微線。曩遊攜童弱。攀岸已震眩。前瞻足未到。下窺意先轉。朝來經雲根。塵思起清羨。野夫三二輩。走過疾于箭。俛仰二十年。今老懷昔健。

宿蘭溪水驛前三首

繫纜蘭溪岸。開襟柳驛窗。人爭趨夜市。月自落秋江。燈火疎還密。帆檣隻更雙。平生經此縣。今夕駐孤幢。合眼波吹枕。開篷月入舫。奇哉一江水。寫此二更天。剩欲酣清賞。翻愁敗醉眠。今宵懷昨夕。雨臥萬峯前。水色秋逾白。山光夜不青。一眉畫天月。萬粟種江星。小酌居然醉。當風不覺醒。誰家教兒子。清誦隔疎櫺。

過白沙竹枝歌

東泝西沂浙江津。去去來來暮復晨。上岸牽檣推穉子。隔船招手認鄉人。





# 朝天續集鈔

和陸務觀見和歸館之韵

君詩如精金。入手知價重。鑄作鼎及彝。所向一一中。我如鴛並驥。夷塗不應共。難追紫蛇電。徒掣青絲鞵。折膠偶投漆。異榻豈同夢。不知清廟茅。可望明堂棟。平生憐坡老。高眼薄蕭統。渠若有猗那。心肯師晉宋。破琴聊再行。新笛正三弄。因君發狂言。湖山春已動。

讀笠澤叢書

笠澤詩名千載香。一回一讀斷人腸。晚唐異味同誰賞。近日詩人輕晚唐。松江縣尹送圖經。中有唐詩喜不勝。看到燈青仍火冷。雙眸如割腳如冰。拈着唐詩廢晚餐。傍人笑我病如癲。世間尤物言西子。西子何曾直一錢。

五更過無錫縣寄懷范參政尤侍郎

蘇州欲見石湖老。到得蘇州發更早。錫山欲見尤梁溪。過卻錫山元不知。起來靈巖在何許。回首惠山亦何處。人生萬事不可期。快然卻向常州去。

晚風

晚日暄溫稍齊威。晚風豪橫大相欺。做寒做冷何須怒。明早一霜誰不知。  
晚風不許鑑清漪。卻許重簾倒地垂。平野無山遮落日。西窗紅到月來時。

題連滄觀呈太守張幾冲

開窗納盡大江秋。天半飛樓不是樓。獨立南徐鼇絕頂。下臨北固虎回頭。蒜山舊址空黃鶴。瓜步新城照白鷗。好事主人酌詩客。風煙一眼到揚州。

丹陽舍舟登陸渡江

小泊樓船鐵甕城。匆匆又作絕江行。看他蠟燭幾回剪。聽盡雞聲不肯明。水底霜寒還十倍。夜來月上恰三更。篙師好事君知否。江面侵晨鏡樣平。

舟過揚子橋遠望

此日淮堧號北邊。舊時南服紀淮堧。平蕪盡處渾無壁。遠樹梢頭便是天。今古戰場誰勝負。華夷險要豈山川。六朝未可輕嘲謗。王謝諸賢不偶然。

過高郵

解纜維揚欲夕陽。過船覆盎已晨光。夾河漁屋都編荻。背日船蓬尙滿霜。城外城中四通水。隄南隄北萬垂楊。一州斗大君休笑。國士秦郎此故鄉。

初食淮白魚

淮白須將淮水煮。江南水煮正相違。霜吹柳葉都落盡。魚喫雪花方解肥。醉臥糟丘名不惡。下來鹽豉味全非。饕人且莫供羊酪。更買銀刀二尺圍。

淮人云。白魚食雪乃肥。

初入淮河四絕句

船離洪澤岸頭沙。人到淮河意不佳。何必桑乾方是遠。中流以北卽天涯。劉岳張韓宣國威。趙張二將築皇基。長淮咫尺分南北。淚溼秋風欲怨誰。兩岸舟船各背馳。波痕交涉亦難爲。只餘鷗鷺無拘管。北去南來自在飛。中原父老莫空談。逢着王人訴不堪。卻是歸鴻不能語。一年一渡到江南。

題盱眙軍東南第一山

建隆家業大于天。慶曆春風一萬年。廊廟謀謨出童蔡。笑談京洛博幽燕。白溝舊在鴻溝外。易水今移淮水前。川后年來世情了。一波分護兩涯船。

初食太原生蒲萄時十二月二日

淮南蒲萄八月酸。只可生喫不可乾。淮北蒲萄十月熟。縱可作粍也無肉。老夫臘裏來都梁。釘坐那得馬乳香。分明猶帶龍鬚在。徑寸玄珠肥十倍。太原清霜熬絳錫。甘露凍作紫水精。隆冬壓架無人摘。雪打冰

封不會折。風吹日炙。不會臘。玉盤一朵直萬錢。與渠傾蓋真忘年。君不見道逢麴車口流涎。

與長孺共讀東坡詩前用唐律後用進退格

急性平生不少徐。讀書不喜喜觀書。十行俱下未心醒。兩目頓昏還月餘。偶與兒曹繙故紙。供看詩句煮春蔬。問來卻是東坡集。久別相逢味勝初。枉着平生讀少書。分明便是蠹書魚。萬籤過眼還休去。一字經心恰似無。急讀何如徐讀妙。共看更勝獨看渠。麴生冷笑仍相勸。惜取殘零覓句鬚。

嘲淮風進退格

絮帽貂裘莫出船。北窗最緊且深關。顛風無賴知何故。做雪不成空自寒。不去掃清天北霧。只來捲起浪頭山。便能吹到僧伽塔。未直先生一笑看。

雨作抵暮復晴

細雨如塵復似煙。兩淮渡口各收船。南商北賈俱星散。古廟無人燒紙錢。

前苦寒歌

四大海潮打清淮。三萬里風平地來。龜山橫身攔不住。潮波怒飛風倒回。欲晴不晴雪不雪。併作苦寒凍人絕。古寺大鐘十字裂。東山石崖一峯蹶。勸君莫出君須出。冰脫君髯折君骨。



後苦寒歌

白鷗立雪脛透冷。鷓鴣避風飛不正。一雙野鴨欺晚寒。出沒冰河底心性。絕憐紅船黃帽郎。綠簑青蒻牽牙檣。生愁墮指脫兩耳。蘆花亦無何許藏。遣騎前頭買乾荻。速烘焙火與一炙。三足老鴉不肯出。看雲訴天天不泣。

雪小霽順風過謝陽湖

都梁三日雪沒屋。小船行水如行陸。山陽一朝帆遇風。大船行水如行空。昨來牽夫凍得泣。買蘆燎衣蘆自溼。朝來牽夫皆上船。收纜脫巾篷底眠。樓船忽然生兩翼。橫飛直過陽侯國。千村一抹片子時。四岸人家眼中失。似聞咫尺是揚州。更數寶應兼高郵。青天萬里當徑度。不堪回首都梁路。

竹枝歌有序

晚發丹陽館。五更至丹陽縣。舟人與牽夫。終夕有聲。蓋吟謳嘯謔。以相其勞者。其辭亦略可辨。有云張哥哥。李哥哥。大家着力一齊拖。又云一休休。二休休。月子彎彎照幾州。其聲淒婉。一唱衆和。因隲括之。爲竹枝云。

吳儂一隊好兒郎。只要船行不要忙。着力大家齊一拽。前頭管取到丹陽。莫笑樓船不解行。識儂號令聽儂聲。一人唱了千人和。又得蹉前五里程。

船頭更鼓恰三槌。底事荒雞早箇啼。戲學當年度關客。且圖一笑過前溪。  
岸旁燎火莫闌殘。須念兒郎手脚寒。更把綠荷包熱飯。前頭不怕上高灘。  
月子彎彎照幾州。幾家歡樂幾家愁。愁殺人來關月事。得休休處且休休。  
幸自通宵暖更晴。何勞細雨送殘更。知儂笠漏芒鞋破。須遣拖泥帶水行。

垂虹亭看打魚斫鱸

橋柱疎疎四寂然。亭前突出小魚船。一聲磔磔鳴榔起。驚出銀刀躍玉泉。  
六隻輕帆攪四旁。兩船不動水中央。網絲一撒還空舉。笑得倚欄人斷腸。

過太湖石塘二首

每過松江得偉觀。玻璃盆底釘乾坤。天邊鳥嶼空無際。煙外人家澹有痕。  
笠澤古今多浪士。包山近遠在何村。季鷹魯望何曾死。雪是衣裳月是魂。  
兀坐船中只欲眠。不如船外看山川。松江是物皆詩料。蘭槳穿湖卽水仙。  
將取垂虹亭上景。都歸卻月觀中篇。正緣王事游方外。鑿齒彌天未當賢。

過八尺遇雨

垂虹登了劣歸船。又復毛空暗水天。節裏無多好天色。闌風長去聲雨餞殘年。

去年今日鳳山頭。兒女團圓爭勸酬。不及松江煙雨裏。獨搔華髮一扁舟。

過平望

豈但湖天好。諸村總可人。麥苗染不就。茅屋畫來真。行止隨緣着。江山到處新。十年三過此。贏得髻如銀。行得三吳徧。清漪最是蘇。樹圍平野合。水隔別村孤。震澤非塵世。松陵是畫圖。更添一詩老。載雪過重湖。小麥田田種。垂楊岸岸栽。風從平望住。雨傍下塘來。亂港交穿市。高橋過得桅。誰言破書筴。擔取太湖回。

秀州嘉興館拜賜春幡勝

中使傳宣下紫宸。鏃頭濃染御香雲。綵幡耐夏宜春字。寶勝連環曲水紋。癡似土牛鞭不動。老登金馬媿無聞。強簪華髮知難稱。只有新詩頌萬分。幡勝用鏃頭紙貼。

大兒長孺赴零陵簿示以雜言長孺舊名仁壽。

好官易得忙不得。好人難做須着力。汝要作好官。令公書考不可鑽。借令巧鑽得。遺臭千載心爲寒。汝要作好人。東家也是橫目民。選官無選處。卻與天地長青春。老夫今年六十四。大兒壯歲初筮仕。先人門戶冷如冰。豈不願汝取高位。高位莫愛渠。愛了高位失丈夫。老夫老則老。官職不要討。白頭官裏捉出來。生愁無面見草萊。老夫不足學。聖賢有前作。譬如着棋看到國手時。國手頭上猶更儘有着。

正月五日以送伴借官侍宴集英殿十口號

殿下鞭聲再掣雷。玉皇徐下九天來。陰晴不定朝來定。五色祥雲霍地開。  
一點班行朝漢天。英符來自玉門關。舊時千歲琵琶語。新學三聲萬歲山。  
金鬣狻猊立玉臺。雙瞻御坐首都回。水沉山麝薔薇露。漱作香雲噴出來。  
千官拜舞仰虛皇。奉上瑤池萬壽觴。殿上雙傳送御酒。檻前一曲繞虹梁。  
大極香開萬物新。紹熙天子燕羣臣。梨園好語君須聽。玉曆初頒第一春。  
已賜儀鸞錦坐蒲。起來再立聽傳臚。君王欲勸羣臣酒。宣示天杯一滴無。  
猛士緣竿亦壯哉。踏空舞闊四徘徊。一聲白雨催花鼓。十二竿頭總下來。  
賜花新剪茜香羅。纂徧烏紗未覺多。花重紗輕人更老。擡頭不起奈春何。  
廣場妙戲鬪程材。纔得天顏一笑開。角觝罷時還罷宴。卷班出殿戴花回。  
賀老如何尾從班。真官也作假官看。君王恩重無真假。賜酒何曾味兩般。

泊舟臨平

前窗向市下卻簾。後窗臨水開卻門。岸頭楊柳報春動。溪底雲天隨浪翻。  
瓊竹三老鳴鉦擗拖樓。今宵又向臨平宿。隔溪數間黃草屋。繞屋千竿翠

謝王恭父贈梁杲墨

詞臣倪玉甫撰致語口號  
云玉曆初頒第一春

君不見蜀人文字天下工。前有相如後楊雄。君不見蜀人烏丸天下妙。前有蒲韶後梁杲。初得梁墨藕摹糊。老夫道梁不及蒲。蓬山藏室王校書。笑我未識真玄菟。兩圭水蒼笏。雙團點漆壁。一併贈老夫。此意已金石。洮州綠玉試松花。星潭黑雲走風沙。龍蛇起陸鷹入骨。卻愁雷電奪神物。

過臨平蓮蕩

蓮蕩層層鏡樣方。春來嫩玉斬新黃。角頭一一張蘆箔。不遣魚蝦過別塘。蓮蕩中央劣露沙。上頭更着野人家。籬邊隨處插垂柳。簷下小船繫釣車。朝來採藕夕來魚。水種菱荷岸種蘆。寒浪落時分作蕩。新流漲後合成湖。人家星散水中央。十里芹羹菰飯香。想得薰風端午後。荷花世界柳絲鄉。

麥

無邊綠錦織雲機。全幅青羅作地衣。此是農家真富貴。雪花銷盡麥苗肥。

春菜

雪白蘆菔非蘆菔。喫來自是辣底玉。花葉蔓青非蔓青。喫來自是甜底冰。三館宰夫傳食籍。野人蔬譜渠不識。用醯不用酸。用鹽不用鹹。鹽醯之外別有味。薑芽根子仍相參。不甑亦不釜。非蒸亦非煮。壞盡蔬中腴。乃以煙火故。霜根雪葉細縷來。藝瓶夕幕明朝開。貴人我知不官樣。肉食我知無骨相。祇合南溪嚼菜

根。一尊徑醉溪中雲。此詩莫讀恐嚙殺。要讀此詩先提舌。提一作

過平望

望中不着一山遮。四顧平田接水涯。柳樹行中分港汊。竹林多處聚人家。風將春色歸沙草。天放晴光入浪花。午睡起來情緒惡。急呼蟹眼淪龍芽。

月夜阻風泊舟太湖石塘南頭

動地顛風政打頭。吳江未到且維舟。五湖波起衆山動。一片月明千里愁。且更放遲些子睡。看他盛怒幾時休。陽侯要與詩人敵。未必詩人輸一籌。

過湖未得匹如閑。何幸湖心泊畫船。宇宙中間都是月。波濤外面更無天。誰知造物將奇觀。不與僮人付謫仙。管領渠儂無一物。鏤冰剪雪作新篇。

新年乘興看春風。來過垂虹東復東。誰有功夫寒夜底。獨尋水月五湖中。今宵頓覺乾坤大。下筆惟愁造化窮。太白青山謝公海。可憐一笑偶然同。

姑蘇館上元前一夕陪使客觀燈之集

節物催人又一年。銀花蓮炬照金尊。麝鎚官樣陪公譙。粉繭鄉風憶故園。何似兒孫談草草。不妨燈火半昏昏。人生行止誰能料。今夕蘇州看上元。廬陵之俗。元夕。粉米爲繭。中藏吉語。剔之以占一歲事。

至洪澤

今宵合過山陽驛。泊船問來是洪澤。都梁到此只一程。卻費一宵兼兩日。政緣夜來到瀆頭。打頭風起浪不休。舟人相賀已入港。不怕淮河更風浪。老夫搖手且低聲。驚心猶恐淮神聽。平急呼津吏催開閘。津吏又手不敢答。早潮已落水入淮。晚潮未來閘不開。細問晚潮何時來。更待玉蟲綴金釵。

過磨盤得風掛帆

兩岸黃旗小隊兵。新晴歸路馬蹄輕。全番長笛橫腰鼓。一曲春風出塞聲。鵲噪鴉啼俱喜色。船輕風順更兼程。卻思兩日淮河浪。心悸魂驚尙未平。

過楚州新野城

已近山陽望漸寬。湖光百里見千村。人家四面皆臨水。柳樹雙垂便是門。全盛向來元孔道。雜耕今是一雄藩。金湯再葺真長策。此外猶須子細論。

過寶應縣新開湖

漁家可是壓塵囂。結屋圓沙最盡稍。外面更栽楊柳樹。上頭無數鷺鷥巢。雨裏樓船卽釣磯。碧雲便是綠蓑衣。滄波萬頃平如鏡。一隻鷓鴣貼水飛。天上雲煙壓水來。湖中波浪打雲回。中間不是平林樹。水色天容拆不開。

五湖佳處是荒寒。卻爲無山水更寬。歸去江南無此景。未須吃飯且來看。

過九里亭

水渚纔容足。漁家便架椽。屋根些子地。簾外不勝天。岸岸皆垂柳。門門一釣船。五湖好風月。乞去聲與不論錢。

再賦石翁石婆

石翁誰怒猶睥目。石婆多愁鬢先禿。荒山野水四無人。二老對立今幾春。珠襦玉匣化爲土。金雁銀鳧亦飛去。知是六朝何帝陵。摩娑碧蘚俱無語。

觀張功父南湖海棠杖藜走筆

看盡都城種海棠。只將一徑引教長。約齋妙出春風手。人在中央花四傍。天工信手灑明霞。若遣停勻未必佳。卻得數株多葉底。殷勤襯出密邊花。

走筆謝張功父送似醪醕

西湖野僧夸藏冰。半年化作真水精。南湖詩人笑渠拙。不如儂家解乾雪。藏冰窖子山之幽。鏡透九地山鬼愁。儂家藏雪有妙手。分明曬在翡翠樓。向來巽二拉滕六。玉妃夜投玉川屋。剪冰作花吹朔風。揉雲爲粉散寒空。醉揮兩袖拂銀漢。稍頭萬斛冷不融。瓊田挈月拾翠羽。砌成重樓天半許。盤作青蛟吐綠霧。亂



飄六出薰沉炷。人間雪脆那可藏。天上雪落何曾香。三月盡頭四月首。南湖香雪今誰有。分似誠齋老詩叟。碎按玉花泛春酒。一飲一石更五斗。

記丘宗卿語紹興府學前景

鏡湖泮宮轉街曲。纔隔清溪便無俗。竹橋斜度透竹門。墻根一竿半竿竹。恰思是間宜看梅。忽然一枝橫出來。霜幹皴裂臂來大。只着寒花三兩箇。

贈寫真水鑑處士王溫叔

我不如森森千丈松。我不如濯濯春月柳。髯疎髻禿已雪霜。皮皴肉皴真老醜。葉生畫時顏尙朱。王生畫時骨更臞。一生愛山吟不就。兩肩化作秋山瘦。君不見褒公鄂公圖。淩煙腰間羽箭大如椽。君不見浣花醉圖粉墨落。日斜泥滑驢失腳。貴人寒士兩相嗤。畫圖猶在人已非。王生王生且停手。不如生前一杯酒。銜命郊勞使客船。過崇德縣。

岸樹低欹一雪餘。枝頭半葉已全無。油窗過盡千梢影。濃處還濃枯處枯。

望多稼亭

遙望城頭多稼亭。亭邊霜檜老更青。當年老守攜糲子。芒鞋葵扇繞城行。臘前移梅春插柳。蹋雪衝泥不停手。柳未成陰梅未花。著帽又迎新太守。後來新守復迎新。到今新舊知幾人。向來手植今在否。寄與此

詩聊問春。

舟中追和張功父賀赴召之句

兩歲千愁寡一欣。故人多問謝張君。又瞻東闕闕前月。只負南溪溪上雲。賓日扶桑遭聖旦。客星釣瀨愧天文。人生離合風前葉。聚首亡何復離羣。余所居里名南溪。

又追和功父病起寄謝之韻

霜何曾傍繡簾寒。酒不能令客臉丹。勤向竹爐溫手腳。嬾尋銅鏡整衣冠。無人孤坐月將落。擁鼻清吟夜向闌。忽憶約齋詩債在。自吹燈火起來看。

曉過丹陽縣

風從船裏出船前。漲起簾幃紫拂天。點檢風來無處覓。破窗一隙小於錢。雞犬漁翁共一船。生涯都在篋篷間。小兒不耐初長日。自織筠籃勝打閑。

過張王廟

地迴人煙寂。山盤水勢回。怪松欹岸出。古廟背河開。晚色催征棹。斜陽戀去桅。丹徒誰道遠。一眺正悠哉。

湖天暮景

湖面黏天不見堤。湖心菱葑水周圍。暮鴻成陣鴉成隊。已落還飛久未棲。

坐看西日落湖濱。不是山銜不是雲。寸寸低來忽全沒。分明入水只無痕。  
抵暮漁郎初上船。一竿搖入水精天。忍寒不睡妨底事。來早賣魚充酒錢。  
瑠碎肝脾只坐詩。鬚髯成雪髻成絲。暮雲薄倖斜陽劣。合造清愁付阿誰。  
斷腸浪說賀方回。未抵秦郎剪水才。欲向湖邊問遺唱。鴛鴦鸚鵡兩相催。

舟中不寐

醉去昏然臥綠窗。醒來一枕好淒涼。意中爲許無佳況。夢裏分明到故鄉。  
淮水打船千浪雪。燕鴻叫月滿天霜。山城更點元無準。偏到雞鳴分外長。

過淮陰縣題韓信廟

鴻溝祇道萬夫雄。雲夢何銷武士功。九死不分天下鼎。一生還負室前鍾。  
古來犬斃愁無蓋。此後禽空悔作弓。兵火荒餘非舊廟。三間破屋兩株松。

雪曉舟中生火

烏銀見火生綠霧。便當水沉一濃炷。卻因斷續更氤氳。散作霏微煖袍袴。  
須臾霧霽吐紅光。煙如雲表生扶桑。陽春和日曛滿室。蒼顏渥丹疑醉鄉。  
忽生火冷霧亦滅。只見紅爐堆白雪。窗外雪深三尺強。窗裏雪深一寸香。

烏銀玉質金石聲。見火忽學爆竹鳴。臚臚膊膊久不停。白日坐上飛繁星。不知何怒泄不平。不知何喜啣  
啣吟。待渠自靜勿與爭。功莫借箸怒復生。到渠緘口兩耳熱。銅瓶在旁卻饒舌。

題金山妙高臺

金山未到時。羨渠奄有萬里之長江。金山既到了。長江不見只見千步廊。老夫平生不奈事。點檢風光難  
可意。老僧覺我見睫眉。引入妙高臺上嬉。不知老僧有妙手。卷舒江山在懷袖。掛上西牕方丈間。長江浮  
在爐煙端。長江南邊千萬山。一時飛入兩眼寒。最愛簷前絕奇處。江心巉然景純墓。僧言道許乃浪傳。龍  
宮特書珠貝編。初云謝靈運。愛山如愛命。掇取天台雁蕩怪石頭。疊作假山立中流。又云王逸少。草聖入  
神妙。天賜琉璃筆。格玉硯屏。仍將大江作陶泓。老夫聞二說。沉吟未能決。長年抵死催上船。徘徊欲去空  
茫然。

桑疇

夾岸瀕河種穉桑。春風吹出萬條長。船行老眼渾多忘。喚作西湖插柁霜。

竹林

珍重人家愛竹林。織籬辛苦護寒青。那知竹性元薄相。須要穿來籬外生。

賦金盤露椒花雨

吾家酒名。敷腴者曰金盤露。芳烈者曰椒花雨。  
金盤夜貯雲表露。椒花曉滴山間雨。一涓不用鴨綠波。雙清釀出鵝黃乳。老妻知我憎官壺。還家小槽壓  
真珠。江西擔取來西湖。遣我醉倒不要扶。更攜數尊往淮上。要夸親舊藏家釀。祇堪獨酌不堪分。老夫猶  
要入修門。

岸柳

柳梢拂入溪雲陰。柳根插入溪水深。祇今立岸一敝帚。歸時弄日千黃金。人生榮謝亦如此。謝何足怨榮  
何喜。秋霜春雨自四時。老夫問柳柳不知。

松江曉晴

昨夜何緣不峭寒。今晨端要放晴天。窗間波日如樓上。簾外霜風似臘前。近水人家隨處好。上春物色不  
勝妍。歸時二月三吳路。桃杏香中慢過船。

泊平江百花洲

吳中好處是蘇州。卻爲王程得勝遊。半世三江五湖棹。十年四泊百花洲。岸傍楊柳都相識。眼底雲山苦  
見留。莫愁孤舟無定處。此身自是一孤舟。

過新開湖

漁郎艇子入重湖。老眼殷勤看著渠。看去看來成怪事。化爲獨雁立橫蘆。  
一鷗得得隔湖來。瞥見魚兒眼頓開。只爲水深難立腳。翩然飛下卻飛回。  
遠遠人煙點樹梢。船門一望一魂消。幾行羖鴨數聲雁。來爲湖天破寂寥。

瓦店雨作

斜風吹雨打船窗。一陣疎來一陣忙。聽作山齋聲點滴。不知作客在山陽。  
詩人長怨沒詩材。天遣斜風細雨來。領了詩材還又怨。問天風雨幾時開。

過淮陰縣

索莫淮陰縣。人家草草中。荻籬緯春勝。茅屋學船蓬。今日非昨日。南風轉北風。霍然香霧散。放出一輪紅。  
題沈子壽旁觀錄

逢著詩人沈竹齋。丁寧有口不須開。被渠譜入旁觀錄。四馬如何挽得回。

送吳敏叔待制侍郎

腳踏雞翹豹尾間。心飛碧岫白雲端。人看疎傅如圖畫。帝念嚴光返釣灘。玉殿松班唐次對。竹宮茅立漢  
祠官。自憐病鶴樊籠底。方羨冥鴻片影寒。



國家圖書館



000797770